

SHEKHAWATI

जीवन को छानणे

जीवन को छानणा



New Life Literature
Logos Center, Horamavu Agara,
Hennur Road, Bangalore – 560043



जीवन को च्यानणे

(शेखावाटी नया नियम की पौथ्यां)

मत्ती, मरकूस, लुका, टाळेडा खास चेला का काम,
ईफिसि, फिलिप्पि, कुलूस्सिया अर तितुस

जीवन को च्यानणे

(शेखावाटी नया नियम की पौथ्यां)

मत्ती, मरकूस, लुका, टाळेडा खास चेला का काम,
ईफिसि, फिलिप्पि, कुलूस्सिया अर तितुस

Year of Publishing : 2015

No. of Copies : 50 (Trial)

Copy right : New Life Literature

Note:- ई पौथी की प्रतियाँ फिलहाल क्युँक मई बाँटबा ताँई ह। ई पौथी न बाँचबाला सजनाऊँ आ अरदास ह क थे इनै बाँच'र थारा विचार अर सुझाव जखा ई अनुवाद न और बी चोखो बणा सकै तछै देयडा पत्ता प भेज'र परमेश्वर का ई काम म हाथ बटा सको हो।

शेखावाटी समीक्षा समीती

कैलाश कुमार शर्मा, ठरढा मौहला,
वार्ड न० १४, पिलानी (राजस्थान)

Illustrations copy right © Illustrations on pages

Mat: 5, 15, 33, 52, 53, 54, 56, 57, 58, 59, 60,

Refer to 1

st.published Mark: (2, 7, 27, 32, 34, 34, 40, 42, 47, 48, 49)

New (63, 66, 82, 86, 88, 93, 94, 97, 98, 99,

Luke: 151, 159, 162,

Acts: 164, 175, 177, 178, 179, 180, 181, 182, 183, 185, 186,

by Horace Knowles

© The British & Foreign Bible Society, 1954, 1967, 1972

Additions and amendments by Louise Bass

© The British & Foreign Bible Society, 1994.

Used with permission.

Illustrations on pages 3, 3, 26,

are used by permission. © David C. Cook Publishing Co., 1978

Published by:

New Life Literature

Logos Center, Horamavu Agara,
Hennur Road, Bangalore – 560043

शेखावाटी नया नियम की पौथ्यां

मत्ती.....	5
मरकूस	67
लुका	107
टाळेड़ा खास चेला का काम.....	169
ईफिसि	231
फिलिप्पि.....	241
कुलूस्सिया	249
तितुस	257

मत्ती

मत्ती क हाथा मांडेड़ो चोखो समचार

भूमिका

मत्ती क हाथा मांडेड़ो चोखो समचार नया नियम की बा चार पोथ्या मऊँ एक ह जखी ईशु का जिवन क बारामै बतावै ह। अनुमान लगायो जावै क आ पोथी ईशु क जलम क करिब साठ बरसा पाछै मांडी गई। इ बात प बी मतभेद ह क आ पोथी कठै मांडी गई ही। पण क्युँक मानै ह क आ पोथी पलिस्तिन अर क्युँक मानै ह क आ यरूशलेम म मांडी गई ह।

इ पोथीनै मांडबाळो मत्ती ईशु को चेलो होबाऊँ पेली बो एक चूंगी लेबाळो हो, जिको दुसरो नाम लेवी हो। मत्ती बा भेजेड़ा बारा चेला मऊँ एक हो अर बो आ पोथी यहूदी मिनखा ताँई मांडी ह क्युँक करीब साठ जघां पुराणा नियम को आक मांडचो ह। मत्ती को इरादो इ पोथीनै मांडबा क पिछै ओ दिखाबो हो क ईशु इ मिनखानै बचाबा ताँई परमेश्वर को टाळेड़ो मसी हो, जि ताँई करार कर्यो गयो हो। इ पोथी म मत्ती परमेश्वर का राज क बारा म बी बोली बाता मांडै ह।

नया नियम की शुरूआत ताँई मत्ती क हाथा मांडेड़ा चोखा समचार की पोथी एक बोली बढीया पोथी ह क्युँक इ पोथी म बोली जघा पुराणा नियम की बातानै मांडचो गयो ह। आ पोथी दो नियमानै आपसर्या म जोडै ह क्युँक ज्ञानीद्यान्या को मानबो ह क मत्ती पुराणा नियम की पेली पाँच पोथ्या जखी मूसा क हाथा मांडी गई ह बाकी रूप रेखा की नकल करी ह। जंय्यां क ढूंगरी प ईशु की सीख (5-7) जिकी बराबरी परमेश्वर को मूसानै विधि-बिधान देबाऊँ करी जा सके ह (व्यवस्थाविवरण 9:3-23:33)

रूप-रेखा

1. इ चोखा समचार की शुरूआत म मत्ती ईशु का जलम अर बिकी सेवा की शुरूआत क बारा म बतावै ह। (1-4)
2. इकै आगै मत्ती ईशु की सेवा अर बिकी बोली सीख क बारा म बतावै ह। (5-25)

3. आखरी भाग म मत्ती ईशु की सेवा की सऊँ बड़ी बात बिकी मौत अर बिको ओज्यू जि उठबानै बतावे ह। (26-28)

ईशु की पिडी

1 इब्राहम की पिडीऊँ लेर दाऊद अँच्या ह। 2इब्राहम को बेटो इसहाक अर इसहाक को बेटो याकूब अर याकूब क यहदो अर बिका भाई होया। 3फरिस अर जीरह यहूदा का बेटा हा अर आकी मा को नाम तामार हो। फरिस हेजरोन को बाप हो। हेजरोन ऐराम को बाप हो। 4ऐराम अम्मिनादाब को बाप हो। अम्मिनादाब नहसोन को बाप हो। नहसोन सलमोन को बाप हो। 5सलमोन अर बिकी लूगाई राहब क बोआज जलम लिन्यो। बोआज अर बिकी लूगाई रूत क ओबेद पैदा होयो। ओबेद यिसै को बाप हो। 6अर यिसै राजा दाऊद को बाप हो। सुलेमान दाऊद को बेटो हो। जखो बि लूगाई क जलम लिन्यो जखी पेल्या उरिय्याह की लूगाई ही। 7सुलेमान रहबाम को बाप हो। अर रहबाम अबिय्याह को बाप हो। अबिय्याह को बेटो आसिफ हो। 8अर आसिफ ओसाफात को बाप हो। अर ओसाफात को बेटो ओराम हो। अर ओराम उजिय्या को बाप हो।^a 9उजिय्या ओताम को बाप हो। अर ओताम अहाज

को बाप हो। अर अहाज हिजकिय्या को बाप हो।^b 10अर हिजकिय्यो मनसे को बाप हो। मनसे अमोन को बाप हो। अर अमोन ओसिय्याह को बाप हो। 11इस्त्राएल का मिनखानै गुलाम बणार जद बेबीलोन लेज्याया जार्यो हो जणा बि टेम का ओसिय्यो क यकुन्याह अर बिकाळा भाई होया।^c 12बेबीलोन म ले जाबा क पाछै यकुन्याह क सालतिएल होयो। अर सालतिएल को बेटो जरूब्बाबील हो। 13जरूब्बाबील अबिउद को बाप हो। अबिउद इल्याकीम को बाप हो। अर इल्याकीम अजोर को बाप हो। 14अजोर को बेटो सदोक हो। सदोक अखीम को अर अखीम इलिहूद को बाप हो। 15इलिहूद को बेटो इलियाजर हो। अर इलियाजर मतान को बाप हो। अर मतान को बेटो याकुब हो। 16अर याकुब यूसुफ को बाप हो। जखो मरियम को मोट्यार हो। मरियम क ईशु जलम लिन्यो जखो मसी खुवावै ह। 17अर अंच्यां अब्राहमऊँ लेर दाऊद तक चौदा पिडी जलम लिन्यी। दाऊदऊँ लेर बंदी बणार बेबीलोन लेज्याया जाबा तक चौदा पिडी होई। बठै पुच्यां पाछै ईशु क जलम ताँई चौदा पिडी होई।

^a 1.8 ओराम उजिय्या का दादा को दादो हो। ^b 1.11 ओसिय्यो यकुन्याह अर बिकाळा भाईया को दादो हो पण मति पिडी की बात करै ह इ ताँई बठै बाप बतायो ह।

ईशु मसी को जलम

18^{ईशु} मसी को जलम अंयां होयो। जद बिकि मा मरियम की सगाई युसूफ क सागै होई जणा बाको ब्या होबाऊँ पैली मरियम पबितर आत्मा की शक्तिऊँ आसऊँ होई। 19जणा बिको होबाळो मोटचार युसूफ आपकी धार्मिकता क चलतै मरियमऊँ सगाई तोड़बा की मन म करी। पण बो लोगा म मरियम की बदनामी बी कोनी चातो हो इ ताँई बो बिनै चुपचाल्योई छोड़बा को बिच्यार कर्यो। 20युसूफ बा बाता क बारा म सोचर्योई हो क प्रबु को ईशबर नगरी दूत युसूफ क सपना म आर बोल्यो, “युसूफ! दाऊद का वंशज, त मरियमनै ब्यार ल्याबा म मना डर, क्युँक जखो बिकै पेट म ह बो मिनखऊँ कोनी पण पबितर आत्मा की शक्तिऊँ ह। 21बा एक बेटो जलमसी जखो आपका मिनखानै बाका पापाऊँ बचासी। तू बिको नाम ईशु राखजे, जिको मतबल ह! प्रबु आपका मिनखानै बचावै। 22ओ इ ताँई होयो ह क्युँक जखा बचन प्रबु आपका दासा क जरिये बोल्यो ह, बे पुरा होवै:

23 “देखो, एक कुवांरी छोरी आसऊँ होसी अर एक बेटो जलमसी अर बिको नाम इम्मानुएल राख्यो ज्यासी बिको मतबल ह परमेशबर म्हारै सागै ह।”

24जद युसूफ निंदऊँ जाग्यो जणा बो बंयांई करयो जंयां ईशबर नगरी दूत बिनै करबा को हूकम दिन्यो हो। बो मरियमनै ब्यार आपकै घरा लिआयो। 25पण जद ताँई बा बेटो न जलमी युसूफ

बिकै कनै कोनी गयो। अर युसूफ बेटा को नाम ईशु राख्यो।

अगुणी दिशाऊँ ज्योतस्याँ को आबो
2 हेरोदेस राजा क राज करबा का

दिना म यहूदिया क बैतलम म ईशु को जलम होयो जणा अगुणी दिशाऊँ क्युंक ज्योतसी जखा चाँद- तारा को ज्ञान राखता हा यरुशलेम म आया। 2बे बुज्या, “यहूदी मिनखा को राजा होबा ताँई जलम्यो बो टाबरियो कठे ह? बिको तारे अगुणी दिशा म उग्यो जणा म्हे बि तारानै देख्या। म्हें बि टाबर क धोक खाबा आया हा।” 3इ बात का समचार जद हेरोदेस राजानै लाग्या जणा बो अर यरुशलेम का बोला मिनख घबरागा। 4जणा बो सगळा बडा याजका अर शास्त्रानै सिखाबाळानै भेळा करर बाऊँ बुझबा लाग्यो, “मसी को जलम कठै होणो चाये।” 5बे बिऊँ बोल्या, “यहूदियां क बैतलम म” क्युँक परमेशबर की खेबाळो अंयां माँडचो ह:

6 “हे यहूदिया दिसावर की बैतलम नगरी का मिनखो, थारी नगरी दूसरी नगर्याऊँ रुद्याई कम कोनी; क्युँक इ मऊँ एक मिनख राजा बणसी, जखो इस्माएल म रेबाळा मेरा मिनखा की अगुवाई करसी।”

7जणा राजा हेरोदेश ज्योतस्याँनै छानैसीक बुलार बुझबा लाग्यो क तारो सऊँ पैली की टेम चमक्यो। 8अर बो बानै अंयां बोलर बैतलहम भेज्यो, “बि टाबर क बारां म पाछा आर मनै ठिक-ठिक खबर दिज्यो जिऊँ क म बिकै धोख खार

आउँ।” ९बे राजा की बात सुण’र चलेगा अर जो तारो बानै अगुणी दिशा म दिख्यो हो। बो बाकै आगै-आगै: चाल्यो अर जठै टाबर हो बी झघां जार रुकगो। १०जद बे बि तारनै देख्या जणा बोला राजी होया। ११बे घर म जार बि टाबरनै बिकी मा मरियम क कनै देख्या, अर बि टाबर क आगै धोख खाई। अर आप-आपका झोलानै खोलर बिकै सोनो, लोबान अर धुप की भेट चढ़ाई। १२जद ज्योतसी सोर्या हा जणा सपना म परमेश्वर बानै चेतायो। क हेरोदेश क कनै मना जायो, जणा बे दूसरा गेलाऊँ आपकै देश चलेगा।

युसूफ को आपका बाळबच्या क सागै मिस्र देश म जाबो

१३ज्योतस्यां क चल्या जाबा क पाढै प्रबु को एक ईश्वर नगरी दूत युसूफनै सपना म दर्शाव दे’र बोल्यो, “उठ अर टाबर अर बिकी माँ न लेर मिस्र देश म भागज्या अर जद ताँई म तेरऊँ न बोलूँ जद ताँई बठैर्इ रिहैजै; क्युँक राजा हेरोदेश इ टाबर न ढूढ़र्यो ह। बो ईनै मारबो चावै ह।” १४जणा बो रातनै ई उठ’र टाबर अर बिकी मा न लेर मिस्र देश कानी चाल पड़्यो। १५अर जद ताँई हेरोदेश राजा कोनी मर्यो बे बठैर्इ रिया। जिऊँ क बो बचन जखो परमेश्वर की खेबालो बोल्यो हो पुरो होवै क म मेरा बेटानै मिस्रऊँ बुलायो हूँ।

राजा हेरोदेश बैतलहम का टाबरियानै मरवा गर्यो

१६जद राजा हेरोदेश ओ देख्यों क ज्योतसी मनै गोली देगा ही जणा बो

लाल-तातो होग्यो अर लोगानै भेजर ज्योतस्यां क बतायडा टेम म बेतलम अर बिका आस-पास का सगळा टाबरानै जखा दो साल अर बिऊँ छोटा हा बानै मरवा गर्या। १७जणा जखा बचन विर्मयाह परमेश्वर की खेबालो ख्यो हो पुरा होया:

१८“राहेल की नगरी रामाह म
बारघोड़ो होर्यो ह;
बा आपका टाबरा ताँई रोरी ह,
अर चुप कोनी होबो चावै,
क्युँक बिका टाबरिया इब इ
दुनिया म कोनी रिया।”

मिस्रऊँ पाढो आबो

१९राजा हेरोदेश क मरबा क पाढै प्रबु को ईश्वर नगरी दूत मिस्र म युसूफनै सपना म दर्शाव दिन्यो, २०अर बोल्यो, “उठ टाबर अर बिकी मा न लेर इस्माएल देश म चल्यो जा, क्युँक जखा टाबर का पिराण लेबो चावै हा बे मरगा ही।” २१जणा युसूफ टाबर अर बिकी मा न सागै लेर इस्माएल देश म आग्यो। २२पण आ सुण’र क अराखिलाउस आपका बाप हेरोदेस की झघां प यहूदिया दिसावर प राज करबा लाग्यो ह, बठै जाबाऊँ डरयो। अर ओज्युँ सपना म परमेश्वर क खच्याँ गेल गलिल दिसावर म चल्यो गयो। २३अर नासरत नाम की नगरी म जा बस्यो, जणा बो बचन पुरो होयो, जो परमेश्वर की खेबालो बोल्यो हो: “बो नासरी खुवासी।”

युहन्नो बतिष्ठो देबालो

३ जद ईशु नासरत नगरी म हो, बा दिना म यहूदिया नगरी का टिबडा



यूहन्नो बतिष्मो देबाळा को परचार (3.1)

म यूहन्नो बतिष्मो देबाळो आयो। 2अर आ खेर परचार कर्यो क, “थे थारा हिया न पापाऊँ फेरो! क्युँक ईश्बर नगरी को राज सांकड़ै ह।” 3ओ बोई मिनख ह जिकै बारा म यशायाह परमेश्बर की खेबाळो खयो ह:

बीड़ म एक हलकारो हैल्लो मारै ह।
“प्रबु ताँई गेलो बणाओ,
अर बिको गेलो सिधो-सपाट
करो।”

4यूहन्नो ऊँट क बालाऊँ बणेड़ा गाबा पेरतो हो अर कमर प चमड़ा को पट्टो बाँध्या करतो हो। बो टिड्या अर जंगली शैद खाया करतो हो। 5यहूदिया दिसावर, यरदन नदी क आस-पास की झाघा का अर यरुशलेम नगरी का घणक्राक मिनख बिकी सुणबा बिकै कनै गया। 6बे आपका पापा न मानर यरदन नदी म यहून्नाऊँ बतिष्मो लियो। 7जद बो देख्यो क बोळा सारा फरीसी अर सदुकि बतिष्मो लेबा ताँई बिकै कनै आर्या ही, जणा बो बाऊँ बोल्यो, “अरै सपोलो, परमेश्बर की सजाऊँ थे बच सको हो ई बात क बारा म थानै कुण बता दियो? 8थारा करमाऊँ बेरो पडणो चाए क थे थारा हियानै पाप का गेलाऊँ फेर लिया हो। 9अर थे थारा हिया म अंय्यां मना

सोचो क म्हारो बाप इब्राहम ह ई ताँई परमेश्बर म्हानै कोनी दंडसी; क्युँ क म थारऊँ बोलु हूँ क परमेश्बर आ भावुआऊँ बी अब्राहम ताँई टाबर पैदा कर सकै ह। 10इब खुबाइयो दरख्त कि जड़ प रखेड़ो ह, ई ताँई जखो दरख्त चाखो फळ कोनी देवै, बिनै काटर आग म बाल दियो ज्यासी। 11म तो थानै पाणीऊँ बतिष्मो देऊँ हूँ, जिऊँ ओ बेरोपाट सकै क थे थारा हियानै पापाऊँ फेर लियो ह। पण जखो मेरै पाछै आबाळो ह बो मेरऊँ बोळो महान ह; म बिकी जुती उठाबा जोगो बी कोनी हूँ। बो थानै पवित्र आत्मा अर आगऊँ बतिष्मो देसी। 12बिको छाजळो बिकै हाथ म ह अर बो ग्यु न तुड़ीऊँ न्यारो करसी, ग्यु न ओबरी म भेला करसी पण तुड़ी न आग म बालसी। अर बा आग भुझबा की कोनी।”

ईशु को बतिष्मो

13बि टेम ईशु गलिलऊँ यरदन क किनारै युहन्ना क कनै बिऊँ बतिष्मो लेबा आयो। 14पण युहन्नो अंय्यां बोलर बिनै रोकबा लाग्यो, “मनै तो थारै हाथऊँ बतिष्मो लेबा की जुर्त ह अर थे मेरै कनै आया हो!” 15ईशु बिनै अंय्यां जबाब दियो, “इब तो अंय्यांई होबा दे, क्युँक जखी परमेश्बर चावै ह बोई आपानै करनो ह।” जणा बो बिकी बात मान लिनी। 16अर ईशु बतिष्मो लेर जंय्याईं पाणी मऊँ बारनै आयो आकास खुलग्यो, अर ईशु परमेश्बर की आत्मा न कबुतर क रुप म आपकै उपर उत्तरता देख्यो। 17जणा आकासऊँ हेल्लो आयो, “ओ मेरो

लाडलो बेटो ह, जिऊँ म बोलो राजी हूँ।”

ईशु न बिचास्यो जाबो

4 जणा पबितर आत्मा ईशु न बिड़ म लेगी जिऊँ शैतानऊँ बो बिचास्यो जावै। २बो चाळिस दिन अर चाळिस रात बिना खाणो खाया रिह्यो। अर जद भुखऊँ बिकी आतडी ऐठबा लागी। ३जणा बिचास्बालो शैतान बिकै कनै आर बोल्यो, “ज तू परमेश्बर को बेटो ह जणा आ भाट्ठाऊँ बोल क रोटी बण जावै।” ४ईशु बिनै जुबाब दिन्यो, शास्त्र म माडेडो ह क,

“मिनख रोटीऊँ इ कोनी जिवै पण
बो हर एक बी बचनऊँ जखा
परमेश्बर आपका मूँडाऊँ बोलै
ह जिवै ह।”

५बिकै पाछै शैतान बिनै पबितर नगरी यरूशलेम म लेगो अर मनदर की चोटी प खड़यो कर दियो। ६अर बिऊँ बोल्यो, “ज तू परमेश्बर को बेटो ह जणा तळै कुदज्या” क्युँक शास्त्र म माडेडो ह क, “परमेश्बर आपका दूता न हूँकम देसी अर तेरा पगा म कांकरो गडै

इऊँ पेलिई बे तनै हात्थु-हाथ
बोचलेसी।”

७ईशु बिऊँ बोल्यो, ‘शास्त्र म ओबी माडेडो ह क,
“तु तेरा प्रबु परमेश्बर न मना
बिचासिये।”

८बिकै पाछै शैतान बिनै एक ऊँचासारा दुंगर प लेग्यो अर सगळो जगत को राजपाट अर भोगबिलास की चिजा दिखाई। ९अर बोल्यो “ज तू मेरै आगै

गोडा टेकर मनै धोकै जणा म ओ सगळो राजपाट तनै दे देस्युँ।” १०जणा ईशु बिनै बोल्यो, “हे शैतान दुर भागज्या!” शास्त्र म मांडेडो ह,

“तु प्रबु परमेश्बर न ई ध्यारजे अर
बिकी ई सेवा करजे।”

११जणा शैतान बिकै कनैऊँ चलेगो अर, ईश्बर नगरी दूत अर बिकी देखभाल करबालाग्या।

ईशु की सेवा की शुरूआत

१२जद ईशु अंयां सुण्यो क यूहन्ना न कैद कर लियो गयो ह जणा बो गलील म चलेगो। १३अर बो नासरत न छोड़र कफरनहुम म जखो दरियाव क किनारै जबुलून अर नसाली दिसावर म ह बढै जार रेहबा लाग्यो, १४जिऊँ यशायाह परमेश्बर की खेबालो जखा वचन बोल्या हा बे पुरा होवै,

१५ “जबलुन अर नसाली दिसावर जखो
र्यदंन नदी क अगुणी दिशा म ह।
गलील जखी गैर यहूदि मिनखा
की भौम ह।

१६ जखा अँधेरा म बैठचा हा, बे
च्यानणो देख्या;

अर जखा मौत का काळ म हा बाकै उपर
बि च्यानणो चमक्यो।”

१७जद ईशु कफरनहुम म हा बि टेमई परचार करबो चालू कर्यो “थे थारा हिया न पाप का गेलाऊँ फेरो! क्युँक ईश्बर नगरी को राज साकड़े ह।”

ईशु चेला न टाळ्यो

१८एक बर ईशु गलिल दरियाव क किनारै किनारै जार्यो हो जणा दो भाईया

ਨ ਦੇਖਿਆ ਬਾਮੈਂਹੁੰ ਏਕ ਕੋ ਨਾਮ ਸ਼ਮੌਨ ਜਿਨੈ ਪਤਰਸ ਬੀ ਖੇਤਾ ਹਾ; ਅਰ ਬਿਕਾਲੀ ਭਾਈ ਅਨਿਦ੍ਰਿਯਾਸ ਹੋ ਬੇ ਦਰਿਆਵ ਮ ਜਾਲ ਗੇਰਧਾ ਹਾ; ਕਿਉਂਕ ਬੇ ਮਛਿ ਪਕਡਿਆਲਾ ਹਾ। 19ਈਸ਼ੁ ਬਾਂਹੁੰ ਬੋਲਿਆ, “ਮੈਰੈ ਗੇਲ ਆओ, ਮ ਥਾਨੈ ਮਿਨਖਾ ਨ ਭੇਲਾ ਕਰਬਾ ਕੀ ਸੀਖ ਦੇਸ਼ੁਂ।” 20ਬੇ ਤਾਵਲਾਸਾ ਆਪਕਾ ਜਾਲ ਫਿਕਿ’ਰ ਬਿਕੈ ਸਾਗੈ ਹੋ ਲਿਨਿਆ। 21ਬਠੈਂਹੁੰ ਕਿਉਂਕ ਦੂਰ ਚਾਲਬਾ ਕ ਪਾਛੈ ਈਸ਼ੁ ਦੇਖਿਆ ਕ ਜਾਭਿਦ ਕਾ ਬੇਟਾ ਯਾਕੁਬ ਅਰ ਬਿਕੋ ਭਾਈ ਯੁਹਨ੍ਹੋ ਆਪਕਾ ਬਾਪ ਕ ਸਾਗੈ ਨਿਆਵਡੀ ਮ ਜਾਲ ਸੁਧਾਰਾ ਹਾ ਬਾਨੈ ਆਪਕੈ ਕਨੈ ਬੁਲਾਯੋ। 22ਬੇ ਬੀ ਤਾਵਲਾ ਸਾ ਨਾਵ ਅਰ ਆਪਕਾ ਬਾਪ ਨ ਛੋਡਿ’ਰ ਬਿਕੈ ਗੇਲ ਹੋ ਲਿਨਿਆ।

ਈਸ਼ੁ ਰੋਗਲਾ ਨ ਨਿਰੋਗੇ ਕਰ्यੋ

23ਈਸ਼ੁ ਗਲੀਲ ਨਗਰੀ ਕੀ ਸਗਲੀ ਝਾਬਾਂ ਮ ਘੁਸਤੋ ਹੋਈ ਅਰ ਬਾਕੀ ਅਰਦਾਸ ਕਰਬਾਲੀ ਝਾਬਾ ਮ ਪਰਮੇਸ਼ਬਰ ਕ ਰਾਜ ਕ ਬਾਰਾ ਮ ਬਤਾਤੋ ਅਰ ਲੋਗ ਕਾ ਰੋਗ ਅਰ ਕਮਜੋਰੀ ਨ ਦੁਰ ਕਰਤੋ ਰਿਹਿਆ। 24ਸਗਲਾ ਸੀਰਿਆ ਦੇਸ਼ ਮ ਬਿਕੀ ਚੱਚਾ ਫੈਲਾਗੀ ਅਰ ਲੋਗ ਸਗਲਾ ਰੋਗਲਾ ਨ ਜਖਾ ਭੱਤ-ਭੱਤ ਕਾ ਰੋਗਾਂਹੁੰ ਰੋਗਲਾ ਹਾ, ਜਖਾ ਪਿਡਾ ਮ ਪੜ੍ਹਾ ਹਾ, ਜਾਮੈ ਓਪਰੀ ਬਲਾਧ ਹੀ, ਜਾਮੈ ਦੋਰਾ ਆਤਾ ਹਾ ਅਰ ਹਵਾ ਭੇਧਡਾ ਮਿਨਖਾ ਨ ਬਿਕੈ ਕਨੈ ਲਿਆਧਾ ਅਰ ਬੋ ਬਾ ਸਗਲਾ ਨ ਨਿਰੋਗੇ ਕਰ ਦਿਨ੍ਹਾ। 25ਇ ਬਜੈਂਹੁੰ ਗਲਿਲ ਅਰ ਦਿਕਾਪੁਲਿਸ, ਧਰਤੀ ਮ, ਧਰਤੀ ਅਰ ਧਰਦਨ ਨਦੀ ਕ ਪਰਲੈ ਨਾਕੇ ਕੀ ਨਗਰਾ ਕਾ ਮਿਨਖ ਹਾ ਬਾਕੀ ਭਿਡਾ ਕੀ ਭਿਡਾ ਬਾਕੈ ਗੇਲ ਹੋਗੀ।

ਡੂੰਗਰ ਪ ਈਸ਼ੁ ਸਿਖ ਦਿਨੀ

5 ਜਦ ਈਸ਼ੁ ਬਿ ਭਿਡਾ ਨ ਦੇਖਿਆ ਜਣਾ ਡੂੰਗਰ ਕ ਤੁਪਰ ਚਢਿਗੋ ਅਰ ਆਪਕਾ ਚੈਲਾ

ਨ ਸਿਖ ਦੇਬਾ ਤਾਂਹੁੰ ਬਠੈ ਬੇਠਗੋ। ਬੇ ਬਿਕੀ ਸੁਣਬਾ ਤਾਂਹੁੰ ਬਿਕੈ ਕਨੈ ਆਯਾ। 2ਜਣਾ ਈਸ਼ੁ ਬਾਨੈ ਸਿਖ ਦੇਬਾ ਲਾਗਿਆ, 3“ਧਨ੍ਯ ਹ ਬੇ ਮਿਨਖ ਜਿਖਾ ਆਤਮਿਕ ਭੁਖ ਰਾਖੈ ਹ; ਕਿਉਂਕ ਈਸ਼ਬਰ ਨਗਰੀ ਕੀ ਰਾਜਪਾਟ ਬਾਕੋਈ ਹ!” 4“ਧਨ੍ਯ ਹ ਬੇ ਜਖਾ ਰੋਵੈ ਹ; ਕਿਉਂਕ ਪਰਮੇਸ਼ਬਰ ਬਾਨੈ ਸ਼ਾਂਤਿ ਦੇਸਿ!” 5“ਧਨ੍ਯ ਹ ਬੇ ਜਖਾ ਸੁਧਾ ਹੀ; ਬੇ ਧਰਤੀ ਕਾ ਹਕਦਾਰ ਹੋਸਿ!” 6“ਧਨ੍ਯ ਹ ਬੇ ਜਖਾ ਧਰਮ ਕਾ ਕਾਮ ਕਰਬਾ ਤਾਂਹੁੰ ਤਡ਼ਪੈ ਹ; ਪਰਮੇਸ਼ਬਰ ਬਾਕੀ ਇਚਛਾ ਪੂਰੀ ਕਰਸਿ!” 7“ਧਨ੍ਯ ਹ ਬੇ ਜਖਾ ਦਿਧਾਲੁ ਹ; ਕਿਉਂਕ ਬਾਪੈ ਦਿਆ ਕਰੀ ਜਿਆਸੀ!” 8“ਧਨ੍ਯ ਹ ਬੇ ਜਾਕੋ ਮਨ ਪਰਮੇਸ਼ਬਰ ਕਿ ਨਜ਼ਰੀ ਮ ਖਰੋ ਹ; ਬੇ ਪਰਮੇਸ਼ਬਰ ਨ ਦੇਖਸਿ!” 9“ਧਨ੍ਯ ਹ ਬੇ ਜਖਾ ਮੇਲਾ-ਮਿਲਾਪ ਕਰਾਵੈ ਹ; ਬੇ ਪਰਮੇਸ਼ਬਰ ਕਾ ਟਾਬਰ ਖੁਵਾਸੀ!” 10“ਧਨ੍ਯ ਹ ਬੇ ਜਖਾ ਧਾਰਮਿਕਤਾ ਕੀ ਬਜੈਂਹੁੰ ਸਤਾਧਾ ਜਾਵੈ ਹ, ਕਿਉਂਕ ਈਸ਼ਬਰ ਨਗਰੀ ਕੀ ਰਾਜਪਾਟ ਬਾਕੋਈ ਹ!” 11“ਧਨ੍ਯ ਹੋ ਥੇ ਜਖਾ ਮਨੈ ਮਾਨਬਾ ਕੀ ਬਜੈਂਹੁੰ ਮਿਨਖ ਥਾਨੈ ਸਤਾਵੈ ਹ, ਥਾਰੀ ਬੇਜ਼ਤੀ ਕਰੈ ਅਰ ਝੂਠ ਬੋਲਿ’ਰ ਹਰ ਬਾਤਾ ਮ ਥਾਨੈ ਬੁਰਾ ਬਤਾਵੀਂ ਹੀਂ। 12ਜਣਾ ਥੇ ਰਾਜੀ ਹੋਜਿਆ ਕਿਉਂਕ ਈਸ਼ਬਰ ਨਗਰੀ ਮ ਥਾਨੈ ਇਕੋ ਫਲ ਮਿਲਸਿ। ਕਿਉਂਕ ਬੇ ਤੋ ਪਰਮੇਸ਼ਬਰ ਕਿ ਖੇਬਾਲਾ ਨ ਬਿ ਜਖਾ ਥਾਰੁੰ ਪੇਲਿ ਹਾ ਬਾਨੈ ਬਿ ਅੰਧਾਈ ਸਤਾਧਾ ਹਾ।”

ਲੁਣ ਅਤੇ ਚਿਨਣਾ

13“ਥੇ ਧਰਤੀ ਕਾ ਸਗਲਾ ਮਿਨਖਾ ਤਾਂਹੁੰ ਲੁਣ ਹੋ; ਪਣ ਜਦ ਲੁਣ ਬੇਸੁਵਾਦ ਹੋਜਾਵੈ। ਜਣਾ ਬਿਨੈ ਓਜ੍ਹੁੰ ਨਮਕਿਨ ਕੋਨੀ ਬਣਾਵੈ। ਜਾ ਸਕੈ। ਅਰ ਨੈ ਬੋ ਕੋਈ ਕਾਮ ਆਵੈ। ਪਣ ਬਿਨੈ ਫੈਕ ਦਿਧਿ ਜਾਵੈ ਹ, ਜਿਉੰ ਬੋ ਲੋਗ ਕ ਪਗ ਤਲ਼ੇ ਮਸ਼ਡਿਆਂ ਜਾਵੈ ਹ। 14ਥੇ ਧਰਤੀ ਕਾ ਚਿਨਣਾ ਹੋ। ਅਰ ਜਖੀ

नगरी दूँगर प ह बा कोनी लुख सकै। 15 मिनख दियो जलार कुंडा तळे कोनी धरै पण आब्या म धरै ह जिऊँ घर म आबा जाबाळा मिनखा न च्यानणो दिख सकै। 16 थारा चोखा काम बी दीया क च्यानणा की जय्याँ चमकणा चाए जिऊँ दुसरा मिनख भला कामा न थारै जरिए देख सकै अर थारा बाप की जखो ईश्वर नगरी म ह बिकी बडाई करै।”

बिधि-बिधान क बारा म ईशु की सिख

17 थे ओ मना सोचो क म मुसा का बिधान नहिस परमेश्वर की खेबाळा की माडेडी पोथ्या न नाश करबा आयो हूँ। म बानै नाश करबा कोनी आयो पण बानै पुरो करबा आयो हूँ। 18 म थारऊँ साची बोलूँ हूँ अकास अर धरती टळ सकै ह पण बिधि-बिधान म मंडेडो आक पुरो होया बिना कोनी रेवै। 19 इ ताँई जखो बी मिनख आ छोटीऊँ छोटी बाता मऊँ एकनई कोनी मानै अर बो बंयाई दूसरा मिनखा न बी करबा कि सिख देवै बो ईश्वर नगरी म छोटाऊँ बि छोटो खुवासी। पण जखो मिनख बा बाता न मानै ह अर दूसरा मिनखा न बी मानबा ताँई सिखावै ह बो ईश्वर नगरी म बडो खुवासी। 20 म थारऊँ साची बोलूँ हूँ ज थारा नेकी का काम शास्त्रि अर फरीसीयां की नेकीऊँ बढ़र कोनी ह जणा थे ईश्वर नगरी म कदैई कोनी जा सकोगा।

झाळ क बारा म सिख

21 “थे सुण्या हो, क आपण बडकाऊँ बोल्यो गयो हो ‘हत्या मना करज्यो’ अर ज कोई हत्या करसी बिको न्याय

होसी। 22 पण म थारऊँ खेऊँ हूँ क ज कोई मिनख कोई प झाळ काडै बिको न्याय होसी। अर ज कोई मिनख कोईकी बेज्जति करै बिको न्याय पंचायत करसी; अर ज कोई मिनख कोईनै बावळो खेवै बिनै परमेश्वर नरक की आग म गेरसी। 23 इ ताँई जद वेदी प चढावो चढाती टेम तनै याद आवै क तेरा भाई का मन म तेरे खिलाप कुटळाई ह। 24 जणा तू तेरा बी चढावा न बठै ई धरर पेलया तेरा भाईऊँ मेल-मिलाप करले अर बिकै पाछै तू तेरा चढावा न चढाजे। 25 अर ज कोई तनै कचेरी म लेज्यावै जणा तू बिकै सागै गेला म ई सुलजेटो कर लिजे कदै अंयां न होज्या क बो तनै पंचा क सामै पेश करै अर पंच सिपाईड़ा न सोपै अर सिपाईड़ा तनै काळ कोठरी म पटकै। 26 म तनै साँची बोलूँ हूँ ज तु एक बार बी काळ कोठरी म चलेगो जणा जद ताँई तू पाई-पाई न चुका दे जद ताँई तु बठैऊँ कोनी छुट सकै।

कुकर्म क बारा म सिख

27 “थे जाणो हो थानै कह्यो गयो हो क थे कुकर्म मना करज्यो।” 28 पण म थारऊँ अंयां बोलु हूँ क ज कोई मिनख पराई लूगाई न बुरी नर्जर्याऊँ देखै ह जणा बो आपका हिया म बि लूगाईऊँ कुकर्म कर लिन्यो। 29 इ ताँई ज तेरी दाई आँख तनै पाप करावै जणा तू बिने फोडदे; क्युँक तेर ताँई ओई भलो ह क तेरी काया को एक अंग नास होज्या पण तेरी सगळी काया नरग म जाबाऊँ बच ज्यावै। 30 अर ज तेरो दायो हाथ तनै पाप करावै जणा बिनै काट फेंक;

क्युँक तेर ताँई ओई भलो ह क तेरी
काया को एक अंग नास होज्या पण तेरी
सगळी काया नरग की आग म जाबाऊँ
बच ज्यावै। 31 थानै अंय्यां बी बोल्यो
गयो हो; क ज कोई आपकी लूगाई न
छोड़बो चावै, जणा बिनै आपकी लूगाई
न तलाकनामो देणो चाए। 32 पण सुणो, ज
कोई मिनख आपकी लूगाई न कुकर्म क
अलावा कोई ओर कारणऊँ छोडै ह अर
बा लूगाई दुसरा मोट्यार क सागै रेहै
जणा बिको कुकर्मी होबा को जिमेदार
बिको पेलडो मोट्यार ह अर बी छोडेडी
लूगाईऊँ ब्याह करबाळो बी कुकर्म करै।

सोगन खाबा क बारा म सिख

33 थे आ बी जाणो हो क आपणा
बड़काऊँ ख्यो गयो हो क थे सोगन
मना तोड़ज्यो पण बिनै प्रबु का नाम
म पुरो करज्यो। 34 पण म थानै खेऊँ हूँ
क थे कदैई सोगन मना खाज्यो; न तो
ईश्वर नगरी की क्युँक ओ परमेश्वर
को सिंघासन ह। 35 अर न इ धरती की
क्युँक आ प्रबु क पगा की चोकी ह।
अर न यरुशलेम नगरी की क्युँक इको
राजा परमेश्वर ह। 36 थे थारा सीर की
सोगन बी मना खाज्यो क्युँक थे थारा
बाळा मऊँ एक बी बाल न तो धोळो
अर न काळो कर सको हो। 37 पण
थारी बात हाँ कि हाँ अर ना की ना
हो। क्युँक जखो मिनख इकै अलावा
क्युँ बोलै ह जणा बो शैतान कानीऊँ ह।

रिश्ता क बारा म सिख

38 थे जाणो हो थानै कह्यो गयो हो
क, “आँख क बदलै आँख अर दांत क

बदलै दांत।” 39 पण म थारऊँ खेऊँ हूँ
थे थारै सागै बुराई करबाळा क सागै
बुराई मना करज्यो। पण ज कोई थारै
दायां गाल प थपड़ मारै जणा बिकै
कानी दसरो गाल बी फेर दिज्यो। 40 अर
ज कोई मिनख तेर प मुकदमो चलार
तेरो कुर्त्यो लेबो चावै जणा बिनै तेरो
कोट बी दे दिजै। 41 अर जखो मिनख
जबरदस्ती आपको समान तनै पकड़ार
एक कोश पैदल ले ज्यावै जणा बिकै
सागै दो कोश चल्यो जाए। 42 अर ज
कोई मिनख तेरऊँ क्युँ माँगै जणा बिनै
दिज्ये। अर ज कोई मिनख तेरऊँ उधारो
लेबो चावै जणा बिनै बी मना मत करजे।

सगळा मिनखाऊँ प्रेम भाव राखजे

43 थारऊँ ओ बी ख्ययो गयो हो क,
“थे थारा पड़ोसी ऊँ प्रेम करज्यो अर
थारा दूशमना ऊँ नफरत करियो।” 44 पण
म थानै खेऊँ हूँ क थे थारा बेरीऊँ प्रेम
करज्यो। अर जखो थानै सतावै, बा ताँई
बी अरदास करज्यो। 45 जिऊँ थे ईश्वर
नगरी म रेहबाळा थारा बाप की ओलाद
बण सको। क्युँक परमेश्वर भला अर
बुरा दोन्यु जंय्यां का मिनखा प सूरज को
च्यानणो करै ह। अर धरमी अर पापी
दोन्यु प म्हे बरसावै ह। 46 अंय्यां म इ
ताँई खेऊँ हूँ क्युँक ज थे थारऊँ प्रेम
करबाळा क सागैई प्रेम करस्यो जणा
थानै बिको काँई फळ मिलसी। अंय्यां तो
चुँगी लेबाळा बी कोनी करै के? 47 अर
ज थे थारा भाईड़ा की ई आव-भक्त करो
हो जणा इमै कुणसी बड़ाई ह? अंय्यां
तो गेर यहूदी मिनख बी कोनी करै के?
48 इ ताँई थानै सिद्ध बणनो चाए, जंय्यां

की ईशबर नगरी म रेबाळो थारो बाप सिद्ध है।

दान देवा की सिख

6 “चोकनना रेवो! परमेशबर आ चावै ह क थे लोगा न दिखाबा ताँई धरम का काम मना करज्यो अर ज अंय्या करस्यो जणा थानै परमपिता जखो ईशबर नगरी म ह बो बाको फळ कोनी देसी।” २इ ताँई जद थे दान द्यो जणा बिको ढीढोरो मना पिटज्यो, जंय्यां क ढोंगी मिनख अरदास करबाळी झघां अर गळी कुचळ्या म खुद की मिनखाऊँ बडाई कराबा ताँई करै ह। म थारऊँ साची बोलूँ हूँ बानै बाको फळ पेली मिलगो। ३पण जद तू दान देवै जणा जो तेरो दायो हाथ करै बिको तेरा बाया हाथ न बेरो ना पड़ै। ४जिऊँ तेरो दान ओला म रेवै अर तेरो परमपिता परमेशबर तनै देखसी अर जखो तू ओला म दियो ह बिको फळ तनै देसी।

अरदास क बारै म सिख

५जद थे अरदास करो, जणा ढोंग्या की जंय्यां मना करज्यो। क्युँक बे यहूदिया की अरदास करबाळी झघां म अर गुवाड़ म खड़िया होर अरदास करै ह जिऊँ लोग बानै देख सकै। म थानै साची खेऊँ हूँ क बानै इको फळ मिलगो। ६पण जद तू अरदास करै जणा तू तेरा खुद का कोठा म जा कूवांड़ जुड़र परमेशबरऊँ जिनै कोई कोनी देख सकै अर जो तेरा ओला

म करेडा कामानै देखै ह। बो तनै बाको फळ देसी। ७जद थे अरदास करो जणा गैर-यहूदी मिनखा की जंय्यां मना करज्यो क्युँक बे आ सोचर अय्याँ करी ही क बाकै बार- बार बोलबा की बजैऊँ बाकी सूणली ज्यासी। ८ई ताँई थे बाकी जंय्यां मना बणज्यो क्युँक थारो परमपिता थारै माँगबाऊँ पेल्याई जाणै ह क थारी जुरत काँई ह। ९थे अंय्यां अरदास करो: ईशबर नगरी म रेबाळा म्हारा बापू, थारा नाम न मेमा मिलै। १०थारो राज आवै। जंय्यां थारी इच्छा ईशबर नगरी म पुरी होवै ह बंयाईं धरती प बि होवै। ११थे म्हारी आज की जुर्त पुरी करो। १२अर जंय्यां म्हें म्हारै खिलाप बुराई करबाळा न माफ कर्या हा बंयाईं थे म्हानै माफ करो। १३अर थे म्हानै विचासबा मना द्यो पण बुराईऊँ बचावो।^c १४ज थे मिनखा का पापा न जखा थारै खिलाप कर्या गया बानै माफ करस्यो जणाई थारो ईशबर नगरी बापू बी थारा पापा न माफ करसी। १५अर ज थे दूसरा मिनखा न माफ कोनी करस्यो जणा थारो ईशबर नगरी बापू बी थारा पाप माफ कोनी करसी।

बरत क बाग म सिख

१६जद थे बरत करो जणा ढोंग्या की जंय्यां मूँडा प उदासी मना ल्याज्यो, क्युँक बे आ दिखावै ह क बे बरत कर मेल्या ही म थानै साची खेऊँ हूँ, क बानै बाको फळ मिलगो। १७पण जद तू बरत करै जणा मूँडो धोर सिर प

^c 6.13 क्युँक हाथऊँ माडेडी पोथ्या म आ जोड़यो गयो ह क शक्ति, आदर अर अधिकार सदा थारो ह।

तेल लगाज्ये। 18जिउँ मिनखानै नई पण तेरा ईशबर नगरी बापूनै जखो ओला म ह बिनै तेरा बरत क बारै म बेरो चालै जणा बो तनै इको फळ देसी।

ईशबर नगरी म धन

19इ धरती प थे धन भेळो मना करो। क्युँ क अठै इकै धिवळ अर जर लागज्यावै ह अर चोर चुरार लेज्यावै ह। 20इकै बदलै अंयां का काम करो जखा परमेशबर न भावै अयाँ करबो ईशबर नगरी म धन भेळो करबा की जंयां ह जठै बिकै न तो धिवळ लागै न जर अर नई बिनै चोर चुरावै। 21क्युँक जठै थारो धन होसी बढैइ थारो मन होसी। 22थारी काया को दियो आँख ह इ ताँई ज थारी आँख निरोगी ह तो थारी सगळी काया म बी च्यानणो रेसी। 23ज तेरी नजर्या बुरी होज्या जणा तेरी सगळी काया म अँधैरो होज्यासी। इ ताँई जो च्यानणो थारै माइनै ह ज बोई बुझज्यासी जणा थारो काँई गेलो? 24कोई बी मिनख एक सागै दो मालिका की सेवा कोनी कर सकै। क्युँक बो एक'ऊँ तो प्रेमभाव राखसी अर दुसरा'ऊँ नफरत करसी, एक'ऊँ तो बफाधार रेसी दूसरानै छोटो जाणसी। अंयाँई थे धन अर परमेशबर की सागै सेवा कोनी कर सको।

चिंता मना करज्यो

25म थारऊँ खेऊँ है, थे थारा जिव कि चिन्ता मना करज्यो कि काँई खास्यो अर काँई पिस्यो? अर नाई काया की चिन्ता करज्यो की इनै किऊँ ढकस्यूँ? क्युँक जिव रोटीऊँ अर काया गाबाऊँ बडर

ह। 26थे आकास का पंछीया न देखो बे न तो बोवै ह अर न काटै, अर न बे आपकी बखार्या म नाज भेळो करै, जणा बी थारो ईशबर नगरी बापू बाको पेट भरै ह। के थे बाऊँ बढर कोनी? 27थार म अंयां को कुण ह जखो चिन्ता करके खुद की उप्र म एक घडी बी बढा सकै? 28गाबल्या की चिन्ता क्युँ करो हो? रोई म उगबाळा रोईडा का बाङ्गा न देखो बे कंयाँ खिल्या रेवै ह। बे न तो काम करी ही अर नाई बे खुद ताँई गाबा सिवी ही। 29म थानै बताऊँ हू क सुलेमान राजा बी आपका राटपाट का वैभव म बामैऊँ एक की जंयां का बी गाबा कोनी पेर सक्यो। 30मैदान म उबाळी घास न देखो जो आज ह पण काल बिनै भटी म झोंक दियो जावै ह बिनै परमेशबर चोराखा गाबा पिरावै ह जणा बिश्वास म कमजोर मिनखो परमेशबर थानै बी पक्काई चोखा गाबा पिरासी। 31इ ताँई थे खाबा-पिबा की अर गाबा की चिन्ता मना करज्यो। 32गैर-यहूदी मिनख आ सगळी चिजा क गेल भागता रेवै ह पण थारो ईशबर नगरी बापू थारी सगळी जुतनै जाणै ह। 33सऊँ पेल्या परमेशबर का राज न हेरो अर सही गेला प चालो, जिऊँ थानै अ सगळी चिजा मिल ज्यासी। 34काल की चिंता मना करो, क्युँ क काल ताँई काल की ई चिंता घणी ह। अर हरेक दिन की चिंता बि दिन ताँई घणिई होवै ह।

न्याय मना करो

7 कोई का बी पाप भर्या कर्मा को न्याय मना करो जिऊँ परमेशबर बी थारा पाप भर्या कर्मा को न्याय कोनी

करसी। २ क्युँक थारो बी फेसलो बंयांई कर्यो जासी, जंयां थे न्याय करबाली टेम दूसरा मिनखा क सागै करो हो। अर जि नाप'ऊँ थे दूसरा ताँई नापो हो बि नाप'ऊँ इ थार ताँई बी नाप्यो ज्यासी। ३ तनै डुंगर बळती तो दिखै पण पघां बळती कोनी दिखै। ४ तनै खुद की बडी- बडी गळत्या तो सूजैई कोनी अर चाल्यो दुसरा की छोटी-छोटी गळत्या न सुधारबा जणा पाछे तु कय्यां खै सकै ह आ भाईडा म तेरी गळत्यानै सुधार द्युँ। ५ ओ ढोंगी पेली

खुद की बडी बडी गळत्यानै तो सुधारले जणा पाछे कठै जार तु ओरा की छोटी छोटी गळत्यानै पिछाणर बानै सुधारबा म बाकी मदत कर सकै ह। ६ “पबितर चिजा गन्कड़ा क आगै मना गेरो। अर न सूलडा क आगै मोती बखेरो। क्युँक ज थे अंय्यां करस्यो जणा बे सूलडा आ मोत्या न आपका पगा तळै रोधसी, अर गन्डकड़ा बी पाछे मुड़र थानै फाड गेरसी।

थे जो क्युँ बी चावै हो बि ताँई परमेश्बर'ऊँ अरदास करो

७ परमेश्बर'ऊँ माँगो, जणा थानै दियो जासी। अर हेरो जणा थानै लाधसी अर खुड़खुड़ाओ जणा थारै ताँई खोल्यो ज्यासी। ८ क्युँक जखो माँगै, बिनै मिलै ह, जखो हेरै ह बिनै लाधै ह, जखो खुड़खुड़ावै ह बि ताँई खोल्यो जावै ह। ९ थार म अंय्यां को कुणसो बाप ह जिऊँ बिको बेटो रोटी माँगै जणा बो बिनै भाडा देवै ह? १० अर नाई अय्याँ को बाप ह जिऊँ बिको बेटो मछी माँगै जणा बिनै साँप पकड़ावै। ११ इ ताँई थे चाए बुरा

मिनख क्युँ न हो, जणा बी थे जाणो हो क टाबरा न चोखी चिजा कंयां दि जावै ह। जणा थारो परम-पिता परमेश्बर जखो ईश्बर नगरी म बिराजै ह बे बाऊँ माँगबाला मिनखा न चोखी चिजा क्युँ कोनी देसी? १२ इ ताँई जंय्यां थे चावो हो क दूसरा मिनख थारै सागै चोखो सूलुक कैर। जणा थे बि बाकै सागै बंयां को सूलुक करो। क्युँक ओ मूसा का विधि-विधान अर परमेश्बर की खेबाला क जरिये परमेश्बर दियो ह।

१३ सकड़ा बारना क गेलाऊँ बड़ो क्युँक चोड़ा बारना को गेलो नास कानी लेज्यावै ह। बोला मिनख ह जखा चोड़ा बारना का गेलाऊँ जार्या ही। १४ पण सकड़ा बारना को गेलो जीवन कानी जार्या ह। अर थोड़ा मिनख इ गेलै जार्या ही।

कर्माौँ बेरो चालै ह क कुण कय्याँ को ह।

१५ थे बा परमेश्बर की खेबाला'ऊ बचर रिज्यो जखा झूठ बोलै ह! बे लल्डी की खोल म फाड़ खाबाला ल्याली ही। १६ पण थे बानै बाका कर्माौँ पिचाण लेस्यो। क्युँक थे जाणो हो क झाडी क अगूर कोनी लागै अर नई केर क अंजीर। १७ अंय्यांई चोखा दरख्त क चोखा फळ अर बुरा दरख्त क बुरा फळ लागै। १८ अर नई एक चोखो दरख्त क बुरो फळ लाग सकै ह अर नई एक बुरा दरख्त क चोखा फळ लाग सकै ह। १९ पण जि दरख्त क चोखा फळ कोनी लागै, बिनै काटर आग क माईनै बाल्यो जावै ह। २० इ ताँई म थानै ओज्युँ

खेऊँ हूँ क थे बा मिनखा न बाका कर्मा
का फाला'ऊँ पिचाण लेस्यो। 21प्रबु-प्रबु
करबाला सगळा मिनख ईश्वर नगरी राज
म कोनी ज्यासी। पण जखो बी मिनख
ईश्वर नगरी म रेबाला मेरा बाप की
ईच्छा गेल चालै ह, बोई बिमै ज्यासी।
22बि न्याय हालै दिन बोला मिनख मनै
खेसी “प्रबु हे प्रबु! म्हें थारै नाम’ऊँ थारी
बाता कोनी बताया हा के? अर थारै
नाम’ऊँ ओपरी बलाय कोनी काडी ही
के? अर थारै नामऊँ बोला सारा ताजूब
का काम कोनी कर्या हा के? 23जणा म
बानै साफ साफ खेस्यूँ क म थानै कोनी
जाणू, ‘हे बुरा कर्म करबालो मेरै कनै’ऊँ
चल्या जावो।’

दो मिनख

24“ई ताँई जखो बी मेरा बचना न
सूणै ह अर बापै चालै ह बिकी बराबरी
बी बुद्धिमान मिनख’ऊँ करी गई ह जो
आपको घर ढाड प बणायो, 25जणा मि
बरस्यो, बाढ आई, भाळ की फटकार
लागी पण बो ढयो कोनी क्युँक बि
घर की नींव ढाड प धेरेडी ही। 26पण
जखो बी मिनख मेरा बचना न सूणै तो
ह पण बापै चालै कोनी, बो बी बावला
मिनख की जंयां ह जो आपको घर
बालू प बणायो, 27अर जद मि बरस्यो,
बाढ आई, भाळ की फटकार लागी
जणा बो घर ढग्यो।” 28अर जद ईशु
आपकी बाता बानै खे सूणाई, जणा
बी भीड़ न ईशु की सीख प ताजूब
होयो। 29क्युँक ईशु बानै यहूदी नेता
की जंयां कोनी पण एक अधिकारी
की जंयां सिख देर्यो हो।

ईशु कोढी न निरोगो कर्यो

8 इकै पाछै जद ईशु डूंगर’ऊ तलै
उतर्यो जणा मिनखा की भिड़ बाकै
गेल हो लिन्यी। 2बामै एक कोढी बी हो।
बो ईशु क कनै आयो अर बाकै पगा म
धोख खार बोल्यो, “मराज म जाणू हूँ क
थे मेरो कोढ धो सको हो।” 3आ सूण’र
ईशु बिकै हाथ अडार बिऊँ खय्यो, “म
चाऊँ हूँ क तेरो कोढ धुपज्या!” अर जद
की जद इ बिको कोढ धूपगो। 4पण ईशु
बिऊँ खयो, “इ बात क बारा म खिनैई
मना खीजे। पण याजक क कनै जार
खुद न दिखा अर मूसा की रित-गेल भेट
चढा जिऊँ मिनखा न तेरै निरोगो होबा
को सबुत मिलै।”

सुबेदार क दास को निरोगो होबो

5अर जद ईशु कफरनहूम नगरी आयो,
जणा रोमी सुबेदार ईशु क कनै आर
अरदास करबा लाग्यो, 6“मराज मेरो एक
दास घर क माईनै रोगलो पड़्यो ह।
बिकै हवा भेगी इ बजै’ऊ बिनै पिड़ा होरी
ह। 7जणा ईशु बिऊँ खयो म बठे आर
बिनै निरोगो करस्युँ।” 8जणा बो सुबेदार
ईशु’ऊँ बोल्यो, मराज म इ जोगो कोनी
क थे मेरै घरा पधारो। थे तो अठै’ऊ इ
आदेश करद्यो जणा मेरो दास निरोगो
होज्यासी। 9क्युँक म अंयां को मिनख
हूँ जो अधिकार्या क तलै काम करूँ
हूँ अर मेरै तलै बी सिपाईड़ा काम करै
ह। अर जद म एक सिपाईड़ा न खेऊँ
चल्यो जा जणा बो चल्यो जावै ह
अर जद दूसरा न खेऊँ हूँ आज्या जणा
बो आज्यावै ह अर जद म मेरा दास’ऊँ

खेऊँ हूँ क अंयां कर जणा बो बंयांई करै ह। 10जद ईशु बिकी अ बाता सूणी जणा ताजुब कर्यो अर बी भीड़ऊँ बोल्यो जखी बाकै गेल आरी ही “म थानै साची खेऊँ हूँ म इम्माएल का मिनखा म अंयां को बिश्वास कोनी देख्यो। 11म थानै बता ऊँ हूँ क बोला मिनख अगुणी अर पाछुणी दिशाऊँ आसी अर बे ईश्वर नगरी म अब्राम, इसहाक अर याकूब क सागै जिमबा बैठसी। 12पण जखी पिढी न राज मिलबालो हो बिनै अँधेरा म गेर दियो ज्यासी जठै रोणो-धोणो अर दात पिसबो होसी। 13ईकै पाछै ईशु बि सूबेदारऊँ बोल्यो, “चल्यो जा जंयां को तेरो बिश्वास ह बंयांई तेरै सागै होसी।” जणा बी टेमई बिको दास निरोगो होगो।

ईशु बोला सारा मिनखा न निरोगो कर्यो।

14जद ईशु पतरस क घरां गयो बढै पतरस की सासू बुखार म पड़ी ही। 15जणा ईशु बिकै हाथ अड़ायो अर बा निरोगी होगी। अर बा खड़ी होर बाकी आव-भगक्त करबा लागी। 16जद दिन आथगो जणा लोग बा मिनखानै जामै ओपरी- बलाय ही बाकै कनै लेर आया। ईशु बा ओपरी बलाय न हूँकम देतो अर बे बाको हूँकम मानर बाकै माईनैऊँ निशर जाती। अर बे बा सगळा मिनखा न निरोगो कर्या जखा रोगला हा। 17अंयां इ ताँई होयो क्युँक यशायाहा परमेश्वर की खेबालो जो खयो हो बो पुरो होवै:

बे आपणा रोगा न खुद प लेर अर
आपणी बिमायनै सेरर दुर
कर दिनी।

ईशु क चेलो बणबा को मोल

18जद ईशु आपकै च्यारूमेर भीड़ देखी जणा बे आपका चेला न दरियाव क परलै नाकै जाबा को हूँकम दियो। 19बि टेम क एक यहूदी जिनै शास्त्र को ज्ञान हो, बो ईशु क कनै आर बोल्यो, “मराज थे जठै बी जास्यो म बी थारै गेल ज्यास्यूँ।” 20बे बिकी इ बात न सूणर बिऊँ कह्यो, “गादडा की धुर अर पछिया का धुसळा होवीं पण मिनखा का बेटा क कनै सिर टेकबा को बी ठिकाणो कोनी।” 21अर ईशु को एक चेलो बाऊँ खय्यो, “गुरु जी, मनै पेल्या मेरा बाप न गाडबा द्यो।” 22पण ईशु बिऊँ बोल्यो, “मेरै गेल होलै क्युँक परमेश्वर बा मिनखा न जाकै कनै जुग-जुग को जीवन कोनी बानै मरेड़ो समझौ ह बा मरेड़ा मिनखा न बाका मरेड़ा न गाडबा दे।”

ईशु तूफान न थाप्यो

23बिकै पाछै बे एक न्यावडी क माईनै जार बैठगा। बाकै सागै बाका चेला बी हा। 24जद बे न्यावडी क माईनै हा बि टेम क दरियाव क माईनै जोरको तूफान आयो अर नावडी म पाणी भरबा लाग्यो पण ईशु सोर्यो हो। 25जणा बे ईशु कनै गया अर बानै जगार बाऊँ बोल्या, “प्रबु म्हानै बचाओ। क्युँक आपां मरबाला हाँ।” 26जणा ईशु बाऊँ बोल्या, हे कम बिश्वास राखबालो! थे अंयां क्युँ डरो हो? बिकै पाछै बे भाळनै अर दरियावनै दकाल्या जिऊँ सक्युँ शांत होगो। 27बे मिनख ताजूब म पड़गा, अर आपसर्या म बतलाबा लाग्या, “ओ मिनख कुण



दरियाव म तौफान (8.24)

ह? जिकी बाता तूफान अर दरियाव बी
मानै ह!”

मिनखा मऊँ ओपरी बलाय काडी।

28बिकै पाछे ईशु गदरेनिया दिसावर
म पुच्यां, ओ दिसावर दरियाव क परलै
नाकै हो। जणा बठै दो मिनख बानै
मिल्या जखा कब्रिशतान’ऊँ निकळर
आर्या हा बाकै माईनै ओपरी बलाय
ही। बे अंय्यां का खतरनाक मिनख
हा की बाकै बजै’ऊँ बि गेलै कोई बी
कोनी जातो हो। 29बे जोर’ऊँ बोल्या, “हे
परमेश्वर का बेटा, थे म्हार’ऊँ के चावो
हो? के थे थारा टेम’ऊँ पेल्याई म्हानै
नास करबा आया हो?” 30अर बठैर्इ
क्युँक दूर एक सूलडा को रेवड़ चरो
हो। 31इ तोई बे ओपरी बलाय बाऊँ
अरदास कर’र बोली, ज थे म्हानै आ
मऊँ काडो हो जणा बा सूलडा का रेवड़
क माईनै भेज द्यो। 32जणा ईशु बाऊँ
बोल्यो, जाओ जणा बे बा मिनखा’ऊँ
निकळ’र बा सूलडा क माईनै बड़गी।
इकै बजै’ऊँ बे सूलडा ढळान’ऊँ गुड़ता

गुड़ता दरियाव क माईनै जा पड़्या अर
मरगा। 33अर सूलडा का गुवाळ्या नगरी
म जार जो क्युँ बठै होयो हो बिकै बारा
म अर जखा मिनखा म ओपरी बलाय
ही बाकै सागे काँई होयो बिकै बारा
म खे सूणायो। 34आ सूण’र बी नगरी
का मिनख ईशु क कनै आगा अर बाऊँ
अरदास करबा लाग्या की बे अठै’ऊँ
चल्या जावै।

हवा भेयडा मिनखनै निरोगो करबो।

9 ईशु एक नावडी म बैठ’र दरियाव क
परलै नाकै खुद की नगरी कफरनून
म आया। 2जणा लोग एक हवा भेयडा
मिनखनै खाटली म घाल’र बाकै कनै
ल्याया। ईशु बाको ओ बिश्वास देख’र बि
हवा भेयडा मिनख’ऊँ बोल्या, “हिमत राख,
तेरा पाप धुपगा!” 3जणा क्युँक शास्त्रानै
सीखाबाळा यहूदी मिनख आपसर्या म
बतलाबा लाया, “ओ अंय्या बोल’र
परमेश्वर को अपमान करै ह।” 4ईशु
बाकी हिया की बाता न जाण’र बाऊँ
बोल्यो, “थे थारा हिया म बुरो क्युँ सोचो
हो? 5सोरो काँई ह? के अंय्यां खेबो ‘तेरा
पाप धुपगा नहिस अंय्यां खेबो खड़यो
होर चाल फिर?’ 6जिकूँ थे आ जाण
सको की इ धरती प पाप माफ करबा
को हक मिनख का जाया क कनै ह।
इकै पाछे ईशु बि हवा भेयडा मिनख’ऊँ
बोल्यो, “खड़यो होर तेरी खाटलीनै उच’र
तैर घरा चल्यो जा। 7बो मिनख खड़यो
होर आपकै घरा चलगो। 8लोग आ देख’र
डरगा। बे परमेश्वर की जे-जैकार करबा
लाग्या क बे मिनखनै ताजूब का काम
करबा की शक्ति दिनी ह।

ईशु को मत्तीनै बुलाबो

9जद ईशु बठैँकुं जार्यो हो जणा बे चुंगी चौकी प एक मिनखनै बैठचा देख्या। बिको नाम मत्ती हो। ईशु बिंकुं बोल्यो, “मेरै गेल होलो।” जणा बो खड्यो होर बाकै गेल होलियो। 10अर जद ईशु आपका चेला क सागै मत्ती क घरा रोटी खाबा ताँई बैठचा जणा बठै बाकै सागै रोटी खाबा ताँई चुंगी लेबाळा अर पापी मिनख बी बैठचा। 11बानै सागै बैठचा देखर क्युँक फरीसी ईशु का चेलानै खया, “थारो गुरु तो चुंगी लेबाळा अर पापी मिनखा क सागै खावै अर उठा-बैठी करै ह?” 12आ सूणर ईशु बाऊं बोल्यो, “निरोगा मिनखनै बैद की जुर्त कोनी होवै, रोगलानै ही बैद की जुर्त पड़ै ह। 13इ ताँई थे जाओ अर शास्त्र म मांडेडा इ बचन को मतबल काँई ह बिनै समझो, ‘म बलिदान कोनी चाऊं पण दया चाऊं हूँ। म धर्मिया ताँई कोनी आयो पण पाप्यां न बुलाबा आयो हूँ।’”

बरत क बारै म सूवाल

14इकै पाछै यहन्ना बतिष्ठो देवाळा का चेला ईशु क कनै गया अर बानै बुझबा लाग्या, “थारा चेला बरत क्यूँ कोनी करै? जदकि म्हे अर फरिसि बार-बार बरत करां हाँ।” 15जणा ईशु बानै खेबा लाग्या, “ब्याव की टेम जद बिंद आपका भाईला क सागै ह जणा बिका भाईला दुःख

मनावै ह के? पण बे दिन आसी जद बिंद बाऊं न्यारो कर्यो जासी जणा बे बरत करसी। 16कोई बी नया सूति गाबा की कारी पुराणा गाबा प कोनी लगावै, अर ज कोई लगा बी ले जणा नयी कारी भेळी होर बि गाबल्यानै दुणो फाड़ गैरै। 17अंयाईं नयी अंगूरी पुराणी बखाल^d म कोनी भर्यो जावै क्युँक ज्युँ-ज्युँ बो उठै जणा बा अंगूरी पुराणी बखाल न फाड़गैरै अर अंगूरी अर बखाल दोन्युई खराब हो ज्यावै। ई ताँई लोग नयी अंगूरी नयी बखाल मई भरीं हीं।”

**मेरडी छोरी न जिन्दो करबो अर
रोगली लूगाईनै निरोगो करबो।**

18ईशु जद अ बाता बानै बतार्या हि हा क अता म ही एक यहदी सभा को एक नेतो बाकै कनै आयो अर बाकै धोक खार बाऊं अरदास करतो बोल्यो, “इबी-इबी मेरी छोरी मरी ह। ज थे चालर बिकै उपर हाथ धरद्यो जणा बा ओज्यु जिन्दा होज्यासी।” 19बिकी बाता सूणर ईशु खड्यो होर आपका चेलानै सागै लेर बिकै सागै चालबा लाग्यो। 20बठै एक लूगाई ही जिकै बारा बरसा^eकुं न्याणी को रोग हो। बा ईशु क गेलनै अर बाका गाबा की कूट क हाथ अड़ा दिनी। 21क्युँक बा सोच्या करती ही क ज म ईशु क गाबा की कूट क हाथ अड़ा देस्यु तो म निरोगी होज्यास्यूँ। 22गेलनै मुडर ईशु बिनै देखर बोल्यो, “बैटी हिम्मत राख। तेरो

^d 2:22 अंगूरा का रस न नया बखाल म घालर धर्यो जातो हो क्युँक जंय्या जंय्या अंगूरा को रस पुराणो होतो बिमै हवा बणती नयो बखाल तो बीकै सागै बढ़तो जातो पुराणा बखाल को काँई बढ़तो।“अर औ बखाल चमड़ा को होतो हो।”

बिश्वास तनै निरोगो कर्यो ह।” अर बा
लुगाई जद की जद निरोगी होगी। 23 जद
ईशु बि यहूदी नेता क घरा पूच्यां जणा
बे देख्या क लोग बी छोरी क मरबा
की बजै’ऊँ रोइ पिटी^e करबा लागर्या
ही। 24 जणा ईशु बा मिनखा’ऊँ बोल्या
थे अठै’ऊँ बारनै चल्या जाओ आ छोरी
मरी कोनी पण सोवै ह। आ सूणर लोग
बाको मजाक उडाबा लाग्या। 25 अर जद
लोगानै बठै’ऊँ बारनै काढ दिन्यो गयो
जणा ईशु माईनै जार बी छोरी को हाथ
पकड़्यो जिऊँ बा छोरी जीगी। 26 इ बात
की चर्चा च्यारूमेर फैलगी।”

ईशु आँधानै आँख्या दिनी

27 अर जद ईशु बठै’ऊँ जार्या हा जणा
दो आँधा मिनख बाकै गेल हो लिन्या
अर हेल्हो देर खेबा लाग्या, “हे दाऊद
का बेटा, म्हार प दया कर।” 28 अर
जद ईशु घर क माईनै बड़गा जणा बे
मिनख बि बाकै कनै गया। बानै देखर
ईशु बाऊँ बुझ्यो, “के थानै विश्वास ह क
म थानै ओजुँ आँख्या दे सकूँ हूँ?” बे
बोल्या, “हाँ माराज!” 29 जणा ईशु बाकी
आँख्या क हाथ अड़ार, खयो “जंय्यां
थारो बिश्वास ह बंय्याई थारै सागै होवै।”
30 अर बे आँधा देखबा लाग्या। अर ईशु
बानै अंय्यां चितायो क इकै बारा म
खिनैई मना खिज्यो। 31 पण बे बठै’ऊँ
जार बि जघां म बा बाता को ढींढोरो
पिट दिन्यो।

गुँगा मिनखनै निरोगो करबो

32 जद ईशु बठै’ऊँ जार्या हा जणा
लोग एक गुँगानै जिकै माईनै ओपरी
बलाय ही बिनै ईशु क कनै लेर आया।
33 अर जद बिकै माईनै’ऊँ बी ओपरी
बलायनै काढ दिनी जणा बो मिनख
बोलबा लाग्यो, जणा बठै भीड़ ही जस्ती
ताजूब करर खेबा लागी, “म्हे इस्माएल
म अंय्यां को काम पेली कदैई कोनी
देख्यो।” 34 पण बठै खड़्या फरीसी
खेबा लाग्या, क ओ ओपरी बलाय
का सरदार की शक्तिऊँ ओपरी बलाया
न काढै ह।”

ईशुनै लोगा प दया आई

35 ईशु नगरी-नगरी गाँव-गाँव जार यहूदी
मिनखा की अरदास करबाली झाघो म
सीखातो हो अर परमेश्वर क राज क
बारै म चोखा समचार को हेल्हो पाड़तो,
लोगा का रोगनै दूर करतो होयो फिर्या
करतो हो। 36 अर ईशु जद बी भीड़नै
देखतो बानै बापै दया आती क्युँक बे
बी लल्डी की जंय्यां हा जिको गुवाल्ड्यो
कोनी होवै ह जिकै बजै’ऊँ बा अठिनै
बठिनै रूलति फिरै ह। 37 जणा ईशु
आपका चेलानै खेबा लाग्यो, ल्यावणी
आईड़ा खेत तो बोला ही पण ध्यानग्या
थोड़ा ही। 38 इ ताँई थे खेत का धणि’ऊँ
अरदास करो जिऊँ बे ल्यावणी करबा
ताँई ध्यानग्यानै भजै।

^e 9.23 यहूदी मिनखा म जद कोईकि मोत होवै चाये बो छोटो हो नहिस बडो हो जणा बे रोई पिटी क
सागै बांसुरी बी बजावी ही पण राजस्थान म अंय्यां कोनी होवै इ ताँई आ बांसुरी हाली बात इ आयत
म कोनी मांडी। पण यूनानी पोथ्या म आ बात बी मंडरी ह क बे बांसुरी बजार्या हा।

भेजेडा बारा चेला

10 ईशु आपका बारा चेलानै आपके कनै बुलार बानै ओपरी बलायनै काढबा की अर रोगलानै निरोगो करबा अर कमजोरीनै दूर करबा की शक्ति दिनी। 2बा बारानै भेजेडा चेला खेर बुलायो जाका नाम अंयां हः सऊँ पेल्या तो शमोन जिनै पतरस बी खेवै ह बिको भाईडो अंद्रियास, जब्दी को बेटो याकूब अर बिको भाईडो यहून्नो, अफिलिप्पुस, बरतुल्मै, थोमो, चुंगी लेबाळो मत्ती, हलफै को बेटो याकूब अर तधै, 4देश भक्त शिमोन, अर यहूदा इस्करियोती ओ बोई ह जखो ईशु न धोका'ऊँ पकड़वायो हो। 5ईशु बा बारानै ओ अधिकार दिन्यो अर हुक्म देर भेज्यो “गैर-यहूदी मिनखा की नगरी म मना जायो अर नाई सामरी नगरी म जायो। 6पण इस्त्राएल का मिनखा क कनैई जायो जखा गुमेड़ी लल्डया की जंयां ह। 7अर बाकै कनै जाओ अर हेल्लो पाड़ो क ‘ईशबर नगरी को राज साकड़े आगो ह’ 8अर रोगलानै निरोग करो, मरेड़ानै जिवावो, कोढ़चाँ का कोढ़नै धोवो अर ओपरी बलायनै काढो। जंयां थानै सितमित म मिल्यो ह थे बी सितमित म द्यो। 9थे न तो सोनो चाँदी ल्यो न ताम्बा का सिक्का अर न बटवो लिज्यो। 10अर नाई गेला ताँई झोलो न कुर्तो, न चप्पल न हाथ म लाठी लिज्यो, क्युँक कम'ऊँ कम ध्यानग्या रोटचा का तो हकधार होवी हीं। 11“थे जद बी कोई नगरी नहिस गाँव म जाओ जणा पेल्या बेरो करज्यो क बठै गत को मिनख कुण ह। अर जद

ताँई थे बठै'ऊँ नई जावो बाकै सागै ही रिज्यो। 12जि घर की थळी प पग धरो जणा बि घर का मिनखानै आसिरवाद दिज्यो। 13ज बि घर का मिनखा म एक जणो बि आसिरवाद क जोगो होसी जणा थारो आसिरबाद ओज्युँ थारै कनै आज्यासी। 14अर ज कोई थारो मान कोनी करै अर न'ई थारी बाता सूणै जणा थे बि घर अर बी नगरी'ऊँ बारै आर थारी चप्पल्या की धूळ झाड़ दिज्यो। अच्याँ कर'र थे बानै आ चेता दिज्यो क परमेशबर बानै सजा देसी क्युँक बे बिकी बात कोनी सूणी। 15म थार'ऊँ साची खेऊँ हूँ जद न्याय होसी, बि दिन बि नगरी की दशा सदोम अर अमोरा नगरी'ऊँ बी बेकार होसी।

भेजेडा चेलानै ईशु चेतायो

16सूणो म थानै ल्याल्या क माईनै लल्डया की जंयां भेज्युँ हूँ। इ ताँई थे साँप क जंयां चालाक अर कबूतर की जंयां भोला रिज्यो। 17अर थे मिनखा'ऊँ हुस्यार रिज्यो क्युँक बे थानै पकड़'र पंचा क हाथा सूप देसी अर बे थानै यहूदी मिनखा की अरदास करबाली झांघा लेज्यार बेत पड़वासी। 18थे मेरै बारा म सीख देवो हो इ बजै'ऊँ थानै राजा अर अधिकारिया क सामै लेज्याओ जासी, पण थानै बी टेम गैर-यहूदी मिनखा म मनै साबित करबा को मोक्षी मिलसी। 19जद बे थानै पकड़सी जणा थे आ चिन्ता मना करज्यो क थानै इब कोई खेणो ह क्युँक बी घड़ी पवित्र आत्मा थानै बतासी काँई खेणो ह। 20क्युँक बोलबाला थे

कोनी पण थारा पिता परमेश्बर की आत्मा थार मऊँ होर बोलसी। 21 भाई भाई न पकड़वार मरवासी, मा बाप टाबरा न मरवासी अर टाबर मा बापा क सामै होर बानै मरवागेरसी। 22 मेरै नाम की बजैँऊँ लोग थारऊँ नफरत करसी पण जखो मिनख आपकी अंतघडी ताँई सक्युँ सेसी बोई बचायो ज्यासी। 23 बे थानै थारी एक नगरी म सतावै जणा थे दूसरी नगरी म भागजाज्यो। अर म थारऊँ साची खेऊँ हूँ इस्माएल देश की सगळी नगर्या म थारै घूमबाऊँ पेलीई मिनख को बेटो आज्यासी। 24 क्युँक चेलो गुरुऊँ बडो कोनी होवै अर नई दास आपका मालिकऊँ बडो होवै ह। 25 इ ताँई चेलानै गुरु क बराबर होबा म अर दासनै मालिक क बराबर होबा म ही सबर राखणी चाये। अर जद बे मिनख घर का मालिक न ही बालजबूल खेवै ह जणा बिका घर का मिनखा क सागै तो ओर बी बुरो सलुक करसी।

मिनखा'ऊँ मना डरो पण परमेश्बरऊँ डरो

26 “इ ताँई थे बा मिनखा’ऊँ मना डरो, क्युँक जो क्युँ बी लूखेडो ह बिनै परमेश्बर चौड़ामै ल्यासी अर जो बी ओला म ह बिनै सामै ल्यासी। 27 इ ताँई म जो क्युँ बी थानै अँधेरा म बोल्यो हूँ थे बिनै दिन का च्यानणा म जोरऊँ बौलो अर जखी बाता म थानै ओला म खेऊँ हूँ बानै थे कोठा प चढ़र बौलो।” 28 “थे बा मिनखा’ऊँ मना डरो जखा थारी कायानै नास कर सकी ही पण थारी आत्मानै नास कोनी कर सकी।

पण परमेश्बरऊँ डरो जखो थारी आत्मा अर काया दोन्यानै नरग म गेरर नास कर सकै ह। 29 क्युँक एक डबळी हाळा सिक्का की दो चिङ्कल्याँ कोनी बिकै के। पण बामऊँ एक बि धरती प मैरै ह जणा बाकै बारै म थारा परमेश्बर पिता नै बेरो होवै ह। 30 उरै ताँई क परमेश्बर थारै सिर का एक एक बाळ बी गिण राख्या ह। 31 इ ताँई डरो मना क्युँक परमेश्बर की नजर्या म थारो मोल तो चिङ्कल्याँऊँ बि बोलो ह।”

मिनखा क सामै ईशुनै मानबो

32 “जखो बि मिनख मनै लोगा क सामै मानसी जणा म बी ईश्बर नगरी म रेबाळा पिता परमेश्बर क सामै बानै मानस्यू। 33 पण जखो बी मिनख मनै लोगा क सामै कोनी मानसी जणा म बी ईश्बर नगरी म रेबाळा पिता परमेश्बर क सामै बिनै कोनी मानस्यू।

34 “थे अँय्यां मना सोचो क म धरती प मिनखा को मेळमिलाप करबा आयो हूँ पण म तो बानै लड़ाबा आया हूँ। 35 म ओ करबा आयो हूँ क बेटो बाप क खिलाफ, बेटी मा क खिलाफ अर भू सासू क खिलाफ होवै। 36 मिनख का बेरी बिका घरकाई होसी। 37 “जखो बी मिनख मेरऊँ ज्यादा आपका मा-बापानै नहिस आपका बालबच्यानै चावै ह बो मेरै जोगो कोनी। 38 अर जखो बी मेरै ताँई दुख दर्द सेबा ताँई अर मरबानै त्यार कोनी बो मेरो चेलो होबा जोगो कोनी। 39 जखो बी आपका पिराण बचावै ह बो बिकी हानी उठावै ह, अर जखो बि मेरै बजैऊँ आपका पिराण देवै ह बो बिनै पासी।”

फल

40 “जखो बी थारो मान करै ह, बो मेरो बी मान करै ह; अर जखो मेरो मान करै ह बो मनै अधिकार क सागै भेजबाल्हा परमेश्वर को बी मान करै ह। 41 जखो बी परमेश्वर की खेबाल्हा को आ जाण’र मान करै ह की बो परमेश्वर की खेबाल्हो ह बिनै बोई फल मिलसी जो परमेश्वर की खेबाल्हानै मिलै ह। अर जखो बी धर्मी मिनख को आ सोचर मान करै ह क बो धर्मी मिनख ह जणा बिनै बि बोई फल मिलसी जो धर्मी मिनखनै मिलणो चाये। 42 अर म थानै साची खेऊँ हूँ ज कोई आ छोटा मऊँ एकनै बी मेरो चलो जाण’र एक गिलास ठण्डो पाणी प्यावै, बिनै बिको फल मिलसी।”

ईशु अर बतिष्मो देवाळो यूहन्नो

11 ईशु आपका बारा चेलानै आदेश देबा क पाछै बठै’ऊँ परचार करबा अर सीख देबा ताँई नगर्या म चलेगो। 2 जद यूहन्नो काळ कोठरी म ईशु का कामा की चर्चा सूणी जणा बो आपका चेलानै ईशु क कनै आ बुझबा ताँई भेज्यो, 3 थे बेई हो के जखा आबाला हा नहिस म्हें ओरनै उडिका? 4 ईशु बाऊँ बोलो थे जो क्युँ बी सूणो अर देखो हो बो सक्युँ यूहन्नानै जार बताद्यो। 5 आँधा ओज्यु देखी ही, लूला-लगडा चाली ही, कोढया को कोढ धुपर्यो ह। बेरा सूणै ही, मुदनै जिवायो जार्यो ह गरिबानै छुटकारा को समचार सुणायो जार्यो ह।

6 परमेश्वर बा मिनखा’ऊँ राजी ह जखा मेरपै बिश्वास करै ह। 7 अर जद यूहन्नो का चेला बठै’ऊँ चाल पड़या जणा ईशु लोगानै बतिष्मो देबाला यूहन्ना क बारा म खेबा लाग्यो। थे बिड़ म काँई देखबा गया हा? भाळ’ऊँ हालाती पानिनै। 8 जणा काँई देखबा गया हा? के किमति गाबा पेरेडा मिनखनै? सूणो जो किमति गाबा पेरी ही बे म्हेलमाल्या म रेवी ही। 9 जणा काँई देखबा गया हा? के परमेश्वर की खेबाल्हानै हा, पण म थानै बोलु हूँ जिनै थे देखबा गया हा बो परमेश्वर की खेबाल्हा’ऊँ बी बडो ह। 10 ओ बो ह जिकै बारा म शास्त्र म मंडर्यो ह:

“देख म मेरा दुतनै अधिकार क
सागै तेरै अगा’ऊँ भेज्ज हूँ।
जखो लोगा का हियानै तेरै ताँई
त्यार करसी।”^f

11 म थानै साची खेऊँ हूँ लूगाई’ऊँ जलमेडा सगळा मिनखा म यूहन्नो बपतिष्मो देवाल्हा’ऊँ बडो कोई मिनख कोनी जलम्यो। पण ईश्वर नगरी का राज म छोटा ऊँ छोटो बी बिऊँ बडो ह। 12 यूहन्ना की टेम’ऊँ लेर परमेश्वर का राज क सागै मारपिट करी जावै ह अर बे मारपिट करबाला जोरामरदी बि राजनै लेबा की कोशिश करै ह। 13 यूहन्ना की टेम ताँई सगळा परमेश्वर की खेबाल्हा अर मूसा को बिधान परमेश्वर को समाचार देता हा। 14 ज थार मऊँ कोई इ बातनै मानबो चावै क आबालो एलिय्यो ओई ह, जणा बो इनै मानल्ये। 15 ध्यान लगार’र सूणो। 16 म इ पिढी का मिनखा

^f 11.10 यूनानी पोथी म अंयाँ मंडर्यो ह क बो तेरै आबा ताँई गेलो त्यार करसी।

की बराबरी किऊँ करूँ? अ तो गुवाड़ म बैठचा बा टाबरा की जंय्यां ह जखा एक दुसरानै हेल्लो देर खेवै ह। 17“म्हें थार ताई बाजो बजाया पण थे नाच्याई कोनी। म्हें थार ताई बार-घाली पण थे रोयाई कोनी।” 18बतिष्ठो देबाळो यूहन्नो आयो बो ओरा की जंय्यां न तो चौखो खातो हो अर नई अंगरी पितो हो जणा बी लोग खया इकै माईनै ओपरी बलाय ह। 19मिनख को बेटो ओरा की जंय्याँ खातो-पितो आयो अर बे खेवै ह ओ पेटू अर पियकड़ ह चुंगी लेबाळा अर पाप्यां को भाईलो ह। परमेश्वर की बुद्धि प चालबाळा आपका कर्मा’ऊँ बिकी बुद्धिनै सई साबित करै ह।

परमेश्वर की सूणाइ न करबाळी नगर्या प धिक्कार

20ईशु बा नगर्यानै धिधक्कारबा लाग्यो जाकै माईनै बे बोळा सारा चमत्कार कर्या हा। क्युँक बैठ का मिनख आपका हियानै पापाऊँ कोनी फेर्या। 21खुराजिन अर बैतसैदा म रेबाळा मिनख प हाय ह अत्ता-अत्ता जोर का काम आ नगर्या म कर्या गया, ज अ काम सुर अर सैदा म कर्या जाता जणा बैठ का मिनख बोरी का गाबा पेरर खुद प राख बुरकार, कदका इ दिखा देता क बे पापाऊँ हियो फिरा लिया ही। 22पण न्याय हाले दिन थारी दशा सूर अर सैदा’ऊँ बोळी ज्यादा बुरी होसी। 23हे कफरनहूम के तू अंय्यां सोचै ह क ईश्वर नगरी जितो उठायो ज्यासी? पण तु तो पताळ म निचो गेर्यो जासी। क्युँक थार माईनै जो चमत्कार कर्या गया हा बे सदोम नगरी म कर्या

जाता जणा बा नगरी आज ताई भसी रेहती। 24पण म थारै’ऊ खैऊ हूँ न्याय क दिन थारा मिनखा की दशा सदोम का मिनखा’ऊँ ज्यादा खराब होसी।

ईशुनै मानबाळा न सुख स्यांति मिलसी

25बठैर्दै ईशु बोल्यो “हे परमेश्वर थे जो ईश्वर नगरी अर धरती न बणाबाळा हो अर थे ही आका मालिक हो म थारो धन्यवाद करूँ हूँ। थे आ बाता न ज्ञानिया’ऊ अर स्याणा’ऊ लूखार रास्व्या पण आनै मामूली मिनखा प प्रकट कर्या। 26अर थे अंय्या इ ताई कर्या हो क्युँक ओ थारी नजर्या म चौखो हो। 27मेरै हाथा म मेरो बाप सक्युँ सुप्यो ह अर बाप क अलावा कोई बी बेटानै कोनी जाणै अर कोई बी बेटा क अलावा बापनै कोनी जाणै। अर बे मिनख बापनै जाणै ह जिनै बेटो बतावै ह।” 28ईशु बाऊँ बोल्यो, “हे थकेडो अर बोज’ऊँ दवेडो मिनखो मेरै कनै आओ म थानै अराम देस्यूँ। 29थे मेरी हाळीनै लेल्यो अर बिनै लादल्यो अर थे मेरै’ऊँ सिखो क्युँक म सिदो-साधो अर मेरो हियो दया’ऊँ भेरेडो ह। जिऊँ थानै बी अराम मिलसी 30क्युँक मेरी हाळी अराम दायक अर मेरो बोज हळको ह।”

सबत क बारा म सूवाल

12 यहूदिया मिनखा क अराम हाळा दिन ईशु अर बाकाळा चेला खेता क माईन’ऊँ जार्या हा जणा चेलानै भूख लागी इ ताई बे खेत मऊँ ग्युँ की बाल्या तोड़-तोड़र खाबा लाग्या।

2 फरीसी बानै अंय्यां करता देख ईशुनै बोल्या थारा चेला अराम हाळा दिन बो काम क्यूँ करै जो आपणा विधि विधान म बरजेडो ह 3 ईशु बाकी बाता सुणार बानै बोल्यो थे शास्त्र म ओ कोनी बाच्या क जद दाऊद अर बिकाळा साथ्यानै भुख लागी जणा बे काँई कर्या हा? 4 बो आपका साथ्या क सागै परमेश्वर का तम्बू म जार परमेश्वर क चढाइडी रोटचाँ खाई जानै याजक सिवा ओरनै बरजेडो हो। 5 थे मूसा का विधि-विधान म ओ कोनी बाच्यां क अरामहाळा दिन मंदर का याजक इ मंदर म अरामहाळा दिन का नियमनै तोडै ह जणा बी बानै कोई क्युँई कोनी बोलै। 6 पण म थानै खेऊँ हूँ अठै जो ह बो मनदर'ऊँ बी बडो ह। 7 ज थे शास्त्रा म जो मांडेडो ह बिकै बारा म जाणता तो थे ओ बी जाणता की म मिनखा'ऊँ ओ चाऊँ हूँ क बे दया करी न कि ज्यानवरा की बली चढावी। जिऊँ थे बा मिनखानै जो खरा ही दोषी ना बतावो। 8 क्युँक नर को जायो अरामहाळा दिन को बी मालिक ह।

हवा भेहडा मिनख को हाथनै निरोगो करबो

9 ईशु बठै'ऊँ चालर यहूदी मिनखा की अरदास करबाळा झाघां गयो। 10 बठै एक मिनख हो बिकै एक हाथ क हवा भेहगी ही, बठै क्युँक मिनख हा बे ईशु प दोष लगाबा ताँई बुज्या आराम हाळा दिन खिनै निरोगो करबो ठिक ह के? 11 ईशु बानै बोल्यो म थानै बुजू हूँ जिकै कनै एक लल्डी हो अर बा खाडा म

पडज्या जणा थे अरामहाळा दिन बिनै बारै कोनी काडो के? 12 जदकि मिनख को मोल तो लल्डी'ऊँ ज्यादा ह। इ ताँई अरामहाळा दिन भलाई करबो चोखो ह। 13 जणा ईशु बी हवा भेहडा मिनखनै बोल्यो तेरो हाथ आगै कर बो हाथनै आगै कर्यो अर बिको हाथ दूसरा हाथ की जंय्यां पेली हो बय्याँई निरोगो होगो। 14 जणा बे फरीसी बारै आर ईशुनै कय्यांसिक मारा ईकी साजिस रचबा लाग्या।

परमेश्वर आपका दासनै टाळ्यो

15 ईशु बाकी चाल समझायो अर बठै'ऊँ चलेगो। पण भीड़ बाकै गेल हो लिनी। ईशु सगळा रोगलानै निरोगो कर्यो। 16 ईशु बा मिनखानै चितायो क मैरै बारा म खिनैई मना खिज्यो। 17 ओ इ ताँई होयो जंय्यां क यशायाह परमेश्वर की खेबाळो जो बचन खया ह बे पुरा होवै,

18 “देखो ओ मेरो दास ह जिनै म

टाळ्यो हूँ,

ओ मेरो लाडलो ह, जिऊँ म
बोलो राजी हूँ।

म मेरी आत्मा इकै उपर उतारस्यूँ,

अर ओ गैर-यहूदी मिनखा म

हेल्लो पाड़सी क परमेश्वर

इमानदारी'ऊँ बाको न्याय

करसी।

19 ओ न तो खिऊँ लड़सी, अर नाई
गळ्याकुच्या म कूकसी।

20 जद ताँई बो धरती प धार्मिकता न
ई फैलादये बो कोई न इ नास
कोनी करै।

चाये कोई अटकेड़ी पानि की जंय्यां
हो नहिस दिया की बुझबाली
लौई की जंय्यां कमज़ार हो।

21 अर सगळा मिनख बिका नाम प इ
आस लगासी।”

ईशु अर बालजुबुल

22लोग ईशु क कनै एक मिनखनै ल्याया
जिमै ओपरी बलाय ही जिकी बजै'ऊं बो
आँधो अर गूँगो हो अर ईशु बीनै नरोगो
कर दिन्यो जिकी बजै'ऊं बो देखबा
अर बोलबा लागगो। 23लोग इनै देखबर
ताजूब करता होयो बोलबा लागया के ओ
दाऊद को वंश मसी ह? 24पण फरीसी
बाकी बाता न सुण'र खेबा लागया ईशु
ओपरी बलाय का सरदार बालजुबुल की
शक्तिऊं बानै निकालै ह। 25ईशु बाकी
हिया की बातानै जाण'र बा'ऊं बोल्यो
जि राजपाट म फूट पड़ज्या जणा बिको
नास होज्यावै ह। अर जि नगरी नहिस
घर म फुट पड़ज्या जणा बो कथ्याँ भस्यो
रे सकै ह? 26अर ज शैतान शैतान को इ
बेरी होबा लागयो जणा बिको राज कथ्याँ
बण्यो रेसी? 27अर ज म बालजुबुल
की मदत'ऊं ओपरी बलायनै काढू हूँ
जणा थारला बी बालजुबुल की शक्तिऊं
काडता होगा? जणा इ बात ताँई बेरी
थानै गळत साबित करसी। 28अर ज म
परमेश्बर की आत्मा'ऊं ओपरी बलायनै
काढू हूँ जणा इऊं आ साबित होवै ह
क परमेश्बर को राज थारै साकड़ै ई ह।
29ज कोई मिनख कोई तगड़ा मिनख
को घर लुटबो चावै ह तो पेली बि घर
का तगड़ा मिनखनै बाँधसी बिकै पाछैई
बि घरनै लुट सकै ह। 30जखो मैरै सागै

कोनी बो मैरै खिलाफ अर जखो मिनखानै
मेरा चेला होबा ताँई भेलो कोनी करै बो
बानै मेर'ऊं दूर लेज्यावै ह। 31इ ताँई म
थानै खैऊ हूँ मिनखा का मूँडा'ऊं करीड़ी
सगळी बुराई अर पाप माफ हो सकी ही,
पण जखो पबितर आत्मा क खिलाफ
बुराई करै ह बिनै माफी कोनी। 32अर
ज कोई मिनख का बेटानै भलो बुरो खेवै
ह जणा बिनै परमेश्बर माफ कर सकै
ह। पण जखो मिनख पबितर आत्मा क
खिलाप क्युँ खेवै ह तो बिनै न तो इ
जुग म अर न आबाला जुग म माफी ह।

जंस्यो पेड़ बिस्यो फळ

33थे जाणो हो ज थानै फळ खाणो
ह तो थानै फळ को इ दरख्त लागाणो
पड़सी, क्युँक हर दरख्त क खाबाला
फळ कोई लागै। अर दरख्त आपका
फळया'ऊं पिच्याणयो जावै ह। 34हे
सपोलो! जद थेर्ई बुरा हो जणा थारै
मूँडा'ऊं चोखी बाता कथ्याँ बोलस्यो?
क्युँक जो हिया म होवै बोई बारै आवै
ह। 35एक भलो मिनख आपका हिया'ऊं
चोखी बाता बोलै ह। जदकी बुरो मिनख
आपका हिया'ऊं बुरी बाता बोलै ह।
36पण न्यायहालै दिन सगळा मिनखानै
आपकी खेहड़ी बुरी बाता को लेखो
देणो पड़सी। 37क्युँक तेरी खेहड़ी बाता
की बजै'ऊं इ तनै दोषी नहिस निरदोस
साबित कर्यो ज्यासी।

ईशु'ऊं ईशबर नगरी की शेलाणी की माँग

38शास्त्रानै सीखाबाल अर फरीसी ईशु
क कनै आया अर बे ईशु'ऊं बोल्या औ

गुरु थे म्हानै कोई ईश्वर नगरी की शेलाणी दिखावो। 39पण ईशु बाँके बोल्यो
इ जुग का बुरा अर कुकर्म करबाली
पिढ़ी ईश्वर नगरी को चिन माँगे ह।
पण म थानै खैऊ हूँ योना परमेश्वर की
खेबाळा की बातानै छोड़र कोई चिन
आ लोगोनै कोनी दिखाई ज्यासी 40जंय्यां
योनो तीन दिना ताँई मछी क पेट म रह्यो
हो बंयाँई नर को जायो बी तीन दिना
ताँई धरती क तलै रेसी। 41जद न्याय
होसी बी दिन मिनवे नगरी का मिनख इ
जुग का मिनखा क सागै खड़्या होसी
अर आपै दोष लगासी क्युँक निनवे का
मिनख योना को परचार सूणर बे हियानै
पापँऊँ फिरा लिन्या हा। पण अठै जो
ह बो योना ऊँ बी बड़ो ह। 42शिबा की
राणी न्यायहालै दिन इ पिढ़ी प दोष
मंडसी क्युँक बा धरती का इ कुणा ऊँ
बि कुणा म सुलेमान क कनै ज्ञान लेबा
गई हीं पण अठै जो ह बो सुलेमान ऊँ
बी बोलो बडो ह।

ओपरी बलाय को पाढो आबो

43जद ओपरी बलाय मिनखा ऊँ
निकळ ज्यावै ह, जणा बा अराम ताँई
सूनी झांघा ढुढति फिरै ह पण बिनै झांघा
कोनी मिलै। 44जणा बा ओपरी बलाय
खुदरँऊँ खैवै ह क म ओज्यु बी घर म
ही ज्याऊँ जिकै माईनै ऊ म निळर आई
हूँ। अर जद बा बठै पाढी जावै ह जणा
बा बि घरनै झाड़यो-बार्यो अर सज्यो-
सजायो खाली देखै ह। 45जणा बा बठै ऊ
जार आपकै सागै सात और बुरी ओपरी
बलाय न लेर पाढी बठै आवै ह अर बे
बि मिनख म बड़ ज्यावै अर बी मिनख

की दशा पेल्या'ऊँ बी ज्यादा बुरी कर
दे ह। इ जुग का मिनखा की दशा बी
अंय्याँई होसी।

ईशु की माँ अर भाई

46जद ईशु भीड़ऊँ बतळार्यो हो जणा
बठै बाकी माँ अर भाईड़ा आर बारनै
खड़्या होगा। बे ईशु ऊ बातचित करबा
ताँई बिनै उडिकबा लाग्या। 47जणा भीड़
मँऊँ कोई मिनख ईशु न बोल्यो थारी माँ
अर भाईड़ा बारनै खड़्या ही बे थारँऊँ
बाताचिता करबो चावै ह। 48ईशु बिकी
इ बात न सुणर बीनै बोल्या कुण मेरी
माँ अर कुण मेरो भाई ह? 49अर ईशु
आपका चेला कानी हाथ करर बोल्यो
देख्यो अ मेरी माँ अर भाईड़ा ही।
50क्युँक जखा बी मिनख मेरा ईश्वर
नगरी बाप की इच्छा गेल चालै ह बेर्इ
मेरा भाई, भाण अर माँ ह।

बीज बोबाळा की निति-कहाणी

13 जनाडैई ईशु आपका चेला क
सागै दरियाव क किनारै जार
बैठगो। 2जणा बाकै च्यारूमेर भीड़
भेठी होगी इ ताँई बे एक नावड़ी प
चढ़गा। पण बा भीड़ किनारै प इ खड़ी
री। 3ईशु बाऊँ निति- कहाण्या म बोली
बाता खयी। बे बानै खया एक बर एक
किसान बिज बोबानै गयो। 4क्युँक बीज
गेला क सारै पड़्या जिऊँ चिड़कल्याँ
आर बानै चूगलेगी। 5अर क्युँक कांकरा
म जार पड़्या बे बोला तावळा उग्या
क्युँक माटी गेरी कोनी ही। 6पण जद
सूरज उग्यो जणा नमी ना मिलबा की
बजै ऊँ बलगा। क्युँक बे जड़ कोनी

ਪਕੜ੍ਹਿ। 7 ਅਰ ਕਿੱਕ ਝਾਡ੍ਹਿ ਮ ਜਾਰੇ
ਪਢ੍ਹਿਆ ਅਰ ਝਾਡੀ ਬਾਕੈ ਸਾਗੈ ਬਢ਼ਰ ਬਾਨੈ
ਦਾਬ ਦਿਨੀ। 8 ਅਰ “ਕਿੱਕ ਉਪਛੀ ਧਰਤੀ
ਪ ਪਢ੍ਹਿਆ ਜਿੱਕੇ ਬੇ ਸੋ ਗੁਣਾ, ਸਾਠ ਗੁਣਾ
ਅਰ ਤੀਸ ਗੁਣਾ ਫਲਧਾ”। 9 ਜਿਕਨੈ ਸੂਣਬਾ
ਤੌਈ ਕਾਨ ਹੀ ਬੇ ਬਾਨੈ ਖੋਲ ਲੇ।

ਨਿਤ- ਕਹਾਣਿਆ ਕੋ ਮਤਬਲ

10 ਚੇਲਾ ਈਸੁ'ਊੰ ਬੁਜਿਆ ਥੇ ਲੋਗੋਊੰ ਨਿਤ
ਕਹਾਣਿਆ ਮ ਇ ਬਾਤ ਕਿੱਥੁੰ ਕਰੋ ਹੋ। 11 ਈਸੁ
ਬਾਊੰ ਬੋਲਧੋ, ਥਾਨੈ ਤੋ ਈਸ਼ਵਰ ਨਾਗਰੀ ਕੋ
ਰਾਜ ਕੋ ਭੇਦ ਕੋ ਜਾਨ ਦਿਨਧੋ ਗਯੋ ਹ
ਪਣ ਬਾਨੈ ਕੋਨੀ ਦਿਧੋ ਗਯੋ। 12 ਜਖੋ ਮੇਰੀ
ਬਾਤ ਪ ਗੋਰ ਕਰੈ ਅਰ ਸਮਝੈ ਹ ਪਰਮੇਸ਼ਵਰ
ਬਿਨੈ ਆਂਹ ਘਣੀ ਸਮਝੈ ਦੇਸੀ ਪਣ ਜਖੋ
ਮੇਰੀ ਬਾਤ ਪ ਗੋਰ ਕੋਨੀ ਕਰੈ ਹ ਬੇ ਜੋ
ਕਿੱਥੁੰ ਬੀ ਜਾਣੈ ਹ ਬਿਨੈ ਬੀ ਭੂਲ ਜਧਾਸੀ।
13 ਮ ਬਾਊੰ ਨਿਤ-ਕਹਾਣਿਆ ਇ ਤੌਈ ਖੇਊੰ ਹੁੰ
ਕਿੱਥੁੰਕ ਮ ਜੋ ਕਿੱਥੁੰ ਕਰੁੰ ਹੂੰ ਬੋ ਬਾਨੈ ਸੂਝੈ
ਹ ਪਣ ਸਮਲੈ ਕੋਨੀ ਅਰ ਜੋ ਖੇਊੰ ਹੂੰ ਬੇ
ਸੂਣੈ ਹੀ ਪਣ ਬਿਨੈ ਸਮਝੈ ਕੋਨੀ। 14 ਬਾਕੈ
ਤੌਈ ਪਰਮੇਸ਼ਵਰ ਕੀ ਖੇਬਾਲਾ ਯਸਾਧਾਹ ਕੀ
ਬਾਤ ਸਹੀ ਸਾਬਿਤ ਹੋਈ:

ਥੇ ਸੁਣਸਾਂਹੀ ਅਰ ਸੁਣਤਾਈ ਰੇਸਾਂਹੀ ਪਣ
ਥਾਰੈ ਸਮਝੈ ਮ ਕਿੱਥੁੰਈ ਕੋਨੀ
ਆਸੀ।

ਥੇ ਦੇਖਤਾ ਰੇਸਾਂਹੀ ਪਣ ਥਾਨੈ ਕਿੱਥੁੰਈ
ਕੋਨੀ ਸੁਝਾਸੀ।

15 ਕਿੱਥੁੰਕ ਆ ਮਿਨਖਾ ਕੋ ਮਨ ਕਾਠੋ
ਛੋਗੋ ਆਨੈ ਕਾਨਾ'ਊੰ ਸੂਣਬੋ ਬੰਦ
ਛੋਗੋ ਆਕੀ ਆੱਖਧਾ ਕ ਪਟ੍ਟੀ
ਬੰਦਗੀ ਨਈ ਤੋ ਬਾਕੀ ਆੱਖਧਾ
ਦੇਖਤੀ,
ਅਰ ਬਾਕਾ ਕਾਨ ਸੂਣਤਾ ਅਰ ਬਾਕਾ
ਮਨ ਸਮਝਤਾ ਜਿੱਕੇ ਬੇ ਧਾਪ'ਊੰ

ਮਨ ਫਿਰਾ'ਰ ਮੈਰੈ ਕਨੈ ਆਤਾ ਜਿੱਕੇ
ਮ ਬਾਨੈ ਛੁਟਕਾਰੀ ਦੇਤੋ।

16 ਪਣ ਥਾਰ'ਊੰ ਪਰਮੇਸ਼ਵਰ ਰਾਜਿ ਹ,
ਕਿੱਥੁੰਕ ਥੇ ਦੇਖੋ ਅਰ ਸਮਝੋ ਹੋ। 17 ਕਿੱਥੁੰਕ
ਮ ਥਾਨੈ ਸਾਚੀ ਖੇਊੰ ਹੂੰ, ਪਰਮੇਸ਼ਵਰ ਕੀ
ਖੇਬਾਲਾ ਅਰ ਧਰਮੀ ਮਿਨਖ ਆ ਬਾਤਾਨੈ
ਦੇਖਬੋ ਅਰ ਸੁਣਬੋ ਚਾਵਾ ਹਾ ਪਣ ਬੇ ਨ ਤੋ
ਸੁਣ ਸਕਿਆ ਅਰ ਨਾ ਦੇਖ ਸਕਿਆ।

ਬੀਜ ਬੋਬਾਲਾ ਕੀ ਕਹਾਣੀ ਕੋ ਮਤਬਲ।

18 ਬੀਜ ਹਾਲ਼ੀ ਨਿਤ-ਕਹਾਣੀ ਕੋ ਭੇਦ
ਸੂਣੋ। 19 ਗੇਲਾਕੈ ਬਿਚ ਮ ਪਡ੍ਹਿਆ ਬਿਜ
ਬਾ ਮਿਨਖਾਨੈ ਦਰਸਾਵੈ। ਜਖਾ ਸੂਣੈ ਹ ਕ
ਪਰਮੇਸ਼ਵਰ ਮਿਨਖਾ ਕ ਮਨਾ ਮ ਕੇਧਾਂ ਰਾਜ
ਕਰੈ ਹ ਪਣ ਬਿਨੈ ਸਮਝੈ ਕੋਨੀ ਬੇ ਜੋ ਕਿੱਥੁੰ
ਸੂਣਧਾ ਬਿਨੈ ਆਂਹ ਸ਼ੈਤਾਨ ਭੂਲਾ ਦੇਵੈ ਹ।

20 ਅਰ ਜਖਾ ਬੀਜ ਕਾਂਕਰਾ ਮ ਪਡ੍ਹਿਆ ਬੇ
ਬਾ ਮਿਨਖਾਨੈ ਦਰਸਾਵੈ ਜੋ ਬਚਨਾਨੈ ਰਾਜੀ ਹੋਰ
ਤਾਬਲਾਸਾ ਮਾਨੈ ਹ, 21 ਪਣ ਬਚਨ ਹਿਧਾ
ਕ ਮਾਈਨੈ ਕੋਨੀ ਭਸਾਵੈ ਜਦ ਪਰਮੇਸ਼ਵਰ
ਪ ਬਿਵਾਸ ਕਰਬਾ ਕੀ ਬਜੈ'ਊੰ ਮਿਨਖ
ਬਾਊੰ ਬੁਰੋ ਬਰਤਾਵ ਅਰ ਬਾਨੈ ਸਤਾਵੈ ਜਣਾ
ਬੇ ਥੋਡਾਈ ਦਿਨਾ ਮ ਬਿਵਾਸ ਕਰਬੋ ਛੋਡ
ਦੇਵੈ ਹੀ। 22 ਅਰ ਜਖਾ ਬੀਜ ਝਾਡਿਆ ਕ
ਮਾਈਨੈ ਪਡ੍ਹਿਆ ਅ ਬਾ ਮਿਨਖਾ ਨ ਦਰਸਾਵੈ
ਜਖਾ ਪਰਮੇਸ਼ਵਰ ਕਾ ਬਚਨ ਸੂਣੈ ਤੋ ਹੀ ਪਣ
ਈ ਦੁਨਿਧਾਰੀ ਕੀ ਚਿੰਨਾ ਅਰ ਧਨ-ਧੋਲਤ
ਕੋ ਲਾਲਚ ਪਰਮੇਸ਼ਵਰ ਕਾ ਬਚਨਾਨੈ ਭੂਲਾ
ਦੇਵੈ ਹ ਕ ਪਰਮੇਸ਼ਵਰ ਬਾਊੰ ਕਾਈ ਚਵੈ ਹ।
23 ਜਖਾ ਬੀਜ ਉਪਛੀ ਧਰਤੀ ਪ ਪਡ੍ਹਿਆ ਅ
ਬਾ ਮਿਨਖਾ ਦਰਸਾਵੈ ਹ, ਜਖਾ ਮੇਰਾ ਬਚਨਾ
ਨ ਸੂਣੈ ਹ ਅਰ ਬਾਨੈ ਸਮਝੈ ਅਰ ਬਿਕੈ ਗੇਲ
ਫਲ ਲਧਾਵੈ ਹ। ਜਿੱਕੇ ਬੇ ਸੌ ਗੁਣਾ, ਸਾਠ
ਅਰ ਤੀਸ ਗੁਣਾ ਫਲੈ ਹ।

खरस्वार बीज की निति-कहाणी

24ईशु बानै एक ओर निति-कहाणी खड़ी। ईश्वर नगरी को राज बी मिनख की जंयां ह जखो आपका खेत म चोखा बीज बोयो। 25पण जद मिनख सोर्या हा जणा बी आदमी को बेरी आर ग्युकै क बिच म खरस्वार बोर चलेगो। 26अर जद ग्युं उग्यो अर बाकै बाढ़ी आबा लागी जणा खरस्वार बी उगाई। 27जणा मजुरिया आपका मालिक कनै आर खेबा लाग्या थे तो खेत म चोखो बीज कोनी बोयो के जणा आ खरस्वार कठैँ^{अँ} आई? 28बो मालिक बाऊँ बोल्यो ओ काम तो कोई बेरी को लागै। जणा मजुरिया बिऊँ बुज्या थे बोलो म्हे बि खरस्वारनै उखाड़ फेंका। 29बो बोल्यो अंयां मना करज्यो क्युँक थे खरस्वार क सागै ग्युं बी उखाड़ देस्यो। 30जद ताऊँ फसल त्यार ना होज्यावै आनै ग्युकै सागैइ बढबा द्यो, ल्यावणी की टेम म मजुरिया^{अँ} खेस्यु क बे पेली खरस्वारनै काटर बाकी पुणी बणार बिनै बाळ द्ये बिकै पाछै ग्युं की ल्यावणी करर बिनै बखार्या म भेळो करो।

क्युंक और निती कहाण्या

31ईशु बानै एकोर नीति कहाणी सूणाई; ईश्वर नगरी को राज सरश्यु का बीज की जंयां ह, जिनै कोइ मिनख आपका खेत म बोयो। 32ओ सगळा बीजाऊँ छोटो होवै पण उगबा क पाछै सगळा साग-पात म स^{अँ} उच्यो बोझो होवै अर इकै डाळ्या प पंक्षी घोसळो घालै ह।

33ईशु बानै एकोर नीति-कहाणी खड़ी ईश्वर नगरी को राज खमिर की जंयां ह। एक लूगाई चिनोसोक खिमर लेर बिनै घणा सार आटा म मिलार मेहलदी अर बि सगळा आटो को खमिर उठगो।

34ईशु अ सगळी बाता लोगा^{अँ} निति-कहाण्या म बोल्या करता हा बे भीड़नै बिना निति-कहाण्या क क्युँइ कोनी बोलता हा। 35अंयां बे इ ताऊँ करता हा क्युँ क परमेश्वर की खेबाळा जो बचन बोल्या हा बे पुरा हो,

“म मेरो मूंडो निति-कहाणी खेबा
ताऊँ ही खोलस्यूँ।

अर इ सृष्टि की रचना^{अँ} जखा
भेद ओलामै हा बानै म सामै
ल्यास्यूँ।”

खरस्वार का बीज की निति-कहाणी को मतबल

36ईकै पाछै ईशु बी भीड़नै बिदा करके घरा चलेगो। जणा बाका चेला बाऊ बोल्या, गुरू म्हाने खरस्वार बीज की कहाणी को मतबल समझावो।

37ईशु बानै बोल्यो जखो चोखा बीज बोया बो मिनख को बेटो ह। 38खेत इ जगतनै दिखावै ह अर चोखा बीज ह बे परमेश्वर क राज का टाबर ही अर खरस्वार शैतान की ओलाद ह। 39जखो खरस्वर बोवै ह बो शैतान ह। ल्यावणी को टेम इ दुनिया को अंत ह। ल्यावणी करबाळा ईश्वर नगरी दूत ही। 40अर जंयां खरस्वारनै भेळी करर बाल्यो गयो बंयाई इ दुनिया क आखरी म होसी। 41मिनख को बेटो आपका ईश्वर नगरी दूतानै अधिकार क सागै भेजसी

बे च्यारूमेरूं बा सगळा मिनखानै भेळा करसी जखा दुसरा मिनखा'ऊ पाप करवावै ह अर जखा परमेश्वर की इच्छा कोनी मानै। 42बानै भेळा करके आग का कुण्ड म गेर दियो ज्यासी जठै रोबो अर दात पिसबो होसी। 43पण धर्मी मिनख परमेश्वर का राज म सूरज की जंयां चमकसी। जिकै कान ह बो बानै खोलल्यो।

मोती अर धन की निति-कहाणी

44ईश्वर नगरी को राज खेत म गाडेड़ा धन की जंयां ह। ओ एक मिनख न लाध्यो पण बो बिनै ओज्युँ बठैर्ड लुखा दिन्यो। अर बो राजी होर जो क्युँ बी बिकै कनै हो बो बिनै बेच'र बि खेतनै मोल ले लिन्यो। 45“ईश्वर नगरी को राज बी जोरी की जंयां ह जखो चोखा मोत्या की खोज म हो। 46अर जद बिनै एक किमती मोती मिल्यो जण बो आपको सक्युँ बेच बाच'र बि मोतीनै मोल ले लिन्यो।

मंछी पकड़बा की निति-कहाणी

47ईश्वर नगरी को राज अच्याँ ह जंयां क क्युँक मछवारा आपका जाळनै दरियाव म गेर्या जिमै सगळी भात की मछचा फसगी। 48अर जद बो जाळ भरगो जण बिनै किनारै प खिच ल्याआ। अर बैठ'र बा मऊँ चोखी-चोखी मछचानै तो छाबड़ा म भेळी कर ली अर जखी ख्युई काम की कोनी ही बानै फिंक दी। 49इ दुनिया की अंत घडी बी अच्याँइ होसी ईश्वर नगरी दूत आसी अर बे धर्मियानै पापी मिनखा'ऊ न्यारा करसी।

50अर पाप्यां न आग का कुण्ड म गेर दियो ज्यासी जठै रोबो अर दात पिसबो होसी।

51ईशु बुझ्यो थे आ बातानै समझ्यो हो के? बे बोल्या हा। 52जणा ईशु बाऊँ ख्यो जता बी शास्त्रानै सीखाबाळा ज्ञानी परमेश्वर का राज का चेला बण्या ही बे बी घर का मालिक की जंयां ह, जखो बक्सा'ऊँ नयी अर पुराणी चिजा निकाळै ह।

ईशु को नासरत म आबो

53ईशु निति-कहाणी खेबा क पाछै बठैर्ऊऊँ चलेगो। 54आपकी नगरी नासरत म आर यहूदी मिनखा की अरदास कराबाळी झघां म परचार करबा लाग्यो। जणा बे ताजुब कर'र खेबा लाग्या इनै अच्याँ की बुद्धि अर चमत्कार करबाकी शक्ति कठैर्ऊऊँ मिली। 55के ओ खाती को छोरो कोनी? के इकी माँ को नाम मरियम अर इकै भाईड़ा को नाम याकूब, यसूफ, शमोन अर यहूदो कोनी। 56इकी सगळी भाणा आपणै बिच मई कोनी रेवै के? जणा इकै कनै आ बुद्धि अर चमत्कार करबा की शक्ति कठैर्ऊऊँ आई? 57इ ताँई बे ईशु को मान कोनी कर्या। ईशु बोल्यो परमेश्वर की खेबालानै बिकी खुद की भौम अर परवारनै छोड़'र सगळी झघां मान मिलै ह। 58बाकै बिश्वास न करबा की बजैर्ऊऊँ ईशु बठै ओर ताजुब का काम कोनी कर्या।

बतिष्मो देबाळा यूहन्ना की हत्या

14 जद राजा हेरोदेश गलिल को राजा हो जणा बो ईशु

क बारा म सूण्यो। 2 अर बो आपका दासा'ऊँ बोल्यो, “के ओ बो बतिष्मा देबालो यहून्नो ह? ओ मरेड़ा'ऊँ ओज्युँ जीन्दो होगो दिखै। इ ताँई इकै माईनै चमत्कार करबा की शक्ति ह।” 3-4 क्युँक हेरोदेश आपका भाई पिलिपुस क जिन्दा रेतासेता बिकी लूगाई'ऊँ ब्या कर लिन्यो हो इ ताँई यहून्नो हेरोदेशनै ओळमो दियो। जणा हेरोदियास क खया म आर बिनै कोठड़ी म गिरवा दिन्यो। 5 अर बो यहून्नानै मारबो चाहो हो, पण बो लोगा'ऊ डरतो हो क्युँक बे यहून्नानै परमेश्वर की खेबालो मानता हा। 6 पण जद हेरोदेस राजा को जलम दिन आयो जणा हेरोदेयास की बैटी दरबार म नाचर राजा हेरोदेसनै बोलो राजी कर दियो। 7 अर बो बिऊँ सोगंध खार बोल्यो, मांग जो क्युँ बी तू माँगसी बो म तनै देस्यु। 8 अर बा आपकी माँ का खेबा म आर बोली, मनै यहून्ना बतिष्मा देबालो को सिर थाळी म धर दिन्यो जावै। 9 आ बात सूणर राजा बोलो दुःखी होयो पण बो आपका बोलेड़ा बचन अर मेहमाना क सामै बोलड़ी बात की बजै'ऊ बिकी मांगनै पुरी करबा ताँई हूकम दे दिन्यो। 10 बो आपका आदम्यानै काळ कोठरी क माईनै भेज्यो जिऊँ क बे यहून्ना का सिरनै काटर ल्यावै। 11 अर यहून्ना को सिर काटर थाळी म धर ल्यायौ गयो अर बि छोरीनै दियो गयो अर बा छोरी आपकी माँ न लेज्यार दे दिनी। 12 अर यूहून्ना का चेला आर बाकी लासनै लेज्यार गाड दिन्या। अर ईशु क कनै जार ओ समचार दियो।

ईशु पाँच झार मिनखानै धपायो

13 जद ईशुनै ओ समचार लाग्यो जणा बे एक न्यावड़ी म बैठ'र बीड़ कानी चाल पड़्या। जणा मिनख आपकी नगर्याऊँ निकल्ठर बाकै गेल हो लिन्या। 14 अर जद ईशु न्यावड़ी'ऊँ किनारै प उतर्या जणा बे भीड़नै सामै खड़ी देखी। बानै बी भीड़ प दया आई अर बढ़ै जता बी रोगला हा ईशु बानै निरोगो कर्या। 15 अर जद दिन डळगो जणा चेला ईशु क कनै आर खेबा लाग्या, “आपा उजाड म हा अर बोलो मोड़ो बी होगो ह इ ताँई थे इ भीड़ न बिदा करो जिऊँ क अ कनै का गावाँ म जार खाबा ताँई मोल लेर खा सकी।” 16 पण ईशु बोल्यो आनै कठैई जाबा की जुरूत कोनी, थेइ आनै खाबा ताँई द्यो। 17 बे खेबा लाग्या म्हारै कनै दो मछी अर पाँच रोट्याँ क सिवा क्युँई कोनी ह। 18 ईशु बोल्यो बानै मैरै कनै ल्याओ। 19 अर बे भीड़ का मिनखा'ऊ बोल्या थे घास प बैठ ज्याओ। बिकै पाछै बे बा पाँच रोट्याँनै अर दो मछ्यानै लेर ईश्वर नगरी क कानी देख्या अर परमेश्वरनै धन्यबाद देर बा रोट्याँ का अर मछ्या का टुकड़ा करर आपका चेलानै देता गया अर चेला लोगानै देता गया। 20 सगळा मिनख धापर खा लिन्या। बिकै पाछै बी बे बचेड़ा टुकड़ा'ऊँ बारा चोल्या भरर उठाया। 21 बढ़ै लुगाया अर टाबरानै छोड़ खाबालो म आदम्या आदम्या की गिणति पाँच झार ही।

ईशु को पाणी प चालबो

22बा बाता क पाछै ईशु आपका चेलानै बोल्यो थे नावडी म बैठ'र दरियाव क परलै नाकै चालो म आ मिनखानै बिदा करके आऊँ हूँ। 23अर बे मिनखानै बिदा कर'र डूँगर प अरदास करबा ताँई चलेगा। बो मोडै ताँई एकलोई हो। 24अर बाका चेला नाव म बैठ'र कोसा दूर चलेगा अर नावडी लेहरा'ऊँ झोळा खाबा लागी। क्युँ'क सामै की भाळ ही। 25भाग-पाटच्या ईशु पाणी प चालतो होयो बाकै कनै गयो। 26चेला बानै पाणी प चालता देख्या जणा डरगा अर आपसर्या म खेबा लाग्या ओ तो भूत ह! अर आ खेर बे सगळा डर क मारै चिलाबा लाग्या। 27ईशु तावळो सो बोऊँ बोल्यो हिम्मत राखो मै हूँ! थे मना डरो। 28पतरस बाकी इ बाता न सूण'र बोल्यो प्रबु ज थे हो तो मनै बी इ पाणी प चाल'र थारै कनै आबा ताँई हुक्म द्यो। 29ईशु बिऊँ बोल्यो आज्या। अर पतरस न्यावडी'ऊ उत्तर ईशु कानी चाल पड्यो। 30पण जंद बिको ध्यान लेहरा कानी गयो जणा बो डरगो अर डूँबबा लाग्यो। जणा बो जोर'ऊँ बोल्यो प्रबु मनै बचाओ। 31ईशु तावळोसो हाथ बढार बिनै पकड़ लिन्यो अर बिऊँ बोल्यो हे थोड़ो बिश्वास राखबाळा तू भेम क्युँ कर्यो? 32बिकै पाछै बे न्यावडी प आगा अर भाळ बी थमगी। 33अर न्यावडी म जता बी मिनख हा बे सगळा बाकी जैजकार करता होयो बानै खेबा लाग्या थे सच म ई परमेश्वर का बेटा हो।

ईशु गन्नेसरत का रोगलानै निरोगो कर्यो

34बे दरियाव पार कर'र गन्नेसरत नगरी म पुच्याँ। 35जणा बठै का मिनख ईशुनै पिच्छाण्णा अर बाकी आबा की खबर आस-पास की झांगां म फैला दिनी। जिऊँ लोग सगळा रोगलानै बठै ले आया। 36अर बे ईशु'ऊँ अरदास करबा लाग्या थे थारा गाबा की कोर कई हाथ अड़ाबा दयो। अर जखो बी हाथ अड़ायो बो निरोगो होगो।

बड़का का रिति-रिवाज

15 यरूशलेम'ऊँ क्युँक फरीसी अर शास्त्रानै सिखाबाळा आर ईशु'ऊँ बुज्या, 2थारा चेला म्हारा बड़का की रिति-रिवाजानै क्युँ कोनी मानै। बे रोटी खाबा'ऊँ पेली आपणी रिति गेल हाथ क्युँ कोनी धोवै? 3ईशु बाऊँ बोल्यो थे थारा बड़का का रिति-रिवाजानै मानर परमेश्वर का हुक्मानै तोड़ द्यो हो। 4क्युँ'क परमेश्वर बोल्यो ह थे थारा माँ बापा को मान करज्यो। अर ज कोई मिनख आपका माँ बापा को मान कोनी करै बिनै मार देणो चाये। 5पण थे मिनखानै सिखावो हो क ज थारा माँ बाप थार क्युँ मांगै जणा बाऊँ खेवो क बा तो म परमेश्वरनै चढा दिनी ह। 6इ बात की बजै'ऊँ बिनै बिका माँ बाप को मान करबा की जुर्त कोनी अंय्यां कर'र थे थारा रिति-रिवाज'ऊ परमेश्वर का हुक्मानै कोनी मानो। 7ओ ढोग्यो थारा बारा म परमेश्वर की खेबाळो यशायाह सई खयो ह,

८ अ मिनख होठा'ऊँ तो मेरो मान
करै ह; पण आको हियो मेर'ऊँ
बोलो दूर ह।

९ अ बेकार म मनै ध्यावै ह, लोगा
का बिच्यारानै धर्म की सीख
बोलर सीखावै ह।

१० बिकै पाछै ईशु भीड़नै आपकै कनै
बुलायो अर खेबा लाग्यो, सूणो अर
समझ्यो। ११ मिनख मूंडा म जो क्यूँ बी
खावै ह बो बिनै सुगलो कोनी करै, पण
बिका मूंडा'ऊँ निकलबाळा शबद बिनै
सुगलो करै ह। १२ जणा चेला ईशु क कनै
आर खेबा लाग्या गुरु थानै बेरो ह के
फरीसी थारी बाता'ऊ चिडगा।? १३ जणा
ईशु बोल्यो जी बोझानै मेरो ईशबर नगरी
बाप कोनी लगायो बो उखाड़यो ज्यासी।
१४ बाकी बातई मना करो क्युँ'क बे
आँधा मिनखा का नेता बण्या फिरी ही।
अर ज आंधो आंधा न गेलो दिखावै
जणा बे दोन्यू खाडा म जा पड़े।

१५ पतरस बोल्यो गुरु जी म्हानै बी
सुगलो करबाळी बात को मतबल
समझ्याओ। १६ ईशु बोल्यो थे ईब ताँई
अण-भोळ म पड़्या हो के? १७ थे कोनी
जाणो मूंडा म खाईड़ी चिजा हिया म
कोनी जावै पण पेट क मांयनै जावै
अर निकल जावै ह। १८ पण जखी बाता
मिनखा का मूंडा'ऊ बारनै निकलै ह
बे बाता बाका हिया'ऊ आवै ह अर
बई मिनखानै सुगलो करै ह। १९ क्युँ'क
हिया'ऊ बुरा बिच्यार, हत्या, रंडीबाजी,
कुकर्म, चोरी, झुठी गुवाई अर चुगली-
चाळा। २० बिना हाथ धोया रोटी खाबो
मिनखनै सुगलो कोनी करै पण अ बाताँई
मिनखा का हियानै सुगलो करै ह।

कनानी कुणबा की लूगाई को बिश्वास

२१ ईशु बठै'ऊ चाल'र सूर अर सैदा
गयो। २२ बठै एक कनानी कुणबा की
लूगाई ईशुनै हेल्लो दे'र बोली प्रभु दाऊद
का बेटा, मेर प दया कर! मेरी छोरीनै
आपोरी बलाय दिन घालरी ह। २३ पण
ईशु बिऊँ क्यूँई कोनी बोल्यो, जणा ईशु
का चेला ईशु क कनै आया अर अरदास
कर'र खया आ लूगाई आपणै गेल-गेल
कूकति आरी ह इनै भेजो। २४ जणा ईशु
बी लूगाई'ऊ बोल्यो मनै परमेश्वर बस
इसाएल का मिनखा ताँई भेज्यो ह। बे
गुमेड़ी लल्डयाँ की जय्यां ह क्युँ'क बे
परमेश्वर का राज को गेलो भुलगा।
२५ जणा बा लूगाई ईशु क आगै गोडा
टेक अर हाथ जोड़'र खई ओ प्रबु मेरी
मदत करो। २६ ईशु बिऊँ बोल्यो टाबरा
की रोटी गंडकडा क आगै गेरबो चोखो
कोनी। २७ जणा बा बोली, “आ तो सई
बात ह, प्रबु,” पण मालिक की थाळी'ऊँ
बचेड़ी झुठ गंडकडा ई तो खावै ह।
२८ ईशु बिकी इ बात न सूण'र बोल्यो “हे
लूगाई तू बोलो बिश्वास करै ह। इ ताँई
जा जंय्यां तू चावै ह बंय्याँई तैरै सागै
होवै, अर बिकी छोरी जद की जर्दई
निरोगी होगी।

बोला सारा रोगला न निरोगो करबो

२९ ईशु बठै'ऊ गलिल दरियाव क
किनारै गयो अर झूँगरी प चढ़ार बेठग्यो।
३० अर मिनखा की भीड़ बिकै कनै भेली
होतीजारी ही। कोई तो आपका लंगड़ा
लूलानै, कोई आँधानै, कोई गुँगा-बेहरानै,

अर कई भाँत-भाँत का रोगला न बिकै कनै ल्यार बिकै पगा म गेरर्या हा अर बो बा सगळा रोगला न निरोगो करो हो। 31लंगड़ा-लूला चालै लाग्या, बेहरा सुणबा लाग्या, गुँगा बोलबा लाया अर आँधा देखबा लाग्या। आ कामा न देखर बे सगळा मिनख ताजुब कर्या अर इसाएल का परमेश्वर की जैजेकार करी।

च्यार झार मिनखा को पेट भर्यो

32ईशु चेला न कनै बुलार बानै बोल्यो मनै ई भीड़ प दया आरी ह, क्युँ क अ मिनख तीन दिनांके मेरै सागै हीं अर आकै कनै खाबा ताँई बी क्युँदू कोनी म आनै भूखा पेट बिदा कोनी करूँ, क्युँक ज म आनै अंय्यां भेजस्थूँ तो ये भूखा मरता चळ्कर खार गिर पड़सी। 33चेला बोल्या इ उजाड़ म अत्ता मिनखा को पेट भरबा ताँई रोटी कठैंके आसी? 34ईशु बानै बुझ्यो थारै कनै कत्ती रोट्याँ हीं? बे बोल्या सात रोटी अर क्युँक छोटी मछ्याँ ह। 35जणा ईशु बा मिनखानै तळै बैठबा ताँई हूकम दिन्यो। 36अर बा सात रोट्याँ अर मछ्याँ न लेर परमेश्वर को धन्यबाद कर्यो। अर बानै तोड़-तोड़र चेला न देतो गयो अर चेला लोगो न परोसता गया। 37लोग जद ताँई खाता रिह्या जद ताँई बे धाप न गया। बिकै पाछै बी चेला बचेड़ा टुकड़ा की सात छाबड़ी उठाई। 38जद की खाबाळा म लूगाया अर टाबरा क अलावा च्यार झार तो मोट्यार मोट्यार इ हा। 39ईशु बा मिनखा न बिदा करबा क पाछै न्यावडी म बैठर मगदन दिसावर चलेगो।

ईश्वर नगरी की शेलाणी की माँग।

16 फरीसी अर सदकी ईशु क कनै आया। क्युँक बे ईशु न फसाबो चावा हा इ ताँई बे ईशु न बोल्या, थानै परमेश्वर भेज्यो ह इ बात न साबित करबा ताँई म्हानै कोई ईश्वर नगरी शेलाणी दिखाओ। 2ईशु बाँऊ बोल्यो, जद सूरज ढळज्यावै ह जणा थे आकास न लाल देखर खेवो हो मोसम चोखो रेहसी। 3अर दिन उगबा क साथई जद थे आकास न काळो-पिळो देखवो जणा बोलो हो आज तो बरसात आसी। थे आकास न देखर मौसम को हाल तो बताद्यो हो पण आ दिना म परमेश्वर काँई करर्यो ह बिनै कोनी समझ सको। 4इ जुग का बुरा अर पापी लोग ईश्वर नगरी की शेलाणी देखबो चावीं हीं पण बानै योना की शेलाणी न छोड़र कोई बी शेलाणी कोनी दिखाई ज्यासी।

सदुकी अर फरीसियां को खमिर

5ईशु का चेला दरियाव क परलै नाकै चलेगा पण बे आपकै सागै रोट्याँ लेबो भूलगा। 6जणा ईशु बानै चितार बोल्यो थैं फरीसी अर सदुकीयाँ का खमिर क्युँक बचर रिज्यो। 7पण बे आपसरी म सोचबा लाग्या, “क ईशु आ बात इ ताँई बोलै ह क्युँक आपा रोट्याँ लेबो भूलगा।” 8ईशु बाकी इ बात न भापगो अर बाँऊ बोल्यो, थोड़ो बिश्वास राखबाळो थे आ क्यूँ सोचो हो क म्हे रोट्याँ लेबो भूलगा? 9थारै हाल बी क्युँदू पलै कोनी पड़ी के? थानै याद कोनी के, जद म पाँच झार मिनखा न

पाँच रोट्याँ^{ऊँ} धपायो हो जणा बचेडी रोट्याँ का टुकड़ा का थे कत्ता चौल्या भर^र उठाया हा? 10 अर जद म च्यार झार मिनखा न सात रोट्याँ^{ऊँ} धपायो हो जणा बचेडी रोट्याँ का टुकड़ा का थे कत्ता चौल्या भर^र उठाया हा? 11 थारै कयुँई पलै कोनी पड़ै, म थानै रोट्याँ ताँई कोनी पण थानै फरीसियाँ अर सदुकियाँ की बातानै न मानबा ताँई बोलूँ हूँ। कयुँक आकी बाता खमिर की जंयां काम करै ह। 12 जणा जार बाकै पलै पड़ी क ईशु बानै रोट्याँ ताँई कोनी खियो पण फरीसियाँ अर सदुकिया की गळत सिख^र बचबा ताँई खियो ह।

पतरस बोल्यो ईशु ई मसी ह

13 ईशु जद कैसरिया फिलिप्पी नगरी म आयो जणा बो चेला न बुझबा लाग्यो क लोग मेरा बारा म काँई खेवै ह क म कूण हूँ? 14 बे बोल्या, “कई तो थानै बतिष्ठो दैबालो यहून्नो, कई एलियो, कई यिर्मयाह अर कई परमेश्वर की खेबाला मऊँ एक खेवै ह।” 15 जणा ईशु बानै बोल्यो, पण थे मनै काँई खेवो हो? 16 शमोन पतरस बोल्यो, “थे सर्वशक्तिमान परमेश्वर का बेटा मसी हो।” 17 ईशु अंयां सुण^र बिनै बोल्यो ओ शिमोन योना का बेटा तू धन्य ह कयुँक आ बात तू कोई मिनख की सूण^र कोनी बोली पण तैरेप ईश्वर नगरी म रेहबालो मेरो बाप परमेश्वर परगट करी ह। 18 म तेरऊँ आबी बोलूँ हूँ तू पतरस ह जिको मतबल ढाड होवै ह। तू निंव की जंयां होसी जीपै म मेरी कलिसिया बणास्यूँ अर ईपै नरक को जोर कोनी चालसी। 19 म तनै परमेश्वर

का राज की ताळ्या दी ह, जिऊँ जो क्यूँ तू धरती प बंद करसी बिनै परमेश्वर ईश्वर नगरी म बंद कर देसी अर जो क्यूँ तू धरती प खोलसी बिनै परमेश्वर ईश्वर नगरी म बी खोल देसी। 20 आ बाता क पाछै ईशु आपका चेलानै चिता^र खयो क थे कोईनै इ मना खिज्यो क म मसी हूँ।

ईशु आपकी मोत क बाग म चेला न बतायो

21 बि टेमई ईशु चेलानै बताबा लाग्यो क मनै यरुशलेम जाणो पड़सी अर बठै प्रधान याजक, बडका अर शास्त्रा न सिखाबाला मनै बोलो दुःख देसी, अर मार गेरसी पण म तीसरा दिन ओज्युँ जीन्दो हो ज्यास्यूँ। 22 आ बात सुण^र पतरस बानै एकला म लेगो अर दकाल^र बोल्यो प्रबु थारै सागै अंयां कदैई नई होवै। 23 ईशु पतरस कानी मुड़र बोल्यो, “शैतान! मैरै कनैऊँ चल्योजा, तू मनै अंयां करबा^रऊँ रोकबो चावै ह, कयुँक तू परमेश्वर की जंयां कोनी सोचै पण मिनख की जंयां सोचै ह।”

24 ईशु चेलानै खेबा लाग्यो, “जखो बी मैरै गेल होबो चावै ह बो खुदनै तज^र, आपकी सुळी उठार मैरै गेल होले। 25 जखो बी खुद का पिराण बचाबो चावै ह बो बिनै खोसी अर जखो बी मेर ताँई खुद का पिराण तजसी, बो आपका पिराण बचासी। 26 अर ज कोई मिनख आपका पिराणा की हानि उठार सगळा जगत न जित ले जणा बिनै काँई फायदो? कोई चीज क बदला म मिनख खुद का पीराण दे सकै ह के? 27 जद

मिनख को बेटो ईशबर नगरी दूता क सागे परमेशबर की मेमा म आसी जणा बो मिनखानै बाका कामा गेल फळ देसी। 28ईशु बाऊँ बोल्यो, “म थानै साची खेऊँ हूँ अठै खड़या मिनखा मऊँ कई तो अंयां का हीं क बे जद ताँई मिनख का बेटानै बिका राज म आतो न देखलीं जद ताँई बे कोनी मरै।”

ईशु को रूप बदलबो

17 छः दिना क पाछै ईशु आपका चेला मऊँ पतरस, याकूब अर बिका भाई यहन्ना न सागै लेर डूँगरी प गयो। 2बर्है बा चेला क सामै ईशु को रूप बदलगो। बिको मुंडो बी सूरज की जंयां भलका मारबा लागमयो अर गाबा चमकबा लागया। 3अर बठै बाकै सामै एलियो अर मूसा परगट होया, बे ईशुँऊँ बताळावा हा। 4पतरस बानै देखर ईशुँऊँ बोल्यो, “ओ प्रबु आ कत्ती चोखी बात ह क आपा अठै हाँ। ज थे चावो तो म अठै तीन पंडाळ बणा द्यूँ एक थारै ताँई एक मूसा ताँई अर एक एलिया ताँई।” 5पतरस अंयां बोलर्यौई हो क एक भलकतो बादल आर बानै ढक लिन्यो अर बी बादल मऊँ हेल्लो आयो, “ओ मेरो लाडलो बेटो ह। जिऊँ म बोलो राजी हूँ थे इकी मानो।” 6अर चेला ओ हेल्लो सुणर बोला डरगया अर ओदै मुडै गिरगा। 7जणा ईशु बाकै हाथ अड़ार बोल्यो, “खड़या होवौ डरो मना।” 8अर बे उठर देख्या जणा बानै बठै ईशुनै छोड़र कोई बी कोनी दिख्यो। 9अर जद बे डूँगरीँऊँ तळै आर्या हा जणा ईशु बा तीन्या न चितार खयो



एलियो, मुसा, ईशु अर चेला (17.3)

जो क्यूँ बी थे देख्या हो बिकै बारा म कोईनै इ क्यूँई मना खिज्यो जद ताँई क मिनख कौ बेटो मरेडा मऊँ ओज्यूँ जीन्दा न होज्या। 10जणा चेला बिनै बुज्या, “यहूदी धर्मशास्त्री क्याले बोलै ह क एलिया को पेल्या आबो पक्को ह? 11ईशु बाऊँ बोल्यो, “आ साँची ह क्युँक परमेशबर कोल वचन कर्यो ह क मसी क आबा ताँई लोगा का हियानै त्यार करबा एलियो आसी।” 12पण म थारुँऊँ खेऊँ हूँ एलियो तो आकेई गयो। पण आपणा नीता बिनै देखर बि कोनी पिछ्याण्या अर जंयां बे बिकै सागै करबो चावा हा बंयांई बिकै सागै कर्यो। अर बे मिनख का बेटा क सागै बि बंयांई करसी। 13पण चेला समझ्या क ओ आपानै यूहना बतिष्मा देबाला क बारा म बोलर्यौ ह।

ईशु छोरा मऊँ ओपरी-बलाय काडी

14जद ईशु भीड़ क कनै आयो जणा बठै एक मिनख बिकै कनै आयो अर

धोक खाई। 15 अर बोल्यो, “हे प्रबु थे मखाला छोरा प दया करो! बिनै जद बी मिर्गी आवै ह जणा बो बोलो तड़फै ह अर बो आग अर पाणी म गिर ज्यावै है। 16 म बिनै थारा चेला क कनै ल्याओ हो पण बे बिनै निरोगो कोनी कर सक्यां।” 17 ईशु बीकी बात सुण’र बोल्यो, “हे थोड़ो बिश्वास करबाला कुटिचर मिनखो, म कद ताँई थारै सागै रेहस्युँ? अर कद ताँई थारी सेस्यूँ? बि छोरानै मेरै कनै ल्याओ।” 18 ईशु बी ओपरी बलायनै बी छोरा मऊँ निकळबा ताँई दकाल्यो अर बा बलाय बीमै’ऊँ निकळगी अर बो छोरो बि घड़ीई निरोगो होगो। 19 अर जद ईशु एकलो हो जणा चेला बिनै बुज्या, “म्हे बी बलाय न क्युँ कोनी काड सक्यां?” 20-21 ईशु बाऊँ बोल्यो, “थार म बिश्वास की कमी ही।” म थार’ऊँ साची खेऊँ हूँ ज थार म राई क दाणो जत्तो बी विश्वास होसी अर थे इ ढुँगर’ऊँ बोलस्यो अठै’ऊँ हट’र बढै चल्यो जा जणा बो चल्यो ज्यासी। थारै ताँई क्यूँई बी अणहोतो कोनी।⁸

ईशु ओज्यूँ आपकी मोत क बाग म बतायो

22 ईशु आपका चेला क सागै गलिल म गयो अर बानै ख्यो, “मिनख को बेटो मिनखा क हाथा म सुँप्यो जाबालो ह। 23 बे बिनै मार गेरसी पण परमेश्वर तिसरा दिन बिनै ओज्यूँ जीन्दो कर देसी।” चेला आ बात सुण’र दुःखी होया।

मनदर को कर अदा करबो

24 जद बे कफरनहूम म आया जणा मंदर को कर लेबाला पतरसनै बुझ्यो, “थारो गुरु मंदर को कर देवै ह के?” 25 पतरस बोल्यो, “हाँ देवै ह।” अर जद पतरस घरा आयो जणा बिकै कर हाळी बात चलाबा’ऊँ पेलिई ईशु बिनै बोल्यो, “हे शिमोन तू काँई सोचै ह? इ धरती का राजा किसै-किसै कर लेवै ह? आपका बेटा’ऊँ नहिस पराया मिनखा’ऊँ।” 26 पतरस बोल्यो, “पराया’ऊँ लेवै ह।” अंयां सुण’र ईशु बोल्यो, “जणा तो बेटा कर कोनी देवी।” 27 पण आपां आको अपमान कोनी करां इ ताँई दरियाव क किनारै काँटो गेर अर जखी पेली मछी हाथ आवै बिको मूँडो फाड़’र देखजे तनै बिकै मुंडा म एक सिक्को मिलसी। बिनै तैरे अर मेरै ताँई कर म दे दिज्ये।

सऊँ बडो कूण

18 बि टेमई चेला ईशु क कनै आर ख्या जद परमेश्वर थानै राजा बणासी बी टेम म्हार मऊँ सऊँ बडो कुण होसी? 2 जणा ईशु एक टाबरियानै कनै बुला’र म्हारै बिच म खड़्यो कर्यो। 3 अर बोल्यो ज थे थारी सोचनै बदल्ह’र इ नान्या की जय्यां कोनी बणो जणा ताँई थे परमेश्वर का राज म कोनी बड़ सकोगा। 4 इ ताँई जखो बी खुदनै इ नान्या की जय्यां नरमाई’ऊँ जीवन जीवै ह बोइ ईश्वर नगरी म सऊँ बड़ो होसी। 5 अर

⁸ 17.20-21 क्यूँक हाथ ऊँ माडेडी पौथ्या म 21वीं आयत न जोड़्यो गयो ह जिमै अंयां मंडर्यो ह क आ जात सिरफ अरदास अर बरत’ऊँ ई निकलै ह। पण चोखी पौथ्या म आ आयत कोनी।

जखो इ टाबर की जय्याँ का टाबरानै मेरी बजैँऊँ अपनावै ह बो परमेश्वर की नजर्या म मनै अपनावै ह।

पापऊँ बचो

६पण मेरैप विश्वास करबाल्लानै पाप म गेरबा को ज कोई कारण बाणै ह। जणा बि ताँई चोखो हो क बिकै नाड़ म घरट घालर समदर क मायनै गेर दियो जावै। ७हाय ह बा मिनखा प जखा मेरैप विश्वास करबाला ताँई आखली बाणै ह। आतो हो कोनी सकै क मेरैप विश्वास करबाला मिनखानै विश्वास म कमजोर करबाला मिनख ना मिलै। पण अय्याँ करबाला प हाय पड़सी। ८इ ताँई ज तेरो हाथ नहिस पग तनै पाप म गेरै जणा बानै काट फिक। क्युँक हाथ-पग होता सोता बी कदैई न बुझभाली नरग की आग म बलबाैऊँ तो लुलो-लगड़ो होर जीवन म बड़बो चोखो ह। ९ज तेरी आँख तनै पाप म गेरै जणा बिनै फोड़ दे, क्युँक दो आँख्या होता सोता नरग की आग म पड़बाैऊँ तो काणो होर जीवन म बड़बो चोखो ह।

गुमेड़ी लल्डी की निति-कहाणी

10-11सूणो थे मेरो खयो मानवाल्लानै निचो मना जाणो कयुँक ईश्वर नगरी म रेबाला दूत थारो लेखो-जोखो मेरा बापनै देवै ह।^h 12म थानै बुज्यू हूँ ज स्विकन सौ लल्डी हो अर बामऊँ एक लल्डी गुमज्या जणा बो बा निन्याणव

लल्डयाँ न बठै ही छोड़र दुँगर म बी लल्डीनै ढुडबा कोनी ज्यासी के? बो पक्कोई ज्यासी। 13अर जद बा लल्डी बिनै लाध्यावै जणा बो बा निन्याणमऊँ ज्यादा बि लाधेड़ी लल्डीैऊँ राजी होसी। 14अंयांई थारो बाप जखो ईश्वर नगरी म ह। बो बी कोनी चावै क आ अणभोल मिनखा मऊँ एक बी नास होवै।

तेरै खिलाप पाप करबालो मिनख

15ज तेरो विश्वासी भाई तेरै सागै/ बुरो करै जणा तू बिनै एकला म लेज्यार बिनै बिकी गळती बता, अर जद बो थारी बात सृणर बिनै मानले जणा तू बिनै नास होबाैऊँ बचा लियो ह। 16पण ज बो तेरी बात कोनी मानै जणा तू एक नहिस दो जणानै सागै लेर बिकै कनै जा जिऊँ शास्त्र म मंडचा गेल दो नहिस बिकै ज्याद गुवा की गुवाईैऊँ बिपै आरोप सिध होज्या। 17अर ज बो बाकी बात बी कोनी मानै जणा मंडली का मिनखानै बिकै बारा म बता। अर बो ज मंडली का मिनखा की बात बी कोनी मानै तो थे बिकै सागै बंयां को बिवार करो जंयां की चुंगी लेबाला अर पाप्यां क सागै कर्यो जावै ह। 18म थानै साँची खेऊँ हूँ जो क्यूँ तू धरती प बंद करसी बिनै परमेश्वर ईश्वर नगरी म बंद कर देसी अर जो क्यूँ तू धरती प खोलसी बिनै परमेश्वर ईश्वर नगरी म बी खोल देसी। 19अर म थानै बताैऊँ हूँ ज दो मिनख इ धरती प एक मन होर मेरा बापैऊँ जखो

^h 18.10-11 क्यूँक हाथैऊँ मांडेड़ी पोथ्या म 11 वी आयत जोड़ी गई ह बिमै मंडर्यो क मिनख को बैटो रूळेड़ानै बचावा आयो ह। ⁱ 18.15 क्यूँक हाथाैऊँ मांडेड़ी पोथ्या म तेरै सागै कोनी मंडर्यो बामै सिदो मंडर्यो ह क ज तेरो विश्वासी भाई तेरो बुरो करै।

ईश्वर नगरी म ह बिँऊं जो क्यूँ माँगसी
जणा बो देसी। 20क्यूँ क जठै दो नहिस
तीन मेरै नामनै लेबा ताँई भेळा होसी
जणा म बठै बाकै सागै होस्युँ।

माफ करो

21पतरस ईशु क कनै जार बाऊँ बुझबा
लाग्यो हे प्रबु ज मेरो भाईडो मेरो बुरो
करै जणा म बिनै कती बार माफ करू?
म बिनै सात बार माफ करू के? 22ईशु
बिनै खयो, “सात बार इ नई, पण सात
का सतर गुणा बार माफ करज्ये। 23ईश्वर
नगरी का राज की बराबरी बी राजा
क सागै करी जा सकै जखो आपका
दासा’ऊँ लेखो-जोखो लेबा की सोची।
24अर जद बो बा दासा’ऊँ लेखो-जोखो
लेर्यो हो जणा एक मिनख बिकै सामै
ल्याओ गयो जिकै बो करोड़ा रिप्या
माँगतो हो। 25पण बि मिनख क कनै
राजानै चुकाबा ताँई कोढोई कोनी हो,
इ ताँई बो राजा सिपाईड़ा न हुक्म दिन्यो
इ मिनखनै ईकी लुगाई अर टाबर-टिकरा
क सागै बेचर मेरो हिसाब पुरो करद्यो।

26आ सुण’र बो मिनख राजा क पगा
म पड़र अरदास कर’र खेबा लाग्यो। हे
मेरा मालिक थे थ्यावस राखो म थारी
पाई-पाई चुका देस्युँ। 27राजानै बिपै दया
आगी इ ताँई बे बिनै छोड़ दिन्यो। अर
बिको कर्जो बी माफ कर दिन्यो। 28पण
जद बो मिनख बठै’ऊँ जार्यो हो जणा
आपका सागाळो एक दास मिल्यो जिकै
बो सौ दिनार माँग्या करतो हो, बो बिनै
पड़क’र खयो मेरा रिप्या चुका। 29जणा

बो दास बिकै पगा म पड़’र बोल्यो थे
थ्यावस राख्यो म थारी पाई-पाई चुका
देस्युँ। 30पण बो बिकी एक बी कोनी
सूणी अर बिनै लेज्यार काळ कोठडी म
गेर दिन्यो। अर बिँऊं खयो जद ताँई तू
मेरी पाई-पाई न चुका दे अठैई सिड़सी।
31बिनै अंयां करता देख दूसरा दास
बोला दुखी होया अर बठै जौ क्यूँ बी
होयो हो बिकै बारा म राजा न खे सूणाई।
32जणा राजा बी पेलडा दासनै आपकै
कनै बुलार बिँऊं खयो हे कुटिचर मिनख
जद तू मेर’ऊँ अरदास करी जणा म तनै
अर तैरो सगळो कर्जो माफ कर दिन्यो
हो। 33इ ताँई जंयां म तेरैप दया करी
ही बंयाईं तनै बी तेरा सागाळा दास प
दया करबो चाए हो। 34अर बो राजा
झाल्या म भर’र बी मिनखनै सिपाईड़ा
क हाथा सोप दिन्यो अर खयो जद ताँई
ओ पाई-पाई न चुका दे इनै कैद राखो।
35इ ताँई ज थे बी थारा भाईड़ा न मन’ऊँ
माफ कोनी करस्यो जणा मेरो बाप जखो
ईश्वर नगरी म रेवै ह बो बी थारै सागै
बंयाईं करसी।

तलाक क बारा म सिख

19 ईशु अ बाता खेर गलिल’ऊँ
चलेगा अर यरदन नदी क
पार यहदी भूमी म आगा। 2जणा बोली
सारी भीड़ बाकै गेल हो लिन्यी, अर बे
रोगलानै निरोग कर्या। 3जणा फरीसी
ईशुनै बिचासबा ताँई बाऊँ बुझ्या, क
विधि-बिधान कोई मिनखनै कोई बि
बजै’ऊँ तलाकनामो देबा ताँई खेवै ह

के? 4 ईशु बानै कह्यो थे ओ कोनी बाच्या के? बानै बणाबाळो शुरूई बानै नर अर नारी करर बणायो ह। 5 जणाई तो मिनख आपका माँ-बाप ऊँ न्यारो होर बी आपकी लूगाई क सागै रेहै ह। अर बे एकई काया होवै ह। 6 जणा बे इब दो कोनी, पण एकई काया ह। इ ताँई जिनै परमेश्वर जोड़यो ह, बिनै मिनख न्यारो न करै। 7 बे ईशुनै बोल्या जणा मूसा क्याले अंयां हृक्म दिन्यो ह, क तलाकनामो देर बिनै छोड़ द्यो। 8 ईशु बानै बोल्यो मूसा मिनखा का मन की कलढाई न देखता बाकी लूगाई न छोड़बा ताँई खयो हो, पण शुरूआत म अंयां कोनी हो। 9 अर म थानै खेऊँ हूँ ज कोई लुगाई कुकर्मी कोनी अर बिको मोटचार बिनै छोड़र दूसरीनै ब्याले ह जणा बो कुकर्म करै ह। 10 आ बात सूणर चेला ईशु'ऊँ बोल्या ज आ बात साची ह, जणा चोखो तो ओ ह क मोटचार ब्याइ ना करै। 11 ईशु बानै बोल्यो हर कोई इ सिख प कोनी चाल सकै, पण बेर्ई मिनख चाल सकै जखानै परमेश्वर अय्यां करबा की शक्ति दिन्यी ह। 12 क्युँक कई तो अंयां का ही जखा माँ का पेट'ऊँ नामदं होवी ही, अर कई अंयां का ही जिनै लोगई नामदं बणा देवी ही। अर कई बे ही जखा ईश्वर नगरी ताँई खुदई ब्या कोनी करै। जखो बी आ बचना न लेवो चावै ह बो ले लो।

ईशु टाबरानै आसीस दिन्यी

13 बि टेमई मिनख आप-आपका टाबरानै ईशु क कनै लेर आया जिऊँ बे बाकै क माथा प हाथ धरर आसिस

देरर अरदास करै पण चेला बानै दकाल्या। 14 पण ईशु बोल्यो टाबरानै आबा द्यो आनै मना मत करो क्युँक ईश्वर नगरी को राज अंयांका कोई ह। 15 अर बे टाबरा क माथा प हाथ धरर बठैऊँ चलेगा।

पिसाळो मिनख

16 एक मिनख ईशु क कनै आर बोल्यो हे गुरु म जुग-जुग को जीवन पाबा ताँई कुणसो भलो काम करूँ? 17 ईशु बिऊँ बोल्यो भलो कुण ह, इकै बारा म मेर'ऊँ क्यूँ बुजै ह? पण भलो तो एक इ ह अर ज तू जुग-जुग को जिवन चावै ह तो परमेश्वर का हुक्मानै मान। 18 बो बुझ्यो कुणसा हुक्म? ईशु बोल्यो हत्या मना करज्ये, कुकर्म मना करज्ये, चोरी मना करज्ये, झूठी गूवाई मना दिजे, 19 माँ-बाप को मान करज्ये अर जंयां तू खुद'ऊँ प्यार करै ह बंयाई तेरा पड़ोसी'ऊँ प्यार करज्ये। 20 बो मोटचार बोल्यो म तो आ सगळी बातानै मानू हूँ इब मेर म कुणसी कमी ह? 21 ईशु बोल्यो ज तू सिद्ध होबो चावै ह जणा जार तेरी जमिन-ज्यजादा बेचर गरिबा म बाँट दे इको साटा को धन तनै ईश्वर नगरी म मिलज्यासी अर आर मेरै गेल होले। 22 अंयां सूणर बो उदास होर चलेगो क्युँक बिकै कनै अणाप-सणाप ज्यजाद ही। 23 जणा ईशु चेलानै खेबा लाग्यो म थानै सांची-सांचीखेऊँ हूँ, क पिसाळा मिनख को ईश्वर नगर म जबो बोलो ओखो ह। 24 पिसाळा मिनख को ईश्वर नगरी म बड़बा'ऊँ तो सूई का नाका'ऊँ ऊंट को निकल्बो सोरो ह।

25 अंच्यां सुणर चेला ताजूब करता होया बोल्या जणा कुण बचायो ज्यासी? 26 ईशु बाका कानी देखर बोल्यो आ मिनखाऊँ अणहोति बात ह, पण परमेश्वर सक्यूँ कर सकै ह। 27 पतरस इ बात न सूणर बोल्यो म्हे सक्यूँ तजर तेरे गेल हो लिया हा म्हानै काँई मिलसी? 28 ईशु बानै खयो म थानै सांची-सांची खेऊँ हूँ, नया जुग म जद मिनख को बैटो मैमा-भर्या सिंधासन प बैठसी जणा थेबि जखा मेरै गेल होलिया हो बारा सिंधासना प बैठर इस्माएल का बारा गोता को न्याय करस्यो। 29 अर जखो बी मेरै ताँई आपका घर-बार, भाई-भाणा, माँ-बापानै, टाबरानै अर जमिन-ज्यजाद न तज्यो ह बिनै सौ गुणा मिलसी। अर बो जुग-जुग को जीवन जिसी। 30 पण बोळा ही जखा आगै ही बे पिछै होसी अर जखा पिछै ही बे आगै होसी।

अंगूरा की बाढ़ी का मजूर

20 ईश्वर नगरी को राज एक जमीदार की जंच्यां ह। बो एक दिन सुअरे उठर आपका अंगुरा का बाग म काम कराबा ताँई मजूरियानै ढूळबा निकळ्यो। 2 बो मजूरानै दिन को एक चाँदी हाळो सिक्का म पुक्तो करर काम करबा ताँई आपका बाग म भेज दिन्यो। 3 नौ बजैसीक बो जमीदार ओज्यूँ आपका घराऊँ निकळ्यो, अर बिनै बजार म क्युँक बेरुज्जकार मिनख मिल्या। 4 अर बानै खयो, थे मखाळा अंगुरा का बाग म जार काम प लागज्याओ म थानै बाजिव मजूरी देस्यूँ। 5 दोपारासिक अर तीनेक बजैसिक बो

ओज्यू बजार गयो। अर बिनै ओर मजूर मिल्या बानै बि बो कंच्यांई खयो। 6 अर बो जमीदार पांचेक बजैसीक ओज्यूँ आपका घराऊँ निकळ्यो अर बिनै बजार म क्युँक मिनख अठिनै-बठिनै डोलता-फिरता मिल्या। बो बानै बुझ्यो थे दिन-भर ठाला-भला क्याले हाडर्या हो? 7 बे बोल्या म्हानै कोई मजूरी प ई कोनी राख्यो। बो जमीदार बोल्यो थे मखाळा अंगुरा का बाग म जार काम प लागज्याओ। 8 अर संज्या क बगिचा को मालिक आर मूनिम न बोल्यो मजूरियानै बुलार बाको हिसाब कर दे, सूण जखा सऊँ आखरी म आया हा बानै सऊँ पेली दिज्ये अर जखा पेली आया बानै सऊँ आखरी म दिज्ये। 9 जणा बो बा मजूरियानै जखा पाचेक बजैसीक आया हा बानै एक-एक चाँदी को सिक्को मजूरी दिन्यी। 10 जणा सऊँ पेली काम प लागबाळा मजूरिया आ सोचर आया क म्हानै तो आऊँ ज्यादा मिलसी पण बानै बी एक-एक चाँदी को सिक्को इ मजूरी मिली। 11 अर बे सिक्को तो ले लिन्यो पण जमिदार प कुड़कुडाबा लाग्या। 12 अर खेबा लाग्या, म्हे तो दिन-भर तपती तावडी म काम कर्या अर बे मजदूर तो एक घंटा बरही काम कर्या। अर थे म्हानै बाकै बराबर इ मजूरी दिन्यी। 13 जणा बो जमिदार बामऊँ एक मजूरियानै खयो म तेरे सागै कुणसो बुरो कर्यो हूँ। जद म तनै काम प राख्यो हो जणा तनै मजूरी म एक चाँदी हाळा सिक्का म पुक्तो कोनी कर्यो हो के? 14 जो थारो बण ह बिनै लेज्या, अर म बानै बी जो थारा पाढ़े आर काम कर्या हा

थारा बराबर देबो चाऊँ हूँ। 15 मेरा धन क सागै म क्यूँ बी करू ईको हक मनै कोनी के? म चोखो मिनख हूँ इ ताँई तू जलै ह के? 16 अंयाँई जखा पिछै ही बे आगै होसी अर जखा आगै ही बे पिछै होसी।

तिसरक ईशु आपकी मोत क बारा बोल्यो

17 ईशु आपका बारा चेला क सागै यरूशलेम जार्यो हो जणा बो बानै एक-कानी लेगो अर चालतो-चालतो खेबा लाग्यो, 18 सूणो आपां यरूशलेम जार्या हा बठै मिनख का बेटो धोखा'ऊँ महायाजक अर धर्मशास्त्री क हाथा सोप्यो ज्यासी। बे बिनै मौत की सजा सुणा'र, 19 गेर-यहूदी मिनखा क हाथा म सुपं देसी अर बे बिको तमासो बाणासी अर बिकै तड़ा मारसी। अर सूळी प चढ़ासी। पण बो तिसरा दिन ओज्यूँ जीन्दो हो ज्यासी।

याकूब अर यहून्ना ताँई अरदास

20 बि टेमई जब्दी का बेटा की माँ आपका बेटानै लेर ईशु क कनै आई। अर धोक खा'र बोली म थार'ऊँ क्युँ मांगबो चाऊँ हूँ। 21 जणा ईशु बिनै बुझ्यो “तू काँई चावै ह? बा बोली थे मनै बचन द्र्यो, थे थारा राज म मेरा आ दोन्यूँ बेटा म एकनै थारा दाँया अर दुसरानै बाँया हाथ बिठास्यो। 22 ईशु बोल्यो थे कोनी जाणो थे काँई माँगो हो? म जो पिड़ा भोगबालो हूँ, थे बिनै भोग सको हो के? बे बोल्या हा भोग सका हा। 23 ईशु खयो थे पक्काई भोगस्यो पण मेर दांया-बांया बिठाबा को हक म कोनी दे

सकूँ। मेरै दांया-बांया तो बेइ बैठसी जिनै मेरो बाप बिठासी। 24 जणा दसु चेला आ बात सूण'र बा दोन्या प लाल-ताता होगा। 25 जणा ईशु बानै कनै बुला'र खेयो थे जाणो हो गैर-यहूदी मिनखा का नेता आपका निचला प हुक्म चलार आ दिखावै ह क बे राजा'ऊँ बडर ही। 26 पण थे अंयां मना करज्यो। ज थार म कोई बडो होबो चावै बो सगळा को दास बाणै। 27 अर थार म जखो बी सँऊँ पेल्यो होबो चावै बो थारे दास बणै। 28 थे मिनख का बेटा की जंयां बणो जखो सेवा-पाणी कराबा ताँई कोनी आयो। पण सेवा-पाणी करबा अर बोला सारा मिनखानै छुड़ाबा ताँई आपका पिराण देबा आयो ह।

आँधानै आँख्या दिन्यी

29 जद बे यरीहो नगरी'ऊँ जार्या हा जणा बोली सारी भीड़ बाकै गेल होलिन्या। 30 बठै ई गैला म दो आँधा मिनख बैठचा हा। अर जद बे सूण्या क ईशु अठै'ऊँ जार्यो ह। जणा बे जोर'ऊँ हेल्लो मार्यो “प्रबु! दाऊद का बेटा म्हार प दया करज्ये! 31 बानै अंयां बोलतो देख'र भीड़ बानै दकालर बोली चुपचाल्या रेवो पण बे ओर बी जोर'ऊँ हेल्लो देबा लाग्या “प्रबु! दाऊद का बेटा म्हार प दया कर! 32 जणा ईशु रूकर बानै बुलायो अर बाऊँ बोल्यो थे काँई चावो हो, म थारै ताँई करूँ? 33 बे बोल्या प्रबु म्हें देखबो चावा हा। 34 ईशुनै बापै दया आगी अर बे बाकी आँख्या क हाथ अड़ायो अर बे जद की जदई देखबा लाग्या। अर ईशु क गेल होलिन्या।

यरूशलेम म ईशु की जैजेकार

21 जद ईशु अर बाकाळा चेला
यरूशलेम क साकड़े जैतून
झूँगरी की ढलाण प बैतफगे अर
बैतनिय्याह क कनै आया। जणा ईशु
आपका चेला मऊँ दो जणानै, 2अंयां
बोलार भेज्यो सामला गाँव म जाओ।
थानै बी गाँव म एक गदेड़ी अर बिको
बच्यो बाँधड़ो मिलसी बानै खोलर मैरे
कनै ल्याओ। 3अर थानै कोई बुझै थे ओ
काँई करो हो? जणा बिनै बोलज्यो, प्रबुनै
इकी जुर्त ह जणा बो थारै सागै बानै
भेज देसी। 4ओ इ ताँई होयो ह, कयुँक
परमेश्वर की खेबाळा का बचन पुरा हो:

5सियोन की छोरीँऊँ खेओ क
बिको राजा बिकै कनै आर्यो ह;
बो खुदनै छोटो कर्यो ह,
हा बो गदेड़ी का बच्या प बैठचो
ह।

6बिकै पाछै बे चेला गया अर जंय्यां
ईशु बानै बताओ हो बंय्याँई कर्यो।
7अर बे बि गदेड़ी अर बिका बच्यानै ले
आया अर बापै बैठबा ताँई बाकै उपर
गाबा गेर्या जणा ईशु गेड़ी का बच्या प
बैठगो। 8बोला मिनख गेला म आपका
गाबा बिछा दिन्या। अर कई दररूताैऊँ
डाल्या तोड़-तोड़र गेला म बिछा दिनी।
9अर जखा मिनख बाकै आगे-पिछै
चालर्या हा बे जोर-जोरऊँ खेर्या हा;

“दाऊद का बेटा की जय हो!

प्रबु क नामैऊँ आबाळो धन्य ह।

आसमान म रेबाळा की जय हो।”

10अर जद बे यरूशलेम म बड़या जणा
सगळी नगरी म खलबली माचगी। अर

लोग बुजबा लाग्या, “ओ कुण ह?”
11अर लोग इ जुबाब देर्या हा ओ गलिल
का नासरत को परमेश्वर की खेबाळो
ईशु ह।

ईशु मंदर म

12ईशु मंदर म गयो अर बठै जताबी
बेचबाळा अर खरिदबाळा हा, बानै
बठैऊँ बारनै काडबा लाग्यो। बे रिपीया
को लेण-देण करबाळा का पाटियानै बगा
दिन्यो अर कबूतर बेचबाळा का तक्तानै
उन्दो कर दियो। 13इकै पाछै बो बानै
बोल्यो, “शास्त्रा म मंडर्यो ह,
“मेरो घर अरदास करबा को घर
खुवासी।

पण थे इनै डाकूआ की खोल
बणा दी।”

14मंदर म क्युँक आँधा, लूला-लगड़ा
हा बे ईशु क कनै आया अर बो बानै
निरोगी कर्यो। 15जद प्रमुख याजक अर
यहूदी धर्मशास्त्री बा ताजूब का कामानै
देव्या। जणा बे टाबरानै जोर-जोरऊँ आ
खेता सूण्या क दाऊद का बेटा की जय
हो! ओ धन्य ह। आ सूणर बे झाल्या म
भरगा। 16अर ईशुऊँ बुझबा लाग्या, तनै
सूण ह के बे काँई खर्या ही? ईशु बाऊँ
बोल्यो हा सुण हूँ। थे शास्त्र म ओ कोनी
बाच्यो, बो टाबर टिकराैऊँ अर दूध
पिता नान्याैऊँ आपकी मेमा कराई ह।
17अर ईशु बानै बठैई छोड़र बैतनिय्याह
चलेगो अर रातनै बठैई रिन्यो।

ईशु अंजिर का दररूतनै दुर्शिस दिन्यो

18भाग पाटचाई जद ईशु नगरी म
जार्यो हो जणा बिनै भूख लागी। 19गेला

म एक अंजिर को दरख्त देखर ईशु बिकै कनै गयो, पण बी दरख्त म पता न छोड़र क्यैंइ कोनी लहाध्यो। जणा बो बी दरख्त'ऊं बोल्यो, तेरै कदैई फळ कोनी लागै। अर बो दरख्त जद की जर्दई सूखगो। 20अर चेला आ देखर ताजूब करता इ ईशु न बुज्या, ओ अंजिर को दरख्त तो हाथ की हाथ क्याँ सूखगो? 21जणा ईशु बानै बोल्यो, “म थानै साची खेऊं हूं, ज थे बिश्वास करो अर भेम ना करो। जणा जो म कर्यो हूं बोई नई पण ज थे इ डूगरऊं खेस्यो क समन्दर क माईनै जा पड़ जणा बंयांई होज्यासी। 22बिश्वासऊं अरदास म जो क्यूं बी माँगस्यो, बो थानै मिलसी।”

ईशु का अधिकार प सुवाल

23जद ईशु मंदर म सिख दर्यो हो जणा प्रमुख याजक अर बढका ईशु क कनै आर बुज्या, थे अ बाता कि अधिकारऊं करो हो? अर थानै ओ अधिकार कुण दिन्यो? 24ईशु बाऊं बोल्यो, म थानै एक सुवाल बुझूं हूं, ज थे मनै बिको जुबाब दे द्यो। जणा म बी थानै बता देस्यूं क म कि अधिकार करूं हूं। 25यहून्ना न बतिस्मा देबा को अधिकार कठैऊं मिल्यो? परमेश्वरऊं नहिस मिनखाऊं? अर बे आपसरी म बतळाता होया खेबा लाग्या, ज आपां खेवा क परमेश्वरऊं जणा बो आपा न खेसी बिको बिश्वास क्यूं कोनी कर्या? 26अर ज आपा खेस्यां मिनखाऊं जणा मिनखा को डर ह, क्युंक मिनख बिनै परमेश्वर की खेबाळो मानी ही। 27जणा बे ईशुनै बोल्या म्हानै कोनी बेरो। ईपै

ईशु बी बाऊं बोल्यो, “जणा म बी कोनी बताऊं क म अ बाता कि अधिकारऊं करूं हूं!”

दो बेटा की निति-कथा

28थे काई सोचो हो? एक मिनख क दो छोरा हा। बो बडोडा छोरा क कनै गयो अर बिऊं बोल्यो अंगूरा का बाग म जा अर काम कर। 29पण बो बोल्यो ‘मेरो मन कोनी’ बिकै पाछै बी बो चलेगो। 30“अर बो बाप दसरा छोरा कनै गयो अर बिऊं बी बंयांई बोल्यो। अर बो छोरो बोल्यो हा ज्यास्यूं पण कोनी गयो। 31“बताओ आ दोन्या म कूणस्यो जो बाप चावो हो बो कर्यो? बे बोल्या बडोडियो छोरो कर्यो।” जणा ईशु बाऊं बोल्यो “म थानै साची खेऊं हूं, चुंगी लेबाळा अर वेश्या परमेश्वर क राज म थारऊं पेल्या ज्यासी। 32अंयां म इ ताई खर्यो हूं क्युंक यहून्नो बतिष्ठो देबाळो थानै धार्मिकता को गेलो दिखाबा ताई आयो पण थे बिको बिश्वास कोनी कर्या। पण चुंगी लेबाळा अर वेश्या बिको बिश्वास कर्या। पण थे बानै देखर बी थारा हियानै कोनी बदल्या अर नाहि बिपै बिश्वास कर्या।

अंगूरा का बाग का ठेकेदारा की निति-कथा

33एक निति-कथा और सूणो: एक जमिदार हो। बो अंगूरा को बाग लगायो अर बिकै च्यास्तमेर बाड़ बाँधी। अर अंगूरा को रस काडबा ताई खाडो खोदर एक गरट लगायो अर रखबाळी ताई एक मचाण बणाई। अर बिनै किराया

प देर दूर दिसावर चलेगो। 34 अर जद अंगुर लागबा की रूत आई जणा बो मालिक ठेकेदारा क कनै आपका दासानै अधिकार क सागै भेज्यो क बे अंगूरा को हिस्सो लेर आवै। 35 पण बे ठेकेदार बा दासानै पकड़र कय्याँ न तो पिटचा, कय्याँ क भाठा मार्या अर कय्याँ न ज्यानऊँ मार गेर्या। 36 अर बो मालिक ओज्यूँ बा दासाूँ ज्यादा दासानै अधिकार क सागै बाकै कनै भेज्यो पण बे ठेकेदार बाकै साकै बी बोई बरताव कर्यो। 37 आखर म बो आपका बेटानै बाकै कनै आ सोचर भेज्यो क बे इको तो मान करसी। 38 पण जद बे ठेकेदार बिका बेटानै देख्या जणा आपसरी म खेबा लाग्या, ओ तो बिको वारिस ह, आओ इनै मार गेर्या अर ईकी ज्यजादै हड़पल्या। 39 अर बे बिनै पकड़र बिकै धका मारर बागऊँ बारै लेग्या अर मार गेर्या। 40 जणा इब थे बताओ जद बो मालिक आसी जणा बा ठेकेदारा क सागै काँई करसी? 41 जणा बे ईशुूँ बोल्या, “बे कुटिचर हा इ ताँई बो बानै बेरहमी ऊँ मारसी अर अंगूरा को बाग दूसरानै ठेका प दे देसी जखा बिनै अंगूरा की रूत म बिकी पाती दे।” 42 ईशु बाऊँ बोल्यो, “थे शास्त्र को ओ बचन कोनी बाच्या के?

“जि भाठानै चेजारा ख्याई जोगो
कोनी समझ्यो, बोई कूणा को
भाठो निकळ्यो?
अर ओ प्रबु कर्यो ह जो आपणी
आख्या क सामै अचम्बो ह’।”

43 इ ताँई म थारऊँ खेऊँ हूँ, परमेश्वर को राज थारऊँ खोस लियो ज्यासी अर बा मिनखानै दे दियो ज्यासी जखा बिकै खया गेल बरताव करै ह। 44 अर जखो बी इ ढाड प पड़सी, बो टुकड़ा-टुकडा हो ज्यासी अर आ ढाड जिपै पड़सी बिनै पिस गेरसी। 45 प्रमुख याजक अर बड़का आ निति-कथानै सूण्या जणा बे समझगा क ओ आपणा बारा म इ खेरो ह। 46 जणा बे ईशुनै पकड़बा की कोशिश करी। पण मिनखाूँ डरगा क्युँक मिनख ईशुनै परमेश्वर की खेबाळो मानता हा।

ब्या का जिमनबार की निति-कहाण्या

22 ईशु बानै एक ओर निति-कथा सुणाई। 2 ईश्वर नगरी को राज बी राजा की जंयाँ ह। जखो आपका बेटा का ब्या की रोटी की त्यारी करी। 3 अर बो आपका दासानै भेज्यो क बे बा मिनखानै जानै नूतो दियो गयो हो बानै जिमबा ताँई बुलार ल्यावी। पण बे कोनी आया। 4 बो राजा ओज्यो आपका दासानै आ खेर भेज्यो की बाकै कनै जार खेवो की पेसारो त्यार ह, ई ताँई आओ अर जिमो। 5 जद जार बे दास बानै खया जणा बे बाकी बाता प गोर कोनी दिन्या। अर आप-आपका खेता म अर काम-धंधा प चलेगा। 6 अर कई मिनख तो बा दासा क सागै मारा पिटी करर बाकी जान ले ली। 7 अर जद राजानै इ बात को बेरो चाल्यो जणा बो झाल्या म भरगो अर आपका सिपाईड़ानै भेजर

k 22.4 उरै पेसारा ताँई बैल अर पालेड़ा ज्यानवरानै काँटचा हा क्युँक यहूदी मिनख बैल को माँस खावी ही।

बा कुटिचर मिनखानै मोत की घाट उतरा दिन्यो अर बाकी नगरी म आग लगवा दिन्यी। 8जणा राजा दासा'ऊँ बोल्यो पेसारो तो त्यार ह पण जिमबाळा इ कुटिचर निकळा। 9ई ताँई बो आपका दासानै बोल्यो थे गळी-कुच्या म जायो अर जताबी मिनख थानै बढै मिलै बानै जिमबा ताँई बुलार ल्याओ। 10बे दास गया अर बानै जता बी भला बुरा मिनख मिल्या बा सनै लेर आया अर बाऊँ टैट भरगो। 11राजा बानै देखबा ताँई माईनै आयो जणा बो बढै एक मिनखनै देख्यो जखो बे गाबा कोनी पेर राख्यो हो जखा ब्या म आबाळा मेहमानै सिवार दिन्या गया हा, 12जणा राजा बिनै बोल्यो तु ब्या हाला गाबा पेर्या बिनाई माईनै कय्याले आगो। पण बो मिनख क्युई कोनी बोल्यो। 13बिनै चुपच्यालो देख्वर राजा आपका दासानै हुक्म दिन्यो इका हाथ पगानै बाँधर बारनै अँधेरा म फिक द्यो जठै ओ दात-पिससी अर बार घालसी। 14जणा ईशु बोल्यो इ नित-कहाणीनै खेबा को मतबल ओ ह, क परमेश्वर बोलानै बुलाया ह पण टाळेडा क्युंक इ ह।

चुँगी देबा प सुवाल

15फरीसी भेठा होर बतळाबा लाग्या ईशुनै कय्यांसिक बिकीई बात म फसायो जावै। 16जणा बे हेरोद को पक्ष लेबाळा गुट का कयुंक मिनखा क सागै आपका चेलानै ईशु क कनै भेज्या। अर बे ईशुनै कह्या गुरु म्हें जाणा हा थे सांचा हो अर परमेश्वर आपणा'ऊँ काँई चावै बिनै खराई'ऊँ बतावो हो। म्हे आबी जाणा हा थे मुंडो देख्वर टिको कोनी काडो अर

नाहि खिकी परवा करो हो। 17ई ताँई थे महानै बताओ कैसरनै चुँगी देणी चाये क नई? 18बो बाकी चाल भापगो अर बाऊँ बोल्यो कपटचो थे मनै क्युँ बिचासो हो? 19थे मनै एक सिङ्को दिखावो। जिनै थे चुँगी म दिया करो हो, जणा बे बिनै एक सिङ्को दिन्यो। 20अर ईशु बाऊँ बुझ्यो ईपै किकी फोटू अर किको आंक ह? 21बे बोल्या “रोम का समराट को” जणा ईशु बोल्यो जो समराट को ह बो समराटनै द्यो अर जो परमेश्वर को ह बो परमेश्वरनै द्यो। 22आ सुण'र बे ताजुब म पड़गा अर बठै'ऊँ चलेगा।

ओज्यु जि उठबा प सुवाल

23जनाडै इ सदुकी बी ईशु क कन्नै आया। बे मर्या पाछे ओज्यु जि उठबानै कोनी मानता हा। बे ईशुनै बुज्या, 24“गुरु मूसो खयो ह, जिको भाईड़ो बिना आस ओलाद क इ मरज्यावै जणा बिको भाईड़ो बिकी लुगाईनै ब्याले। अर आपका भाईड़ा का वश न आगै बढावै। 25म्हारै अठै सात भाईड़ा हा बा मऊँ बडोड़ा को ब्या होयो अर क्युंक दिना क पाछे बो बिना आस ओलाद क इ मरगो। जणा बिको छोटक्यो भाईड़ो बिकी लुगाईनै ब्याली। 26जणा बो दूसरो अर इकै पाछे तीसरो बी बिना आस ओलाद क इ मरगो। अंय्याई बा सात्यु भाईड़ा क सागै इ होयो। 27अर आखर म बा लूगाई बी मरगी। 28जणा थे बताओ जद मिनख मेरेडा'ऊँ जि उठसी जणा बि लूगाई को मोटचार बा सात्यु भाईड़ा मऊँ कुणसो होसी। क्युँक बे सात्युई बिनै ब्याली ही। 29ईशु बाऊँ बोल्यो थे गळत हो। थे न

तो शास्त्रानै जाणो अर नाहि परमेश्वर की शक्तिनै। 30 सच तो ओ ह क मरेड़ा मऊँ जि उठबा क पाछे बा लुगाई बा मऊँ कोइसा की इ लुगाई कोनी होसी। क्युँक ओजयु जि उठबा क पाछे लुगाई-मोट्यारा म ब्या कोनी होवै पण बे ईश्वर नगरी दूता की जंयां होज्यासी। 31 जठे ताँई मरेड़ा को जी उठबा को सुवाल ह, जणा के थे ओ कोनी बाच्यो? परमेश्वर खयो ह, 32 “म अब्राहम को परमेश्वर इसहाक को परमेश्वर अर याकूब को परमेश्वर हूँ।” बो मर्या खप्पा को कोनी पण जीवता को परमेश्वर ह। 33 बे ईशु की इ सिखनै सुणर ताजुब म पड़गा।

सऊँ बडो हुक्म

34 जद फरीसी सूण्या की ईशु सदुकियानै चोखो जुबाब देर बाको मुँडो बंद कर दिन्यो ह। जणा बे एक सागै भेळा होया। 35 अर बाम’ऊँ एक यहूदी शास्त्री ईशुनै अलजाबा ताँई बुझ्यो, 36 “गुरु जी विधि-विधान म सऊँ बडो हुक्म कुणसो ह?” 37 ईशु बिऊँ बोल्यो, तू तेरा प्रबु परमेश्वर’ऊँ सगळा हिया, सगळा पिराण अर सगळी बुद्धि’ऊँ प्यार कर। 38 ओई सऊँ बडो अर पेलो हुक्म ह। 39 अर दुसरो हुक्म बी इ जिसोई ह थारा पड़ोसी’ऊँ जंयां तु खुद’ऊँ प्यार करै ह बंयाँई प्यार करज्ये। 40 विधि विधान अर परमेश्वर की खेबाळा की पोथ्या आ दो हुक्मा प इ टिकरी ह।

मसी किको बेटो

41 जद फरीसी भेळा हा, जणाई ईशु बाऊँ एक सवाल बुझ्यो, 42 “मसी किको

बेटो ह थे बिकै बारा म काँई सोचो हो?” बे बोल्या “दाऊद को।” 43 जणा बो बाऊँ बोल्यो दाऊद आत्मा’ऊँ भरर बिनै प्रबु क्युँ खेवै ह अर ओ मांडेडो बी ह;

44 प्रबु मेरा प्रबु’ऊँ खेवै ह तु मेरै दायिनै हाथ बैठयो रे जद ताँई म तेरा दुश्मनानै तेरै पगा तल न कर द्यूँ।

45 जद दाऊद बिनै प्रबु खेवै ह जणा बो बिको बेटो क्याँ हो सकै ह? 46 ईशु की बातानै सुणर बाको मुंडो बंद होगो अर बि दिन क पाछे बाम’ऊँ कोईकी इ ईशु’ऊँ ओजयु सुवाल बुझबा की हिम्मत कोनी होई।

शास्त्री अर फरिसियाँ की जंयां
का काम मना करज्यो

23 जणा ईशु चेला अर भीड़’ऊँ बोल्यो। 2 परमेश्वर का विधि-विधान न सिखाबाळा मुसा क पाछे इब शास्त्री अर फरीसी बिनै समझावी ही। 3 इ ताँई बे जो बी खेवी बिनै मानज्यो अर बिय्याँई करज्यो। पण बे जो करी ही बो मना करज्यो। क्युँक बे जो बोली ही बे खुद कोनी करी। 4 बे लोगा प बोला सा नियम कायदा लाधी ही जानै मानबो मुसकिल ह। पण बे बा नियमा’ऊँ एक नई मानबामै कोईनै आगळी को सारोई कोनी देवै ह। 5 बे जो क्युंबी करै ह बे मिनखानै दिखाबा ताँई करी ही। हाथ अर माथा प बाँधबाळा डब्बानै जिमै धर्मशास्त्र की पोथ्या धरी ज्यावै ह। क्युं ज्यादाई चौड़ी करवाइ ही। अर आपका चोलानै ज्यादाई लम्बो करवाई

ही। जिउँ मिनख बानै धर्मी जाणी। ६बे जिमणबार अर अरदास करबाळी झांझां म सऊँ चोखी झांझां म बैठणो चावी ही। ७अर बे चावै ही क बजारा म मिनख बानै इज्जद देर नमस्कार करै अर गुरु खेर बुलावी।

८थे जखा मेरा चेला हो खुदनै गुरु मना खुवायो क्युँक थारो गुरु एक ह अर बो म हूँ। थे सगळा बराबर्या भाई हो। ९थे धरती प कोईनै इ बाप खेर मान मना दिज्यो क्युँक थारा सगळा को आत्मिक बाप ईश्वर नगरी म रेबाळो परमेश्वर ह। १०अर नाहि थे खुदनै सिख देबाळा खुवाज्यो क्युँक थानै सिख देबाळो एक ह अर बो मसी ह। ११थार मऊँ जखो बी बडो होबो चावै बो दास बाणै। १२अर जखो बी बडो बणबो चासी बिनै छोटो कर्यो ज्यासी अर जखो बी छोटो बाणसी बो बडो कर्यो ज्यासी।

१३-१४हे कपट राखबाळो धर्मशास्त्रियों अर फरिसियों! थार प धिक्कार ह। थे लोगा को ईश्वर नगरी म जाबाळा गेलानै रोको हो। थे न तो खुद बि गेलै जायो अर नाहि लोगानै बी गेलै जाबा द्यो।¹

१५हे कपट राखबाळा धर्मशास्त्रियों अर फरिसियों! थार प धिक्कार ह। थे कोईनै चेलो बणबा ताँई बिकै हाथ धोर गेल होज्यावो हो अर जद बो थारो चेलो बणज्यावै ह। जणा थे बिनै थारऊँ ज्यादा नरग म झोक द्यो हो।

१६यहूदी मिनखा का सरदारो थार प बी धिक्कार ह। थे बा आँधा मिनखा की

जय्याँ हो जखा दूसरानै गेलो दिखाबा की कोशिश करी ही। जखा खेवो हो ज कोई मंदर की सोगन खावै बिनै बा सोगन कोनी लागै। पण ज कोई मंदर म रखेडा सोना की सोगन खावै ह बिनै बा सोगन लागसी। १७ओ आँधो-गेलो बडो काँई ह? मंदर म धेरेडो सोनो नहिस मंदर जखो सोनानै पबितर बणावै ह? १८अर थे बोलो हो क ज कोई वेदी की सोगन खावै बिनै बा सोगन कोनी लागै पण बिषै रखेडा चाढावा की सोगन लागसी। १९ओ आँधो-गेलो आमै बडो काँई ह, चढाईडो चाढावो नहिस बा वेदी जखी बिनै पबितर बणावै ह? २०इ ताँई जखो वेदी की सोगन खावै ह बो बिषै चढाईडा चढावा की बी खावै ह। २१अर जखा मंदर की सौगन खावै ह बो मंदर अर बिमै रेबाळा परमेश्वर की बी सौगन खावै ह। २२अर जखा ईश्वर नगरी की सौगन खावै ह, बो सिंघासन की अर बिषै बैठबाळा की बी खावै ह।

२३हे कपट राखबाळा शास्त्रियों अर फरिसियों! थार प धिक्कार ह। थे पोदिना, जिरा, अर सौफ को दसवो हिसो परमेश्वरनै द्यो हो। पण सऊँ बडी बात परमेश्वर का विधि-विधान न मानबो टाळ द्यो जंय्याँ क न्याय, दया अर बिश्वास चोखो तो ओ होतो क थे बाकै सागै आनै बी मानता। २४ओ आँधा सरदारो थे मच्छरनै तो छाणो हो पण ऊँटनै गिट ज्यावो हो।

¹ 23.13-14 क्युंक हाथऊँ मांडेडी पोथ्या म 14 वी आयत जोडी गई ह थे खाली होडियाँ लुगायाँ को घर लूटो हो। अर दिखाबा ताँई मोडे-मोडे ताँई अरदास करो हो। इ ताँई थानै बोली सजा मिलसी।

25 शास्त्रियों अर फरिसियों! थार प धिक्कार ह, थे लालची अर मतलबी हो। थे बी कचोळा अर थाळी की जय्याँ हो जखा माइन'ऊँ नइ पण बारै-बारै'ऊँ माज्या जावी ही। 26 ओ आँधो फरिसियों जय्याँ कचोळा अर थाळीनै पेली माईन'ऊँ मांज्यो जावै जणा बे बारन'ऊँ बी साफ होज्यावी ही। जणा पेली थे थारा लालच अर मतलबनै छोड़ो। जणा पाढे थे धर्म का काम करबा जोगा होज्यास्यो।

27 हे कपटचो थार प धिक्कार ह, थे चुना पोती कबर की जय्याँ हो। बे बारै'ऊँ तो सौवणी लागै ह पण बाकै माईनै मुर्दो सिडै ह। 28 अंय्याई थे बारै'ऊँ तो धार्मिक दिखो हो पण थारै माईनै छळ कपट भरी ह।

29 हे कपटी धर्मशास्त्रियों अर फरिसियो! थार प धिक्कार ह, थे परमेश्वर की खेबाळा की कबर बणावो हो, अर धार्मिक मिनखा की समाधिनै सजावो हो। 30 अर खेवो हो ज म्हें म्हारै बडगा की टेम होता तो परमेश्वर की खेबाळा न मारबा ताई बाकै सागो कोनी देता। 31 अंय्यां खेर थे खुदई थारै खिलाफ गुवाई देवो हो क परमेश्वर की खेबाळानै मारबाळा की ओलाद हो। 32 जणा इब थारै बडगा की कसर पुरी करल्यो।

33 हे सपोलो थे काँई सोचो हो, के थे नरग'ऊँ बच ज्यास्यो। 34 इ ताई म थानै खेऊँ हूँ, म थारै कन्नै परमेश्वर की खेबाळानै, बुद्धिमानानै अर गुरुआनै भेजस्युँ। पण थे बाम'ऊँ कय्याँ क तो यहूदी मिनखा की अरदास करबाळी झङ्घां म बेत मारस्यो, कय्यानै सतास्यो, कय्यानै सूळी प चढास्यो, कय्यानै मार

गेरस्यो अर नगरी-नगरी थे बाको पिछो करस्यो। 35 फळ सरूप थे हाबिल'ऊँ लेर बिरिक्याह का बेटा जकरयाह तक जिनै थे मंदर अर वेदी क बिच म मार्या हा जता बी धर्मी मिनखा की हत्या ई धरती प होई ह। बाकी सजा भोगस्यो। 36 म थानै साँची बोलु हूँ अ सगळी बाता की सजा इ पीढ़ी का मिनख भोगसी।

यरुशलेम का मिनखा प ईशुनै रोज आयो

37 ओ यरुशलेम का मिनखो थे परमेश्वर की खेबाळानै मारगेर्या अर जिनै परमेश्वर थारै कनै भेज्या बानै बी थे भाठा मार'र मारगेर्या हो। जय्याँ मुर्गी आपका चुजानै पांखा तळै भळो करै ह बर्याई परमेश्वर बी कति बार भेळो करबो चायो पण थे ओ कोनी चाया। 38 इ ताई थारो मंदर तज दियो ज्यासी अर बो खाली होज्यासी। 39 म थानै साँची बोलु हूँ थे इब'ऊँ मनै जद ताई कोनी देखस्यो जद तक थे थारा मुंडा'ऊँ अंय्यां न खेदेस्यो की बो महान ह जखो प्रबु क नाम'ऊँ आवै ह।

यरुशलेम अर दुनिया को बिनास

24 जद ईशु मंदर'ऊँ बारै जार्यो हो जणा चेला बाकै कनै आर बोल्या देखो ओ मंदर कतो सोवणो ह। 2 ईशु बानै बोल्यो थे इ हेल्मीनै खडी देखो हो? म थानै साँची बोलू हूँ अठै एक भाट्यो बी कोनी रेसी। सगळा भाट्या ढा दिया जासी। 3 जद ईशु जैतून की डुँगरी प बैठचो हो जणा चेला एकेला म आर बाऊँ बोल्या म्हानै बता अ बाता कद

घटसी। तेरै आबा अर इ दुनिया का अंत को काँई चिन होसी? 4 ईशु बानै बोल्यो थे समळर रिज्यो थानै कोई छळ न ले। 5 म थानै अंयाँ इ ताँई बोलु हूँ क्युँक मेरै नाम'ऊँ बोला आसी अर खेसी 'म मसी हूँ।' अंयाँ बोल'र बे बोला मिनखानै धोखो देसी। 6 थे जद लडाई अर बिकी अफवाह सूणो जणा मना डरज्यो। क्युँक आ बाता को होबो ते ह। पण बा घडी नास की कोनी होसी। 7 मिनख-मिनख प अर देश-देश प उपर चढाई करसी। अर हर कठैई भूचाल आसी अर काळ पड़सी। 8 पण अ सगळी बाता तो पीड़ा की शरूआत इ ह। 9 बा दिना म थानै सजा दिलाबा ताँई बे पकड़वासी अर मार गेरसी। क्युँक थे मेर प बिश्वास करो हो। इ ताँई सगळी दुनिया थार'ऊँ नफरत करसी। 10 बा दिना म बोला मिनख बिश्वास करबो छोड़ देसी। एक दूसरानै धोखा'ऊँ पकड़वासी अर एक दूसरा'ऊँ नफरत करसी। 11 बोला झूठा परमेश्वर की खेबाला आसी अर लोगानै भटकासी। 12 बुराई बढ़ज्यासी अर बोला मिनखा मऊँ प्रेम-भाव जातो रेसी। 13 पण जखा आखरी ताँई बिश्वास राखसी बे बचाया ज्यासी। 14 परमेश्वर का राज का चोखा समचार को हेल्पो पुरी दुनिया म पाड़यो ज्यासी। जिऊँ सगळी धरती का हर कुणबा का मिनख परमेश्वर को बचन सूणे। जणै पाछै जार इ धरती को अंत होसी। 15 इ ताँई थे उजाड़बाली सुगली चिजानै जठे न होणी चावै ही बठै देखो जिकै बारा म परमेश्वर की

खेबालो दानिय्यल बतायो हो। बाचबालो आ बातानै हळकी ना ले।^m 16 जणा जखा यहूदिया म होवै, बानै डूँगरा म भाग ज्याणो चाये। 17 अर जखा मिनख छात प होवै बे घर क मांय आपकी चिज लेबा न ज्याय। 18 अर जखा खेत म होवै बे गरम गाबा लेबा ताँई ओटा न आवै। 19 अ दिन बा लुगाया ताँई जखी आसऊँ होसी अर दुध प्याबाली टाबरा की माँ ताँई बोली पीड़ा का होसी। 20 थे अरदास कर्या करो क थानै अराम हाळै दिन नहिस श्याला का दिना म न भागणो पड़ै। 21 बा दिना म अंयाँ को कळेस होसी जखो न तो इ जगत क शुरूआत'ऊँ लेर इ इब ताँई कदै होयो अर नाहि कदे होसी। 22 ज परमेश्वर बा दिना न कम ना करतो तो कोई बी कोनी बचतो। पण बिका टाळेड़ा मिनखा की बजै'ऊँ परमेश्वर बा दिना न कम कर दिन्यो ह। 23 बा दिना म थानै कोई खेवै देखो मसी अठै ह। नहिस बठै ह। जणा बाको बिश्वास मना करज्यो। 24 क्युँक झूठा मसी अर झूठा परमेश्वर की खेबाला आसी, बे चिन-चमत्कार अर ताजूब का काम दिखासी। अर ज होसक्यो तौ बे टाळेड़ा मिनखानै बी छळबा की कोशिश करसी। 25 पण थे सूणो म थानै अ सगळी बाता होबा'ऊँ पेलाई बता दिनी ह। 26 इ ताँई ज कोई थानै खेवै क सूणो बो बीड़ म ह जणा थे बठै मना जायो। अर ज कोई खेवै सूणो बो कोठा म लुखर्यो ह जणा बाको बिश्वास मना करज्यो। 27 अंयाँ अकास म बिजळी अगुणी दिशा'ऊँ लेर पाछुणी

^m 24.15 बाचबालो आ बातानै हळकी ना ले। आ बात मत्ती आपकी तरफ'ऊँ मांडी ह।

दिशा ताँई चमकै ह। अर सगळा मिनख बिनै दिखै ह, बंयाँई जद मिनख को बेटो आसी, जणा बिनै सगळा देखसी। 28 जठै क्युं मरेडो पड़यो रेवै ह बठै गिरज कांवळा भेळा होवै ह। 29 बा दिना म, बी कलेस क पाछै सूरज उज्जाळा न स्वो देसी अर चाँद बी कोनी चमकसी। अर अकास मऊं तारा बी तछै पड़ मरसी। अर अकास की शक्तियाँ हिलाई जासी जिऊं बे आपकी झघां छोड़ देसी। 30 “बि टेप आकास म मिनख क बैटा को आबा को चिन दिखसी, जणा धरती का सगळा मिनख छाती पिटसी अर मिनख का बैटानै मेमा अर शक्ति क सागै बाढळा म आतो देखसी। 31 नरसिंगो फुंक्यो जासी अर बो आपका दूतानै ईश्वर नगरी’ऊं धरती प च्यारुमेर भेजसी। अर बे सगळी धरती पऊं टाळेडा मिनखानै भेळा करसी।

अंजीर का दरख्तऊँ सिखो

32 थे अंजिर का दरख्तऊँ सिखो जद बिकी डाळयां नरम होवै अर बिकै कुपळ फुटबा लागै ह। जणा थे बिनै देखर जाणज्यायो हो क उंध्याळो आबाळो ह। 33 अंयाँई जद थे अ बातानै होता देखो जणा जाणज्यायो क मेरै ओज्यु आबा को टेम साकडै इ ह। 34 म थानै सांची खेऊँ हूँ, जद ताँई अ बाता कोनी बितसी इ पिढ़ी को नास कोनी होसी। 35 आकास अर धरती टळ ज्यासी पण मेरी बाता कोनी टळै।

जागता रिज्यो

36 बि दिन अर बि घड़ी क बारा म कोई बी कोनी जाणै। न तो ईश्वर नगरी

दूत अर नाहि बेटो पण पिता परमेश्वर ही जाणै ह। 37 जंयां नूह का टेम म होयो हो। बंयाँई मिनख क बेटा क ओज्यु आबा की टेम होसी। 38 क्युं’क जळ-परलये क पेली जद ताँई नूह जहाज म कोनी चढ़यो हो बि घड़ी ताँई लोग खार्या-पिर्या हा अर ब्याया जार्या हा। 39 अर बानै बेरो ई कोनी पड़यो क कद जळ-परलये आर बानै भहालेगो अंयाँई मिनख क बेटा क ओज्यु आबा की टेम होसी। 40 बि टेम दो जणा खेत म होसी बाम’ऊँ जिको मेर प बिश्वास होसी बिनै सागै ले लिन्यो जासी दूसरानै छोड़ दियो जासी। 41 बंयाँई दो लूगाई चाङ्की म दाणा पिसति रेसी बाम’ऊँ एकनै जिको मेर प बिश्वास ह बिनै सागै ले लियो जासी अर दूसरीनै छोड़ दियो जासी। 42 इ ताँई थे चेता म रेह्वो क्युं’क थे कोनी जाणो क थारो प्रबु कद आसी। 43 ज घर को मालिक जाणै क चोर कद आसी जणा बो जागतो रेहसी अर चोरानै बड़बाई कोनी देसी। 44 इ ताँई थे समळर रिज्यो क्युं’क जि घड़ी क बारा म थे कोनी सोचो बी घड़ी इ मिनख को बेटो आ जासी।

बिश्वास जोगो अर कुटीचर दास की निति-कथा

45 बो बिश्वास जोगो अर स्याणो दास कुण ह? जिनै बिको मालिक नोकर-चाकरा प मुखियो बणायो। जिऊं बो बानै टेमू टेम रोटी टुक देवै। 46 भागहाळो ह बो दास जिनै बिको मालिक आवै जणा बिकै ख्या गेल करता देखै ह। 47 म थानै सांची बोलु हूँ, बो मालिक

बिनै चोखो काम करता देख आपकी सगळी ज्याजाद प मुनिम बणा देसी। 48पण जखो कुटिचर दास होवै ह। बो आ सोच'र क बेरो कोनी मेरो मालिक तो कद आसी। 49अर नोकर-चाकरानै मारबा-कुट्टबा लाग्यो अर दरू-कुटच्या क सागै खाबा-पिबा लाग्यो। 50जणा बिको मालिक अंयां क दिन आसी जि दिन अर जि घडी क बारा म बो सोच्योइ बोनी। 51बो आर बिनै भयंकर सजा देसी अर बिको भाग कपटच्या क सागै ठहरासी जठै रोणो अर दांत पिसणो पड़सी।

दस कुंआरी छोर्या की निति-कथा

25 बि टेम ईश्वर नगरी को राज अंयाँ होसी मानो दस कुंआरी छोर्या आपको दीयो लेर बिंदु'ऊँ मिलबा ताँई चाली। 2आमै पाँच तो स्याणी अर पाँच नासमझी ही। 3नासमझ छोर्या दीयो तो ले लिन्यी पण सागै तेल कोनी ली। 4पण स्याणी छोर्या आपका दीया क सागै कुप्पा म तेल बी भर लिन्यी। 5जद बिंदनै आबा म मोड़ो होयो जणा बे सगळी उंगबा लागी अर सोगी। 6आदी रात क रोलो माच्यो बिंद आर्यो बाँरे चालर बिऊँ मिलो 7जणा बे छोर्या खडी होर आप-आपका दीयानै समाळी। 8अर जखी नासमझ ही बे स्याणी छोर्या'ऊँ बोली थारा तेल मऊँ म्हानै बी द्यो। क्युँक म्हारो दीयो बुझबाळो ह। 9पण बे बोली म्हारै कनै अतो तेल कोनी जिऊँ थानै अर म्हानै पुरो पडै, इ ताँई थे जार बेचबाळा'ऊँ मोल लेल्यो। 10जद बे मोल लेबा ताँई जारी ही अता मई बिंद आगो।

अर जखि छोर्या त्यार ही बानै बिकै सागै ब्या हाळा कोठा म भेज'र कुवाडु ढक दिन्या गया। 11जणा पाछे बे नासमझ छोर्या बी आर खेबा लागी मालिक म्हारै ताँई कुवाडु खोलो। 12पण बिंद बोल्यो म थानै सांची बोलु हूँ, म थानै कोनी जाणू। 13इ ताँई थे चेता म रिज्यो क्युँक थे न तो बी दिन क बाँरे अर नाहि बी घडी क बारा म जाणो हो।

तीन दासा की निति-कथा

14ईश्वर नगरी को राज बी मिनख की जंयां ह। जखो दिसावर जाबा'ऊँ थेली आपका दासानै बुलार बानै क्युँक पिसो-टङ्को दियो। 15बो बानै बाकी उज्मा गेल पिसा दिन्या। एकनै चाँदी हाळी सिङ्का'ऊँ भेरेडी पाँच थेली, दूसरानै दो अर तिसरानै एक देर दिसावर चलेगो। 16अर जिनै पाँच थेली मिली ही बो बाऊँ पाँच ओर कमा लिन्यी। 17अर जिनै दो मिली ही बो बाऊँ दो ओर कमाली। 18पण जिनै एक मिली ही बो बिनै जमिन म खाडो खोदर गाड दिन्यो। 19बोला दिना क पाछै बाको मालिक आयो। अर बाऊँ हिसाब किताब माँगबा लाग्यो। 20जणा जिनै पाँच थेली मिली ही बो ओर पाँच थेल्या क सागै आयो अर खयो, मालिक म थारी पाँच थेल्या'ऊँ ओर पाच थेल्या कमाली। 21बिकी इ बात न सूण'र खयो स्याबास तु बिश्वास जोगो अर चोखो दास ह। तु थोड़ा म बिश्वास राख्यो इ ताँई म तनै ओर बोली विजा प अधिकार देस्युँ। आर मेरै सागै खुशी मना। 22बिकै पाछै दो थेली हाळो आर खयो मालिक थे मनै दो थेली दिन्या

हा। जिउँ म दो ओर कमाली। 23मालीक बिनै बी खयो स्याबास तु बी बिश्वास जोगो अर चोखो दास ह। तु बी थोड़ा म बिश्वास राख्यो इ ताँई म तनै बी बोल्ही चिजा प अधिकार देस्यूँ। आर मेरै सागै खुशी मना। 24बिकै पाछै एक थेली हाळो दास आयो अर खयो, मालिक थे बोल्हा निर्दई हो। थे जठै कोनी बोओ बठै'ऊँ काटो हो, अर जठै कोनी बिखेयो बठै'ऊँ सोरो हो। 25इ ताँई म डरगो अर इ धन न लेज्यार जमिन म गाड दिन्यो। ओल्यो थारो धन। 26बो मालिक बिऊँ खयो तु आळसी अर ख्याई जोगो कोनी, तु मनै जाणता बुझता बी क म जठै कोनी बोऊँ बठै'ऊँ काटू हूँ जठै कोनी बिखर्यु बठै'ऊँ सोरू हूँ। 27इ ताँई तनै अंय्यां करणो चाये हो क मेरा धन न साहूकारानै ब्याजुणा दे देतो। जिउँ म आर बाऊँ ब्याज क सागै ओटो ले लेतो। 28इकै कनै'ऊँ आ थेली लेल्यो अर जिकै कनै दस थैल्या ह बिनै दे द्यो। 29क्युँ'क जिकै कनै जो क्यूँ ह अर बो बिनै सही बरतै ह बिनै परमेश्वर ओर देसी। जिउँ बाकै कनै बोल्हो होज्यासी। पण जाकै कनै जो क्यूँ ह अर बे बिनै सही कोनी बरतै। जणा जो क्युँ बि बाकै कनै ह बो ले लियो जासी। 30इ ताँई इ दासनै जखो ख्याई जोगो कोनी बारै काडो अर अँधेरा म पटक्याओ। जठै मिनख बार घाली अर दांत पिसै ह।

जगत को न्याय

31मिनख को बेटो जद ओज्यु आसी। जणा बो आपकी मेमा अर ईश्वर नगरी दूता क सागै आसी। बो एक राजा की

जंय्याँ आपका मेमा भर्या सिंघासन प बैठसी। 32जणा बिकै सामै पुरी दुनिया का मिनख आसी। अर बो बानै अय्यां एक दुसरा'ऊँ न्यारा करसी जंय्याँ गुवाल्यो बकरियाँ'ऊँ ललडयानै न्यारो करै ह। 33बो धर्मि मिनखानै दाया नाकै अर अधर्मनै बाया नाकै राखसी। जंय्याँ क गुवाल्यो ललडयानै अर बकर्यानै न्यारै-न्यारे राखै ह। 34जणा बो राजा आपकै दायां कानी खड़्या मिनखा'ऊँ बोलसी मेरा बाप'ऊँ आसिस पाईड़ा मिनखो थे आयो अर बा आसिसानै लेल्यो जखी इ जगत क शुरूआत'ऊँ थारै ताँई ह। 35क्युँ'क जद म भूखो हो जणा थे मनै खाबा ताँई दिन्या अर जद म तिसायो हो जणा थे मनै पिबा ताँई दिन्या, जद म अणजाण हो जणा थे मनै थारै घर म बासो दिन्या। 36जद म उगाड़ो हो जणा पेरवा ताँई गाबा दिन्या। अर जद म रोगलो हो जणा मेरी खेचल करी अर जद म कैद हो जणा मेर'ऊँ मिलबा आया। 37जणा धर्मी मिनख बुजसी मालिक म्हें थानै कद भुखो देख'र खाबा ताँई दिन्या अर कद थानै तिसायो देख'र पिबा ताँई दिन्या? 38अर कद म्हें थानै अणजाण देखर म्हारै घरा म बासो दिन्या? कद थानै उगाड़ो देखर पेरबा ताँई गाबा दिन्या? 39थे कद रोगलो हा अर कैद म हा जो म्हे थार'ऊँ मिलबा आया? 40जणा बो राजा खेसी म थार'ऊँ सांची बोलर्यु हूँ, जो क्यु बी थे थारा भोला-ढाळा भाईयाँ ताई कर्या हो बो थे मेर ताँई कर्या हो। 41बाकै क पाछै बो राजा आपकै बाया हाथ खड़्या मिनखा'ऊँ खेसी हाय ह थारपै। थे मेरै कनै'ऊँ चल्या जावो। अर

जखी नाबुझबाली आग शैतान अर बिका दूता ताँई बाल राखी ह बिमै पड़ मरो। 42क्युँक जद म भूखो हो जणा थे मनै खाबा ताँई कोनी दिन्यो। अर जद म तिसायो हो जणा पिबा ताँई कोनी दिन्या। 43अर जद म अणजाण हो जणा थे मनै थारै घरा म बासो कोनी दिन्या। जद म उगाड़ा हो जणा पेरवा ताँई गाबा कोनी दिन्या। अर जद म रोगलो अर कैद म हो जणा थे मेरी समाळ कोनी करी। 44जणा बे बुझसी प्रबु थे कद तो भूखा, अर कद तिसाया, अर कद अणजाण, अर कद थानै गाबा की जुर्त ही, अर कद थे रोगला हा अर कद थे कैदी म हा जो म्हे थारी तिथ कोनी ली? 45म थारैँ साची खेऊ हूँ, जद कदै बी मेरा भोला-ढाला मिनख मऊँ एक को बी भलो कोनी कर्या इको मतलब ओई ह क थे मरै ताँई क्यूँई कोनी कर्या। 46जणा बे मिनख कदैई न खतम होबाली सजा पासी अर धर्मी मिनख कदैई न खतम होबालो जीबन पासी।

ईशु न मारबा की जाळ-साजी

26 बा बाता खेबा क पाछे ईशु चेला ऊँ खयो, 2थानै बेरो ह दो दिना क पाछे फसै को त्युहार ह। अर मिनख को बेटो धोखा ऊँ सुली प चढाबा ताँई पकड़वायो जासी। 3जणा बडा-बडा याजक अर यहूदी बडका काइफा नाम का महायाजक क घर का आगणा म भेला होया। 4अर बे बर्ते जाळ-साजी करी क ईशुनै कय्याँसिक छळ ऊँ पकड़र मारा। 5पण बे आपसर्या म बतलाया, “आपा ईशुनै त्युहार क दिन

कोनी मारा। ज आपा त्युहार क दिन इनै मारा जणा के बेरो जनता दंगो कर दे।

ईशु क उपर अत्तर-फुलेन गेर्यो

6जद ईशु बैतनिया म शीमौन क घरा हो। ओ बोई शमोन ह जिको कोढ़ ईशु धोओ हो। 7जद ईशु रोटी खार्यो हो जणा बठै एक लूगाई संगमरमर का बर्तन म जटामांसी को मेंगो अत्तर-फुलेन लेर आई। अर बा लूगाई बी बर्तन न खोलर बिकै माइनै जत्तो बी अत्तर-फुलेन हो बिनै ईशु क सीर प उन्दका दिन्यी। 8चेला अंयां देखर चिङ्गा अर ख्या, “आ लूगाई इ अत्तर-फुलेन न क्यालै खराब करी ह? 9इनै चोखा दामा म बेचर इऊँ जखा रिप्या मिलता बानै गरीबा म बाँच्यो जा सको हो।” 10ईशु बाकी इ बातनै भापर बानै बोल्यो, “थे इ लूगाईनै क्युँ तंग करो हो? आ तो मेरो मान करी ह। 11गरीब तो थारै सागै सदाई रेहसी, पण म थारै सागै सदा कोनी रेस्युं। 12आ मनै गाडबा ऊँ पेल्याई मेरी काया प अत्तर-फुलेन उन्दकाई ह। 13म थानै सांची खेऊ हूँ, सगळी दुनिया म जठै बी चोखो समचार को हेल्लो पाड़यो ज्यासी, बठै इ लूगाईनै अर इका काम न याद कर्यो ज्यासी।”

ईशुनै धोखो देबा ताँई यहूदा को कगार

14जणा यहूदो इस्करियोती जखो बारा चेला मऊँ एक हो बडा याजका क कनै गयो अर बाऊँ बोल्यो, 15ज म ईशुनै थारै हाथ पकड़वा दयुँ जणा थे मनै काँई देस्यो? जणा बे बिनै चाँदी हाला तीस सिङ्का देबा की बात प राजी होगा अर

बिनै तीस सिङ्का गिणर दे दिन्या। 16 बि
टेम'ऊँ इयहूदो ईशुनै पकड़ाबा की ताक
म मौको ढूँढ़बा लाग्यो।

चेला क सागै आखरी फसै

17 बिना स्वमीर की रोटी हाळै त्युहार
क पेला दिन चेला ईशु क कनै आर
बूझ्या, “तू कठै चावै ह क म्हें तेर ताँई
फसै खाबा की त्यारी करा?” 18 ईशु
बाऊँ खयो नगरी क मांय फलाणीया
मिनख क कनै जायो अर बिऊँ बोलो,
गुरु खयो ह, मेरो टेम साकडै ह, म मेरा
चेला क सागै तेर घरा फसै को त्युहार
मनास्युं। 19 अर बे चेला ईशु क खया
गेल बी नगरी म फसै की रोटी त्यार
करी। 20 जद दिन आथगो ईशु बारा चेला
क सागै रोटी खाबा बैठ्यो। 21 जद बे
सागै बैठ'र रोटी खार्या हा। जणा ईशु
आपका चेलानै बोल्यो, “म थानै सांची
खेऊँ हूँ थारै मऊँ एक जणो जखो अठे
मेरै सागै जीमर्यो ह बो मनै धोखा’ऊँ
पकड़वासी।” 22 बे ईशु की इ बातनै
सुण'र बोला दुखी होया अर बे ईशुनै
एक-एक करके बूझबा लाग्या, “प्रबु बो
म तो कोनी न?” 23 पण ईशु बोल्यो,
जखो मेरै सागै इ कचोला म टिमेवै ह
बोई मनै धोखा’ऊँ पकड़वासी। 24 मिनख
का बेटानै तो मरनो इ ह जंय्यां क
मंडेडो ह। पण कत्ती बुरी दसा ह बी
मिनख की जिकै बजै’ऊँ मिनख को बेटो
पकड़वायो जासी। इऊँ चोखो तो ओ
होतो क बो मिनख जामतोई ना। 25 जणा
बिनै धोखा’ऊँ पकड़ाबालौ यहूदो बोल्यो
हे गुरु बो म हूँ के? ईशु बोल्यो हा
अंय्याँई जंय्याँ तु बोल्यो ह।



चेला क सागै आखरी प्रबु-भोज (26.26)

प्रबु-भोज

26 बे जिमर्याई हा क ईशु रोटी ले'र
परमेश्वरनै धनेवाद दे'र रोटी न तोड़यो
अर आपका चेलानै आ खेतो रोटी बाटी,
“ल्यो आ मेरी काया ह।” 27 इकै पाछै
ईशु कचोलो लियो अर परमेश्वरनै
धनेवाद देर बो कचोलो आपका चेलानै
दियो अर खयो थे सगळाँ बिमै'ऊँ पिओ।
28 क्युँक इ कचोला की अंगूरी मेरा लोय
को करार ह। ओ लोय बोला मिनख का
पापानै माफ करबा ताँई बहायो ज्यासी।
29 म थानै सांची खेऊँ हूँ म इबै'ऊँ आ
अंगूरी जद ताँई कोनी पीस्युं जद ताँई
परमेश्वर का राज म थारै सागै नयी न
पीऊँ। 30 इकै पाछै बे एक गीत गार जैतून
का ढूँगर प चल्यागा।

पतरस ईशुनै पीछाणबा'ऊँ मना करसी

31 जद बे गेला म हा जणा ईशु चेला'ऊँ
बोल्यो, “थे सगळा कानी-कानी हो
ज्यास्यो। क्युँक मंडेडो ह:

‘म गुवाळ्याँ न मारस्युं अर
ललडचा तीन-तेरा होज्यासी।’

32पण म ओज्युं जिन्दो होर थार’ऊँ
अगा’ऊँ गलील जास्यूं।” 33जणा पतरस
खयो चाये सगळा तनै छोड़’र भाग ज्यावै
पण म तनै कोनी छोडुं। 34ईशु बिऊँ
खयो, म तनै सांची खेऊँ हूं आज रात
मुर्गा क बाँग देबा’ऊँ पेल्या तू तीन बार
मेरै बारामै खेसी क म इनै कोनी जाणू।
35जणा पतरस खयो ज मनै थारै सागै
ज्यान बी देणी पडी जणा बी म पिछै
कोनी हटूं। अर बाकी का सगळा चेला
बि अंय्याई बोल्या।

गतसमनी का बाग म अरदास

36इकै पाछै चेला ईशु क सागै
गतसमनी नाम की झांघां गया अर बढै
ईशु आपका चेलानै बोल्यो म बढै जार
अरदास करूँ थे अठैई बेठाया रिज्यो।
37ईशु आपकै सागै पतरस अर जब्दी का
दोन्यु छोरा याकूब अर यहन्ना न लेगो।
ईशु बोलो दुःख दुबलो होर्यो हो। 38ईशु
बाऊँ बोल्यो “मेरो हियो बोलो उदास ह
अठै ताँई की म मरबाळो सो होर्यो हं।
थे उरई मेरै सागै चेता म रिज्यो। 39ईकै
पाछै ईशु बढै’ऊँ चिनेक दुर जार धरती
प मोदो पसर अरदास करबा लाग्यो।
मेरा बापू जी ज आ हो सकै तो मनै इ
पिडा म मना गेरो पण म चाऊँ अय्याँ
नई पण थे चावो बय्याई होवै। 40ईशु
अरदास कर आपका चेला क कनै गयो।
अर बानै सुत्यो देखर पतरस’ऊँ खयो,
थे बोला कचा निकळ्या जो थे मेरै सागै
थोडी-घणी देर इ कोनी जाग सक्यां?
41थे जागता रेह्यो अर अरदास करो



बाग म ईशु को अरदास करबो (26.39)

जिऊँ थे बिचास्या न जाओ। आत्मा तो
चावै ह पण आ काया माडी ह। 42अर
ईशु दूसरकै अरदास करबा ताँई चल्योगो
अर अरदास म खयो, बापू जी ज मेरो
दुःख भोगबो जरूरी ह जणा थे जो चावो
हा बोई मेरै सागै होवै। 43अर ओज्युं बो
चेला क कनै गयो अर बानै सुत्यो देख्यो
बाकै आँख्यां म निंद चढरी ही। 44बो
बानै छोड़’र ओज्युं गयो। अर जय्यां
पेल्या अरदास करी बय्याई बोलर बो
तिसरकै बी अरदास करी। 45ओज्युं ईशु
चेलाकै गयो अर बोल्यो हाल बी थे
आराम’ऊँ सुत्या हो। देखो बा घडी आगी
जद मिनख को बेटो पापिया क हाथ म
सौफ्यो जार्यो ह। 46थे खड़्या होवो अर
देखो मनै पकड़ाबाळो आबाळो ह।

ईशु न धोखा’ऊँ पकड़वायो

47ईशु अंय्यां बोलर्योई हो, क यहदो
जखो बारा चेला मऊँ एक हो बो आपकै
सागै बडा याजक, शास्त्रियां अर बडका
का हुक्म’ऊँ घणी सारी भिड़ लेर बढै
आयो। बाकै कनै तलवार अर लाठच्या
बी ही। 48धोखा’ऊँ पकड़ाबाळो पेल्याई
भिड़नै बता दिन्यों हो क, “जिको म
माखो ल्युं बोई ईशु ह थे बिनै पकड़



यहुदो ईशु को माखो लिन्यो (26.48)

लिज्यो।” 49 अर यहूदो तावलोसो ईशु कनै जार खयो गुरु जी नमस्कार अर बो बाको माखो लिन्यो। 50 ईशु बिनै खयो जी काम ताँई तु आयो ह बो काम कर। जणा बे बिनै पकड़ लिन्या। 51 ईशु क सागाळा मऊँ एक जणो तलवार काढ़र महायाजक का एक दास को कान काट गेर्यो। 52 जणा ईशु बिनै बोल्यो तेरी तलवार ओठी घाल ले जखा तलवारँकै मरै ह बो तलवारँकै मार्यो ज्यासी। 53 केथे कोनी जाणो म मेरा बापनै मददत करबा ताँई बुला सकुं हूं। अर बो ईश्बर नगारी की दुता की बारा सेना^१कै बी ज्यादा मेरै ताँई भेज देसी। 54 ज म अंयां करस्यु जणा शास्त्रा म मंडेडो कंयां पुरो होसी क्युंक अंयां होणोई ह? 55 बी टेमई ईशु भीड़नै खेबा लाग्यो, म कोई डाकू हूं के ज थे मनै पकड़बा ताँई तलवार अर लाठचा लेर

आया हो? म रोजिना मंदर म रेहतो अर सीख देतो हो जणा तो थे मनै कोनी पकड़या। 56 पण अ सगाळी बाता जखी परमेश्बर की खेबाळा पवित्र शास्त्र म मांडी ह बानै पुरो होणोई ह। अर ईशु का चेला बीनै छोड़र भागगा।

यहूदी पंचायत म ईशु
57 बे ईशुनै कैफा नाम का महायाजक क कनै लेगा अर बठै बडा-बडा याजक अर बडका अर शास्त्री अर भेठा होगा। 58 पतरस बाकै गेल-गेल आयो अर महायाजक क आँगणा म चौकीदारा क सागै आ देखबा ताँई क



ईशु न पकड़र लेग्या (26.56)



ईशु महायजक क सामै (26.57)

इब काँई होसी बठै बैठगो। 59 बडा-बडा याजक अर सगाळी पंचायत का मिनख ईशुनै मारबा ताँई बीकै खीलाफ झूठी गुवाई देबाळानै

छुंदबा लाग्या। ६०पण बानै इंयांकी कोई गुवाई कोनी मिली जस्थि बाकै काम आ सकै। जदकी बोला मिनख बाकै खिलाफ झूठी गुवाई दी ही। आखर म दो मिनख आगै आया, ६१अर बे ख्या ओ खेवै ह म परमेश्वर का मंदरनै ढार बिनै तीन दिना क पाछै ओज्यु खड़यो कर सकूँ हूँ। ६२जणा महायाजक खड़यो होर ईशुनै बुझबा लाग्यो, तू जबाब क्यूँ कोनी देवै अ सगळा तैरै खिलाफ गुवाई देर्या ही। ६३पण ईशु चुपचाल्योई रीन्यो। जणा ओज्यु महायाजक बीऊँ बोल्यो म थानै जिन्दा परमेश्वर की सौगन देऊँ हूँ, म्हानै बता तू परमेश्वर को बेटो मसी ह के? ६४ईशु बोल्यो हा जंयाँ थे बोलो हो म बोइ हूँ। अर थे मिनख का बेटानै सर्वशक्तिमान परमेश्वर क दायां हाथ बैठर राज करता देखोगा। अर थे मनै ईश्वर नगराऊँ बादळा मऊँ आतो बी देखगा। ६५महायाजक बिकी आ बात सुणर आपका गाबल्या फाडर ख्यो इब ओर गुवा की जुर्त कोनी ह। ओ अंयां खेर परमेश्वर की बेजजती करै ह अर थे सगळा इकी बाता सुण्या हो। ६६इब थारो काँई फेसलो ह? जणा बे ख्या ओ तो मोत को हकधार ह। ६७जणा पाछै बामऊँ कई बिकै मुंडा प थुकबा अर बिकै मूका मार्या अर बिकै थपड़ मार्या, ६८अर ख्या तू मसी ह न इब भविष्यवाणी करर बता तनै कुण मार्यो?

ईशुनै जाणबाऊँ पतरस को मुकरबो

६९हाल पतरस बारला आँगणा म बैठचो हो, जणा एक दासी बिकै कनै आर बोली “तूबी तो बी गलीली ईशु क

सागै हो। ७०पण पतरस सगळा क सामै नटगो अर बोल्यो तू जो बोलरी ह बा मेरै तो क्युँई पलै कोनी पड़े। ७१अर बो बारली गुवाई का बारना कनै चलेगो जणा एक ओर दासी बिनै देखर बठै खड़या मिनखानै बोली ओ मिनख ईशु नासरी क सागै हो। ७२ओज्युं पतरस नटगो अर सौगन खार बोल्यो म बिनै कोनी जाणू। ७३क्युँक देर पाछै बठै खड़या मिनख पतरस क कनै गया अर ख्या पक्काई तू ईशु क सागळा मऊँ एक ह क्युँक तेरी बोलीऊँ बेरो चालै ह क तु गलिल को ह। ७४जणा पतरस सौगन खार बोल्यो म बी मिनखनै कोनी जाणू ज म बिनै जाणू तो परमेश्वर मनै सजा देवै। अत्ता म इ मुर्गो बाँग देबाऊँ हूँ पेल्या तू तीन बार मेर ताँई खेसी म इन्है कोनी जाणू। अर बो बारनै चलेगो अर पछाड़ा गालर रोबा लाग्यो।

ईशुनै पीछातुस क
सामै हाजिर कर्यो

२७ दिन उगताई बडा याजक अर यहूदी बडका एक मत होयो क ईशुनै कथ्याँसिक मोत की सजा दिबाई ज्यावै। २अर बे ईशु का हाथानै बाँधर रोमि राजपाल पिलातुस क कनै लेगा। अर बिकै हाथा म बिनै सुप दिया।

यहूदो खुद क फासी लगाई

३ईशुनै धोखा’ऊँ पकड़बालो यहूदो जद आ सूण्यो क ईशुनै दोषी ठहरायो गयो ह। जणा बो पछतायो अर बडा



यहूदो सिक्कानै बगा दिन्यो (27.5)

याजक अर बडका कनै चाँदी हाल्ला
तीस सिक्का लेर ओठो गयो। 4 अर ख्यो
म निरदोष मिनख्वै धोखा'ऊँ पकड़वार
पाप कर्यो हूँ। अंय्यां सुण'र बे बोल्या
म्हानै ईऊँ काई लेणो ओ तो तेरो मामलो
ह। 5 अंय्यां सुणर यहूदो बा चाँदी का
सिक्कानै मंदर क मांयनै फिंकर चलेगो
अर जार खुद क फासी लगा लिन्यी।

6 जणा बडा याजक बा सिक्कानै उठार
ख्या आ सिक्का'ऊँ एक मिनख्वै मारबा
ताँई मोल लेयडो ह। अर आपणो विधि-
बिधान आनै मंदर की दान पेटी म धरबा
की इजाजत कोनी देवै। 7 इ ताँई बे
आपसरी म फैसलो कर'र आ सिक्का'ऊँ
एक कुहार को खेत मोल लिन्यो जिऊँ
यरूशलेम म आबाळा पराया मिनख्वा
क मरबा क पाछै बानै गाड सकै। 8 इ
ताँई बो खेत आज ताँई लोई को खेत
खुवावै ह। 9 अर अंय्यां परमेश्वर का
खेबाळा यिर्मयाह को मांडेडो बो आक
बी पुरो होयो;

“बे चाँदी का तीस सिक्का लिन्या,
आ बो रकम ह जस्ति बि खातिर
इसाएल का मिनख देबा ताँई
त्यार होयो।

10 अर जंय्यां प्रबु मनै हुकम दिन्यो हो
बे बंयांई बि रकम'ऊँ कुहार को
खेत मोल लिन्यो।”

पिलातुस ईश'ऊँ सवाल बुज्यो

11 ईशुनै बे राजपाल पिलातुस क सामै
लोया अर बो बिऊँ बुझ्यो “के तु यहूदिया
को राजा ह?” ईशु बोल्यो “हाँ म हूँ”
जंय्यां थे बोल्या हो। 12 अर जद बडा
याजक अर यहूदी बडका बिपै बोली
बाता को दोष लगावा हा बि टेम ईशु
क्युई कोनी बोल्यो। 13 जणा पिलातुस
बोल्यो तु सुणै ह न अ तेरपै कता दोष
लगार्या ही? 14 पण ईशु पिलातुस न क्युई
जबाब कोनी दिन्यो। आ देख'र बिनै बिपै
ताजुब हुयो।

ईशुनै मोत की सजा

15 फसै का त्युहार प पिलातुस रित गेल
एक कैदीनै जिनै लोग चाता बिनै बा ताँई
छोड़ देतो हो। 16 बि टेम बरअबा नाम
को एक कैदी बढै हो जिनै सगळा
जाणता हा। 17 अर बढै भीड़ भेली होगी
जणा पिलातुस बाऊँ बुज्यो थे काँई चावो
हो क म थोरै ताँई किनै छोड बरअबानै
नहिस ईशुनै जिनै थार मऊँ क्युंक मसी
बतावै ह? 18 बो ओ सुवाल इ ताँई
बुज्यो क क्युँक बो जाणगो हो बडा
याजक जळता बळता ईशुनै पकड़वाया

ⁿ 27.16 कई हाथ'ऊँ मांडडी पोथ्या म इको नाम ईशु बरअबा नाम मांडचो गयो ह



सिपाईड़ा ईशु का गाबा बाट लिया (27.35)

ही। 19 अर जद पिलातुस न्याय हाला सिंघासन प बैठयो हो जणा बिकि लूगाई बिकै कनै एक संदेशो भेजयो। जिमै मंडर्यो हो सुबेरसिक म सुपनो इ मिनख की बजै^{अै} बोलो दुःख पाई हूँ। जणा इ धर्मी मिनख क सागे क्युँई बुरौ मना करज्यो। 20 पण बडा याजक अर यहदी बडका जनतानै उकसाया क म्हार ताई बरअबानै छोड़ द्ये अर ईशुनै मार। 21 जणा राजपाल पिळातुस बाऊँ बुज्यो थे आ दोन्या मऊँ कुणसानै छुड़ाबो चावो हो? बे बोल्या बरअबा न! 22 जणा पिळातुस बाऊँ बुज्यो म इ ईशु को जखो मसी खुवावै ह काँई करूँ? बे सगळा बोल्या इनै सूळी चढा दयो। 23 पिलातुस बुज्यो क्युँ औ लाय काई बुरो कर्यो ह? पण बे ओर बी जोर^{अै} बोल्या इनै सूळी प चढावो। 24 पिलातुस आ देखर सोच्यो इब क्युँई कोनी हो सकै ज म भीड़ क स्विलाफ जास्युँ तो दंगो हो सकै ह। इ ताई बो पाणी लेर भीड़ क सामै हाथ धोर खयो, ई मिनख की मोत म मेरो

कोई लेण देण कोनी आ थारी करणी ह। 25 जणा बे सगळा बोल्या इका जिमेबार म्हें अर म्हारा टाबर-टिकर ही। 26 जणा पिळातुस बा ताई बरअबा न तो दियो छोड़ अर ईशु क बेत पड़वार सूळी प चढाबा को हूँकम दे दिन्यो।


सिपाईड़ा ईशु की बेजती करी

27 सिपाईड़ा ईशुनै राजपाल पिळातुस क गढ का आँगणा म लेगा। अर बिकै च्यारूमेर सिपाईड़ा की सगळी पळटण भेळी होगी। 28 बे बिका गाबा उतार बिनै उजळा लाल रंग को गाबो पिराया। 29 जणा बे बिका सिर प काटाहाळी डाळ्यां को मुकट बणार धर दिन्यो। अर बिका दायां हाथ म कामडी^० पकड़वा दिन्यी अर बिकै आगे गोडा टेकर हँसताई खया यहूदिया का राजा नमस्कार। 30 बे बिपै थुकर्या अर बा कामडी लेर बिकै सीर प मार्या। 31 अर बे बिको तमासो बणाबा क पाछै बिका बे गाबा उतार लिन्या अर बिकाई गाबा बिनै ओज्यु पिरार सूळी प चढावा ताई चाल पड़या।

ईशुनै सूळी चढाबो

32 अर जद बे बारनै निकळर क्युंक दूर गया जणा बानै कुरेन को रेबाळो शिमोन नाम को एक मिनख मिल्यो। अर बिनै धमकार खया ईशु की सूळी उठार चाल। 33 अर जद बे गुलगुता जिको मतबल खोपडी की झऱ्यां ह पुच्यां। 34 जणा बे ईशुनै पित मिलेडी अंगूरी पिलाबा

^० 27.29 आ कामडी गन्ना स्यार की होवै ह।



सूक्ष्मी प ईशु अर दो डाकू (27.38)

ताँई दिन्या। पण ईशु बिनै चाख्यो जणा कोनी पियो। 35 इकै पाछे बे ईशुनै सूक्ष्मी प चढा दियो, अर ईशु का गाबा परची गेरेर आपसर्या म बाट लिन्या। 36 अर बे बैठेर्ई बैठगा अर पेरो देबा लागगा। 37 बे बिको दोष पत्र सूक्ष्मी प चिपका दियो जिपै मंडर्यो हो “ओ यहूदी मिनखा को राजा ईशु ह।” 38 बी टेमई ईशु क सागै दो डाकू बी सूक्ष्मी चढाया गया हा एक न तो ईशु क दाया नाकै अर दूसरा न बाया नाकै। 39 आबाळा जाबाळा नाड हिलार-हिलार ईशु की बुराई करा हा। 40 अर खेर्या हा मंदर न ढाबाळा अर तीन दिना म ओज्यु बणाबाळा खुदनै बचा, परमेश्वर का बेटा तळै उतर्या। 41 अंयांई बोलर बडा याजक, शास्त्रानै सिखाबाळा अर बडका क सागै मिलर बिको तमाशो करा हा। अर खेर्या हा, 42 दूसरानै बचाबाळा पेल्या खुदनै तो बचा! ज तू यहूदिया को राजा ह जणा सूक्ष्मी पऊँ तळै उतर्या। जणा म्हें तेरपै बिश्वास करस्यां। 43 ओ बोळो परमेश्वर प बिश्वास कर्या करतो हो। ओ खेतो

हो क म परमेश्वर को बेटो हूँ जणा ज परमेश्वर चावै तो इनै बचावै। 44 अर बे डाकू बी जखा बिकै सागै सूक्ष्मी प चढाया गया हा बिको तमोसो करा हा।

ईशु पिराण तज्यो

45 दोपरा बारा बजे^{अँ} लेर तीन बजै ताँई सगळा देश म अँधेरो छायो रिन्यो। 46 अर करिब तीन बजेसिक ईशु जोर की उवाज म चिलायो “इलोई, इलोई, लमा शबकतीनी?” जिको मतबल ह। “हे मेरा परमेश्वर तु मनै क्युँ तज दियो?” 47 अर जखा मिनख बठै खड़या हा बे अंयां सुणर खेबा लाग्या ओ परमेश्वर की खेबाळा एलिय्या न बुलातो दिखै ह। 48 जणा एक मिनख तावळो सो भागर चुखानै खाटी अँगुरी म बिगोर लाठी प टाँगर ल्यायो अर ईशुनै चुसबा ताँई दिन्यो। 49 अर कई मिनख खया डटो आपां देखस्यां इनै एलिय्यो बचाबा आवै ह क कोनी। 50 अर ईशु जोर^{अँ} चिलार पिराण तज दिन्यो। 51 अर बि टेमई मंदर



मंदर का परदा को फाटबो (27.51)



ढाड म खुदेड़ी कबर (27.60)

को परदो उपर'ऊँ लेर निचै ताँई फाट'र
दो भाग होगो। धरती हालगी अर ढाड
बी तड़गी। 52अर अठै ताँई क क्युँक
कब्रा बी खुलगी अर परमेश्वर का बोला
मेरड़ा धर्मी मिनख ओज्यु जिगा। 53बे
कब्रा'ऊँ निकल'र ईशु क जिबा क पाछै
यरूशलेम म जार बोलानै दिख्या। 54रोमी
सेना को सूबेदार अर ईशु क पेरो देबाला
मिनख भूचाल अर जो बढै घट्यो हो
बिनै देखर डरगा। अर ख्या ओ सचमई
परमेश्वर को बेटो हो। 55बढै घणी सारी
लुगाया बी ही बे ईशुनै परऊँई खड़ी-
खड़ी देखै ही बे बिकी सेवा करबा ताँई
गलिल'ऊँ बिकै सागै आई ही। 56बा
लुगाया म मरियम मगदलिनी, याकूब
अर योसेस की माँ मरियम अर याकूब
अर यहून्ना की मा ही।

ईशुनै कबर म धर्या

57जद दिन आथगो जणा अरिमतियाह
नगर'ऊँ यसुफ नाम को एक पिसाळो
मिनख आयो। ओ ईशु को चेलो हो।

58ओ पिलातुस क कनै गयो अर बाऊँ
ईशु की लास माँगी। जणा पिलातुस हुक्म
दियो इनै लास दे दी जाय। 59यसुफ
लासनै लियो अर बिनै एकदम साफ
गाबा म लपेट्यो, 60बिकी लासनै बि
कबर म धरयो जिनै बो ताजा ई ढाडै
खोदर बणवायो हो अर कबर का मुंडानै
बडासार गोळ भाठा'ऊँ ढक'र चलेगो।
61मरियम मगदलिनी अर दूसरी मरियम
आर बि कबर क सामै बैठगी।

ईशु की कबर को पेरेदार

62शक्रवार क आगलै दिन जो यहूदी
मिनखा को अराम हालो दिन हो बि दिन
याजक अर फरीसी पिलातुस क कनै
गया। 63अर ख्या महाराज, म्हानै याद ह
जद बो धोखेबाज जिन्दो हो जणा खेतो
हो क मेरी मोत क पाछै म तिजै दिन
ओज्यु जिन्दो होज्यास्यूँ। 64इ ताँई थे
हुक्म द्यो क तीन दिना ताँई कबर की
पेरादारी करी जाय। क्युँक कदै अंयां न
होज्या क बिका चेला बिकी लास चुरा
लेज्यावै अर मिनखा'ऊँ खेबा लागी क
बो मेरड़ा मऊँ जिगो ह। अर ओ काम
बिका पेलड़ा कामा'ऊँ बी बुरो होसी।
65जणा पिलातुस ख्यो थे पेरो लगाबा
ताँई सिपाईड़ा लेज्यावो अर जंयां थे
चावो हो बंयांई पेरो देवो। 66जणा बे
जार कबर प लगाइड़ा भाठा प छाप
लगा दिनी अर पेरो देबा ताँई सिपाईड़ानै



सिपाईड़ा कबर पेरो देता (27.66)

बठैर्ड बिठा दिन्या जिऊँ बे बिकी निगां
राख सकै।

ईशु को जि उठबो

28 अराम हाला दिन क पाछै
दितबारनै सुवारै मरियम बी
ईशुनै कबर म देखबा ताँई गयी। 2अर
च्याणचुकई एक जोरको भूचाळ आयो
अर बि टेमझ ईश्वर नगरीऊँ एक दूत
धरती प आयो बो कबर प जार बिका
मूंडापै लागेड़ा भाठानै हठार बिपै बैठगो।
3बिको मुङ्डो आकास की बिजली जंयां
भळका मारो हो अर बिका गाबा बी
बर्फ जंयां धोळा धप हा। 4बे सिपाईड़ा
जखा पेरो देवा हा बे डर क मारी धुजबा
लाग्या अर मरेड़ा समान होगा। 5जणा
बो दुत जखो बठै बैठयो हो बो बा
लुगायाऊँ खयो, डरो मना म जाणूँ हूँ
क थे ईशुनै ढुँढो हो जिनै सूळी प चढायो
गयो हो। 6बो अठै कोनी। परमेश्वर बिनै
ओज्यु जिन्दो कर दिन्यो ह। जंयां क
बो थारऊँ बोल्या करतो हो। आओ अर
देखो जठै बिकी लास धोड़ी ही। 7जणा
इब तावलीसी जार बिका चेलानै ओ
समचार सुणाओ क बो मरेड़ा मऊँ जि

उठयो ह। अर बो थारै अगा'ऊँ गलिल
जासी, अर थे बिनै बठैर्ड देखस्यो, म जो
थानै खयो हूँ बिपै गोर करो। 8बे लुगाया
तावलीसी कबर'ऊँ निकली बे डररी अर
राजी बी होरी ही अर चेलानै ओ समचार
देबा ताँई भागरी ही। 9जणा चाणच्युकई
ईशु बानै मिल्यो अर खेयो नमस्कार अर
बे बिकै पगा म धोक खार बाकै पगानै
पकड़ लिन्यी। 10जणा ईशु बाऊँ बोल्यो
डरो मना थे मेरा भाइड़ा'ऊ बोलो क
गलिल जाबा ताँई रवानगी करो अर बे
मनै बठैर्ड देखसी।

चेरेदार रिश्वत खाई

11जद बे लुगाया गेला म ई ही जणा
बे सिपाईड़ा जखा पेरो देवा हा नगरी म
गया। अर जो क्युँ बठै होयो बिकै बारा
म बडा याजकानै खे सुणाया। 12बे बडा
याजक यहूदी बडका क सागै मिल'र
साजिस गड़ी। अर बा सिपाईड़ानै घणा
सारा पिसा देर, 13बाऊँ खया थे लोगानै
खिज्यो क रातनै जद म्हे सोर्या हा जणा
ईशु का चेला आर बिकी लासनै चुरा
लेगा। 14अर ज थारी आ बात राजपाल
ताँई जासी जणा म्हें बिनै समझ्या देस्या।
थे बेफिकर रह्यो, म्हे थारो बाल इ बाको
कोनी होबा द्या। 15पेरादार पिसा लेर
बंयांई कर्या जंयां बाऊँ खयो गयो हो।
अर इ बातनै यहूदी मिनख आज ताँई
मनै ही।

चेला ताँई बडो हुक्म

16ग्यारा चेला गलील की बी ढुँगरी प
गया जठै जाबा ताँई ईशु बानै खयो हो।
17अर जद बे बिनै बठै देख्या जणा बे

बिकै आगै धोक खाई। पण कव्यां क हिया म सक बी हो। 18 जणा ईशु बाकै कनै आर खेयो ईश्वर नगरी को अर इ धरती को सगळो अधिकार मनै दियो गयो ह। 19 इ ताँई थे जायो अर सगळी धरती का हर कुणबा का मिनखानै मेरा

चेला बणाओ अर बाप, बैटा अर पबितर आत्मा क नाम म बतिष्ठो द्यो। 20 म थानै जो हुक्म दिन्यो हूँ बे सगळी बाता बानै मानबो सीखाओ। अर याद राखज्यो इ जगत की अंत घडी ताँई सदाई म थारै सागै रेस्यूं।

मरकुस

क हाथा माण्डेडो चोखो समचार

भूमिका

परमेश्बर का बेटा ईशु मसी को चोखो समचार ई बात क सागे चालु होवै ह, “परमेश्बर का बेटा ईशु मसी को चोखो समचार।” ई समचार म ईशु न एक मेनती अधिकारी की जंय्यां बतायो गयो ह। अर बिको अधिकार बिकी सीख म, ओपरी बलाया प अर मिनखा क पापा न धोण क बारा म सामै आयो। इमै ईशु खुद न ‘मिनख को बेटो’ बोलै ह। बो मिनखा न पापा स अजाद करबा ताँई आपका पीराण देबा आयो।

मरकुस ईशु की सीख अर बचना प जोर कोनी देवै पण बिका कर्मा प जोर देवै ह। जणाई तो बो बिकी कथा न साफ सिधा अर चोखा ढंग स पेश करै ह। यूहन्ना बतिस्मो देबाळो, ईशु को बतिस्मो अर बिका बिचासणा स जुड़ी बाता क पाछै, लिखबाळो हाथ की हाथ ईशु की सीख बिकी निरोग करबा की बाता अर सेवा कामा को बखान करबा लागै ह। जंय्यां-जंय्यां टेम बित्यो बंय्यां-बंय्यां ही ईशु की बाता न मानबाळा ओर चोखा ढंग स बिनै जाणबा लाग्या, पण बिका सामला ओर ज्यादा खतरनाक होता गया। आखरी पाठ म ई धरती प बिका आखरी असो की बाता को बखान करता हुया, जामै खास खास बाता बिनै सूळी प चढ़ायो जाणो अर बिको जी उठबो।

रूप-रेखा

चोखो समचार को चालु होणो (1:1-13)

ईशु को गलील म लोगा की सेवा करणो (1:14-9:50)

गलील स यरुशलेम को दोरो (10:1-52)

यरुशलेम म आखरी असो (11:1-15:47)

ईशु को जी उठबो (16:1-8)

ईशु को दर्शाव अर ईश्वर नगरी म जाणो (16:9-20)

यूहन्ना बतिस्मो देबाळा को हैल्लो

1 परमेश्वर का बेटा ईशु मसी^a को
चौखो समचार अंयां चालु होयो।
2 जंयां की यशायाह परमेश्वर की
खेबाळा की पौथी म मंडर्यो ह।

“देख म तेरो गेलो बणाबा ताँई तेरै

पेल्या मेरा दूत न भेजुँ हूँ।

3 बीड़ म एक हलकारो हैल्लो
मरै ह। की, ‘प्रबु ताँणी गेलो
बणाओ, अर बिको गेलो सिधो-
सपाट करो’।”

4 यूहन्नो बीड़ क मांय आयो अर बो
बठै बतिस्मो देतो अर परचार करतो
हो की थे थारा हिया न पाप का गेलाऊँ
बदलर बतिस्मो लेल्यो जिसै परमेश्वर
थारा पापा न धो देसी। 5 एहूदीयां दिसावर
अर युश्लेम नगरी का घणक्राक मिनख
बिनै सुणबा बिकै कनै गया। अर बे
बठै जार आपका पापा न मान्या जिसै
बो बानै यरदन नंदी म बतिस्मो दियो।
6 यूहन्नो ऊँट क बालाऊँ बणेड़ा गाबा
पेरतो हो अर कमर प चमड़ा को पट्टो
बाँध्या करतो हो। बो टिड्युआ अर जंगली
शैद खाया करतो हो 7 अर बो मिनखा
म परचार करतो हो की, “मेरै पाछै एक
जणो आर्यो ह। बो मेर हू बोलो महान
ह, अर म तो बीकाळा जूता का सळ
खोलबा जोगो ही कोनी 8 अर म तो थानै
पाणीऊँ बतिस्मो द्युँ हू पण बो थानै
पवित्र आत्मा स बतिस्मो देसी।”

ईशु को बतिस्मो अर परीक्षा

9 बा दिना म अंयां होयो ईशु गलील
का नासरतऊँ आयो अर बठै यूहन्ना स
यरदन नंदी म बतिस्मो लियो। 10 जंयां
ई बो पाणी मऊँ बारनै निकळ्यो बो
देख्यो की अकास खुलगो अर पवित्र
आत्मा कबूतर की जंयां बिपै उतरी।
11 अर बादळा मऊँ हैल्लो आयो, “तू मेरो
लाड़लो पूत ह, म तेरुँ बोलो राजी हूँ।”

12 इकै पाछै पवित्र आत्मा बिनै
हात्युहाथ जोर देर बीड़ म लेगी। 13 बठै
चालिस दिना ताँई शैतान^b बिनै बिचासतो
रियो अर बो बठै जंगली जीनावरा क
सागै रैहतो अर ईश्वर नगरी दूत बिकी
खेचळ करता हा।

ईशु को सेवकाई करबो

14 यूहन्ना न कोठड़ी क मांय न बन्द
करबा क पाछै ईशु गलील गयो अर
बठै परमेश्वर को चौखो समचार लोगा न
सुणाबा लाग्यो। 15 बो खयो, “परमेश्वर
को राज कनै आबा को ठिक टेम आगो
ह जिमै परमेश्वर राज करसी। ई ताँणी
थे पापाऊँ हियो फिराओ अर परमेश्वर
का चौखा समचार प बिश्वास करो।”

मछुआ न ईशु बुलायो

16 जद ईशु गलील दरियाव क किनारा
किनारा जार्यो हो जणा बो शमोन अर
शमोन का भाई अन्द्रियास न देख्यो बे
मछी पकड़बाळा हा, अर बि टेम बे मछी

^a 1:1 मिनखा न पापा स बचाबालो राजा
को बेरी।

^b 1:13 भूत पलिता को सरदार अर मिनखा अर परमेश्वर

1:2 मलाकी 3:1 1:3 यशायाह 40:3

पकड़बा ताँई दरियाव म जाळ गेर्या हा 17 ईशु बण स बोल्यो, “मेरै गेल आओ म थानै परमेश्वर ताँई मिनखा न ल्याबाळो बणास्युँ।” 18 बे जाळ न छोड़र बिकै गेल हो लीया। 19 अर बे ज्युँई थोडा सा आगै ढळयाक जणा बानै जब्दी को बेटो याकूब अर बिको भाई यूहन्नो दिख्यो बे न्याव म जाळ सुधारा हा। 20 ईशु बानै तावळो सो आपकै कनै बुलायो अर बे आपका बाप जब्दी न मजुरा क कनै छोड़र खुद बिकै गेल होगा।

मिनख मऊँ ओपरी-बलाय काढि।

21 अर बे कफरनहूम गया अर एहूदीयां का आबाळा अराम हाळा दिन^c ईशु एहूदीयां की प्रार्थना करबाळी झाघा गयौ अर मिनखा न परबचन सीखाबा लाग्यो। 22 लोग बिका बचना न सुणर ताजुब म पड़गा। क्युंक बो बानै शास्त्रा न सीखाबाळा की जंयां परबचन कोनी देतो हो, पण एक अधिकारी की जंयां परबचन देतो हो। 23 बण एहूदीयां का प्रार्थना घर म एक मिनख हो जिकै मांय ओपरी-बलाय ही अर बो चाणचुक्यो ही जोरऊँ बार घालर 24 बोल्यो, “ओ नासरत का ईशु थारो-म्हारो काँई लेण-देण के तू म्हानै तब्बा करबातांणी आयो ह, म जाणूँ हूँ की तू परमेश्वर को खरो मिनख ह!” 25 बिकै अंयां बोलता ही ईशु बिनै दकाल्यो अर बिनै खयो, “तू चुपचाली रैह अर इमैऊँ बारै निकळ ज्या।” 26 ओपरी-बलाय बी मिनख न

मरोड़र बार घालती बिमै स निकळगी। 27 ई बातऊँ सगळाँ मिनख चोरंगा रैट्या। अर आपसरी म बूझबा लाग्या, “आ बेधड़क सीखाबाळी नई सीख काँई है? अर ओ ओपरी-बलाय न भी ओडावै ह, अर बे इको ख्यो मानै ह।” 28 अर आ कारनामा की टो-टो गलील अर बिकै कनै का सगळाँ गाँवा म होगी।

ईशु बोळा रोगला न निरोगो कर्यो

29 बो तावळो सो एहूदीयां का प्रार्थना घर स निकळर याकूब अर यूहन्ना क सागै शमोन अर अन्द्रियास क घरा गयो। 30 शमोन की सासु क उन^d होरी ही जि बजै स बा बिछावणा म पड़ी ही बिकै बारा म बे ईशु न जद की जद बताया 31 ईशु बिकै कनै जार बिको बावळयो पकड़र बिनै उठायो अर बा निरोगी होगी अर जणा बा बाकी सेवा पाणी करबा लाग्यी। 32 दिन आथ्या पाछै लोग रोगला न अर जिकै मांय न ओपरी-बलाय ही बानै बिकै कनै ल्याया। 33 अर पूरी की परी नगरी बारना क आगै उल्ट पड़ी। 34 ईशु बा रोगला न निरोगो कर्यो जो भाँत-भाँत की पीड़ा म हा। अर ओपरी-बलाय बी काढि। अर बो बा ओपरी-बलाय न बोलबा कोनी देतो हो क्युंक बे बिनै जाणै ही।

गलील म ईशु को परचार

35 बो भागपाट्या ही आपका घरा न छोड़र उजाड़ म चलेगो अर बो बैठ

^c 1:21 एहूदी मिनखा को अराम हाळो दिन। बि दिन बै काम ऊँ अराम करता अर परमेश्वर क भवन म जार बीकी भगती करता हा जिनै सब्त को दिन बोलै है। ^d 1:30 जोर की बुखार।

प्रार्थना करबा लाग्यो। ३६ शमोन अर बिका साथी-संगी ईशु न हूँढ़बा निकल्या। ३७ बे बिनै हूँढ़ लियो अर बोल्यो, “सगळाँ मिनख तनै हूँढै ह।” ३८ ई बात न सुण’र ईशु बानै बोल्यो, “आओ ल्यो आपा दूसरी नगर्या म चालां, जिसै म बैठे का मिनखा न बी चोखो समचार दे सूकूँ ई ताँई तो म आयो हू।” ३९ अर बो गलील का सगळाँ एहूदीयां का प्रार्थना घर म परमेश्वर को हैङ्गो देतो गयो अर कई मिनखा मऊँ ओपरी-बलाय काढतो।

ईशु एक कोढ़ी को कोढ़ धोयो

४० ईशु क कनै एक कोढ़ी आयो अर बो ईशुऊँ हाथ जोड़’र अरदास करबा लाग्यो अर बोल्यो, “ज थे चाओ तो मेरो कोढ़ धो सको हो।” ४१ ईशु न बिपै दया आई अर बो बिपै आपको हाथ धर’र खयो, “म चाऊँ हूँ, तू कोढ़ स निरोगो हो।” ४२ अर बो कोढ़ी हान्युहाथ ही निरोगो होगो। ४३-४४ ईशु बिनै चितार बोल्यो, “देख तू ई बात क बारा म कोई न ही मना खिज्ये अर याजक क कनै जार खुद न दिखा, अर मूसा की रीत गेल जंयां मंडेडो ह तेरो कोढ़ धुपण की गुवाई म तू चढावो चढ़ा।” ४५ पण बो बारनै जार सगळाँ म आ बात फिला दि जिसै ईशु बी नगरी म चोड़ै-धाड़ै कोनी जा सक्यो। पण बो उजाड़ म रियो। अर बैठे बी लोग च्याखँमेर हू बिकै क कनै आर्या हा।

हवा भेहड़ा न निरोगो करबो

2 क्युंक दिना क पाछै ओज्युँ ईशु कफरनहूम म आयो। अर मिनखा न

ई बात को बेरो चाल्यो की बो घरा ह। २ अर बी घर क माईनै अर बारनै अत्ता मिनख भेहड़ा होया की बैठे तिल धरबा की भी झांघा कोनी री। अर ईशु मिनखा न परबचन देर्यो हो। ३ अत्ति बारा म ही बैठे च्यार मिनख एक हवा भेहड़ा मिनख न उठार ल्याया। ४ पण धणी सारी भीड़ की बजै स बे बिनै ईशु क कनै कोनी लेज्या सक्या। जणा बे अंय्यां कर्या की बे बी कोठा की छात प चढ़गा अर जठे ईशु हो बैठेऊँ बी छात न हठाया अर बे बिनै खाटली प सुवार रस्सा क बल ईशु क कनै लटका दिन्यो ५ ईशु बाकाळा बिश्वास न देखर बी हवा भेहड़ा मिनखऊँ बोल्यो, “बेटा तेरा पाप धुपगा।” ६ बी बैठे शास्त्रा न सीखाबाळा भी बैठचा हा। बे आप-आपका हिया म सोचबा लाग्या, ७ “ओ मिनख अंय्यां की बात क्युं बोलै ह। ओ तो परमेश्वर की बैजती करै ह, परमेश्वर क अलावा किकी मजाल की बो पापा न धो सकै?” ८ ईशु आपकी आत्मा म जाणगो की बे आपका हिया म काँई सोचर्या ही। अर बो बण स बोल्यो, “थे थारा हिया म ओ काँई सोचर्या हो। ९ चोखो काँई ह, ई हवा भेहड़ा न ओ खेणो की तेरा पाप धुपगा। १० ई जणा ओ खेणो खड़यो हो अर तेरी खाटली उठार चाल पड़। ११ पण म थानै साँची बोलूँ हू की मिनख का बेटा न ई धरती प पाप धोण को हक ह।” अर ईशु हवा भेहड़ा मिनख न बोल्यो, १२ “म तनै खेवूँ हू खड़यो होर तेरी खाटली न लेर तेरै घरा चल्यो जा।” १२ अर बो खड़यो होर तावलो सो आप हाळी खाटली न उठार सगळाँ की आँख्या क आगै ही

चलेगो। अंयां को काम देख'र बाकै ताजुब होयो अर बे आ बोल'र परमेश्वर की जै-जैका'र करी की, “म्हें अंयां को कार कदै ही कोनी देख्या।”

ईशु लेवी न बुलायो

13 ईशु ओज्युँ गलील दरियाव क किनारे गयो अर भीड़ बी बीकै गेल आरी ही जणा ईशु बानै सीख देबा लाग्यो। 14 अर चालता-चालताँई ईशु हलफई का बेटा लेवी न चुंगी चोकी प बैठचो देख'र, बिनै बोल्यो, “मेरै गेल आ।” अर बो खड़्यो होर बिकै गेल होगो।

15 इकै पाछै ईशु लेवी क घरा जार जीमबा लाग्यो। अर बठै बिकै अर बिका चेला क सागै चुंगी लेबाळा अर पापी बी जिमा हा क्युँक अंयां का घणक्राक बिकै गेल आग्या हा। 16 आ देख'र फरीसी अर शास्त्रा न सीखाबाळा बिका चेला स बोल्या, “ईशु पाप करबाळा अर चुंगी लेबाळा क सागै खावै पीवै ह!” 17 ईशु बाकी बातां सुण'र बण स बोल्यो, “निरोग मिनखा न बैद की जुर्त कोनी होवै। रोगला न ही बैद की जुर्त पड़े ह। म धर्मिया ताँई कोनी आयो पण पाप्यां अर अछूता ताँई आयो हूँ।”

बरत को सवाल

18 एक बर अंयां होयो की यूहन्ना अर फरीसीयां का चेला ईशु क कनै आया। अर बा दिना म अंयां होतो हो की यूहन्ना अर फरीसीयां का चेला बरत

करता हा जणा बे ईशु न बूझबा लाग्या, “यूहन्ना अर फरीसीयां का चेला तो बरत करीं हीं, पण तेरा चेला बरत क्युँकोनी करीं?” 19 ईशु बोल्यो, “कणा अंयां होयो हो के बिन्द सागै अर बरात भूखी रैह? जद ताँई बराती बिन्द क सागै ह बे बरत कोनी करीं। 20 पण अंयां का दिन बी आबाळा ही जद बनड़ो बण स दूर कर्यो जासी बे दिन बाकां बरत करबाळा होसी।

21 कोई बी पुराणा गाबा प नया सूति गाबा की कारी कोनी लगावै, अर कोई लगा बी ले जणा धोण क पाछै बा नई कारी भेड़ी होर बि गाबल्या न दुणो फाड़ गेरै। 22 अंयां ही नयो दाखरस पुराणी बखाल^e (खल्लड़) म कोनी भर्यो जावै क्युँक ज्युँ-ज्युँ बो उठै जणा बो दाखरस पुराणी बखाल न फाड़गेरै अर दाखरस अर बखाल (खल्लड़) दोन्युं ही खराब हो ज्यावै। ई ताँई नयो दाखरस नई बखाल (खल्लड़) म ही भर्यो जावै ह।”

अराम हाँझै दिन को प्रबु

23 अंयां होयो की ईशु अर बिका चेला एहूदीयां का अराम हाँझै दिन खेत मऊँ जार्या हा अर चेला चालता-चालता बाळी तोड़बा लाग्या 24 फरीसी बानै अंयां करता देख'र ईशुँक बोल्या, “देख थारा चेला जो काम अराम हाला दिन बरजेड़ो ह बो काम क्युँकरीं ही?” 25 ईशु बण स बोल्यो, “थे ओ कोनी बाच्या की जनाड़े दाऊद अर बिका साथी-संग्याँ न भूख

^e 2:22 अंगूरा का रस न नया बखाल म घालर धर्यो जातो हो क्युँक जंय्या जंय्या अंगूरा को रस पुराणे होतो बिमै हवा बणती नयो बखाल तो बीकै सागै बढ़तो जातो पुराणा बखाल को काँई बढ़तो। “अर औ बखाल चमड़ा को होतो हो।”

लागी अर रोटचाँ की जुर्त पड़ी जणा बो के कर्यो? 26बो कंयां महायाजक अबियातार क टेम म परमेश्वर क मन्दर म गयो अर भेट चढ़ायडि रोटचाँ खाई अर आपका साथी-संग्याँ न भी खुवाई जानै याजक क अलावा कोई न बी खाबा की इजाजत कोनी ही।” 27अर ईशु बण स बोल्यो, “अराम हाल्हो दिन मिनखा क भला ताँई बणायो गयो ह मिनख अराम हाल्हे दिन ताँई कोनी बणायो गयो। 28ई ताँई मिनख को बेटो अराम हाल्हे दिन को बी प्रबु ह।”

टुंडा मिनख न निरोगो करबो

3 ईशु ओज्युँ एहूदीयाँ का प्रार्थना घर म गयो बठै एक मिनख हो जो टुंडो हो। 2क्युंक मिनख ईशु प दोष लगाबा की ताक म बैठचा हा। बे देखणो चावा हा की ईशु बी मिनख न अराम हाल्हे दिन निरोगो करै या कोनी करै। 3ईशु टुंडा मिनखऊँ बोल्यो, “मिनखा क मांय खड़यो हो।” 4अर ईशु बण स बूझबा लायो, “चोखो काँई ह? अराम हाल्हे दिन भलो करबो की बुरो करबो? कोई न बचाणो की मारणो?” पण बाकी बोलती बन्द होगी। 5ईशु झाळाँ म भर’र च्यारूँमेर देख्यो अर बाका हिया न काठो देख’र बो बोलो दुखी होयो। अर ईशु टुंडा मिनख न बोल्यो, “तेरो हाथ आगे कर।” अर बो आपका हाथ न आगे कर्यो अर बिको हाथ चोखो होगो। 6इकै पाछै फरीसी बठैऊँ चलेगा अर हिरोद की मानबाला

मिनखा क सागै एक्को कर जाळ रच्यो की ईशु न कंयांसिक मारा।

घणी सारी भीड़ ईशु क गेल होगी

7ईशु आपका चेला क सागै गलील दरियाव क कनै गयो अर घणी सारी भीड़ बिकै गेल होली 8जिमै गलील, एहूदीयाँ, यरुशलेम, इदुमिया अर यरदन नंदी क परलै नाकै का अर सुर-सैदा क कनै का मिनख हा। अर बे ईशु का कारनामा न जो बो कर्या करतो हो बानै सुण’र बिकै गेल आया हा। 9भीड़ बिनै चीथ न सकै ई बजै स ईशु आपका चेला न बोल्यो, “मैर ताँई एक छोटीसी न्यावड़ी को जोगाड़ लगाओ।” 10ईशु बोला सारा मिनखा न निरोगो कर्यो हो ई ताँई घणा सारा रोगला बिकै हाथ अड़ाबानै बि प पड़्या हा। 11जा मिनखा म ओपरी-बलाय होती बे बिनै देखता ही बिकै पगा म धोक खाता अर ओपरी-बलाय चिलाटि घाल’र खेती, “तू परमेश्वर को बेटो ह।” 12पण बो बानै दकाल्तो अर खेतो थे मनै मना दर्शाओ।

ईशु बारा चेला टाळयो

13ईशु दूँगरी प चढ़गो अर बो जिनै चावो हो बानै आपकै कनै बुलायो, अर बे बिकै कनै गया। 14बा मऊँ बो बारा न टाळयो अर बो बानै आपका खास टाळेड़ा चेला १ बणायो। ईशु बानै ई ताँई टाळयो की बे बिकै सागै सागै चाली। अर बानै बो चोखो समचार

f 3:13 बे मिनख जानै खास काम मसी को चोखो समचार सुणाबा ताँई टाळयो गयो अर जानै बी काम न पूरो करबा ताँई खास हक देर भेज्यो गयो।

सुणाबा ताँई भेज सकै। 15 अर बे ओपरी-बलाय न काढ़बा को हक बी राख सकीं। 16 जाका नाम अंय्यां हा, शमोन जिको नाम बो पतरस रख्यो 17 जब्दी को बेटो याकूब अर याकूब को भाई यूहन्नो जिको नाम बो बूअनर्गिस रख्यो जिको मतबल “गाज को बेटो” होवै ह। 18 अंद्रियास, फिलीप्पुस, बरतूलमै, मर्ती, थोमो, हलफई, हलफई को बेटो याकूब, तहै अर देश भगत शमोन 19 अर एहूदा इस्करियोती ओ बोई ह जो ईशु न धोखा स पकड़ायो हो।

ईशु शैतान की शक्ति न कोनी बरतै

20 जद बो घरा गयो अर बठै ओज्युं घणी सारी भीड़ भेली होगी ई बजै स ईशु अर बीकाळा चेला न रोटी खाबा को बी ओसाण कोनी हो। 21 जणा ईशु का घरका सुण्या की ईशु बठै आयड़ो ह जणा बे बिनै लेण ताँणी आया। क्युंक लोग ईशु के बारा म खेता हा इको चित ठिकाणै कोनी। 22 यरुशलेमऊँ आयड़ा धर्मशस्त्रि खेता हा की, “ईशु के माईं ओपरी-बलाय को सरदार बालजबूल रळ्यो ह।” क्युंक ईशु बिकी शक्तिऊँ ही ओपरी-बलाय न काढै ह।

23 ईशु बानै बुलार नीति कथा म खेबा लाग्यो की, “शैतान न शैतान कंय्यां काढ़ सकै। 24 ज कोई राज पाट म फूट पड़ज्या जणा बो राज पाट कंय्यां चाल सकै ह। 25 अर घरका क मांय न फूट पड़ज्या जणा बो घर कंय्यां बस्यो रैह सकै ह। 26 ज अंय्यां ही शैतान खुद म फूट गेर खुद क सामै खड़यो होज्या जणा बिको राज कंय्यां बण्यो रैह सकै ह? आ ढंगा

तो बो तब्बा हो जासी। 27 ज कोई तगड़ा मिनख का घर न लूटणो चावै तो पेल्या बी तगड़ा मिनख न बाँधणो पड़सी जणा पाछै ही बिको घर लूटयो जा सकै ह। 28 म थानै साँची-साँची खेवँ हू की मिनखा का सगाँ पाप उरै ताँई परमेश्वर न बुरो भलो कहड़ो भी धुप सकै ह 29 पण जो पवित्र आत्मा न बुरो भलो कहदै बो पाप कदैई धोयो कोनी जा सकै। अर जो अंय्यां को पाप करै बो जुगान्तर को पापी हो ज्यावै।” 30 (ईशु आ बात ई ताँई बोल्यो क्युंक बठै खड़या मिनख बोल्या हा की इमै ओपरी-बलाय रळरी ह।)

ईशु का भाईड़ा अर माँ

31 ईशु की माँ अर भाई बठै आया, अर बारै ही खड़या होर बिनै बुलावो भेज्यो 32 ईशु क च्यारूमेर भीड़ ही बे ईशु न बोल्या, “तेरी माँ अर तेरा भाईड़ा तनै बारनै बुलावै ह।” 33 ईशु बण स बोल्यो, “मेरी माँ अर भाई कुण ह?” 34 ईशु आपकै च्यारूमेर बैठचा मिनखा न देखर बोल्यो, “देखो अ मेरी माँ अर मेरा भाई ही। 35 जो परमेश्वर क कह्या गेल चालै बो ही मेरो भाई भाण अर माँ ह।”

बीज बोण की नीति कथा

4 दरियाव क किनारै ईशु ओज्युं सीख देबा लाग्यो। अर बिकै च्यारूमेर घणी सारी भीड़ भेली होगी। ई बजै स बो दरियाव म खड़ी न्यावड़ी क मांय न बैठगो अर लोग दरियाव किनारै खड़या होगा। 2 ईशु बानै सीखदेबाली नीति कथा म कई बातां सीखातो हो, अर बो बानै अंय्यां सीखायो की, 3 सुणो, “एक बार

की बात ह एक किसान हो अर बो बीज बोण ताँई गयो। 4 अर जद बो बीज बोण लाग्यो, जणा क्युंक बीज गेला क मांय न पड़या अर बानै पन्धी चुग लेगा। 5 अर क्युंक बीज कांकरा म पड़या अर बानै चायै ही बत्ती माटी कोनी मिली जि बजै स बे तावळा ही निपज्याया 6 पण सूरज उगता ही तावडीऊँ बलगा क्युंक बाकी जड़ कोनी फेल पाई। 7 अर क्युंक बीज झाड़या म जार पड़या अर बानै झाड़ी फेल'र दबा दी। 8 अर क्युंक बीज उपकी माटी म पड़या अर उपज्या जिसै खूब पणप्या, अर बण स तीसुणा साठुणा अर सोगुणा पैदावार होई।” 9 अर ईशु बानै बोल्यो, “जिकै कान ह बो खोलल्यो।”

सीखदेबाकी नीति कथा को मकसद

10 जद ईशु एकलो हो जणा बिका कनै का मिनख बा बारा चेला क सागै बिनै नीति कथा क बारा म बूझबा लाग्या 11 ईशु बानै खेबा लाग्यो, “थानै तो परमेश्वर का राज को भेद खोलेडो ह पण दूसरा मिनखा ताँई तो सगळी बातां नीति कथा म ही होवै ह। 12 जणाई तो,

“देखता-देखता बानै कोनी सुझै अर सुणता-सुणता कोनी सम्बलै अर जणाई तो बे आपका हिया न कु गेलाऊँ कोनी बदळी अर परमेश्वर बानै माफ कोनी करै।”

बीज बोण की नीति कथा को खुलासो

13 ईशु बण स बोल्यो, “आ नीति कथा थारै पह्नै कोनी पड़ी जणा बाकी की

नीति कथा कंथ्यां पह्नै पड़सी? 14 किसान जो उगावै ह बो तो परमेश्वर को बचन ह। 15 जो बीज गेला क मांय न पड़या अ बे लोग ह जो बचन सुणै ह पण शैतान अर बी बचन न चुरा ले जावै ह। 16 जो बीज कांकरा क मांय न पड़या अ बे लोग ह जो बचन न सुणी ही अर बिनै राजी-पेटाऊँ मानी बी ही 17 पण बो बचन बाकै हिया म जड़ कोनी पकड़ पावै जि बजै स जद बापै दुख अर सताव आवै जणा बाको बिश्वास मर ज्यावै ह। 18 जो बीज झाड़या क माइनै बोया गया अ बे लोग ह जो बचन सुणी 19 पण जीण को घ्यार, मो-माया को लालच अर मन की बुरी बातां बाका हिया म ही बचन न दबा देवै ह, ई ताँई बे बीज फळी कोनी। 20 अर जो बीज उपकी माटी म बोया गया अ बे लोग ही जो बचन सुण'र बिनै मानी ही अर बिकै गेल फळी, जिसै बे तीसुणा, साठुणा, सोगुणा अर सौ गुणाऊँ बी घणो फळ ल्यावी।”

कुण्डा तकै दिवो

21 ईशु बण स बोल्यो, “कोइनै दियो जळा'र बिनै कुण्डा अर खाट क तलै म्हेलता देख्या हा के? पण बिनै आळ्या म म्हेली ही जिसै बो सगळाँ कोठा न च्याण्णो दे। 22 जो क्युं बी ओला म ह बो चौडा म ल्याओ जासी अर जो क्युं ढकेडो ह बिनै खोल्यो ज्यासी। 23 जिकै कान ह बो खोल ल्यो।”

24 बो बण स बोल्यो गोर कर'र सुणज्यो, “जंय्यां थे लोगा क सागै करो

हो बंयां ही परमेश्वर थारै सागै करसी अर बिसै बी बत्ती करसी। 25जिकन ह बिनै ओर दियो जासी, अर जिकै कनै कोनी बिसै जो क्युं बिकै कनै ह बो भी ले लियो जासी।”

बीज की नीति कथा

26ईशु बोल्यो, “परमेश्वर को राज खेत म बीज बोणिया मिनख की जंयां ह। 27अर बो तो रात न सोतो अर दिन म जागतो। अर कद बा बीजा म कुपल्ड आई अर कद बे बढ़या बिनै तो काँई बात की खबर ही कोनी पड़ी। 28धरती खुद ही उपजावै पेल्या कुपल्ड आवै जिकै पाछै बाळी अर बाल्या म खूब दाणा। 29अर जद दाणा पक जावै ह जणा बो बेगो सो दातली लेर काटबा लागज्या क्युंक लावणी को टेम आ ज्यावै ह।”

राई का दाणा की नीति कथा

30ईशु ओज्युं बोल्यो, “आपा परमेश्वर का राज न किसै दर्शा सकां हा, अर बिनै की बातऊँ समझा सकां हा? 31ओ राई क दाणा की जंयां को ह जिनै जमीन म बोयो जावै अर ओ दाणो सगळाँ बीजा मऊँ छोटो होवै। 32पण जद इनै बोयो जावै जणा ओ दाणो उगर धरती का सगळाँ बोज्जा मऊँ बडो होज्या ह। इकी डाल्याँ असि बडी होवै की पंछी बा पघुसळो घालै।”

33अंयां की नीति कथा सुणार बो बानै बचन सुणाया करतो हो, अर बो बानै बाकी बुद्धि गेल ही सीखातो हो। 34बिना नीति कथा क क्युं ई कोनी सीखातो हो पण जद बो आपका चेला

क सागै एकलो होतो जणा बो बानै सगळीं बातां को भेद समझाया करतो हो।

ईशु तौफान न डाटचो

35जनाडै आथण्या ईशु चेला न बोल्यो, “आओ ल्यो आपा दरियाव क परलै-पार चालां” 36ई बजै स बे भीड़ न बठै ही छोड़र ईशु जि न्याव म बैठचो हो बी न्याव म ही बिनै लेर रवाना होया। बठै ओर बी न्यावा ही। 37बाकै रवाना होण क पाछै जोर सूँ तौफान चालबा लाग्यो। अर दरियाव म झाल उठबा लागी अर न्याव म पाणी भरबा लाग्यो। 38पण ईशु न्याव क गेलडै नाकै सुत्यो हो। चेला बिनै जगाया अर बिसै बोल्यो, “ओ गुरजी थानै क्युंई परवा कोनी के? म्हें डुब बाला हा।” 39ईशु खड़्यो होर तौफान न दकाल्यो अर झालऊँ बोल्यो, “थम ज्या” अर तौफान थमग्यो अर बठै सक्युं श्यान्त होगो। 40अर ईशु बण स बोल्यो, “थे क्यालै डरो हो? थानै हालबी बिश्वास कोनी के?” 41बे डरग्या अर आपसरी म बूझबा लाग्या, “ओ कुण ह? जिको खयो हवा अर पाणी भी माने ह।”

ईशु नुगरी आत्मा न काढचो

5 बे दरियाव क परलै नाकै गिरासेनियो नाम का परदेस म गया, 2ईशु जद न्याव मऊँ उतर्यो जणा बठै एक मिनख मूसाणा मऊँ ईशु क कनै आयो बिकै मांय न नुगरी-आत्मा ही 3बो मूसाणा क मांय न रैहतो हो बिनै कोई भी साँकळाऊँ कोनी बाँध सक्यो। 4क्युंक बिनै बोली बार

साँकळां हूँ बाँध्या हा पण बो साँकळां न तोड़ देती अर बानै पीस गेरतो, बिनै कोई भी बस म कोनी कर सकयो। ५ बो मूसाणा अर डूँगरा म चिलाटि घालतो भटकतो, अर खुद न भाड्हुऊँ मारतो हो।

६ बो ईशु न पैर स देखर बिकै कनै भागर गयो अर बिका पगा म पड़ग्यो ७ अर बार घालतो बोल्यो, “ओ ईशु परम पीता परमेश्वर का बेटा थारो म्हारो काँई लेण देण? ज मनै दिन घाल्या तो, थानै परमेश्वर की सोगन लागै।” ८ [क्युं] क ईशु बिनै खयो हो, “हे नुगरी इकै मार्ईऊँ निकळ ज्या।” ९ अर ईशु बिनै बूझ्यो, “तेरो नाम काँई ह?” बो ईशुऊँ बोल्यो, “मेरो नाम पलटण ह क्युंक म्हें घणी सारी हा।” १० अर बो ईशुऊँ हाथ जोड़र अरदास करबा लाग्यो, “म्हानै देश निकाळो मना दे।”

११ अर बी टेम बठै डूँगर प सुलडा को रेवड़ चैर हो। १२ जणा बा पलटण ह जखी ईशु स अरदास करर बोली, “म्हानै तू बामै जाबा दे जिसै म्हें बामै रळज्यावां।” १३ जणा बो बानै हुकम दिन्या अर बा पलटण ही जखी बि मिनख मऊँ निकळर बा सुलडा क मांय न जा रळी। सुलडा करीब दो हजार हा। बे सुलडा डूँगर क उपरऊँ ही गुळ-गच्छी खार दरियाव क मांय न जार पड़या अर डुबर मरगा।

१४ बी रेवड़ का गुवाळ्यां जो बा सुलडा न चराता हा बे भागर नगरी अर बिकै कनै की ढाणि-ढाफाण्या म जार ओ समचार सनै खे सुणायो। बठै जो होयो हो बिनै देखण ताँई लोग भेळा होगा। १५ बे ईशु क कनै आर देखया जणा बो मिनख जिमै बे नुगरी-आत्मा

ही बो सूल ढंग ह गाबा पेरर सतूना म बैठचो हौ। अर बै बिनै देखर डरग्या। १६ अर बी घटना न देखणिया बा मिनखा न बताबा लाग्या की जिकै मांय न नुगरी-आत्मा ही बिकै सागै अर सुलडा क सागै काँई होयो? १७ लोग ईशुऊँ अरदास करबा लाग्या की तू अठैऊँ चल्यो जा।

१८ जणा ईशु न्याव म चढबा लाग्यो जणा बो मिनख जिमै पेल्या नुगरी-आत्मा ही ईशुऊँ अरदास करबा लाग्यो, “मनै बी तेरै सागै ले चाल।” १९ पण ईशु बिनै नटचो अर बिनै बोल्यो, “तेरा घरा जा अर तेरा मिनखा न अ सगळी बातां बता जो प्रबु तेर ताँई कर्यो ह। अर बानै अंच्यां बी बता की प्रबु कंच्यां सिक तेर प दया करी ह।” २० अर बो मिनख चलेगो अर दस नगर्या म जार बठै का मिनखा न बताबा लाग्यो की ईशु बी ताँणी कितनो बडो चमत्कार कर्यो ह। ई काम की बजै स मिनखा न ताजुब होयो।

मरेडी छोरी अर रोगली लूगाई।

२१ ईशु ओज्युँ दरियाव पार कर किनारा प हो जद ही बिकै च्यारूँमेर घणी सारी भीड़ भेळी होगी। २२ जणा एहूदी प्रार्थना घर का सरदारा म स एक जणो जिको नाम याईर हो बठै आयो अर बो ईशु न देख्यो अर बिकै पगा पड़र २३ अरदास करतो बोल्यो, “मेरी नानी छोरी मरबाळी ह, म तेरुँ हाथ जोड़ खेवूँ हूँ मेरै सागै चालर तेरो हाथ बिपै धर दै जिसै बा बच ज्यावै।” २४ जणा ईशु बिकै सागै चाल पड़यो अर घणी सारी भीड़ बी बिकै गेल होली। अर लोग बिपै टूटर पड़े हा।

25बामै एक लूगाई ही जो बारा बरसा हूँ लोय भेबा का रोग हूँ दुखी ही 26बा सगळाँ जतन कर देखली अर भाँत भाँत का बैदा की दवाई ले'र देखली पण भापड़ी क क्युं ई अराम कोनी हो। अर जो क्युं बिकै कनै पूण पावलो हो बो भी ई बिमारी की दवा-दारू म बोया बैठी ही। पण बिकी हालत घणी खराब होगी। 27-28जद बा ईशु क बारा म सुण्यो बा भीड़ क माईऊँ ईशु क गेल आई, क्युं'क बा आपका हिया म ध्यार राखी ही, “ज म ईशु का गाबा की कोर क हाथ अड़ा दूँयूँ तो म निरोगी हो ज्याउंगी।” अर जय्याई बा बिका गाबा क हाथ अड़ायो। 29बिको हात्युहाथ लोय बहणो बन्द होगो अर बा आपकी काया म जाणगी की म निरोगी होगी हू। 30अर जद की जद ईशु न बी लाग्यो की बिकै माईऊँ शक्ति निकळी ह। ईशु गेल न मुड़र बूझबा लाग्यो, “मेरा गाबा क कुण हाथ अड़ायो ह?” 31जणा ईशु का चेला बिनै बोल्या, “तू देखर्यो ह की भीड़ तनै च्यारूँमेर स दबाया जा री ह। अर तू बूझै ह की थारै कुण हाथ अड़ायो?” 32पण ईशु च्यारूँमेर देखतो रियो की अंय्यां को काम कुण कर्यो ह। 33बा लूगाई जाणती ही की बिकै सागै काँई हौयो ह? बा डरती - डरती आई अर ईशु क पगा म पड़र सगळी बातां साँची-साँची बता दी। 34अर ईशु बिनै बोल्यो, “बेटी तेरो बिश्वास तनै बचायो ह, सुखऊँ चली जा अर बिमारी स बची रैह।”

35बो अंय्यां बोल ही रियो हो अत्तार्मई एहूदी धर्म सभा भवन का अधिकारी क घराऊँ लोग आया अर बे याईरऊँ बोल्यो,

“इब गुरु न दिन मना घालो क्युं'क थारी छोरी तो चलती री।” 36ईशु बाकी बातां न सुण्यो अर याईरऊँ बोल्यो, “डरै मना बस तू तो बिश्वास राख।” 37अर ईशु बठै सगळाँ न छोड़ आपकै सागै पतरस, याकूब अर याकूब का भाई यूहन्ना न ले'र 38याईर क घरा गयो। अर बठै देख्यो की लोग जोर-जोर सूँ बार घोड़ो मचा राख्यो ह। 39बो मांय न गयो अर बण स बोल्यो, “थे क्युं बार- तोबा मच्यार्या हो? छोरी तो मरी कोनी पण सुत्ती ह।” 40बिकी ई बात न सुण'र लोग बिको तमासो करबा लाग्या। पण ईशु मिनखा न बारै काढ़र छोरी का माँ-बाप अर आपका चेला न सागै ले'र बठै गयो जि कोठा म छोरी ही। 41ईशु छोरी को हाथ पकड़्यो अर बोल्यो, “तलीता कूमी! (इको मतबल ह नानी छोरी) म तनै बोलूँ हूँ खड़ी हो ज्या।” 42अर बा नानी छोरी तावळीसी खड़ी होगी अर अठिन बठिन चालबा-फिरबा लागी। (बा छोरी बारा बरस की ही।) बे बिनै देखर ताजुब म पड़गा। 43ईशु क सागै जो हा बानै बो चितार हुकम दिन्यो की ई बात क बारा म किनैर्ह मना खिज्यो अर बो बोल्यो, “ई छोरी न खाबा ताँई किमी द्यो।”

नासरत म ईशु को निरादर

6 इकै पाछै ईशु बी झावै न छोड़र आपकी नगरी क मांय न गयो। बिका चेला बी बिकै सागै हा। 2एहूदीयां का अराम हालै दिन ईशु एहूदीयां का प्रार्थना घर म गयो अर बठै परबचन सिखाबा लाग्यो। ईशु को परबचन सुण'र लोग ताजुब म पड़गा। बे बोलबा लाग्या,

“इकै कनै अ बातां कठैऊँ आई। अर इनै ओ कुणसो ज्ञान देयड़ो ह, अर ओ बडा-बडा चमत्कार कंयां करै ह? ३के ओ बोई खाती कोनी के? जो मरियम को बेटो अर याकूब, युसफ, एहूदा अर शमोन को भाईड़ो ह। इकी भाणा आपणै सारई कोनी री के?” ई बजै स बै लोग ईशु की कोनी सुणी। ४ईशु बण स बोल्यो, “परमेश्वर की खेबाळा (नबी) को निरादर आपका खुद की नगरी, रिस्तेदार अर कुणबा न छोड़र कठै ही कोनी होवै।” ५अर बो बठै क्युर्ई चमत्कार कोनी कर सक्यो। पण क्युंक सा बिमारा प हाथ धरर बानै ठिक कर्यो। ६ईशु न बाका अविश्वास प ताजुब होयो अर बो कनै का गाँवा म जातो अर सीखातो रियो।

ईशु आपका बारा चेला भेज्यो

७ईशु आपका बारा चेला न आपकै कनै बुलायो। अर बो बानै दो-दो जणा न बोरै भेजबा लाग्यो अर बो बानै ओपरी-बलाय प हक दियो। ८अर बानै हुकम दियो, “थे थारी लाठी न छोड़र किमि बी सागै मना लियो न रोटी, न झोळी अर न बटवा म रीपया ९थे लीतरा तो पेरल्यो पण दुजो कुर्तो सागै मना लियो। १०जिकै बि घरा थे जाओ बठै ई बासो लेता रियो जद ताँई थे बी नगरी म रेह्हो। ११अर कोई गाँव अर नगरी म थारी आवभगत न होवै तो थे बी नगरी अर गाँवऊँ बारै चल्या जाओ अर बण क खिलाफ बानै चिताणा ताँई थे थारै लीतरा की धुळ बी

बठै हि झाडु दिज्यो।”^g १२अर बे बठैऊँ जार पापाऊँ हिया फिराबा को हैल्लो पाड़यो। १३अर बे घणी सारी ओपरी-बलाय निकाळी अर घणा सारा रोगला न जैतून को तेल लगार (अविषेक) निरोग कर्या।

बतिस्मा देबाळा यूहन्ना की हत्या

१४राजा हेरोदेस^h ईशु क बारा म सुण्यो, क्युंक ईशु की बातां सगळी जघै फेलाई ही। कई मिनख बोलता हा की बतिस्मा देबाळा यूहन्नो मेरेडा म स जीगो ह। ई बजै स बिकै मांय न चमत्कारी शक्ति काम करै ह। १५पण कई बोलता हा की ‘बो एलियोⁱ ह।’ अर कई बोलता हा की ‘ओ कोई पुराणा टेम को परमेश्वर की खेबाळा की जंयां को एक ह।’ १६पण हेरोदेस बिकै बारा म सुण्यो तो बो बोल्यो, “ओ तो यूहन्नो ह जिको सिर म कटवायो हो ओ ओज्युं स जिन्दो होगो।” १७हेरोदेस राजा खुद का सीपाईड़ा न भेजर बिनै बन्धार कोठड़ी म गीरवा दिच्यो। अर हेरोदेस राजा खुद का भाई फिलीप की घरहाळी जिको नाम हिरोदियास हो बिकै सागै बो ब्याह कर लियो। १८ई बजै स यूहन्नो हेरोदेस न कहतो हो, “तू जो अंयां को काम कर्यो ह ओ ठिक कोनी ह। की तू तेरा भाई की लूगाई न ब्याली ह।” १९ई बजै स हेरोदिया यूहन्ना स बैर राखबा लाग्यी। अर चावती ही की यूहन्नो मार्यो जाय। पण बा बिनै मार कोनी सकीं।

^g 6:11 आ ई बात की शेलाणी ह की अंयां करके चेला बणको इंकार करीं हीं। ^h 6:14 हेरोद अन्तिपास जो गलील को राजा हो अर महाधिगरज हेरोद को बेटो हो ⁱ 6:15 ओ एक अंयां को मिनख हो जो ईशु का टेम हू सेकड़ो बरसा पेली परमेश्वर की खेबाळो होयो हो।

20 क्युं'क हेरोदेस राजा यूहन्ना स डरतो हो। अर जाणतो हो की यूहन्ना एक खरो अर धर्मी मिनख ह। ई बजै स बो बिकी रुखाळी करतो हो। अर हेरोदेस यूहन्ना की बातां न सूण'र बोलो घबरातो हो। इकै बाद म बी बिनै यूहन्ना की बातां चोखी लागती ही।

21 कुदरती हिरोदियास क हाथ अंयां को मौको लाग्यो की एक दिन ओ हेरोदेस राजा खुदका जलमदिन प दरबारिया न, सेनापतियां न अर गलील का मान्यां-थान्यां मिनखा न बुलायो। 22 बी दिन हिरोदियास की छोरी (बेटी) बठै आई अर नाच'र, जीमबा आया सगळाँ मिनखा न अर राजा हेरोदेस न राजी कर दी। ई बजै स राजा बिनै बोल्यो, “माँग तू कॉई चावै ह जो तू माँगसी म तनै देस्युँ।” 23 बो बचन दर बिनै बोल्यो, “तू माँग! ज तू मेरो आद्वे राज-पाट बी माँगसी तो म तनै दे देस्युँ।” 24 अर बा आपकी माँ क कनै गई अर बिसै बूझबा लागी, “मनै के माँगणो चाए?” बिकी माँ बिनै बोली, “यूहन्ना बतिस्मो देबाळा को सिर।” 25 अर बा तावळीसी भाग'र राजा क कनै गई अर बा राजाऊँ बोली, “मनै यूहन्ना बतिस्मो देबाळा को सिर कटवा'र थाळी म धर'र इब की स्यात दियो जाय।” 26 ई बात न सुण'र राजा बोलो दुखी होयो। पण हेरोदेस राजा होण क नातै आपकी जुबान अर म्हेमाना की बजै स बो आपकी बेटी न मना कोनी कर सक्यो। 27 अर राजा एक जळाद न हुकम दियो की बो यूहन्ना को सिर काट'र ल्यावै। 28 अर बो जळाद कोठडी क मांय न गयो अर यूहन्ना को

सिर काट'र अर बिनै थाळी क मांय न धर'र बी छोरी न दियो। अर बा छोरी बिनै आपकी माँ न देती। 29 अर यूहन्ना का चेला जद ई बात क बारा म सुण्या तो बे बठै गया अर यूहन्ना की लाश (शव) ले'र आया अर बिनै एक कबर क मांय न धर दी।

चेला को ओज्युँ सूँ आणो अर सुनसान झाई म जाणो

30 खास टाळेडा चेला भेळा होर ईशु क कनै आया। अर जो क्युं बै कर्या अर सिखाया हा बिनै सक्युं खेसुणायो। 31 बाकै कनै मिनखा को तांत्यो लागर्यो हो। अर बानै रोटी खाबा को बी ओसाण कोनी हो। ई बजै स ईशु बण स बोल्यो, “आओ ल्यो आपा कोई उजाड़ म जार अराम कर ल्याँ।” 32 बे न्याव म चढ़र उजाड़ म चलेगा।

पाँच हजार मिनखा को पेट भर्यो

33 बानै जाता देख लोग बानै पीछाणगा अर सगळी नगर्या का मिनख भेळा होर भाग'र बिकै अगाऊ बठै पूँचगा। 34 जद ईशु न्याव स तळै उतर्यो जणा बिनै घणी सारकी भीड़ दिखी अर बो बापै तरस खायो। क्युं'क बे बा (भेड्यां) ललिंदियां की जंयां हा, जाको गुवाळयो कोनी होवै। अर ईशु बानै घणी सारकी बातां सिखाबा लाग्यो।

35 अर जद दिन आथबा लाग्यो जणा ईशु का चेला बिकै कनै आर बोल्या, “आ तो उजाड़ ह अर मोड़ो भी बोलो होगो।” 36 ई ताँणी तू आ मिनखा न बिदा कर दे जिसै बे कनै का गाँव बस्तियाँ

म जा'र खुद ताँई रोटी मोल ले सकिं।” 37 बो बण स बोल्यो, “थे ही आनै खाबा ताँई द्यो।” बे बिसै बोल्या, “के म्हें दो सौ दिनारा की रोटी मोल ले'र आवां अर बानै खुवावां?” 38 ईशु बण स बोल्यो, “जाओ अर देखो थारै कनै कत्तीक रोटी ह।” अर बे बेरोपाड़र बिनै बताया की म्हरै कनै पाँच रोटी अर दो मछीयां ह। 39 अर बो बानै हुकम दियो की सगळाँ न घास प पंगत म बिठा द्यो। 40 अर बे सौ-सौ की अर पच्चास-पच्चास की पंगता बणार बैठगा। 41 ईशु पाँच रोटी अर दो मछी न हाथ म लियो अर ईश्वर नगरी कामी देखर परमेश्वर को धनेवाद कर्यो, अर बिकै पाछै बो रोट्याँ ली अर रोट्याँ का टुक-टुक कर चेला न देतो गयो, जिसै बे मिनखा न जिमा सकै अर बा दो मछीयां न बी बा सगळाँ म बाट दि। 42 सगळाँ जणा खा'र धापगा। 43 बिकै पाछै बी रोटीयां अर मछियाँ भरेडा बारा चोल्या बचगा। 44 रोटी खाबाळा म पाँच हजार तो मोटचार-मोटचार हा।

ईशु पाणी प पगा चाल्यो

45 ईशु चेला न बोल्यो की तावळा सा न्याव म चढ़ ज्यावो अर बैतसैदा जो दरियाव क परलै नाकै ह बढै मेरुं अगाऊँ पूँचो अर म आनै बिदा कर्र आऊँ हूँ। 46 बानै बिदा कर्र ईशु हूँगर प प्राथीना करबा चलेगो। 47 अर दिन आथगो, न्याव दरियाव क बीच म ही, जद ईशु जमीन प एकलो हो। 48 अर ईशु देख्यो की चेला न्याव चलाता-चलाता

सांस फुलगा ही। क्युंक सामै की भाळ चालरी ही ईशु भागपाटचा दरियाव प चालतो होयो बाकै कनै आयो अर बो बण स अगाऊँ जाणो चावहो। 49 पण बे बिनै दरियाव प चालतो देखर बिच्यार्या, “ओ तो भूत ह” अर बे कुकबा लाग्या। 50 क्युंक बे सगळाँ बिनै देखर डरग्या। पण ईशु तावळो सो बण स बातां कर्यो अर बोल्यो, “ढाड़स बाँधो, म हूँ, डरपो मना।” 51 अर बो बाकै कनै न्याव प गयो अर भाळ थमगी अर बे ताजुब करबा लाग्या। 52 अर बाकै रोटीयां क चमत्कार क बारा म बी कोनी पलै पड़ी क्युंक बाकी मती बँधरी ही।

गन्नेसरत म रोगला न निरोगो करबो

53 अर बे दरियाव न पार कर गन्नेसरत म पुचर बठै ही न्याव न बाँध दी। 54 अर न्यावऊँ उतर ताँई लोग बिनै पीछाणगा। 55 अर सारै की बस्तियाँ म भागर गया अर बठैका मिनखा न बताया बे रोगला न खाटल्या म घालर बिकै कनै ल्याया। 56 ईशु जि गाँव, नगरी अर बस्तियाँ म जातो हो लोग बठैई रोगला न बजारा म ल्यार बिसै अरदास करता हा की बो बानै आपका गाबा की कौर क हाथ अड़ाबा दे अर जत्ता बी बिकै हाथ अड़ाता हा बे निरोग हो ज्याता हा।

रिती-रीवाज न निभाणे

7 फरीसी अर शास्त्रा न सीखाबाळा जो यरुशलेमऊँ आया हा अर बे ईशु क कनै भेळा होया 2 अर बे ईशु का चेला

न हाथ धोया बिना रोटी खाता देख्या। ३(फरीसी अर सगळौं एहूदी आपका बढ़का की लीक पीटचा करता हा, अर बे बिना हाथ धोया रोटी कोनी खाता हा। ४अर बे बजा'र म जार आता तो बी बिना न्हाई-धोई करै रोटी-टुक कोनी खाता। अर आ बातां न छोड़र और बी बोली बातां ही जिनै बे निभाता हा, जंयां लौटा, घड़ा अर तांबा का भांढा न धोणो अर माँजणो।) ५ई बजै स बे फरीसी अर शास्त्रा न सीखाबाला ईशु न बूझ्या, “थारा चेला क्युं बढ़का (पूर्वजो) का रिती रीवाज प कोनी चालै, अर सूल हाथ धोया बिना ही रोटी खावै ह?” ६ईशु बण स बोल्यो, “यशायाह नबी थारा जंयां का दोगला मिनखा ताँई परमेश्वर कानीऊँ ठिक ही बोल्यो हो। जंयां मंडर्यो ह,

‘अ लोग होठाऊँ तो मेरो मान करीं ही पण आको हियो मेरऊँ दूर ह।

७अ बेकाम ही मनै ध्यारी ही।

अर मिनखा का बणायडा नियमा न मेरा करके सिखावी हीं।’

८थे परमेश्वर का हुकम न टाळके मिनखा का रिती-रीवाजा न मानो हो। ९थे बोला चतर हो जो परमेश्वर का हुकमा न टाळर थाकाला रिती- रीवाजा न मनवाबाला हो। १०जंयां मूसा खियो ह,

‘थे थारी माँ अर बाप की इज्जत करो, अर कोई बी मिनख आपकी माँ अर बाप को बुरो करै बिनै मार देणो चायै।’

११पण थे मिनखा न अंयां सिखार्य हो की जद थारा माँ-बाप थारै कनैऊँ कोई चिज माँगै तो थे बानै बोलो हो की बा तो कोर्बान^४ ह, (जिङ्को मतबल परमेश्वर न चढ़ाएडी ह)। अंयां बोलर थे थारा माँ-बापा की सेवा करबा स बरी हो ज्यावला। १२अर थे अंयां सिखार मिनखा न बा का माँ-बापा की सेवा कोनी करबा द्यो १३अर थे अंयां का रिती-रीवाजाऊँ जो थारा बणाईड़ा हीं आनै निभाण ताँई परमेश्वर का बचन न टाळ द्यो हो। अर अंयां-अंयां का ओर बी घणा सारा काम ह जो थे करो हो।”

मिनख न सुगलो करबाढी बातां

१४ईशु ओज्युँ भीड़ न बुलायो अर बो बोल्यो, “थे सगळौं मेरी सुणो अर समझो। १५अंयां की कोई बी चिज कोनी ह जो मिनख न बारैऊँ बिकै मांय जार बिनै सुगलो करै १६[पण जो चिजा मिनखा क माईऊँ निकळै ह बे बिनै सुगलो करै ह। जिकै सुणबा ताँई कान हो बो सुण ले।]” १७अर ईशु भीड़ न बठैई छोड़र घर क मांय न गयो अर बिका चेला बिनै ई नीति कथा क बार म बूझ्या लाग्या। १८ईशु बण स बोल्यो, “के थारै भी कोनी पल्लैपडी? के थे कोनी जाणो की जखी चिज बारैऊँ मिनख क मांय न जावै ह बा बिनै सुगलो कोनी करै। १९बे चिजा हिया म कोनी जावै पण पेट क मांय न जावै अर निकळ जावै ह।” अर बो अंयां बोलर खाबाली

⁴ 7:11 जिङ्को मतबल परमेश्वर न चढ़ाएडी चिज ह अर इनै बो बरत बी सकै ह। १716 पुराणी पौथी म आ बात कोनी।

सगळी चिजा न शुद्ध बताओ। २० पाछै ईशु बोल्यो, “मिनख हियाऊँ जो बिच्यारै ह बो बिनै सुगलो करै ह। २१ मिनख क हियाऊँ बुरा-बुरा बिच्यार, कुकर्म, चोरी, हत्या, २२ व्यविच्यार^m, लोभ, कर्मणो-पुणो, दोगलोपुणो, ठगणो, बेहूदोपुणो, बळोकडोपुणो, कोई ताँई बुरो बोलबो, गुमान अर गोबुपुणो (मोथोपुणो) बारै निकळ ह। २३ अ सगळी बुरी-बुरी बातां मिनख क माईऊँ निकळर बिनै सुगलो करै ह।”

सुरुफिनीकी जात की लूगाई को बिश्वास

२४ ईशु बी झाघा न छोड़र सुर नाम की नगरी म एक घर क मांय न गयो। अर बो चावै हो की बिकै आबा को बेरो कोई न ही न पड़ै, पण बो छापळ कोनी सक्यो। २५ ईशु क बारा म सुणर एक लगाई जिकी छोरी म ओपरी-बलाय ही बठै बेगीसी आर ईशु का पगा म पड़गी। २६ आ लूगाई यूनानी हि अर इको जलम सिरिया क फिनीकी परदेस म होयो हो, आनै एहूदी अछूत मानता हा। बा लूगाई ईशुऊँ अरदास करती बोली मेरी छोरी मऊँ ओपरी-बलाय काढ़ दे। २७ ईशु बी लूगाई स बोल्यो, “पेल्या टाबरा न धापबादे, टाबरा की रोट्याँ न गण्डकडा क आगै बगणो चोखो कोनी।” २८ बा लूगाई ईशुऊँ बोली, “प्रबु थाकाळी भी साँची ह पण टाबर की रोटी का बिखरेडा माखणा गण्डकडा ही तो खावी ही।” २९ ईशु बिकी बात

न सुणर बिसै बोल्यो, “तेरी ई बात की बजै स थाकाळी छोरी क माईऊँ ओपरी-बलाय कढ़गी ह, इब तू राजी-खुशी जा।” ३० अर बा लूगाई घरा जार आपहाळी छोरी न देखी की, बिमै स ओपरी-बलाय कढ़गी अर बा खाट म आडि होरी ही।

बोळा अर काबा को निरोगो होणो

३१ ईशु सुर नाम की नगरी स बिदा होर, सेदाऊँ दस नगरी होतो होयो गलील दरियाव क कनै पूँचगो। ३२ जणा लोग एक बोळा न जो काबो बी हो ईशु क कनै ल्याया। अर ईशुऊँ अरदास कर्र बोल्यो, “ईशु थे थारो हाथ इपै धरद्यो।” ३३ ईशु बी बोळा न भीड़ऊँ नाकै लेगो अर आपकी आँगळ्यां बिकै काना म घाल्यो अर थुँकर बिकी जीब क हाथ अड़यो। ३४ अर ईशु ईश्वर नगरी कानी देखर दयाऊँ भर्र सांस खिंची अर बिसै बोल्यो, “इप्पथा” इको मतबल ह, “खुल ज्या।” ३५ अंय्यां बोलता ही बिका कान खुलगा अर जीब की आँट्टी भी खुलगी अर बो चोखा ढंगऊँ बोलबा लाग्यो। ३६ अर ईशु बानै हुकम दियो की थे ई बात क बारा म किनैई मना खिज्यो। पण बो बानै जत्तो ना बताण ताँई बोल्यो हो, बे बिसै बी घणी बी बात न फैलाई। ३७ लोग ताजुबकर बोलबा लाग्या, “ईशु भलो-भलो ही करै, अठै ताँणी की बो बोळा न सुणबा अर गुंगा न बोलबा की शक्ति देवै ह।”

^m 7:22 व्याह करै पाछै बिराणी लूगाई अर मोटचार क सागै गंदो काम करनो व्यविच्यार ह।

च्यार हजार मिनखा को पेट भर्ये

8 बा दिना म एक बार ओज्युँ ईशु क कनै घणी सारी भीड़ भेळी होइ। अर बाकै कनै खाबा ताँई क्युंई कोनी हो। ई बजै स ईशु आपका चेला न बुलायो अर बा न बोल्यो, ²“मनै आपै दया आरी ह क्युंक अ मिनख तीन दिनाऊँ मेरै सागै ही अर आकै कनै खाबा ताँई क्युंई कोनी। ³अर म आनै भूखा न ही घरा भेजुँ तो अ गेला म ही आक्ता होर बठै ही गोडा टेक दिंगा। क्युंक कई तो बोल्ही दूरऊँ आईड़ा ही।” ⁴चेला ईशु न बोल्या, “ई उजाड़ म म्हें रोटी कठैऊँ ल्यावां, जिसै आको पेट भर सकां।” ⁵ईशु बण स बूझ्यो, “थारै कनै कत्तीक रोट्याँ ही?” बे बोल्या, “म्हारै कनै सात रोट्याँ ही।”

⁶ईशु भीड़ न हुकम दियो थे पंगत बणार बैठ ज्यायो। अर ई क पाछै ईशु बा सात रोट्याँ न हाथ म लेर परमेश्वर न धनेवाद देर बा रोट्याँ का टुक कर-कर आपका चेला न देतो गयो अर चेला भीड़ न परोसता गया। ⁷बाकै कनै थोड़ी सीक मछी बी ही ईशु बानै बी लियो अर परमेश्वर न धनेवाद देर चेला न दियो अर चेला मिनखा न देता गया। ⁸बे सगळाँ खा’र धापगा अर चेला रोट्याँ स भेरेडा सात चोल्या बठैऊँ उठाया। ⁹बठै करीब च्यार हजार मिनख हा ¹⁰इकै पाछै ईशु बानै बैठैऊँ बिदा कर्यो। अर खुद आपका चेला क सागै न्याव म चढ़र दलमनूता दिसावर चलेगो।

फरीसी ईशु स ईश्वर नगरी की शेलाणी माँगी

11 फरीसी ईशु क कनै जा’र बिसै जिदबा लाग्या तू असल म ही परमेश्वर कानी स भेजेडो ह तो म्हानै ईश्वर नगरी की कोई शेलाणी” दिखा। क्युंक बे ईशु न फसाणो चावै हा। ¹²ईशु बाकी ई बात न सुण’र आपकी आत्मा म जोर स आह भर्र बा ऊँ बोल्यो, “ई पीढी का लोग चमत्कार क्युं माँगै ह? आनै ईश्वर नगरी को कोई निशाण (चिन्ह) कोनी दियो ज्यासी।” ¹³इकै पाछै बो बानै छोड़’र ओज्युँ स न्याव प चढ़गो अर दरियाव क परलै नाकै चलेगो।

फरीसीयां अर हेरोदेस को खमीर

14 चेला आपकै सागै खमीर हाळी रोटी लेणो भुलगा पण बाकै कनै न्याव म एक ही खमीर हाळी रोटी ही अर इनै छोड़’र बाकै कनै खाबा ताँई क्युंई कोनी हो। ¹⁵ईशु बानै चितार बोल्यो, “थे फरीसीयां अर हेरोदेस का खमीर० ऊँ बर्चर्जियो।” ¹⁶चेला आपसरी म ताणा-कसी करबा लाग्या की ईशु आ बात ई ताँई बोलै ह क्युंक आपणा कनै खमीर हाळी रोटी कोनी ह। ¹⁷ईशु बाकी ई बात न भापगो अर बण स बोल्यो, “थे आपसरी म अंच्यां क्युं सोचो हो की म्हारै कनै खमीर हाळी रोटी कोनी ह? थारै हालबी

ⁿ 8:11 ईश्वर नगरी को कोई बडो चमत्कार ^o 8:15 खमीर बाका दोगलापुणा न दिखावै ह। (रोट्याँ न फुलाबा ताँई आटा म गैरबा की चिज।)

क्युं कोनी पल्लै पड़ी? थारी मती क्युं बँधगी। 18 थारै आँख्या होता सोता बी थानै कोनी सुझै? अर थारै कान होता सोता बी थानै कोनी सुणै? थानै क्युं इयद कोनी? 19 जनाडै म पाँच हजार मिनखा न पाँच रोटीऊँ खुवायो हो बी दिन थे रोटचाँ स भरेडा कत्ता चोल्या उठाया हा?” अर बे ईशु न बोल्या, “बारा चोल्या।” 20 “अर जनाडै म च्यार हजार मिनखा न सात रोटचाँ स धपायो हो बी दिन थे रोटचाँ स भरेडा कत्ता चोल्या उठाया हा?” बे बोल्या, “सात चोल्या।” 21 ईशु बण स बोल्यो, “थारै हालबी पल्लै कोनी पड़ी के?”

ईशु आन्धा की आँख्या खोली

22 बे बैतसैदा पँचगा अर बढै लोग एक आन्धा न ईशु कनै ल्याया अर ईशु स अरदास करता बोल्या बिपै हाथ धरदे। 23 ईशु बी आन्धा मिनख को हाथ पकड़यो अर बिनै गाँव क बार न लेगो। अर बिकी आँख्या म थुक्यो अर आपका हाथ बिपै धर्यो अर इकै पाछै बिनै बूझ्यो, “तनै क्युं सुझै ह के?” 24 बो बोल्यो, “मनै हाल तो धुन्दो-धुन्दो सुझै ह। मनै मिनख चालता दरखता की जंयां सुझी ही।” 25 ईशु ओज्युँ स बिकी आँख्या प हाथ धर्यो जणा बो गोर कर्र देख्यो अर पाछै बिनै सूल सूझबा लाग्यो। अर बो सगळी चिजा न सुल्या ढंग स देखबा लाग्यो। 26 बो बिनै आ खेर घरा भेज्यो, “गाँव म मना जाए।”

पतरस बोल्यो ईशु ही मसी ह

27 ईशु अर बीकाळा चेला कैसरिया फिलीप्पी गाँव म जार्या हा गेला म ईशु बानै बूझ्यो लोग मनै काँई खेवीं ही, “म कुण हूँ।” 28 बे ईशु न बोल्या, “कई तो थानै बतिस्मो देबाळो यूहन्नो अर कई एलियो अर कई परमेश्वर की खेबाळा म स एक समझी ही।” 29 ईशु बण स बोल्यो, “थे मनै काँई समझो हो?” पतरस बोल्यो, “थे मसी॥ हो।” 30 ईशु बण स बोल्यो, “थे ई बात क बारा म किनैई मना खिज्यो।”

ईशु आपकी मोत क बारा म चेला न बताओ

31 ईशु आपका चेला न बताबा लाग्यो की मिनख का बेटा न दुख उठाणो ह। बो बोल्दो दुख उठावगो अर बढ़का, प्रधान याजक अर शास्त्रा न सीखाबाळा बिनै तजसी अर जिकै पाछै बो मार्यो जासी। पण बो तीसरा दिन मरेडा म हू जिज्यावैगो। 32 अंयां बोलर ईशु आपका चेला न खुद क बारा म सगळी बातां साँची-साँची बता दिन्यो। जणा पतरस ईशु न एकला म लेगो अर ईशु न दकाल्यो। 33 पण ईशु पाछो मुड़र आपका चेला न देख्यो अर पतरस न दकाल बोल्यो, “शैतान मैरै सामैऊँ चल्यो जा। तू परमेश्वर कानीऊँ कोनी सोचै पण मिनख की बातां सोचै ह।”

ईशु के पीछे चालबा को मतबल

34 ईशु आपका चेला अर भीड़ न आपकै कनै बुलार बानै बोलबा लाग्यो, “ज कोई मेरै गेल आणो चावै ह बो खुद न तजर, आपकी सूळी⁹ उठार मेरै गेल हो ले। 35 जो बी आपको पीराण बचाणो चावै ह बो आपका पीराणा की हानि उठासी। अर जखौ बी मेर ताँई अर चोखा समचार ताँई आपका पीराण तजसी, बो बिनै बचासी। 36 कोई मिनख आपका पीराणा की हानि उठार सगळा जगतनै जीत ले तो बिनै काँई फायदो? 37 कोई चीज क बदला म मिनख खुद का पीराण दे सकै ह के? 38 ईशु बण स बोल्यो जखौ बी ई पापी अर साँचा परमेश्वर न कोनी ध्यार बाळी पीढ़ी म मेर स अर मेरा बचना स मूळो फेरगो तो मिनख को बेटो बी जद बां पवित्र ईश्वर नगरी दूता क सागे अर आपका बाप की महिमा म आसी जणा बो बी बा मिनखा स मूळो फेर लेसी।”

9 ईशु बण स बोल्यो, “म थानै साँची खेवूँ हूँ, अठै खड़ाया मिनखा म स कई-कई ता अंयां का ह की बे जद ताँई परमेश्वर का राज न बिकी शक्ति क सागे न देखले जद ताँई बानै मोत कोनी आसी।”

ईशु को रूप चमकबा लाग्यो

2छ: दिना क पाछै ईशु पतरस, याकूब अर यूहन्ना न सागै लियो, अर एकला म

बो बानै ऊँचा सारा डूँगर प लेगो। बठै बाकै सामै ईशु को रूप बदल्यो गयो 3 अर ईशु का गाबा चमकबा लाग्या अर अंयां का धोळा होया क भळका मारै लाग्या। 4 ईशु क सागै एलीया अर मूसा बी प्रगट होया। अर बे ईशुऊँ बतळावा हा। 5 पतरस बानै बतळातो देखर ईशु न बोलबा लाग्यो, “ओ गुरु ओ कत्तो चोखो ह की आपा अठै हा। म्हानै अठै तीन पंडाल बणाबा दे एक तेरो, एक मूसा को अर एक एलीया को।” 6 बे डरगा हा ई ताँई पतरस आ बात बोली। 7 जद ही एक बादळ आयो अर बानै ढक लियो अर बादळ मऊँ हैळो आयो, “ओ मेरो लाड़लो बेटो ह। थे इकी सुणो।” 8 अर बे तावळा सा च्यारूँमेर देखबा लाग्या बे आपकै सागै ईशु न देख्या अर बानै बठै ओर कोई बी कोनी दिख्यो।

9 जद बे डूँगर स निचै आर्या हा ईशु बा तीन्या न हुकम दियो की थे जो बठै देख्यो हो बिंके बारा म जद ताँई मना खिज्यो जद ताँई मिनख को बेटो मरेड़ा मऊँ पाछो ना जी ज्या। 10 अर बे ई बात न आपका हिया क मांय न ही राख्यी पण बे सोचबा लाग्या की मरबा क पाछै जीबा को काँई मतबल ह? 11 ई ताँई पाछै बे ईशु न बूझ्या, “शास्त्रा न सीखाबाला क्यालै बोली ही की एलीया को पेल्या आणो पळ्यो ह?” 12 ईशु बण स बोल्यो, “सगळी बातां न ठिक (सई) करबा ताँई पळ्कोई एलियो पेल्या आसी। पण मिनख का बेटा क बारा म ओ क्युं

⁹ 8:34 दुख उठाण स्वातिर मरबा ताँई बी तैयार होणो।

9:11 मत्ती 11:14 ,मलाकी 4:5

मंडर्यो ह की बिनै बोलो दुख भोगणे पड़सी। अर लोग बिनै ठुकरासी? 13 मथानै बताऊँ हूँ, एलियो तो पेल्याई आलियो अर लोग जो चावा हा बो बिकै सागै कर-करालियो जंयां की बिकै बारा म मंडर्यो ह।”

ईशु छोरा म स ओपरी-बलाय काढि

14 जद बे बाकी चेला क कनै आया जणा बे देख्या की चेला क च्यारूँ-मेर घणी सारी भीड़ भेळी होरी ह अर कई शास्त्रा न सीखाबाळा बाकै सागै जिहर्या ही। 15 अर बे ईशु न बठै देखर ताजुब करता ही भागर बिकै कनै गया, अर बिसै नमस्कार कर्यो। 16 ईशु बण स बोल्यो, “थे आसै क्युं जिहर्या हो।” 17 भीड़ क मांय स एक जणो बोल्यो, “ओ गुरु म मेरो छोरो जिकै मांय न गूँगी बलाय ह बिनै तेरै कनै ल्यायो हो। 18 आ गूँगी बलाय मेरा छोरा क हर कठै ही फेट मार दे, अर इको मूँडो झागऊँ भरज्या अर ओ दाँत पीसबा लागज्या अर ओ दिन-दिन सुख्यो जार्यो ह। मथाकाळा चेला न खियो हो की बे ई बलाय न इकै मांय स काढ़ दे, पण बे ई बलाय न इमै स कोनी काढ़ सक्या।” 19 ईशु बिकी बातां सुणर बानै बोल्यो, “ओ अबिश्वासी मिनखो, म कद ताँई थारै सागै रैस्यु अर कद ताँई थारी सेहस्युं? बिनै मेरै कनै ल्याओ” 20 अर बलाय जद ईशु न देखी तो बा छोरा क मरोड़ी देर बिनै आडो पटक दियो अर बिकै मूँडा स झाग आबा लाग्या। 21 ईशु बी छोरा का बाप हूँ बूझ्यो, “इकी या हालत कद स ह?” बो बोल्यो, “टाबर

पुणा स ही इकी हालत अंयां की ह। 22 अर आ गूँगी बलाय इको नास करबा ताँई कदै तो इनै पाणी म अर कदै आग म पटकै ह पण म तेरूँ अरदास करूँ हूँ की ज तू इको जापतो कर सकै ह तौ जापतो करदे अर म्हारो भलो कर दे।” 23 ईशु बिनै बोल्यो, “तू अंयां क्युं खेवै ह कर सकै ह तो, “बिश्वास करबाळा ताँई तो सक्युं हो सकै ह”। 24 बी छोरा को बाप रोयो अर ईशु स बोल्यो, “ओ प्रबु म बिश्वास राखुँ हूँ, पण मेरै बिश्वास न पाङ्को करदे।” 25 अर ईशु देखबा लाग्यो की बठै मिनखा की भीड़ लागबा लागी ह बो बी गूँगी-बैरी बलाय न दकाल बोल्यो, “ए गूँगी-बैरी बलाय म तनै हुकम दयुँ हूँ इकै मांय स निकळ ज्या अर इकै मांय न कदै ही मना आजे।” 26 अर बा गूँगी बलाय बार घालर बी छोरा क मरोड़ी देर बिकै माईऊँ निकळगी अर बो छोरो मरबाळो सो होगो कई मिनख तो खेण लाग्या की ओ छोरो तो मरगो। 27 पण ईशु बी छोरा को बावळ्यो पकड़र बिनै खड़्यो कर्यो अर बो छोरो खड़्यो होग्यो। 28 अर जद ईशु घरा आयो तौ बीकाळा चेला एकला म बिनै बूझ्या, “म्हें बी बलाय न क्युं कोनी काढ़ सक्या?” 29 ईशु बण स बोल्यो, “प्रार्थना न छोड़र अंयां की कुजात न काढ़बा को कोई उपाय कोनी।”

ईशु ओज्युँ आपकी मोत क बारा म बताओ

30 इकै पाछै बे बठैऊँ चल्यागा अर बे गलील क माईऊँ होर जार्या हा अर ईशु

कोनी चावै हो की बिनै कोई पीछायै, 31 क्युं^r क ईशु आपका चेला न सीखार्यो हो की “मिनख को बेटो मिनखा क हाथा धोखा स पकड़ायो ज्यासी अर बे बिनै मार दिंगा पण बो तीन दिना क पाछै मोत ऊं जी उठ खड़्यो होसी।” 32 पण आ बात बाकै पल्लै कोनी पड़ी अर बे बिसै ओज्युं बूझबा ताँई डरा हा।

सगळाँ म स बडो कुण ह?

33 बे कफरनहूम म आया अर ईशु आपहाळा चेला न बूझ्यो, “थे गेला क मांय न काँई बतलावा हा?” 34 बे चुपचाल्या होगा क्युं^r क बे गेला क मांय न आपसरी म बतलावा हा की आपणा मऊं कुणसो बडो ह। 35 ईशु बैठ्यो होर बा बारा न आपके कनै बुलायो अर बण स बोल्यो, “थारै मऊं ज कोई बडो होणो चावै ह तो बिनै सगळाँऊं छोटो अर सगळाँ को चर्वादार बणनो चाए।” 36 अर ईशु बाकै सामै एक टाबरीयां न खड़्यो कर्यो अर बिकै कुँवां प हाथ धर बेण स बोल्यो, 37 “जो बी मेरा नामऊं टाबरा को मान करै ह बो मेरो भी मान करै ह अर मनै भेजबाळा को बी मान करै ह।”

जो आपणै सामै कोनी बो आपणोई ह

38 यूहन्नो ईशु न बोल्यो, “ओ गुरु म्हें एक मिनख न तेरै नामऊं ओपरी-बलाय निकाळता देखया अर म्हें बिनै ई बजै स रोक्या की बो मिनख आपणा मऊं कोनी हो।” 39 पण ईशु बण स बोल्यो, “थे बिनै

रोको मना जखौबी मेरै नामऊं चमत्कार करै ह बो मेरै बारा म तावळोसो बुरी बातां कोनी करै। 40 अर जखौबी आपणै सामै कोनी बो आपणोई ह। 41 अर जखा बी मिनख थानै सोता को जाणर एक गिलासीयो पाणी प्यावै ह, जणा आ कोनी हो सकै क इको फळ न मिलै।

आँखळी मना बणो

42 मेर प बिश्वास करबाळा आ नान्या मऊं कोई एक न बी पाप म गेरबा ताँई आँखळी बणै ह बि ताँई ओई चोख्यो ह क बिकै नाड़ म घरट घालर बिनै समदर क मांय फींक दियो जावै। 43 ज तेरो हाथ तनै ठोकर खुवावै बिनै काट फींक। क्युं^r क तेरै दो हाथ होतो सोता बी तू नरक का दरियाव म गेर्यो जाय जिकी आग कदै ई कोनी बूझ्य इसै तो तेरो टुंडो ई ईश्वर-नगरी म बड़नो चोख्यो ह। 44 [अर बठै को किडो मैर कोनी अर बठै की आग बूझ्य कोनी।]^s 45 अर तेरो पग तनै ठोकर खुवावै तो बिनै काट दे अर लंगडो ई ईश्वर-नगरी म बड़नो चोख्यो ह, इसै ओ भलो ह की दो पग होता सोता बी नरक का दरियाव क माईनै गेर्यो जाय। 46 [बठै को किडो ना तो मैर अर ना बठै की आग बूझ्य।] 47 ज तेरी आँख तनै ठोकर खुवावै तो बिनै काढ़ दे काणो होर ही परमेश्वर का राज म जाणो तेरै ताँई ठिक ह। इसै की तेरै दो आँख होता सोता तू नरक म गेर्यो जाय। 48 बठै मिनखा न खाबाळो किडो कोनी

^r 9:41 जिन्दगी भर की भाईला-च्यारी निभाण को करार। ^s 9:44 क्युंक मानी-थानी पुराणी पौथीयां म 44 अर 46 की बाता कोनी मंडी।

मरै अर मिनख न ज़लाबाली आग कोनी बूझै। 49जंय्यां लूण बली न पवित्र करै ह बंय्यां ई सगळी मिनखा न आगऊँ शुद्ध कर्यो ज्यासी। 50लूण चोखो ह पण लूण म स चरचराट चलीजा जणा बिनै कंय्यां चरचरो कर सकां हा? थे थारै म लूण जंय्यां को सुवाद राखो अर आपसरी म श्यान्तिऊँ रियो।”

तलाक की सीख

10 इकै पाछै ईशु बठैऊँ बिदा होर पार कर्यो। अर भीड़ की भीड़ बिकै कनै भेली होगी, ईशु बानै आपकी बाण गेल सीखाबा लाग्यो। 2जदई फरीसी बिकै कनै आर ईशु न बिचासबा ताँई बिसै बूझाबा लाग्या की आपणा विधान म कोई मोट्यार आपकी लूगाई न छोड़ सकै ह के? 3ईशु बण स बोल्यो, “मूसा थानै काँई हुकम दियो ह?” 4बे बोल्या, “मूसा तो तलाक नामो मांडू देण ताँई बोल्यो ह।” 5ईशु बण स बोल्यो, “मूसा आ बात थारै हिया की कुटलाई न देखता मांडयो ह। 6पण जद परमेश्वर ई सरष्टि न बणायो हो जदऊँ ही बो बानै,

‘नर अर नारी करके बणायो हो।

7ई ताँई मोट्यार आपका माँ-बापा न छोड़ेर आपकी लूगाई क सागे रेहै 8अर बे दोन्यु एक जीव होज्यासी, अर बे दो कोनी पण एक जीव ह।

9ई बजै स परमेश्वर जिनै जोड़यो ह; बिनै मिनख न तोड़े।”

10जद ईशु घर क मांय न हो जणा चेला बिनै ई बात क बारा म ओज्युँ बूझाबा लाग्या। 11ईशु बण स बोल्यो, “जो मिनख आपकी लूगाई न छोड़ेर दूसरो ब्याह करै ह बो कुकर्म करै ह क्युँक बो आपकी पेलडी लूगाई क बिश्वास जोगो कोनी। 12अर लूगाई आपका मोट्यार न छोड़ेर दूसरो ब्याह करै ह तो बा बी कुकर्म करै ह।”

ईशु टाबरा न आशिर्बाद दियो

13लोग टाबरा न ईशु क कनै लेर आया बे चावै हा की ईशु बा टाबरा क सिर प हाथ धौरे पण चेला बानै दकाल्या। 14ईशु झाळां म भर्र चेलाऊँ बोल्या, “थे टाबरा न मेरै कनै आबा द्यो। अर आ टाबरा न मना नटो, क्युँक परमेश्वर को राज आ जंय्यां को ही ह। 15ईशु बण स बोल्यो म थानै साँची-साँची खेवू हूँ की जखौ मिनख परमेश्वर का राज न टाबरा की जंय्यां कोनी अपणावै बो परमेश्वर का राज म कोनी बड़ सकै।” 16ईशु बा टाबरा न कनै लेर बा क सिर प हाथ धरेर बानै आशिर्बाद दियो।

पीसाळो मिनख ईशु क कनै आयो

17जद ईशु बठैऊँ निकळर गेला म जार्यो हो बठै एक मिनख भागतो होयो ईशु क कनै आयो अर बो गोडा टेकर हाथ जोड़र ईशुऊँ बूझाबा लाग्यो, “ओ चोखा गरु म जुगान्तर को जीवन पाण ताँई काँई करूँ?” 18ईशु बिसै बोल्यो, “तू मनै चोखो क्युँ बोलै ह? परमेश्वर

न छोड़र कोई बी चोखो कोनी, 19तू परमेश्वर का हुकम न तो जाणे ह जंयाँ मंडेडो ह,

“तू कुकर्म मना करजै, चोरी मना करजै, हत्या मना करजै, झुठी गुवाई मना दिजै, छळ मना करजै, अर माँ-बापा को मान करजै।”

20बो मिनख ईशु न बोल्यो, “ओ महान गुरु अ हुकम तो म टाबरपुणाऊँ ही मानतो आयो हूँ।” 21ईशु बिकै कानी देख्यो अर ईशु न बिपै दया आई अर बिनै बोल्यो, “तेरै मायं न एक बात की कमी ह। तू जा अर तेरै कनै जो बी ह बिनै बेचर गरीबा न देदे। तनै ईश्वर नगरी म धन मिलसी, अर तू मेरै गेल होले।” 22ई बात न सुणर बिको मूँडो लटकग्यो अर बो दुख्खी होर बठैऊँ चलेगो, बो पीसाळो मिनख हो।

23ईशु च्यारूँमेर देखर आपका चेला न बोल्यो, “जखा मिनखा को मोह धन म ह बा मिनखा को ईश्वर नगरी म जाणो बोलो ओखो ह।” 24चेला ईशु की ई बात न सुणर ताजुब करबा लाग्या ई ताँई ईशु बण स ओज्युँ बोल्यो, “मेरा टाबरे परमेश्वर का राज म जाणो कत्तो ओखो ह? 25ऊँट को सूई का नाका मऊँ निकळबा स बी पीसाळा को ईश्वर नगरी म बड़नो ओखो ह।” 26बे बोलो ताजुब करके आपसरी म बतळाबा लाग्या, “ज अंयाँ की बात ह जणा ईश्वर नगरी म कुण जा सकै ह?” 27ईशु बा कानी देख्यो अर बोल्यो, “ओ मिनख क बस

को कोनी पण परमेश्वर सक्युँकर सकै ह।” 28जणा पतरस ईशु न बोल्यो, “म्हें सक्युँ तजर तेरै गेल आया हा।” 29ईशु बोल्यो, “म थानै साँची-साँची खेवूँ हूँ ज कोई मैरै ताँई अर चोखा समचार ताँई घर, भाई-भाण, माँ-बापा, टाबर-टिकरा, अर खेत न छोड़ दियो ह 30बिनै अठैई सौ गुणा घर, भाई-भाणा, माँयाँ, टाबर-टिकर अर खेत मिलसी अर सागै की सागै जुगान्तर को जीवन मिलसी। 31पण बोला ह जखा की आज बूज ह बाकी बूज कोनी होसी अर जखा की बूज कोनी बाकी बूज हो जासी।”

तीसरका ईशु आपकी मोत क बारां म बताओ

32बे यरुशलेम जार्या हा गेला म ईशु आपका चेला क आगे-आगे चालर्यो हो। चेला ताजुब म पड़ग्या अर बाकै सागै जो मिनख हा बे डर्या हा। ईशु आपका बारां चेला न एक कानी लेगो अर बानै बताबा लाग्यो की मैरै सागै काँई-काँई बितबाली ह। 33ईशु बानै बोल्यो, “थे सुणो आपा यरुशलेम म जार्या हा मिनख का बेटा न धोखा स पकड़र महायाजका अर शास्त्रा न सीखाबाला क सपुर्द कर दियो ज्यासी। अर बे बिनै जान स मारबा की सजा देर जखा एहूदी कोनी बाकै हाथा म सपुर्द कर दिंगा। 34बिको तमासो बणायो जासी अर बिपै थुकिंगा अर कोड़ा मारू बिनै जान स मार दिंगा पण बो तीसरा दिन ओज्युँ जीन्दो हो ज्यासी।”

याकूब अर यूहन्ना की अरदास

35जब्दी का बेटा याकूब अर यूहन्नो ईशु क कनै आया अर ईशुँ बोल्बा लाग्या, “ओ गुरु म्हें चावां हा की जो बी म्हें थारै स माँगा, बो थे म्हानै द्यो।” 36ईशु बण स बोल्यो, “थे मेर स काँई चाओ हो?” 37बे ईशु न बोल्या, “थारै महिमाभर्या राज म थे म्हानै थारै दांयाबांया बैठबा को सोबाग द्यो।” 38ईशु बण स बोल्यो, “थे कोनी जाणो की थे काँई माँगो हो। जो पीड़ा स भर्यो बाटको म पीबा जार्यो हूँ के थे बिनै पी सको हो? अर जो बतिस्मो म लेबा जार्यो हूँ के थे बिनै ले सको हो?” 39बे ईशु न बोल्या, “म्हें अंय्यां कर सकां हा!” ईशु बण स बोल्यो, “थे ओ बाटको बी पीस्यो अर ओ बतिस्मो बी लेस्यो जखौ म लेबाळो हूँ। 40पण मेरै दांया अर बांया बैठबा को हक म कोनी दे सकूँ क्युँक जा ताँई परमेश्वर आ झाई बणाई ह बानैई बो आ झाई देसी।”

41जद दस चेला ई बात न सुणया जणा बे याकूब अर यूहन्ना प लाल ताता होगा। 42ईशु बानै आपकै कनै बुलायो अर बण स बोल्बा लाग्यो, “थे जाणो हो की दूसरी जात्यां का राज करबाला मिनख जखा एहूदी कोनी बे मिनखा प हुकम चलावीं हीं अर बाका सरदार जोर जमावीं हीं। 43पण थारै म अंय्यां कोनी थारै म जखौबी बडो होणो चावै बो सगळाँ को चर्वादार बणै। 44अर थारै मऊँ जखौबी प्रधान होणो चावै बो सगळाँ को गुलाम बणै। 45मिनख को बेटो ई ताँई कोनी आयो की बिकी सेवा

करी जाय पण ई ताँई आयो ह की बो दूसरा की सेवा करै अर बोला सारा न छुड़बा ताँई आपका पीराण दे।”

आन्धा बरत्तिमाई न सूजबा लाग्यो

46बे यरीहो गाँव क मांय न आया अर ईशु क सागै बिका चेला अर घणी सारी भीड़ ही बे यरीहा मऊँ निकलर जार्या हा, जणा तिमाई को बेटो बरत्तिमाई जिखो आंधो बीखारी हो बो सड़क क किनरै बैठयो हो 47जद बो सुण्यो की ईशु नासरी अठैऊँ जार्यो ह बो जोर-जोरऊँ खेबा लाग्यो, “ओ दाऊद का बेटा ईशु मेर प दया करजै।” 48लोग बिनै दकालर बोल्या, “तू चुपचाल्यो रैह पण बो ओर बी जोर जोरऊँ खेबा लाग्यो ओ दाऊद का बेटा मेर प दया करजै।” 49ईशु बिकी सुणर डटगो अर बोल्यो, “बिनै मेरै कनै ल्याओ।” अर बे लोग बी आन्धा न बुलाया अर बिनै बोल्या, “राजी हो अर खड़यो हो तनै ईशु बुलावै ह।” 50बो आपका गाबा बगार बेगोसो उठयो अर ईशु क कनै आयो। 51ईशु बिनै बोल्यो, “तू के चावै ह की म तेर ताँई करूँ?” बो आंधो मिनख बोल्यो, “ओ गुरु म देखणो चाऊँ हूँ।” 52ईशु बोल्यो, “चल्यो जा तेरो बिश्वास तनै निरोगो कर दिन्यो ह।” जणा बो बढ़ै ही देखबा लाग्यो अर ईशु क गेल हो लियो।

यरुशलेम म ईशु की जै-जैकार

11 जद बे यरुशलेम क सांकड़ै जैतून ढूँगर की ढाल प भसेड़ी बैतफगे अर बैतनिय्याह नगरी क कनै आया जणा ईशु आपका चेला मऊँ दो

जणा न अंयां बोल'र अगाऊँ भेज्यो,
2“थे आगला गाँव म जाओ। थानै बी
गाँव म एक गदेड़ी को बच्चो बाँधेड़ो
मिलसी जिनै इब ताँई कोई काम म
कोनी लियो ह बिनै खोल'र ल्याओ।

3अर थानै कोई बूझै थे ओ काँई करो
हो? थे बानै बोलज्यो ‘प्रबु न ओ चाए
ह’ अर बे थरै सागै बिनै भेज देसी।”

4बे जार बी गदेड़ी का बच्चां न
गळियारा म कुवाड़ा क बँधेडो देख'र
बिनै खोलबा लाग्या 5बठै खड़्या
मिनखा मऊँ कई मिनख बानै बोल्या,
“थे काँई करो हो, इनै क्यालै खोलर्या
हो?” 6जंयां ईशु बानै बोल्यो हो बंयांई
बे बा मिनखा न बोल्या अर बे बाकी
बात सुण'र बानै गधेड़ी का बच्चां न
लेज्याबा दियो। 7बे गदेड़ी का बच्चां
न ईशु क कनै लेगा, अर बिपै आपका
गाबा गेर्या अर ईशु बिपै बैठगो। 8जद
ईशु बी बच्चां प बैठ'र जार्यो हो जणा
लोग गेला म आपका गाबा बीछाबा
लाग्या अर कई लोग खेताउँ हरी-भरी
डाळ्याँ काट'र आवभगत करबा ताँई
बीछादी। 9अर जताबी मिनख ईशु क
आगै-पीछै हा बे जोर जोरऊँ जै-जैकार
कर'र बोलर्या हा,

“प्रबु की महमा हो ओ प्रबु क
नामऊँ आर्यो ह इनै परमेश्वर
आशिर्वाद दे।

10म्हारा बडका दाऊद को राज
आर्यो ह इनै परमेश्वर आशिर्वाद
दे। ओ महान ह ईश्वर नगरी म
प्रबु की महमा हो!”

11ईशु यरुशलेम पूँच्यो अर बठै
मन्दर म गयो अर बठै बो च्याँस्मेर
की सगळी चिजा न देख्यो अर मोड़ो
होग्यो जणा बो आपका चेला क सागै
बैतनिय्याह गयो।

अंजीर क पेड़ न दुर्शिश देणो

12आगला दिन जद बे बैतनिय्याह मऊँ
चाल पड़्या जणा ईशु न भूख लागी।

13ईशु दूरऊँ एक अंजीर को पेड़ देख्यो
जो हर्यो-भर्यो हो बो बिकै कनै गयो जिसै
बिका फळ खा सकै। पण बी पेड़ म
पता न छोड़र क्युंइ कोनी हो। क्युंक
बा अंजीर का फळा की रुत कोनी ही।
14ईशु बी पेड़ स बोल्यो, “इबऊँ तेरो
फळ कोई कदे ही कोनी खासी” अर ई
बात न ईशु का चेला सुणर्या हा।”

ईशु मन्दर म गयो

15जद बे यरुशलेम आया ईशु मन्दर
म गयो अर बठै जताबी बेचबाळा अर
खरिदबाळा हा बानै बठैऊँ बारनै काढबा
लाग्यो। रिपिया को लेण-देण करबाळा
का पाटिया न बगादियो अर कबूतर
बेचबाळा का पाटिया न उन्दो कर दियो।

16अर मन्दर मऊँ किनैई क्युंइ कोनी
लेज्याबा दियो। 17इकै पाछै बो बानै
सीख देतो होयो बण स बोल्यो, “शास्त्रा
म मंडर्यो ह,

‘मेरो घर सगळी जात्यां का मिनखा
ताँई प्रार्थना को घर होसी।’ पण
थे ई घर न डाकूआ की खोल
बणा दि।”

18 अर जद महायाजक अर धर्मशास्त्रि ईशु की ई बात न सुणी बे ईशु न मारबा का गेलो ढूँढ़बा लाग्या। पण भीड़ ईशु क परबचना म रमर बिकै सागै ही ई बजै स बे ईशु न मारबा स डरा हा। 19 अर दिन आथगो जणा बे यरुशलेम नगरीऊँ बारै चलेगा।

सुखेड़ा अंजीर स सीखाबो

20 आगला दिन जद ईशु आपका चेला क सागै जार्यो हो जद बे बी अंजीर का पेड़ न पता स लेर जड़ ताँई सूखेड़ो देख्यो 21 अर पतरस न ईशु की कहड़ी बात याद आई बो ईशु न बोल्यो, “ओ गुरु देख्वो जि पेड़ न थे दुर्शिंश दिया हा बो सुखग्यो ह!” 22 ईशु बण स बोल्यो, “परमेश्वर म बिश्वास राखो 23 म थानै साँची-साँची खेवूँ हू ज कोई ई ढूँगर स बोलै की ‘तू अठौऊँ हटर समदर क माइनै डूब ज्या’ अर बी मिनख क हिया म ई बात प जमा ई भेम न होवै पण इकै बदला म पूरो बिश्वास होवै तो जंय्यां बो आपका मूँडा स बोल्यो बी ताँई बंयां ही हो ज्यासी। 24 जणा ही म थानै खेवूँ हू थे प्रार्थना म ओ बिश्वास करके माँग्या करो की थे जो भी माँगर्या हो बो थानै मिलगो ह जणा बो थानै मिल ज्यासी। 25 अर जद थे प्रार्थना करबा लागो जद ही थे बा मिनखा न माफ करो जो थारो बुरो कर्यो ह जिसै थारो बाप जो ईश्वर नगरी म ह बो थारा पाप माफ करसी। 26 [अर थे बिनै माफ कोनी करो जणा थारो बाप

जो ईश्वर नगरी म ह बो बी थारा पाप माफ कोनी करसी।”^t

ईशु क हक प एहूदी नेता को सवाल 27 बे ओज्युँ यरुशलेम म आया। ईशु मन्दर म घूमर्यो हो जद बडा याजक, शास्त्रा न सीखाबाळा अर एहूदी बढ़का ईशु क कनै आया। 28 अर बे ईशु न बोल्बा लाग्या, “तू अ काम किका हक स करै ह अर ओ हक तनै कुण दियो ह?” 29 ईशु बण स बोल्यो, “म बी थानै एक सवाल बूझूँ ज थे मनै ई सवाल को जुबाब देद्यो जणा म बी थानै बतादयुगो की म ओ काम किका हक स करै हूँ? 30 थे बताओ यूहन्ना न बतिस्मो देबा को हक परमेश्वर स मिल्यो या मिनखाऊँ? 31 बे ईशु की ई बात न सुणर आपसरी म बतळाबा लाग्या, बे बोल्या ज आपा खेवां बिनै परमेश्वर स हक मिल्यो ह जणा ईशु आपा न खेवगो थे बिष्वास क्युँ कोनी कर्या।” 32 अर आपा खेवां, “बिनै मिनखा स हक मिल्यो हो जणा अ लोग आपणा प झाळां काढसी, क्युँ क अ लोग यूहन्ना न परमेश्वर की खेबालो मानी हि।” 33 ई बजै स बे ईशु न बोल्या, “म्हें कोनी जाणा की बिनै ओ हक कठै स मिल्यो हो?” ईशु बाकी ई बात न सुणर बण स बोल्यो, “म बी थानै कोनी बताऊँ की म किका हक स ओ काम करै हूँ।”

अंगूरा की बाड़ी का ठेकेदार

12 ईशु बण स नीति कथा म खेबा लाग्यो, “एक बार अंयां होयो

^t 11:26 क्युंक मानी-थानी हाथाऊँ माणडेड़ी पुराणी पौथियां म अ बाता कोनी।

एक मिनख अंगूरा को बगिचो लगायो अर बी बगिचा क च्याहूँमेर बाड़ बाँधी। अर बठैई अंगूरा को रस काढ़बा ताँई कुण्ड अर निगराणी करबा ताँई एक मचाण बणाओ। अर इकै पाछै बो ई बगिचा न ठेका प देर दिसावर चलेगो। 2 अंगूर पकणा की रुत म बो मिनख दिसावरऊँ आपका दास न बा किसाना क कनै भेज्यो जि स बे बठै जार बा किसाना स अंगूरा को हिसाब ले सकै। 3 पण बे किसान बी दास न पकड़र मार्या अर बिनै रीतो ही भेज दियो। 4 इकै पाछै बगिचा को मालीक दूसरा दास न बठै भेज्यो पण बे किसान बिनै बी मार्या अर बिको सिर फोड़र बिकी बैजती कर्या। 5 बो मालीक तीसरा दास न बठै भेज्यो पण बे किसान बी दास न मार गेर्या। अंय्याँई बो बोला दासा न भेज्यो पण बे किसान कया न तो पीटचा अर कयाकी जान लेली। 6 ई क पाछै बी बगिचा का मालीक क कनै भेजबा ताँणी बिको लाडलो बेटो ही बच्यो। अर बो आ सोचर की बे इको तो आदर करसी। ई बजै स बो आपका बेटा न बठै भेज्यो। 7 बे किसान मालीक का बेटा न आतो देख आपसरी म बतलाबा लाग्या, ‘ओ अठै को वारीश ह। आओ आपा मिलर इनै मार देवां। अंय्यां करबा ऊँ अंगूरा को बगिचो आपणो हो ज्यावैगो।’ 8 अर बे सगळाँ किसान मिलर बिनै मार दिन्यो अर बगिचा क बारनै बगा दियो। 9 ई बात न सुणर बगिचा को मालीक बा किसाना क सागै काँई करसी? बो

बठै ज्यासी अर बा किसाना न मारैगो अर अंगूरा को बगिचो दूसरा किसाना न दे देवगो। 10 थे शास्त्र म ओ बचन कोनी बाच्यो के?

‘जि भाट्टा न कारिगर रुद्धाँई जोगो कोनी जाण्यां बो ही भाट्टो कुणा न समाबाळो निकल्यो। 11 अर ओ आँख्या क सामनै अजूबो ह इनै प्रबु कर्यो ह।’

12 बठै खड्या शास्त्रि समझागा की ओ आ नीति कथा बापैई कही ह। ई बजै स बे ईशु न कैद करबाताँणी कोई गेलो ढूँढ़बा लाग्या। पण बे मिनखा स डरता हा जिसै बे बिनै बठै हि छोड़र चल्यागा।

चुंगी देबा की सीख

13 बे ईशु न फसाबा ताँई फरीसीयां अर हिरोद की मानबाळा क्यंक मिनखा न बिकै कनै भेज्या। 14 बे ईशु क कनै गया अर बिऊँ बोल्बा लाग्या, “ओ गुरु म्हें जाणा हा की तू बोलो ईमानदार ह अर तू ई बात की परवा कोनी करै की लोग तनै काँई खेवै ह। अर तेरा बारा म काँई सोचै ह। अर तू मिनखा को मूँडो देखर बातां कोनी करै पण परमेश्वर क कनै जाण ताँई जखौ गेलो ह बिनै तू सम्याईऊँ बतावै ह। पण म्हें तनै बूँझै हा की कैसर न चुंगी देणी चाए की कोनी?” 15 ईशु बाकी चाल न भापगो अर बण स बोल्यो, “थे मनै क्युं बिच्यास्यो हो? थे मेर कनै एक सिङ्को ल्याओ जिसै म देखुँ।” 16 बे ईशु न एक सिङ्को दिन्यो।

अर ईशु बण स बूझ्यो, “इपै किकी सकल अर किको नाम ह?” बे बोल्या, “कैसर की।” 17 ईशु बाकी ई बात न सुणर बोल्यो, “जखौ कैसर को ह बो कैसर न द्यो अर जखौ परमेश्वर को ह बो परमेश्वर न द्यो।” बे ईशु की ई बात न सुणर ताजुब म पड़गा।

मर्या पाछै जिबा प सवाल

18 इके पाछै सदुकी ईशु क कनै आया अ मानी ही क मरेड़ी काया ओज्युं कोनी जीव अर बे ईशु न बूझबा लाग्या, 19 “ओ गुरु मूसा म्हारै ताँई मांड्यो ह की जिको भाई मर ज्यावै अर बिकी लूगाई क कोई टाबर न होवै जणा मरबाळा को भाई बिकी लूगाई स ब्याह करले जिसै बो आपका भाई को वंश बढावै। 20 एक बार सात भाई हा। बा म स बडोड़ा को ब्याह होयो अर क्युंक दिना क पाछै बो मरग्यो बिकी लूगाई क कोई टाबर-टिकर कोनी हो। 21 बिको दूसरो भाई बिसै ब्याह कर लियो अर बो बी क्युंक दिना क पाछै मरगो अर बिसै बी बिकै कोई टाबर कोनी होयो। तीसरो भाई बी अंयाईं कर्यो अर बिकै सागै बी बो ही होयो। 22 अर अंयाईं सात्युं का सात्युं बे औलाद ही मरगा अर बिकै पाछै बा लूगाई बि मरगी। 23 बे ईशु न बूझबा लाग्या की सगळी मरेड़ी काया ओज्युं जीसी बी दिन बा सात म स किकी लूगाई होसी। क्युंक बे सात्युं हि बिनै ब्याली ही।” 24 ईशु बण स बोल्यो, “थे आ बातां न गळत लेली क्युंक थे

शास्त्रा न अर परमेश्वर की शक्ति न कोनी जाणो। 25 जद मरेड़ी काया ओज्युं जीसी जणा बाको ब्याह कोनी होसी पण बे ईश्वर नगरी म ईश्वर नगरी दूता की जंयां होसी। 26 अर जठै ताँई मरेड़ी काया क जीबा को सवाल ह, थे मूसा की पौथी म ओ कोनी बाच्यो के? जद परमेश्वर बळती झाड़ी म स बिसै खयो ‘म ईब्राहिम को परमेश्वर हूँ,

इसाक को परमेश्वर हूँ अर
याकूब को परमेश्वर हूँ।’

27 इको मतबल ओ ह की बै मर्गा पण बे मरेड़ा कोनी जिन्दा ही जणा ई बो मर्या खप्या को कोनी पण जिता-जागता को परमेश्वर ह। थे तो भेम म पड़या हो।”

सगळाँ मँ बडो हुकम

28 बठै एक एहूदी शास्त्रा न सीखाबाळो आयो अर बो बानै बठै जिरै करता अर ईशु बा सदुकीया न सागैड़ो जबाब देर्यो हो आ देखर बो ईशु न बूझ्यो, “सगळाँ हुकमा मँ कुणसो बडो ह?” 29 ईशु बिसै बोल्यो, “सगळाँ मँ बडोड़ो ओ ह।

‘सुणो ईस्त्राएलियो आपणा परमेश्वर न छोड़र कोई प्रबु कोनी ह। 30 अर थे आपका सगळाँ हियाऊं सगळी आत्मा स सगळी बुद्धिऊं अर आपकी सगळी शक्तिऊं परमेश्वर न प्रेम करो।’ 31 अर दूसरो हुकम ओ ह ‘तू तेरा पड़ोसीऊं बंयां ही प्रेम कर जंयां तू खुदऊं प्रेम करै ह।’

आ हुकमा स बडो कोई बी हुकम कोनी।” ३२एहूटी शास्त्रा न सीखाबाला ईशु की ई बात न सुणर बोल्या, “ओ गुरु थारो ओ खेणो ठिक ई ह की परमेश्वर एक ई ह अर बिनै छोड़ दूसरो कोई कोनी। ३३आपका सगळाँ हियाऊं []ⁱⁱ सगळी बुद्धिऊं अर आपकी सगळी शक्तिऊं परमेश्वर न प्रेम करो अर आपका पड़ोसीऊं खुद की जंयां प्रेम करो। अर अ दोन्युं सगळाँ होम बली अर चढावाऊं बढके ह।” ३४जि चतराईऊं बो जबाब दिन्यो हो बिकी सुणर ईशु बिसै खयो, “तू परमेश्वर का राज हू घणी दूर कोनी।” ई क पाछै किकी ई ईशुऊं सवाल बूझबा की हिम्मत कोनी बगी।

मसी किको बेटो ह?

३५इकै पाछै ईशु मन्दर म परबचन देतोई बोल्यो, “शास्त्रा न सीखाबाला क्यालै बोली ई की मसी दाऊद क कुणबा को बेटो ह? ३६पण दाऊद खुद पवित्र आत्मा स भरर बोल्यो हो,

‘प्रबु (परमेश्वर) मेरा प्रबु (मसी)
ऊं खियो जद ताँई म तेरा
दुश्मना न तेरै पगा तळै न
कर दयुं मेरै दांया हाथ बैठचो
रैह।’

३७दाऊद खुद ई मसी न प्रबु बोलै ह जणा मसी दाऊद को बेटो कंयां हो सकै ह?” घणी सारी भीड़ ईशु की बातां न राजी हियाऊं सूणै ही।

शास्त्रा न सीखाबाला ऊं बचर रिज्यो ३८ईशु बानै सीखातो ई बोल्यो, “थे शास्त्रा न सीखाबाला ऊं समळर रिज्यो बे लाम्बो-लाम्बो चोंगो पेरीं ही अर बानै घूमणो चोखो लागै ह अर बे चावी ही की लोग बजारा म बाको आदर-मान करीं। ३९अर बे एहटीयां का प्रार्थना घर अर जीमणवार म उंची गदी प बिराजणा की मन्स्या राखै ह। ४०बे खाली होयडी लूगायां को घर खाज्याई ही। अर दिखाबा ताँई बडी बडी प्रार्थना करीं ही। आ मिनखा न बुरी ऊं बुरी सजा मिलसी।”

साँझो दान

४१ईशु यरुशलेम मन्दर की दान पेटी क सामे बैठर देखर्यो हो की लोग दान हाली पेटी म कंयां दान घाली ही। पीसाला तो बड-चढर दान घालर्या हा। ४२बाकै पाछै बठै एक खाली होयडी गरीबणी आई अर बा बी पेटी क मांय दो डब्बली हाला सिङ्का घाली अ सिङ्का क्युंक पीसा जता होता हा। ४३ईशु आपका चेला न आपकै कनै बुलायो अर बण स बोल्यो, “म थानै साँच्ची-साँच्ची खेवूँ हू ई खाली होयडी को दान सऊँ बेसी ह। ४४क्युंक सगळाँ तो आपकी बढती मऊँ घाल्या पण आ खाली होयडी आपकी सगळी कुमाई इमै घाल दि। इकै कनै अत्तो ही हो जिसै इको चूल्लो बल्लो।”

ⁱⁱ 12:33 क्युंक पौथियां म सगळाँ हिया क पाछै सगळी आत्माऊं बी मड़्यो ह।

मन्दर ढब्बा की भविष्यवाणी

13 जद ईशु यरुशलेम का मन्दर क मांय स बारनै जायो हो जणा बी टेप बीकाळा चेला म स एक चेलो ईशु न बोल्यो, “ओ गुरु देख अ भाट्ठा अर आ हेल्ही कत्ती सोवणी ह।” २ईशु बिकी ई बात न सुण’र बिने बोल्यो, “के तू ई बडी सारी हेल्ही न देखै ह? अठै एक बी भाट्ठा कोनी रेहसी सगळाँ भाट्ठा ढा दिया जासी।”

विपदा अर सताव

३जद ईशु जैतून का डूँगर प मन्दर क सामै बैठचो हो जणा बिसै पतरस, याकूब, अर अन्द्रियास एकला म बूझ्या ४बे ईशु न बूझ्या, “अ बातां कद घटसी? अर आ बातां क होण का चिन काँई होसी?” बाकी बातां सुण’र ५ईशु बानै बोल्यो, “थे समझ’र रिज्यो थारै सागै कोई छळ न करज्या। ६मेरा नामऊँ बोळा सारा आसी अर खेसी ‘म मसी हूँ’ अंयां बोल’र बे बोळा सारा मिनखा न भरमासी। ७अर जद थे लडाई अर लडायां की खबर्यां सुणो जणा मना डर जयायो, क्युँक आ बातां को होणो तै ह पण बा घडी नास की कोनी होसी। ८अर जात्यां जात्यां प अर देश देश प चढाई करसी। अर कठै-कठै तो भूचाळ आसी अर काळ पड़सी अर अ सगळी बातां हाल तो जझ्या क सरुका उठबाळा दर्द जंयां की ह। ९पण थे समझ’र रिज्यो, थानै पकड़’र कचेरी क सपुर्द कर्यो ज्यासी अर थानै एहूदीयां की धर्म सभा म पीटचो जासी अर थानै मेरा नाम अर चोखा समचार की बजै स पंचा, राजा

अर हाकिमा क सामै खड्यो कर दियो जासी जिसै थे बानै चोखो समचार बता सको। १०पण आ पक्की ह की आसै पेल्या सगळी जात्यां न चोखो समचार सुणायो जासी। ११अर जद थानै पकड़’र लोग कचेरी क हवालै करीं जणा थे ई बात की जमाई चिनत्या मना करज्यो की थानै काँई खेणो ह? बी घडी पवित्र आत्मा जखा सब्द दे बे ही बोलज्यो क्युँक बोलबाळा थे कोनी पण पवित्र आत्मा होसी। १२भाई-भाई न पकड़ा’र मरवासी अर अंयां ही बाप आपका टाबरा क सागै करसी अर टाबर आपका माँ- बाप क खिलाफ हो’र बानै मरवासी। १३अर मेरा नाम क बजै स सगळाँ मिनख थारै स बैर राखसी, पण जिखा आखिर ताँई सब’र करसी बो ही बचायो जासी।

बिनास की घडी

१४जद थे उजाड़बाली सुगली चिजा न जठै न होणी चायै ही बठै देखो (बाचबाळो खुद ही जाण ले इको मतबल काँई ह?) जणा जखौ एहूदीयां म होवै, बानै डूँगरा म भाग जाणो चाए। १५अर जखौ मिनख आपकी छात प होवै बे आपका घरा म क्युर्हुई चिज ल्याण ताँई न उतरै। १६अर जखा खेत म होवै बो आपको गाबा लेण ताँई न मुडै। १७दुध प्याती माँयाँ अर पेट हाली लूगायां ताँई बे दिन बोली कलडाई का होसी। १८थे प्रार्थना कर्या करो की अ बातां श्याळा म न हो। १९बा दिना म अंयां को कलेस आसी जखौ जुगाद म जद परमेश्वर ई दुनिया न रची जदऊँ ले’र न तो हाल ताँई आयो अर न इकै पाछै कणा आसी। २०ज परमेश्वर बा दिना न

कम ना करतो तो कोई बी कोनी बचतो। पण बिका टाळेडा मिनखा की बजै स परमेश्वर बा दिना न कम करदियो ह। 21 बा दिना म थानै कोई खेवै, ‘देखो अठै ह मसी या बढ़ै ह मसी’ जद थे बिको विश्वास मना करज्यो। 22 थानै बा दिना म झुठा मसी अर झुठी परमेश्वर की खेबाला दिखणा म आसी। अर बे चिन-चमत्कार दिखार टाळेडा मिनखा न बी भेकाण की कोसीश करसी। 23 पण थे समलर रियो म थानै अ सगळी बातां पेल्या स ही बता दिनी ह।

मिनख का बेटा को ओज्युँ आणो

24 बा दिना म, बी कळेस क पाछै सूरज उज्जाळा न खो देसी अर चाँद बी कोनी चमकसी। 25 अर अकास मऊं तारा बी तळै पड़ मरसी। अर अकास की शक्तियाँ हिलाई जासी जिसै बे आपकी झाघा छोड़ देसी। 26 जणा लोग मिनख का बेटा न महाशक्ति अर महिमा क सागै बादला प आतो देखसी।

27 ‘अर बो आपका दूता न भेजसी की बे धरती अर अकास प जार च्यारूमेर स बिका टाळेडा मिनखा न भेळा करीं।’

28 “थे अंजीर का दरखतऊँ सिखो जद बिकी डाळ्याँ नरम होवै अर बिकै कुपळ फूटबा लागै जणा थे बिनै देखर जाण ज्यायो हो की उंदयाळो आबाळो ह। 29 अंयां हि जद थे आ बातां न होता देखो जणा जाणज्यायो की बा घड़ी

सांकडै ही ह, अर थळी प हि ह। 30 याद राखीयो, म थानै सँझी खेवूँ हूँ जद ताँई अ बातां कोनी होसी ई जमाना का मिनख कोनी मरसी। 31 अकास अर धरती टळ जासी पण मेरी बातां कोनी टळी।

जागता रियो

32 बी दिन अर बी घड़ी क बारा म कोई बी कोनी जाणै, न तो ईश्वर नगरी दूत अर ना बेटो पण पीता परमेश्वर हि बिकै बारा म जाणै ह। 33 ई बजै स थे समलर जागता रिज्यो थानै कोनी बेरो की बो दिन कद आसी अर न थे बी दिन क बारा म जाणो। 34 ओ अंयां होसी ज्यां कोई मिनख दिसावर जाण स पेल्या आपका घर न आपका दास क हवालै करके बानै न्यारो-न्यारो काम बाँटर चल्यो जावै अर चौकिदार न पेरो लगाबा को हुकम देर अंयां बोलर की जद ताँई म कोनी आँऊँ तू घर की समाळ करजै। 35 थे बी जागता रिज्यो थानै कोनी बेरो की घर को मालीक कद आवगो। आथण्या आवगो क मङ्ग रात म आवगो क भागपाट्या आवगो या दिन चढ़्या आवगो। 36 अर अंयां ना होज्या कणा बो चाणचुक्यो अर थानै सोतो देखै। 37 अर जखी बातां म थानै खेवूँ हूँ बे ही बात म सगळाँ न खेवूँ हूँ की थे सगळाँ जागता रिज्यो।”

ईशु न मारबा की जाळ-साजी

14 दो दिना क पाछै फसै को त्युंहार अर बिना खमीर की

v 14:1 फसै(पार कर जाणो) को त्युंहार जद परमेश्वर ईब्रानिया का घरा न छोड़र मिस का पेलीपोत का होयडा न मार्यो हो बी याद म मनायो जावै ह।

रोटी को त्युंहार^w आबालो हो। बड़ा-बड़ा याजक अर शास्त्रि ईशु न धोखा स पकड़ेर मारबा की साजिश रचया हा। २पण बे आपस म खेबा लाग्या, “आपा ईशु न त्युंहार क दिना म कोनी मारा। आपा त्युंहार क दिना म इनै मारा तो के बेरो जनता भड़क ज्यावै।”

ईशु प अत्तर-फुलेन गर्ये

३जद ईशु बैतनिय्याह म शमोन जखौ पेल्या कोढ़ी हो बिकै घरा रोटी खाबा बैठच्यो, बठै एक लूगाई संगमरमर का बर्तन म जटामांसी (बाल झाड़)को मेंगो अर खरो अत्तर-फुलेन लेर आई। अर बा लूगाई बी बर्तन न खोलर बिकै माइनै जत्तो बी अत्तर-फुलेन हो बिनै ईशु क सीर प उन्दका दि। ४बठै खड़िया मिनखा म क्युंक चिड़गा अर खया, “आ लूगाई ई अत्तर-फुलेन न क्यालै खराब करी ह? ५ई अत्तर-फुलेन न तीन सो चाँदि का सिक्का^x ऊं बी ज्यादा म बेच्यो जा सकै हो अर इसै जखा रुपया मिलता बिनै गरीबा म बाँट्यो जाणो चायै हो।” अर बे बिनै दकालबा लाग्या। ६ईशु बाकी ई बात न सुणर बानै बोल्यो, “थे ई लूगाई न क्युं तंग करो हो? थे इनै छोड़ द्यो। आ तो मेर सागै भलो करी ह। ७गरीब तो थारै सागै सदा हि रेहसी। थे जद चावो बाको भलो कर सको हो, पण म थारै सागै सदा कोनी रेस्यु। ८अर जो क्युं बिकै बस म हो बा करी। आ मनै गाडण हूं पेल्या मेरी

काया प अत्तर-फुलेन उन्दकाई ह। ९म थानै साँच्ची खेवूँ हूं सगाळी दुनिया म जठै बी चोखो समचार परचार कर्यो ज्यासी, बठै ई लूगाई न अर इका काम न याद कर्यो ज्यासी।”

एहूदो ईशु न धोखो देबा ताँई राजी होयो

१०एहूदा इप्करियोती बारा चेला मऊँ एक हो ओ बड़ा याजक क कनै ईशु न पकड़ाबा की बातचीत करबा ताँई गयो। ११एहूदा की ई बात न सुणर याजक खुश होयो अर बे एहूदा न रुपया देण ताँई बोल्या। एहूदो ह जखौ ईशु न पकड़ाबा की ताक म मौको ढूँढ़बा लाग्यो।

चेला क सागै आखरी फसै

१२बिना खमीर की रोटी हाळै त्युंहार क पेल्डै दिन जद फसै का त्युंहार प ललड़ी का बच्यां की बली दि जाती ही बी दिन चेला ईशु न बूड़िया, “तू कठै चावै ह की म्हें तेर ताँई फसै खाबा की तैयारी करा?” १३बामैऊँ दो जणा न ईशु अंयां बोलर भेज्यो, “थे गाँव क माय न जाओ अर थानै बठै एक मिनख पाणीऊँ भेरेडो घड़ो लीया मिलसी थे बिकै गेल हो लियो १४अर बो जि घर म जावै, थे बी बि घर म जार घर का मालीक न बोलज्यो गुरु बोल्यो ह, ‘मेरो फसै खाबा को कोठो कठै ह जठै म आपका चेला क सागै फसै खा सकूँ।’ १५बो थानै बडो सारो अर सक्युं जच्यो-जचाईड़ो चोबारो दिखासी बिमैई आपणा ताँई सक्युं तैयार

^w 14:1 ई दिन एहूदी बिना खमीर की रोटी क सागै एक खास तरयां को भोज करता हा। ^x 14:5 एक साल की मजदुरी क बराबर

करज्यो।” 16 अर बे चेला बी गाँव क माईनै गया अर जंय्यां ईशु बानै बताओ हो बंय्यां ही बे बठै देख्यो अर बे बठै फसै खाबा की तैयारी करी।

17 अर दिन आथता ही ईशु बारा चेला क सागै बठै गयो 18 अर जद बे सागै बैठैर रोटी खार्या हा ईशु आपका चेला न बोल्यो, “म थानै साँच्ची खेवँ हूँ थारै मऊँ एक जणो जो अठै मेरै सागै जीमर्यो ह बो मनै पकड़वासी।” 19 बे ईशु की ई बात न सुण’र दुखी होया अर बे ईशु न एक-एक करके बूझबा लाग्या, “माराज बो म हूँ के?” 20 ईशु बण स बोल्यो, “बो थारै बारा मऊँ एक ह। बो मेरै सागै कचोळा मऊँ टिमोवै ह। 21 मिनख का बेटा न तो मरनो ई ह जंय्यां की मंडेडो ह। पण कत्ती बुरी दसा ह बी मिनख की जिकै बजै स मिनख को बेटो पकड़ायो जासी। इसै चोखो तो ओ होतो की बो मिनख कोनी जलमतो।”

प्रबु- भोज

22 बे जिमर्याई हा क ईशु रोटी ले’र प्रबु न धनेवाद दे’र बो रोटी न तोड़यो अर ईशु आपका चेला न आ खेवतो रोटी बाटी, “ल्यो आ मेरी काया ह” 23 इकै पाछै ईशु कचोळो लियो अर प्रबु न धनेवाद दे’र बो कचोळो आपका चेला न दियो बे सगळाँ बिमै स पीया 24 अर ईशु बण स बोल्यो, “ओ मेरो लोय ह ओ परमेश्वर का नया करा’र को चिन्ह ह जखौ बोळा ताँई बहायो ज्यार्यो ह। 25 म थानै साँच्ची खेवँ म आ अंगूरी जद

ताँई कोनी पीस्युँ जद ताँई परमेश्वर का राज म नई न पीऊँ।” 26 इकै पाछै बे एक गीत गार जैतून का ढूँगर प चल्यागा।

पतरस ईशु न पीछाणबा ऊँ मना करसी

27 ईशु आपका चेला ऊँ बोल्यो, “थे सगळाँ कानी-कानी हो ज्यास्यो। क्युँक मंडेडो ह,

‘म गुवाळ्याँ न माँग्यो अर भेड़ तीन-तेरा हो ज्यासी।’

28 पण परमेश्वर क हाथा ओज्युँ जी उठबा क पाछै म थारै स पेल्या गलील जास्युँ।” 29 जणा पतरस बोल्यो, “चायै सगळाँ तनै छोड़ैर भाग ज्याय पण म थारै सागै डट्यो रेस्युँ।” 30 ईशु पतरस की ई बात न सुण’र बिसै बोल्यो, “म तनै साँच्ची खेवँ हूँ आज की रात ही मूर्गा क दो बार बाँग देण हूँ पेल्या तू तीन बार मनै पीछाणबा हूँ मना करसी।” 31 पतरस ईशु की बात सुण’र ओर जोर स बोल्यो, “ज मनै तेरै सागै मरबो बी पड़ओ जणा बी म अंय्यां कोनी करूँ।” अर सगळाँ चेला बी आई बात बोल्या।

गतसमनी का बाग म ईशु की प्रार्थना

32 इकै पाछै बे गतसमनी नाम की झघा गया अर बठै ईशु आपका चेला न बोल्यो, “थे अठै ही बैठच्या रियो जद ताँई म प्रार्थना करूँ।” 33 ईशु आपकै सागै पतरस, याकूब अर यूहन्ना न लेगो। ईशु बोळो दुख-दुबळो होर्यो हो। 34 ईशु बण स बोल्यो, “मेरो हियो बोळो उदास ह, अठै ताँई म मरबाळो सो होर्यो हूँ। थे

अठे ही बैठ ज्यायो अर जागता रियो।” 35इकै पाछै ईशु बठैऊँ चीनेक दूर जार धरती प मोदो पसरर प्रार्थना करबा लाग्यो अर बोल्यो, “ज हो सकै तो आघडी मेर पै स टल ज्याय जणा चोखो हो ज्याय।” 36अर बो बोल्बा लाग्यो, “बापु ओ बापु थारै ताँई क्युं ही ओखो कोनी। ई दुख का कचोला न मेरऊँ नाकै कर दे, पण जंयां म चाऊँ बंयां न हो पण जंयां तू चावै बंयाँई होवै।” 37ईशु प्रार्थना करर आपका चेला कन गयो अर बानै सुत्यो देखर पतरस न बोल्यो, “ओ शमोन तू सोर्यो ह के? के तू घंटा भर बी कोनी जाग सक्यो? 38थे जागता रियो अर प्रार्थना करो जिसै थे बीचास्यां न जाओ। आत्मा तो जो सई ह बो करनो चावै ह पण आ काया माडी ह।” 39ईशु ओज्युँ स प्रार्थना करबा न चलेगो अर जंयां पेल्या प्रार्थना करी बंयां ही बो प्रार्थना करबा लाग्यो। 40अर ईशु ओज्युँ स आपका चेला क कनै आयो अर बिनै बे ओज्युँ सुत्या लाध्या अर बाकी आँख्या म निंद चढ़री ही अर बानै बेरो कोनी हो की बे ईशु न काँई जबाब दि। 41ईशु तीसरी बार आर बानै बोल्यो, “बस बोला सोलीया हालबी थे अराम स सुत्या हो। देखो बा घडी आगी जद मिनख को बेटो पाप्यां क हाथ पकड़ायो जार्यो ह। 42थे उठो अर देखो मनै पकड़ाबालो उरैई ह।”

ईशु न धोखा ऊँ पकड़ायो

43ईशु अंयां बोलर्योई हो क एहूदो जो बारा चेला मऊँ एक हो बो आपकै सागै प्रधान याजक अर शास्त्रा न सीखाबालो

अर बढ़का का हुकम ऊँ घणी सारी भीड़ लौर बठै आयो बाकै कनै तलवार अर लाठ्यां बी ही। 44धोखा ऊँ पकड़ाबालो पेल्या ही बी भीड़ न बता दिन्यो हो की जिको म माखो ल्यूँ बो ई ईशु ह थे बिनै पकड़र ध्यानऊँ सिपाया की निगराणी म लेज्यायो। 45अर जंयां ही एहूदो बठै आयो अर बो ईशु क कनै जार बोल्यो, “गुरु” अर बो ईशु को माखो लियो। 46इकै पाछै बा भीड़ बिनै पकड़र आपका कब्जा म लेली। 47ईशु क कनै खड़्यो एक चेलो आपकी तलवार काढ़ि अर महायाजक का एक दास को कानडो काट गेयो। 48ईशु बण स बोल्यो, “म कोई डाकू हूँ के थे मनै पकड़बा ताँई तलवार अर लाठी ल्याया हो? 49म रोजिना मन्दर म थानै सीखातो, थारै सागै ही रिया करतो हो जद थे मनै कोनी पकड़या, पण ओ पवित्र-शास्त्र म मंडेडो ह जिनै पूरो होणो ही ह।” 50ईशु का चेला बिनै छोड़र भागगा।

51एक मोटचाल्डो आपकी उधाड़ी काया प चादरो ओढ ईशु क गेल गेल होर्यो हो लोग बिनै पकड़बा ताँई बिकै गेल; भाग्या 52जणा बो चादरो बगार उधाड़ो ही भाग छुट्यो।

महा पंचायत म ईशु

53ईशु न महायाजक क कनै लेगा, अर बठै प्रधान याजक अर बढ़का अर सगळों शास्त्रि आर भेळा होया। 54पतरस क्युंक दूरी बणार बाकै गेल-गेल आयो अर महायाजक क आँगणा क मांय न आर बठै चौकिदार क सागै तपबा लाग्यो। 55प्रधान महायाजक

अर सगळाँ महापंचायत का लोग ईशु न जान स मारबा ताँई बिकै स्विलाफ गुवाई टोबा लाग्या। पण बानै कोई गुवाई कोनी मिली। ५६घणा सारा लोग ईशु क स्विलाफ गुवाई बी देर्या हा पण बाकी गुवाई झुठी ही अर एक जिस्सी बी कोनी ही। ५७क्युंक खड्या हो'र ईशु क स्विलाफ झुठी गुवाई देबा लाया। ५८बे खेबा लाया, “म्हें इका मूँडा स सुण्या हा ओ खेवै ह, ‘म हाथ हू बणेडा मन्दर न ढा देस्यु अर तीन दिना क पाछे दूसरो बणा देस्यु बो मन्दर हाथा हू बणायडो कोनी होसी।’” ५९अर ई बा'र बी बाकी गुवाई एकसी कोनी निकळी। ६०बाकी बातां सुण'र महायाजक खड्यो हो'र ईशु न बूझबा लाग्यो, “तू जबाब क्युंकोनी देवै अ सगळाँ तेरै स्विलाफ गुवाई देर्या ही।” ६१पण ईशु चुपचाल्यो बाकी सुणतो रियो अर बो बानै जबाब कोनी दियो। महायाजक ईशुऊँ ओज्युँ बूझ्यो, “तू पवित्र परमेश्वर को बेटो मसी ह के?” ६२ईशु बोल्यो, “हा म बोई हू अर थे मिनख का बेटा न सर्वशक्तिमान परमेश्वर क दांया हाथ बैठ्यो अर अकास म बादळा क सागै आतो देखस्यो।” ६३महायाजक आपका गाबा फाड्यो अर बोल्यो, “इब गुवाई देबा की जुरत कोनी। ६४थे खुद ही इका मूँडा स परमेश्वर की बुराई सुण लीया हो इब थे काई चावो हो?” अर बे सगळाँ बोल्या, “इनै मार' देणो चाए।” ६५अर कई लोग ईशु प थुकबा लाग्या अर कई ईशु की आँख्या प गाबो बाँध'र मुळा मारबा लाग्या अर बिको

तमासो बणा'र बोल्या, “तू भविष्यवाणी करतो फिरतो हो न इब बता तनै कुण मार्यो” अर चौकिदार ईशु न पकड़ेर चनपट मार्या।

पतरस ईशु न जाण-बुझा'र कोनी पीछाण्यो

६६पतरस निचै आँगणा म बैठ्यो जणा बठै महायाजक की एक दासी आई। ६७अर बा पतरस न तपता देख'र पतरस न बोली, “तू बी तो ईशु नासरी क सागै हो।” ६८पण पतरस नटगो अर बोल्या, “म ईशु नासरी न कोनी जाणूँ अर तू जो बोलरी ह बा मेरै तो क्युंई पल्लै कोनी पड़री।” अर बो अंय्या बोलतो आँगणा की थळी प पूँच्योई हो [अत्ता म ही मूर्गा-बाँग दिनी] y। ६९बा दासी ओज्युँ पतरस न देखी अर बठै खड्या मिनखाऊँ बोली, “ओ बी बामैऊँ ई ह।” ७०पतरस ओज्युँ नटगो थोड़ी देर क बाद बठै खड्या मिनखा मऊँ कई बोल्या, “सई म ई तू बामैऊँ एक ह, क्युंक तू बी तो गलील को ह।” ७१पतरस बाकी बातां सुण'र सोगन खा'र बोल्यो, “म बी मिनख न जिकी थे बातां करो हो कोनी जाणूँ ज म झुठ बोलूँ तो परमेश्वर मनै सजा दे।” ७२अर जद ही दूसरी बार मूर्गा बाँग दिनी। जणा पतरस माथो पकड्यो अर बिनै ईशु की खेईड़ी बा बात याद आई की मूर्गा क दो बार बाँग देण हृ पेल्या तू तीन बार मेरै ताँई खेसी म इनै कोनी जाणूँ, अर बो ई बात न सोच'र बळ-बळ रोबा लाग्यो।

पीछातूस क सामै ईशु की पेशी।

15 दिन उगता ही प्रधान याजक अर बुढ़ा ठेरा, शास्त्रि अर सगळाँ महासभा का पंच ईशु न बँधार वीछातूस कन लेज्यार हाजीर कर्यो। 2पीछातूस ईशुऊँ बूझ्यो, “तू एहूदीयां को राजा ह के?” ईशु बिनै ख्यो, “तू खुद ही तो बोलै ह।” 3प्रधान याजक ईशु प बोली बातां को दोष लगार्या हा। 4पीछातूस ईशु न ओज्युँ बोल्यो, “तु बोल-बाल्यो कंथ्यां खड्यो ह अ सगळा तो तेर प दोष लगाबा लागर्या ही।” 5पण ईशु बिनै जबाब कोनी दियो ईशु न बोल-बाल्यो देखर पीछातूस न ताजुब होयो।

ईशु न मोत की सजा देणो

6फैस हाला त्युंहार प पीछातूस रित गेल एक कैदी न जिनै लोग चाता बिनै बा ताँई छोड़ देतो हो। 7बी टेम बरअब्बा नाम को एक मिनख बगावित्या क सागै कैद म हो क्युंक बो एक बगावत म एक मिनख न मार गेर्यो हो। 8जद लोग पीछातूस क कनै जार बिसै कह्या जंथ्यां तू म्हारै ताँई करतो आयो ह बंयां ही कर। 9जण पीछातूस बण स ख्यो, “के थे चाओ हो के म थारै ताँई एहूदीयां का राजा न छोड़ द्युँ?” 10पीछातूस अंथ्यां ई बजै स बोल्यो क्युंक बो जाणतो हो की अ याजक जळता-बळता इनै पकड़ाया ही। 11पण याजक बरअब्बा न पीछातूसऊँ छुडाण ताँई भीड़ न पैल्याऊँ उकसा राख्यो। 12पीछातूस बण स ओज्युँ बूझ्यो, “थे जिनै एहूदीयां को राजा खेओ हो बिको म काँई करूँ थे बताओ थे

काँई चाओ हो?” 13बे कुँकर बोल्या, “इनै सूळी चढ़ा द्यो!” 14पीछातूस बण स बोल्यो, “म इनै क्युं सूळी चढ़ाऊँ ओ लाई कुणसी बुराई करी ह।” पण बे मिनख बुर्या हि करबा लाग्या, “इनै सूळी चढ़ा द्यो।” 15पीछातूस भीड़ न राजी करबा ताँई बरअब्बा न छोड़ दियो अर ईशु क कोड़ा मरवाया जिकै पाछै सूळी चढ़ाबा को हुकम दियो।

सिपाईड़ा क हाथा ईशु की बैजती

16सिपाईड़ा ईशु न राजपाल क गढ़ का अँगणा म लेगा। अर बे सगळी पलटण न भेळी करली। 17बे ईशु न बैंगणी रंग को गाबो पीरार बीकाळा सीर प काँटा को मुकट गूँथर धर दियो। 18बे ईशु को तमासो बणाबा ताँई जै-जै कार करबा लाग्या अर बे बोल्या, “ओ एहूदीयां का राजा तेरी जै हो।” 19बे ईशु क सिर प डंडा स मारर, बिषै थुँकर, गोडा टेकर बिनै नमस्कार कर्या। 20बे ईशु को मजाक उड़ार बिको बैंगणी गाबो तो लीया काढ, अर पाछा बिकाई गाबा पीरार, बिनै सूळी चढ़ाबा ताँई बारनै लेगा।

ईशु न सूळी चढ़ाणो

21सिकन्दर अर रुफुस को बाप जिको नाम शमोन हो ओ कुरेन गाँव को हो इनै गाँवऊँ आतो देख बे सिपाईड़ा बिनै जोरदेर ईशु की सूळी न लेज्याबा ताँई बोल्या 22बे ईशु न गुलगुता नाम की झघा प लेगा जिको मतबल खोपडी की झघा ह। 23बे ईशु न मिर्न नाम की दवाई मिलेडी अंगूरी पीलाबा लाग्या पण ईशु

कोनी पीओ। 24 इकै पाछै बे ईशु न सूळी प चढ़ा दियो, ईशु का गाबा लेबा ताँई बे पर्ची गेरी अर आपसरी म बानै बाट लीया। 25 जद बे ईशु न सूळी चढ़ाया जणा दिनग्या का नो बजर्या हा। 26 अर बठै बिको दोष पत्र हो जिपै मंडर्यो हो, “एहूदीयां को राजा।” 27 ईशु क सागै दो डाकू बी सूळी प चढ़ाया गया एक ईशु क दांया नाकै अर दूसरो बांया नाकै लटकायो गयो। 28 [अर पवित्र शास्त्र क माईनै जो बचन मडेडा हा बे पूरा होया। की ईशु अपराध्या क सागै लटकायो जासी।] ^z 29 अर गेला मऊँ जाबाळा आपका सिरा न हला-हलार ईशु की बेजती करर बे ईशु न खेर्या हा मन्दर न तोड़बाळा अर तीन दिन म ओज्युँ ऊँ बणाबाळा 30 तकै उतर्या अर खुद न बचाले 31 अर अंय्यां ही प्रधान याजक अर शास्त्रा न सीखाबाळा बी ईशु को मजाक उड़ार्या हा। अर बे आपसरी म बतळाबा लाग्या, “ओ दूसरा मिनखा न बचायो पण खुद न कोनी बचा सक्यो।” 32 अर बे ईशु न खेवै हा, “ओ इसाइल का राजा मसी सूळी स तकै उतर क दिखा जणा म्हें बिश्वास कर लेस्यां” अर जखा डाकू ईशु क सागै सूळी प चढ़ाया गया हा बे बी ईशु को मजाक उड़ार्या अर बिकी बेजती कर्या हा।

ईशु पीराण त्याग्या।

33 दोपारा बारा बजताँई सगळाँ देश क माईनै अंधेरो छायो अर करीब तीन बजे

ताँई अंधकार छायो रियो। 34 ईशु तीन बजे जोर ऊँ बार घालर ख्यो “इलोई, इलोई, लमा शबक्तनी।” जिको मतबल ह,

“ओ मेरा परमेश्वर ओ मेरा परमेश्वर तू मनै क्यालै छोड़ दियो?”

35 अर जखा मिनख बठै खड़या हा बे ईशु न अंय्यां बोलता सुण्या जणा बे खया, सूणो एलिया न बुलार्यो ह।”

36 एक मिनख भागर चुँखा न खाटो उठायडो अंगूरा का रस म डुबार लाठी प टांगर ल्याओ अर ईशु न पीबा ताँई दियो अर खयो, “आपा देखस्यां इनै उतारबा ताँई एलियो आवै की कोनी।”

37 जणा ईशु जोरऊँ बार घालर पीराण त्याग दिन्या। 38 अर मन्दर को परदो उपर स लेर तकै ताँई पाटर दो टुकड़ा होगो। 39 सेना को एक अधिकारी ईशु क सामनै खड़यो हो ओ ईशु की बातां न सुण्यो अर देख्यो की ईशु कंय्यां आपका पीराण त्याग्या। अर बो बोलबा लाग्यो,

“ओ मिनख साच्याँई परमेश्वर को बेटो हो।” 40 बठै लूगायां बी ही बे ईशु न दूरऊँ खड़ी खड़ी देखै ही बा लूगायां म मरियम मगदलीनी, छोटक्यो याकूब अर युसफ की माँ मरियम अर सलौमी ही।

41 ईशु जद गलील क मांय न हो जणा बि बठै अ लूगायां ईशु क गेल चालबाळी ही अर अ ईशु की सेवा करती ही। अर बठै ओर बी कई लूगायां ही जखी ईशु क सागै यरुशलेम ताँई आई ही।

^z 15:28 क्युंक मानी-थानी पुराणी पौथियां म अ बाता कोनी मंडरी।

ईशु न कबर म धरनो

42 दिन आथगो हो अर ओ अराम हाला दिनऊँ पेलडो दिन हो जिनै तैयारी करबालो दिन बी बोलै ह। 43 ई बजै स अरिमतिया को युसफ आयो। ओ मिनख एहूदी महापंचायत को मान्यो-थान्यो हो अर परमेश्वर का राज न उडीकै हो। ओ ठाडी छाती करर पीछातूस कनै गयो अर बिसै ईशु की लाश माँगी। 44 पीछातूस न ताजुब हायो की ईशु अत्तो तावलो कंयां मरगो। अर बो सेना का अधिकारी न आपकै कनै बुलायो अर बिसै बूझ्यो, “बिनै मर्या बोली देर होगी के?” 45 अर पीछातूस अधिकारीऊँ समचार लेर ईशु की लाश न युसफ न लेज्याबा को हुकम दे दियो। 46 युसफ मलमल को चादरो खरिद्यो अर लाश न सूलीऊँ उतार बी चादरिया म बिनै लपेटर ढाड क मांय खोदेडी कबर म धर दियो। अर कबर का मूँडा प बडो सारो भाट्हो लगा दियो। 47 मरियम मगदलीनी अर युसफ की माँ मरियम देखै ही की बो ईशु की लाश न कठै धर्यो ह।

ईशु ओज्युँ जिन्दो होगो

16 अराम हाला दिन क पाछै अर याकूब की माँ मरियम ईशु की लाश प लगाबा ताँई सुगन्ध आबाली चिज मोल ली 2 अर बे असा का पेलडा दिन दितवार न सुआरे सूरज निकलता

ही कबर प गई। 3 बे आपसरी म खेबा लागी, “कबर क मूँडा आगै का भाट्हो न कुण सरकासी?” 4 अर बे सामनै देखी जणा भाट्हो तो सरकेडो हो। बो भाट्हो बोलो बडो हो। 5 बे बेगीसी कबर क मांय न जार देखी की एक मोटचार धोला गाबा पेर्या दांया नाकै बैठ्यो हो अर बे बिनै देखर उक चुक होगी। 6 अर बो मोटचार बानै खयो, “थे डरो मना थे जि ईशु नासरी न ढूँढो हो, जिनै सूली प चढायो गयो हो बो अठै कोनी ह बो मरगो हो पण इब जी उठ्यो ज यकीन ना होवै तो बी झघा न देखल्यो जठै बे बिकी लाश न धर्या हा। 7 थे अठै ऊँ जाओ अर ईशु का चेला न अर पतरस न ओ समचार देवो की बो थारै ऊँ पेल्या गलील म जासी जंयां बो थानै पेल्या ही बोल्यो हो। बो थानै बैठै ही मिलसी।” 8 अर बे डरगी अर ताजुब करती ही कबर ऊँ भागर निकली, अर बे किनैई क्युरुई कोनी बताओ क्युंक बै डरगी ही।^a

ईशु मरियम मगदलीनी न दिख्यो

9 ईशु जिन्दो होण क पाछै दितवार हालै दिन मरियम मगदलीनी जिमै स ईशु सात ओपरी-बलाय काढि ही बिनै दिख्यो। 10 बा जार ईशु का साथ्याँ न जो बोला दुखी हा अर रोवा हा बानै ओ समचार दियो। 11 अर बे बिकी ई बात न सुणर की बो जिन्दो होगो ह अर बिनै दिख्यो ह बे बिकी बातां प बिश्वास कोनी कर्या।

^a 16:8 सबऊँ मानी-थानी पुणाणी दो यूनानी भाषा की पौश्यां म मरकुस को चोखो समचार सोळवां पाठ की आठवी आयत प ही पूरो होज्यावै ह।

दो चेला न ईशु दिख्यो

12इकै पाछै दसरा रूप म ईशु खेत का गेला जांवता दो चेला न दिख्यो जिखा बामै स हा। 13बे पाछा आर ओरा न ई बात को समचार दियो पण बे बाको बी बिश्वास कोनी कर्या।

ग्यारा चेला न ईशु दिख्यो

14इकै पाछै रोटी खाबा की टेम ईशु बा ग्यारा चेला न बी दिख्यो। ईशु बाका अबिश्वास अर हिया की कलडाई प बानै दकाल्यो। क्युं'क बे ईशु क जिन्दो होण को समचार देबाळा की बातां प बिश्वास कोनी कर्या। 15जणा पाछै ईशु बानै खयो, “थे सगळी धरती प जार चोखो समचार को हैल्लो द्यो। 16अर जो बी थारी बातां प बिश्वास करसी अर बतिस्मो लेसी

बिको उद्धार होसी अर जो बिश्वास कोनी करसी बो पापीई रेहसी अर सजा भोगसी। 17मेर म बिश्वास करबाळा म अ चिन होसी की बे मेरा नाम ऊँ ओपरी-बलाय काढ़सी अर बे नई-नई भाषा बोलसी। 18ज बे आपका हाथाऊँ साँप बी पकडै अर झौर बी पी ज्यावै तो बि बाकै क्युंई कोनी होसी, अर बे रोगला प हाथ धरसी जणा बे ठिक हो ज्यासी।”

ईशु को ईश्वर नगरी म उठायो जाणो

19अ सारी बातां बोलबा क पाछै ईशु ईश्वर नगरी म उठा लियो गयो अर परमेश्वर क दांया नाकै जार बैठगो। 20अर बिका चेला झघा-झघा जार प्रबु को परबचन दियो। बाकै सागै प्रबु काम कर्यो हो। अर बो चमत्कारी चिनाऊँ बचना न सच कर्यो।

लूका

ईश मसी क बारा म लूका क हाँथा मंडेड़ो चोखो समचार

भूमिका

लूको एक बेद हो जखो ई चोखा समचारनै मांडबाळो हो। बो इकै अलावा भेजेड़ा चेला का काम नाम की पोथीनै बी मांडबाळो हो। लूका क जरिए मांडेड़ो ओ चोखा समचार कद अर कठै मांडचो गयो ईका एकदम सही टैम क बारा म कोई कोनी जाणै। पण घण्कराक इयाता मानी ही की ओ चोखो समाच्यार ईशु क जलम क करीब सत्तर बरसा पाछै मांडचो गयो हो।

इकै मांडबा का तरिका अर भाषा'ऊँ ओ बेरो पटै ह की बो एक पढ्यो लिख्यो मिनख हो। लूको ईशु का जीवन की बातानै अर घटनानै जंयां बे घटी बंयां मांडबो चायो जिऊँ पढ्बाळानै इको फायदो मिल सकै। (1:1-3), बो गेर यहुदी मिनख हो (कुलिसियो 4:10-14) अर बो ई चोखा समचारनै ई तरिकाऊँ मांडचो जिऊँ गेर यहुदी मिनख चोखा समचारनै समझ सकै, जंयां बो यहुदी रिती रिवाजानै समझायो इमै बा बात साफ दिखै ह (1:8)।

लूका क जरिए मांडचो गयो चोखो समचार ईशुनै इस्यायल क सागै परमेश्वर'ऊँ बचन करेडो उद्धारकर्ता अर सागै की सागै सगळा जगत का मिनखनै बचाबाळो बतावै ह। ई चोखा समचार म दो भाग ही (पाठ 1-2 अर 9-19) जखा बोली सारकी बाता'ऊँ भर्या पड़्या हीं, जखा सिर्फ ई चोखा समचार म ई लाधै ह। जंयां की ईश्वर नगरी दुता को गीत, ईशु का जलम प गुवाळ्या को जाबो, टाबर-पुणा म ईशु को मंदर म होबा की खाण्या, अर चोखा सामरी अर खोयड़ा बेटा की निती कथा। सगळा चोखा समचार म अरदास, पबितर आत्मा, ईशु का सेवा काम म लुगांया की भूमिका अर पाप'ऊँ परमेश्वर की माफी क बारा प घणो जोर दियो गयो ह।

रुप-रेखा:

1. लूका ई चोखा समचार को परिचय देवै ह अर बतावै ह की बो इनै क्यु मांडचो (1:1-4)
 2. जणा पाछै बो ईशु का जलम अर बो कथ्या सेवा का काम ताँई त्यार होयो आ बतावै ह (1:5-4:13)
 3. चोखा समचार का बाकी का भाग म (4:14-21:38), लूको ईशु का करेड़ा काम क बारा म बतावै ह, खासकर बिकी सिख अर चमत्कार जिखा बो कर्यो।
 4. आखिर का दो पाठा म (22-24), बो ई बातनै बतावै ह की ईशु कथ्या मर्यो, गाडचो गयो अर मरेड़ा म'ऊं जी उठचो।
-

1 अजी थियफिलुस, बोळा जणा आपणै माईनै बीतड़ी बातानै मांडबा की कोशिश करी। **2**अ सगळी बातां आपानै बे पुंचाई जखा आ सगळी बातानै शुरूं घटता देखी अर जखा बचन को हेल्लो पाड़बाळा होयो। **3**इ बजैऊँ मनै लाग्यो क म बी थार ताँई आ सगळी बातानै सुल मांदू, क्युंक म आ सगळी बातानै शुरुआतुई सुल परखेडो हुँ। **4**म चाऊँ थे आ जाण सको क थानै सिखायडी बाता पुरुत्वा ही।

यूहन्ना बतिष्मो देबाळा का जलम की पेल्याऊँई घोषणा

5एहूदिया को राजा हेरोदेश क दिना म याजक सुमदाय का अबिय्याह टोळी का कुणबा मऊँ एक जकरयाह नाम को याजक हो अर बीकी लूगाई इलीसिबा बी हारुण का कुणबा मऊँ ही। **6**परमेश्वर की नजरा म बे दोन्युं ई धर्मी हा अर बे प्रबु का सगळा नेम कायदानै मानबा म खरा हा। **7**बाकै कोई आस ओलाद तो

आथ कोनी ही, क्युंक इलीशिबा बाँझड़ी ही अर बे दोन्युं बूढा हा।

8एक बर जद बौ आपकी टोळी की बारी म परमेश्वर क आगै याजक को काम करै हो। **9**जणा याजका की रित गेल प्रबु क मंदर म धुप जळाबा ताँई पर्ची गेरी अर पर्ची जकरयाह का नाम प निकळी। **10**धुप जळाबा की टेम सगळा मिनखा की टोळी भेळी होर बारनै अरदास कर'री ही। **11**बी टेमका जकरयाहनै प्रबु का एक दूत को दरसाव होयो अर बो दूत धूप जळाबाळी वेदी का दाया नाकै खड़यो हो **12**बी दूतनै देखर जकरियो धुजगो अर बिऊँ बो बोळो डग्गयों। **13**पण ईश्वर नगरीदूत बिऊँ खयो जकरया डरै मना थाकी अरदास सुणली अर थाकी लूगाई इलीशीबा एक छोरानै जलम देसी जिको नाम तू यूहन्नो राखजे। **14**जिऊँ थे राजी होस्यो अर सागै क सागै इ बिकै होबाऊँ और बी बोळा जणा राजी होसी, **15**परमेश्वर की नजरा म बो महान होसी अर बो अंगूरी अर

नशीली चीजा कदैई कोनी पिसी, अर बो आपकी माँ का पेटऊँ इ पबितर आत्माऊँ भेरडो होसी। 16बो ह जखो इस्त्राइल का घणकरा मिनखानै बाका प्रबु परमेश्वर क कनै फेर ल्यासी 17बो एलिया जंय्यां की शक्ति अर परमेश्वर की आत्मा म प्रबु क आगै- आगै चालसी। बो बापा को मन बाका टाबरा कानि मोड़ देसी अर खेणो न करबालानै धार्मिकता की बुद्धि कानी ले ज्यासी अर मिनखानै प्रबु ताँइ त्यार करसी। 18जणा जकरियो ह जखो बी दूतऊँ खयो आ बात म कंय्यां मानूँ? क्युँक म तो बुढो हूँ अर मेरी लूगाई बी बूढी होगी। 19जणा बो ईश्वर नगरीदूत हो जखो बिऊँ कहां म हूँ जिब्राइल जखो परमेश्वर क सामै तण्या खड़यो रेहूँ हूँ। अर मनै ईश्वर तनै आ बात बताबा अर आको हेल्लो पाड़बा ताँई भेज्यो हो। 20देख तू ह न जखो मेरी बातनै साची तो मानी कोनी मेरा खयड़ा बचन तो आपका टेम म पुरा होसीइ पण मेरी बाता प बिश्वास ना करबा की बजैऊँ आ बाता का घटबाला दिन ताँइ तु गुंगो रेहसी। 21बिठै नै मिनख हा जखा मन्दिर का बारनै जकरियानै उडिका हा अर बा सगळा क ताजुब होर्यो क बिनै अत्तो टेम कंय्यां लागग्यो 22अर जद बो बारनै आर बाऊँ बोल कोनी सक्यो जणा बे जाणग्या हो ना हो ओ मंदर म कोइ दरसाव देख्यो ह। बो गूँगो होग्यो अर सेण ई करतो। 23जद मंदर म बिका सेवा का दिन पुरा होगा जणा बो आपका घरा चलेगो।

24क्युंक दिना पाछै बीकी घरहाली ही जखी आसऊँ होई। अर पाँच मेहना

ताँई घराऊँ बारैई कोनी निकळी। 25अर अंय्यां खैरी हि, “मिनखा म मेरी इज्जत राखबा ताँई, प्रबु आ दिना म मेर प म्हेर करी ह।”

ईशु का जलम की घोषणा

26-27जद जकरयाह की घरहालीनै छठो मेहनो लागर्यो हो। जणा परमेश्वर जिब्राइल ईश्वर नगरी दूतनै गलिल देश का नासरत नगर म एक मरियम नाम की छोरी क कनै भेज्यो। बा हाल कुवांरी हि। बिकी सगाई दाउद क कुणबा का युसफ नाम का एक मिनखऊँ होयडी ही। 28ईश्वर नगरीदूत बिकै कनै आर कह्यो राजी रेह, थारै प प्रबु की म्हेर होई ह अर बे थारै सागै ह। 29आ बचनाऊँ बा घबरागी अर बा सोचबा लागी अंय्यां बोलबा को इको काँई मतबल ह। 30जणा ईश्वर नगरी दुत बिऊँ खयो, मरियम डैरे मना परमेश्वर की दया तेर प होरी ह। 31सुण तु आसऊँ होसी अर एक छोरो जणसी अर तु बिनै ईशु खैर बुलावगी। 32बो महान होसी अर बो परम- प्रधान को बेटो खुवासी, प्रबु परमेश्वर बानै बड़का दाऊद की गद्दी प बिठासी 33अर बो याकूब का कुणबा प सदा राज करसी, अर बिको राज कदैई कोनी मिटसी। 34जणा मरियम ईश्वर नगरीदूतऊँ बोली ओ कय्यां हो सकै ह? हाल तौ म कुवांरी हुँ। 35ईश्वर नगरीदूत खयो परमेश्वर की आत्मा तेर प उतरसी अर परम प्रधान की शक्ति तनै आपकी ओट म ले लेसी इ बजैऊँ बो पबितर टाबर परमेश्वर को बेटो खुवासी, 36सुण तेरी रिस्तेदार इलिशिबानै सगळा बांझड़ी-

बांझड़ी बोलता हा, अर आज बा बुढापा म आसऊँ ह अर बिनै ओ छठो मेहनो लागर्यो ह। ३७ क्युंक परमेश्वर ताँई क्युंई अणहोतो कोनी। ३८ अर मरियम बोली म प्रबु की दासी हूँ, “थारै खया गेल मेरे सागै होवै” अर ईश्वर नगरीदूत बिकै कनैऊँ चलेगो।

इलिशिबा क घरा मरियम को जाबो

३९ क्युंक दिना पाछै मरियम त्यांर हो० र बेगी सी यहुदिया का पहाड़ी इलाका की एक नगरी म चलगी। ४० अर जकरयाह क घरा जाऊ बिकाळी लूगाई इलिशिबाऊँ नमस्कार करी। ४१ जद इलिशिबा क काना म मरियम को नमस्कार पड़यो जणा इलिशिबा का पेट को टाबरियो उछळबा लागगो अर इलिशिबा पवित्र आत्माऊँ भरगी। ४२ अर जोरऊँ कही तू धरती की सगळी लुगांया म भागहाळी ह अर तैरै पेट को टाबर बी भागहाळो ह। ४३ मेरो ओड बडो भाग? क मेरै प्रबु की माँ मेरै कनै आई। ४४ क्युं क थाकी उवाज म्हारै काना म पड़ताँई म्हारै पेट को टाबरियो राजी होर उछळबा लागगो ४५ तु भागहाळी ह क्युंक तु परमेश्वर की खैयड़ी बात प बिश्वास करी क बे पुरी होसी।

मरियम का मुँडाऊँ परमेश्वर को भजन

४६ जणा मरियम बोली मेरो पिराण प्रबु की बडाई करै ह। ४७ अर मेरी आत्मा मनै बचाबाला परमेश्वर म राजी ह। ४८ क्युंक बो आपकी इ गरीबणी दासीनै याद कर्यो ह, अर इ मानऊँ राजी कर्यो ह, क इबऊँ लेर जुग-जुग का मिनख

मनै भागहाळी खैसी, ४९ अतो बडो काम सर्व-शक्तिमान मेरै सागै कर्यो ह इ बजैऊँ बिको नाम पबितर ह। ५० अर बिनै मान देबाला प बाकि दया बाकी पीढिया ताँई रेवै ह। ५१ बो आपका हाथाऊँ बडा बडा काम कर बानै जखा आपका मना म गुमान करता हा निचो दिखायो। ५२ बे राज करबालानै गदीऊँ तळै पटक्यो अर बोदानै उचो उठायो। ५३ बे भूखानै चोखी-चोखी चिजाऊँ भर्या पुर्या अर धायानै रीता फाका भेज दियो। ५४-५५ बानै बे बाता याद रिह जखी बो आपणा बडका इब्रहाम अर बिकी पिढीऊँ करी हि, की म इब्रहाम अर बिकी पिढी प सदा दया करस्युं। अर बे आपका कह्या गेल आपका दास इस्त्राइलनै याद राख०र मदत करी। ५६ मरियम करिब तीन मेहना इलिशिबा क कनै रेह०र पाछी आपकै घरा आगी।

बतिष्मा देबाला यूहन्ना को जलम

५७ जद इलिशिबा क जापा की घडी आई अर बा एक छोरानै जलमी। ५८ परमेश्वर बिपै दया दिखाई ह इ बात को समचार बिका रिस्तेदारानै अर जाणकारानै लाग्यो जणा बे सगळा बिकै सागै खूब राजी होया। ५९ इकै पाछै आठवा दिन बे सगळा मिनख बी छोरा को नाम काडबा अर बीकी सुन्नत करबा ताँई भेला होया। बे बिको नाम बिकाला बापू क नाम प जकरियो राखबो चावा हा। ६० पण बिकाळी माँ बोलपड़ी नई इको नाम तो यूहन्नो राखणो ह। ६१ जणा बे सगळा बिऊँ बोल्या तेरा कुणबा म इ नाम को कोई कोनी। ६२ अर इकै पाछै बे

बिकाळा बापूनै सेण कर्यो क इको नाम काँई होणो चाए। ६३जणा जकरियो हो जखो पट्टी मंगार बिपै बिको नाम युहन्नो माण्डदियो आ देख बे सगळा ताजुब म पड्गा। ६४अंयां करता इ बिकी जिब की आटी खुलगी अर बो परमेश्वर का गुण-गान करबा लाग्गो। ६५आ बाता की बजैऊँ आस पास रेहबाळा डरगा अर आ बाता की चर्चा यहुदिया का पहाड़ी इलाका म च्यांरमेर फैलगी। ६६अर जताबी बठै हा बाकै रेह-रेह ओई विच्यार होवहो की ओ टाबरियो ह जखो काँई बणसी? इको कारण ओ ह की इकै सिर प प्रबु को हाथ ह।

जकरयाह को भजन

६७बिको बाप जकर्यो पबितर आत्माऊँ भरगो अर बो परमेश्वर कानीऊँ खेबा लाग्गो। ६८इस्त्रायल का प्रबु परमेश्वर की जै हो की बे आपका मिनखा प निंग्या करी अर बानै छुडायो। ६९बे आपका भक्त दाउद का कुणबा मऊँ आपणा ताँई एक प्राक्रमी उद्धारकर्ता खड़यो कर्यो, ७०जंयां क बे बोळी पेल्याई परमेश्वर की खेबाळा पबितर मिनखा का मुंडाऊँ खुवा दिया हा। ७१बे म्हानै म्हारा दुश्मनाऊँ अर म्हारऊँ नफरत राखबाळा की शक्तिऊँ बचासी। ७२बे आपका पबितर करारनै ध्यान म राख्यो ह क बो आपणा बडका प दया करसी। ७३आ सोगंध बो आपणा बडका इब्राहिमऊँ खाई, ७४क पक्काई म्हारो छुटकारो म्हारा दुश्मनाऊँ होसी। अर प्रबु की सेवा करबा ताँई म्हानै कोई डर ना होवै, ७५अर सगळी उमर आपा

रोजिना बिकै सामै पबितर अर धर्म रेह्हा। ७६ओ मेरा छोरो यूहन्ना तु परम-प्रधान परमेश्वर की खेबाळो खुवासी। क्युं क तु प्रबु को गेलो त्यांर करबा ताँई बिकै आगै आगै चालसी, ७७अर बानै सिखासी की थारा पापा की माफी मिलबा की बजैऊँ थे बचाया जास्यो। ७८अर आपणा परमेश्वर की बडी दयाऊँ आपणा प उद्धारकर्ता एक उगता सुरज का च्यानणा की जंयां ईश्वर नगरीऊँ चिलकसी। ७९जिऊँ बो च्यानणो मोत की छाया म सोबाळा अर अंधकार म जिबाळा प चमकसी अर आपानै शान्ति म लेज्यासी। ८०अंयां बो टाबरियो होळ्यां होळ्यां सागैळो मोटचार होगो अर आत्मा म बी बढगो, अर इसाएली लोग क सामनै आबा क दिन ताँई बो जंगल म ई रिह्यो।

ईशु को जलम

२ बा दिना राजा औगुस्तुस ओ आदेश बटवायो क सगळा रोमी राज का मिनखा को नाम दर्ज कर्यो जावै। २आ सगळा रोमी राज का मिनखा की पेली गिणती ही। आ बी टेम का होई, जि टेम सीरिया को जम्मीदार क्विरिनियुस हो। ३जणा सगळा मिनख नाम दर्ज कराबा आप-आप क गाँव गया। ४जणा युसूफ दी गलील का नासरत नगरऊँ एहूदिया म दाऊद की जन्मभौम बैतलहम गयो क्युंक बो दाऊद का कुणबा अर बिकी पीढी को हो। ५नाम दर्ज करबा बो मरियम क सागै गयो जिकै सागै बिकी सगाई हो राखी हि अर बा आस'ऊँ ही ६अंयां होयो क बठै'ई मरियम क जापा की घडी

आगी। 7 अर बिकै पेली पोत को छोरो होयो जिनै बा गाबा म लपेट'र ल्हास म सुवायो क्यु क बानै रेहबा की जगा कोनी मीली।

गुवाळीयानै ईश्वर नगरी दूता को संदेशो

8 अर रातनै बी इलाका की रोई म गुवाळिया आप-आप का रेवड़ा की रुखाळी करर्या हा। 9 अर प्रबु को एक दुत बाकै सारै आर खड़यो होगो अर बाकै च्यांस्मेर प्रबु की मेमा को तेज चमक्यो जिँ बे डर क मारै धुजबा लागा। 10 जणा बो दूत बाऊँ कह्यों डरो मना म थानै खुशखबरी देऊँ हूँ, जखी सगळा मिनखा ताँई होसी। 11 क्यु'क थानै बचाबाळा मसी प्रबु को जलम आज दाऊद की नगरी म होगयो ह। 12 अर इकी पिछाण आ ह की थानै बो जलमतो टाबर ल्हास म गाबा म लपटेडो मीलसी। 13 अत्ता म बठै ईश्वर नगरीदूत क सागै ईश्वर नगरी दुता की भीड़ की भीड़ प्रगट होई अर अंयां बोल'र परमेश्वर को गुण-गाण करबा लागी, 14 क, “ईश्वर नगरी म परमेश्वर की जै-जैकार हो अर धरती प बा मिनखानै स्यांति मिलै जिँ बो राजी ह।”

15 जद बे दूत बठैऊँ ओटा ईश्वर नगरी चलेगा जणा बे गुवाळिया आपसरी म बतलाया की, “आबो क्युं न आपा ई बातनै बेतलहम चाल'र देखा जखी आपानै प्रबु बताँई ह।” 16 जणा बे

तावळा सा जार मरियम, यूसूफनै अर ल्हास म बी टाबरीयानै देख्या। 17 अर देख'र बे गुवाळीया ई टाबरिया क बारा म खेयडी बाता बानै बताँई। 18 अर जता बी गुवाळीयानै सुणया बे अच्म्बो कर्या। 19 पण मरियम बा सगळी बातानै आपका हिया म राख'र बिच्यारतीरी। 20 अर बे गुवाळीयां जंयां की बाऊँ कह्यों गयो हो बय्याँई सगळी बातानै देख'र परमेश्वर को गुणगान करता पाछा चलेगा।

ईशुनै मंदर म लेर-जाबो

21 आठवा दिन जद बि टाबर की सुन्नत करबा को टेम आयो जणा बिको नाम ईशु काडचो, ओ नाम ईश्वर नगरीदूत बिकै पेट म पड़बाऊँ पेलीई बता दिन्यो हो। 22 जणा मसा की रीत गेल जझा को शुद होबा^a को दिन आयो बी टेम युसूफ अर मरियम बी टाबरनै परमेश्वर क सामै हाजिर करबानै यरुशलेम लेगा। 23 जंयां प्रबु का बिधी-बिधान म मंडर्यो ह।, “हर पेली पोत का छोरानै परमेश्वर की सेवा ताँई टाळणो पड़सी।” 24 अर बे बी प्रबु का बिधान गेल कमेडी को एक जोड़ो नहिस कबूतरा को जोड़ो बली चढाबा गया।

25 यरुशलेम म पबितर आत्माऊँ भेरेडो शमौन नाम को एक खरो अर भगत मिनख हो जखो इसाएल की आजादीनै उडिकै हो। 26 अर पबितर आत्मा बिनै आ बता राखी ही क प्रबु का भेजेडा मसीनै देख्यां बीना तनै मोत कोनी आवै।

^a 2.22 शुद होबा यहुदी मिनखा का समाज म मूसा की एक रित हि जिकै गेल जझा चालीस दिना ताँई अशुद समझी जावै ह ओज्युं शुद होबा ताँई बिनै दो बाता करनी जरुरी होवै 1 औ टेम चालीस दिना को ह 2 बिनै बलि चढाणी पड़े ह।

27 अर पबितर आत्मा बिनै मंदर म लि आई। अर बि टेम ई ईशु मसी का माँ-बाप बिधान कि रिति पुरी करबा ताँई ईशुनै ल्याया। 28 जणा शमौन बी टाबरनै आपकी गोद्या म ले'र, परमेश्वर को गुणगान कर'र कह्यों, 29 “प्रबु थे थारा कह्यानै पुरो कर्या हो इब थारो दास सुख स्यातिं भर सकै ह। 30 क्यु’क मेरी आँख्या थारा भेजेडा उद्धारकतनै देख लि। 31 जिनै थे सगळा मिनखा की आख्या क सामै रच्यो ह। 32 ओ बा गैर-एहूदी मिनखा ताँई थारो गेलो दिखाबालो उजालो अर थारा इसाएल का मिनखा ताँई मेमा ह।” 33 बिकै बारा म आ बातानै सूण'र बीका माँ-बाप ताजुब कर्या। 34 आ बात होबा क पाछै शमौन बानै आशिर्वाद देर बीकी माँ मरियमऊं कह्यो, ई टाबरनै इसायल म कय्यानै डुबाबा अर तारबा को कारण बणाबा अर परमेश्वर की पिछाण बणबा ताँई जिको बिरोद कर्यो ज्यासी पैदा कर्यो गयो ह। 35 जिंकूं कय्याँ की पोल चोडै आसी। अर तेरी आत्मा तड़पसी।

हन्नाह की गुवाई

36 अर बठै हन्नाह नाम की परमेश्वर की खेबाली एक बूढ़ी लूगाई ही। अर बा अशेर का कुणबा का फानूल की छोरी ही। अर बा आपकै ब्याह क सात बरसा ताँई इ सुहागण रीही। 37 इब बा चोरासी बरस की हो रिही। अर बा कदैई मन्दिर कोनी तज्यो बा रात-दिन बरत अर अरदास क सागै प्रबु की भगती करती। 38 बी टेम बा आ'र परमेश्वर को धनेबाद दियो अर बा सगळानै जखा

यरूशलेम का छुटकारानै उडिकै हा बी टाबर क बारां म बतायो।

यूसूफ अर मरियम को पाछो घरां जाबो

39 प्रबु का बिधी- बिधान गेल सक्यु सलटा-सल्टुर बे पाछा गलील म आपकी नगरी नासरत म आग्या। 40 अर बो टाबर हो जखो डिल- डोल अर बुद्धि म बढतो गयो अर बिपै परमेश्वर को आसीरवाद हो।

टाबर ईशु

41 बिका माँ-बाप फसै का त्युहार प आई साल यरूशलेम जाया करता हा। 42 जद बो बारा बरसा को होयो’क जणा बे फसै का त्युहार की रित गेल यरूशलेम गया। 43 जद त्युहार खतम होयो जणा बे घरा जाबा लाग्या पण ईशु बठै ई रेहग्यों अर बिका माँ-बापानै इको बेरो कोनी हो। 44 अर बिकाला माँ-बाप ई भेम म हा क बो उरैई आपणा कोईसा सागैहाला क सागै होसी। अंयां करता करता एक दिन बीतगो। जणा बे आपका सगा-संबधिया अर जाणकारा म बिनै ढुंडबा लाग्या। 45 अर बो बानै लाध्यों ई कोनी जणा बे बिनै हेरता-हेरता ओज्युँ यरूशलेम आया। 46 तीन दिना क पाछै बो बानै ज्ञानी-ध्यान्या म बेठ्यो बाकी सूणतो अर बाऊं सुवाल जबाब करतो मंदर म लाध्यों। 47 अर जता बी बिनै सूणै हाक बे सगळा बिका समझदारी भर्या जुबाबा प ताजुब कर्यो। 48 बिका माँ-बाँप बिनै देख'र भोचंगा होगा अर बिकी माँ बिंकूं बोली, “मेरा लाल तू

म्हार म आ काँई करी? तेरो बापू अर मं तनै हुंडता-हुंडता हिरान होगा।” 49जणा ईशु बाऊँ बौल्यो, “थे मनै क्याले हुंढा हा? थानै बेरो कोनी के मनै मेरा पीताजी क घरा होणो इ ह।” 50पण ईशु की बात बाकै पलै कोनी पडी। 51अर इकै पाछै बो बाकै सागै पाछो नासरत आगो अर बाकै कह्या म चालतो हो। बिकी माँ आ सगळी बातानै आपका हिया म धर राखी ही। 52ईशु काया, बुद्धि, परमेश्वर अर मिनखा की छतर-छाया म बढतो गयो।

बतिष्मा देबाळा युहन्ना को परचार

3 आ बात जणा की ह जद तिबिरियुस बरस हो, जद एहूदिया को राजपाल पुन्तियुस पिळातुस हो, अर गलील को राजपाल हेरोदेस हो, अर बिको भाई फिलिप्पुस इतूरैया अर त्रिखोमीतिस को, अर अबिलेने को राज-काज लिसानियास क तळै हो। 2बि टेम हन्ना अर केफा महायाजक हा, बा दिना म जकरयाह का छोरा युहन्नानै उजाड़ म परमेश्वर का समचार लाग्या। 3अर बो यर्दन नदी अर बिकै आडोस-पाडोस की सगळी झाँधा म घुम-घुमर हेल्लो पाड्यो क, “थारा मनानै पापाऊँ फिरावो अर बतिष्मो ल्यो जिऊँ परमेश्वर थारा पापानै माफ करसी।” 4जंय्यां की यशायाह परमेश्वर की खेबाळा का बचना हाळी पोथी म मंडर्यो ह। “कोई जंगल म हेल्लो देवै ह, ‘प्रबु ताँई गेलो बणाओ अर बिको गेलो सिदो सपाट करो।’ 5सगळी घाटचा को भराव कर इकसार कर्यो जाणो, टेडा-मेडा गेला सिदा कर्या जाणा अर बेढंग

का गेलानै ठंग का बणाया जाणा जरुरी ह। 6अर सगळा मिनख परमेश्वर का उद्धार का कामनै देखस।” 7जता बी युहन्ना क कनै बतिष्मो लेबा आता बा सगळानै बो एक ही बात बोलतो, “अरै सपोलो थानै, थार प पड़बाली परमेश्वर कि झाळऊँ बचबा ताँई कुण चेता दियो? 8जणा इब थारा कर्माऊँ ओ बेरो पड़नो चाये के थे पाप करबो छोड दिया हो। अर अंय्यां मना जतावो की म्हें इब्राहम की ओलाद हा। क्युक म जाणू हूँ अर थारूँ बी ख्युँ हूँ परमेश्वर आ भाठाऊँ बी इब्राहिम ताँई ओलाद पैदा कर सकै ह। 9इब कुहाडो दरखत की जड्या प ह जखो बोझो चोखो फळ कोनी ल्यावै बीनै काटर आग म बाळयो ज्यासी।” 10जणा बा भीड़ बिऊँ बुजी, “म्हानै काँई करबो चाए?” 11बो कह्यों, “जिकनै दो कुड़तिया ही बे बिकै सागै बाट ले जिकनै कोनी। अर जिकनै रोटी ह बो बी अंय्याई करै।” 12चुंगी लेबाळा बी बिकनै बतिष्मो लेबा आया अर बिऊँ बुज्यो, “म्हानै काँई करणो चाये महराज?” 13बो बाऊँ कह्यों, “जतो थानै बतायड़ो ह बिऊँ बति मना लिज्यो।” 14सीपाईड़ा बी बिऊँ बुज्यो, “म्हें काँई करा?” बिको जबाब ओ हो की, “थे पिसा ताँई मिनखानै मना डराज्यो बस थाकी तनखा म राजी रीज्यो अर कोई प झूठो आरोप मना लगाज्यो।”

15इब मिनखा की आस बढबा लागी क मसी प्रगट होबाळो ह। अर बे सोचबा लाग्या हा की, “कणा ओई तो मसी कोनी ह?” 16जणा युहन्ननो बा सगळाऊँ कह्यो, “म तो थानै पाणीऊँ बतिष्मो दर्यो हूँ पण जखो आबाळो ह

बो बोलो शक्तिसाली ह म बिकी जुत्या काडबा जोगोई कोनी, अर बो थानै पवित्र आत्मा अर लायऊँ बतिष्मो देसी। 17 अर बो छाजलो लेर त्याह जिऊँ बो गीवानै दुण्डलीऊँ न्यारो करसी, जिऊँ गीवानै तो आपकी ओबरी म रख देसी अर दुण्डल्यानै बाळबा ताई कदैई ना बुझबाली लाय म गेर देसी।” 18 अर बो मिनखानै ओर बोली बाताऊँ समझार चोखो समचार सूणातो रीह्यो।

यूहन्ना को काम खत्म होबो

19 पण जद युहन्नो राजपाल हिरोदेसनै बिका भाईडा की लूगाई हेरोदियास’ऊँ ब्याह करबा अर बिका सुगला कामा क पेटा ओळमो दियो। 20 जणा हेरोदेस सऊँ बुरो काम ओ कर्यो की युहन्नानै काळ कोठरी म गीरवा दिन्यो।

ईशु को बतिष्मो

21 जद सगळा मिनख बतिष्मा लेर्या हा, बाकै पाछै ईशु बी बतिष्मो लियो। अर जंय्याई ईशु अरदास कर्या बी टेम परमेश्वर आकाशनै खोल दियो। 22 अर पवित्र आत्मा कमेडी को रूप लेर बीपै उतर्यो, जणा अकाशवाणी हुई “तू मेरो लाडलो बेटो ह, म तेरूँ घणो राजी हूँ।”

ईशु को कुणबो

23 ईशु करीब तीस बरस को होयो हो जणा बो बचन की सिख देबो चालू कर्यो। ईशु मिनखा की नजर्या म यूसुफ को बेटो

हो^b अर यूसुफ एली को छोरो हो, 24 एली जखो मत्तात की, मत्तात लेवी की, लेवी मलकी की, मलकी यन्ना की, यन्नो जखो युसुफ की, 25 यूसुफ जखो मतित्याह की, मतित्याह आमोस की, आमोस नहूम की नहूम असल्याह की, असल्याह नोगह की, 26 नोगह जखो मात की, मात जखो मतित्याह की, मतित्याह जखो शिमी की, शिमी योसेख की, योसेख योदाह की, 27 योदहा योन्नान की, योन्नान रेसा की, रेसा जरूब्बाबिल की, जरूब्बाबिल शालतियेल की, शालतियेल नेरी की, 28 नेरी मलकी की, मलकी अद्वी की, अद्वी कोसाम की, कोसाम इलमोदाम की, इलमोदाम ऐर की, 29 ऐर जखो यहूसु की, यहूसु इलाजार की, इलाजार योरीम की योरीम मत्तात की, मत्तात लेवी की, 30 लेवी शमौन की, शमौन एहूदा की, एहूदा यूसूफ की, यूसूफ योनान की, योनान इलियाकीम की। 31 इलियाकीम मलेआह की, मलेआह मिन्नाह की, मिन्नाह मत्तात की मत्तात नातान की, नातान दाऊद की, 32 दाऊद यिशै की, यिशै ओबेद की, ओबेद बोअज की, बोअज सलमोन की, सलमोन नहशोन की, 33 नहशोन अम्मीनादाब की, अम्मीनादाब अराम की, अराम हिस्त्रोन की, हिस्त्रोन फिरिस की, फिरिस एहूदा की 34 एहूदा याकूब की, याकूब इसहाक की, इसहाक इब्राहीम की इब्राहीम तिरह की, तिरह नाहोर की, 35 नाहोर जखो सरुग की, सरुग रऊ की, रऊ

^b 3.23 ईशु मिनखा की नजर्या म यूसुफ को बेटो हो बि टेम का मिनखा कि समझ म ईशु यूसुफ को छोरो समझ्यो ज्यातो हो पण सच म परमेश्वर क कानीऊँ पवित्र आत्मा क जरिये बो मरियम क पेट म पड्यो बि टेम मरियम कुवारी ही।

फिलिग की, फिलिग एबिर की, एबिर शिलह की, ३६शिलह केनान की, केनान अरफक्षद की, अरफक्षद शेम की शेम नूह की, नूह लिमिक की, ३७लिमिक मथूशिलह की, मथूशिलह हनोक की हनोक यिरिद की, यिरिद महललेल की, महललेल केनान की, ३८केनान जखो एनोश की एनोश जखो शेत की, शेत जखो आदम कि ओलाद ही, आदम जैन परमेश्वर रच्यो।

ईशुनै बिचासबो

४ ईशु पवित्र आत्मा^{अँ} भर'र यरदन नदी^{अँ} पाछो आयो। अर बा आत्मा बिनै उजाड़ म लेगो। २अर बठै ईशुनै चाळिस दिना ताँई शैतान बिचास्यो। बा दिना म बो क्युंई कोनी खायो जि बजैअँ आ चाळिस दिना पाछै बिनै भूख लागी। ३अर शैतान बिँऊ कह्यो, “ज तू असल म ही परमेश्वर को बेटो ह जणा इ भाठानै बोल क ओ रोटी बण ज्यावै।” ४इपै ईशु बिनै जबाब दियो, “शास्त्र म अंयां मंडर्यो ह की मिनख रोटीअँ ई कोनी जीवै।” ५जणा शैतान बिनै उच्ची झागा म लेजार आँख मीचता ही धरती प को सगळो राज दिखायो ६अर बिँऊ कह्यो, इकै उपर को सगळो अधिकार अर मैमा तनै दे देस्यूं क्युंक ओ मनै देयड़ो ह अर म जिनै चाऊं बिनै दे सकूं हूँ ७जणा ईब अ सगळी चिजा तेरी हो सकै ह ज तु मनै ध्यारै। ८ईशु बिनै जबाब दियो, “शास्त्र म अंयां मण्डर्यो ह तनै, तेरा प्रबु परमेश्वर की सेवा करणी चायै अर बिनैई ध्यारणो चायै।” ९जणा बो बिनै यरुशलेम का मंदर की सऊँ उँचली चोटी प लेज्यार

खड़्यो कर दिन्यो। अर बिँऊ बोल्यो, “ज तू साच्याँई परमेश्वर को बेटो ह जणा अठैअँ तलै कूदज्यां।” १०क्युंक, “शास्त्र म मंडर्यो ह की परमेश्वर आपका दूतानै तनै बचाबा भेज देसी, ११अर बे तेरा पगानै कोई कांकरा प पड़ै बिँऊ पेली तनै आपका हाथा म उठा लेसी।” १२पण ईशु बिँऊ बोल्यो, “ओ बी मंडर्यो ह की तू तेरा प्रबु परमेश्वरनै मना बिच्यास जे।” १३जणा शैतान बिनै हर तर्याँऊँ बिच्यास^र चोखो मोको आबा तक बिनै छोड़र चल्योगो।

लोगा म ईशु का परबचन

१४जणा पाछै ईशु पवित्र आत्मा की ताकताँ भेरेडो गलील म पाढा आया। अर बिकी चर्चा बी ईलाका म च्यारूमेर फैलगी। १५बो एहूदि मिनखा कि अरदास करबाली झांघा म सिख देतो अर सगळा बिकी वाह-वाई करता।

नासरत म ईशु की बैजति

१६जणा पाछै बो नासरत नगरी म आयो जठै बो पळ्यो-बढ़यो हो, अर आपकी बाण गेल एहूदी मिनखा क आराम हाळा दिन एहूदी मिनखा कि अरदास करबाली झांघा गयो अर बो पाठ बाचबा ताँई खड़्यो होयो। १७अर बाचबा ताँई बिनै यशायाह नबी की पौथी दि गई। अर बो पौथी खोलर बा झांघा काढी जठै ओ मंडर्यो हो, १८प्रबु की आत्मा मेर प ह, क्यूंक बे मनै टाळर भेज्यो ह, क म बोदानै चोखो समचार सुणा^{अँ}, केद्यां की अजादी को हेल्लो पाडू, आँधानै आँख्या द्युँ, कुचलेडानै उठाऊँ, १९अर

बी टेम को हेल्पो पाड़ुँ जिमै परमेश्वर आपक मिनखानै बचाईसी। 20इकै पाछै बो पौथी बन्द कर बा तो दे दी बी सेवकनै, अर खुद निचै बेठगो। अर जता बी बठै हा बा सगळा को ध्यान बीपई हो। 21जणा बो बाऊँ कह्यो आज शास्त्र का मंडेड़ा अ बचन पुरो होया जय्यां कि थे सुणर्या हो। 22सगळा बिकी वाह-वाई करा हा। अर बिका मुण्डा'ऊँ निकळबाळा दयाऊँ भेरेड़ा बचना प ताजुब करा हा। अर बोलर्या हा, “के ओ युसुफ को छोरो कोनी?” 23बो बाऊँ कह्यो, “थे मनै आ बात ख्योगा, ‘ओ बैद खुदनै निरोगो कर अर आबि ख्योगा जोक्यूँ थे कफरनहूम म कर्या हो बो थारी खुद की नगरी म बि कर’ 24म थार'ऊँ साची-साँची बोलू हूँ खुद की नगरी म परमेश्वर की खेबाळा की जमाई कदर कोनी होवै। 25म थार'ऊँ साँची बोलू हूँ, एलिय्याह का टेम जद साढे तीन बरसा ताँई एक छाँट ई कोनी गीरी अर सगळा देश क माईनै सागेड़ो काळ पड़यो बी टेम का इसायल म घणीई खाली होयड़ी लुगांया ही। 26पण सैदा नगरी का सारला गाँव सारपत की एक खाली होयड़ी छोड़र एलिय्याहनै बाम'ऊँ ओर कोय क कनै कोनी भेज्यो गयो। 27अर अंय्याई एलिशा का टेम म बोला कोढी हा पण सीरिया देश का नामाननै छोड़र दुसरा कोईको बी कोढ कोनी धोयो गयो।” 28जता बि एहूदी मिनखा कि अरदास करबाली झांघां म हा बे अ बाता सूणर झाल्या म भरगा। 29बे खड़या होर बिनै धकामारर नगरी क बारै डूँगरी की चोटी प लेगा जि डूँगरी प बाकी नगरी बसेड़ी

हि जिऊँ क बे बिनै खड़ी चोटीऊँ तलै पटक सकै। 30पण बो चुपचाप बाकै माईनैऊँ चल्योगो।

एक आदमी मऊँ औपरी-बलाय काढी

31इ पाछै बो गलील का कफरनहूम नगरी म गयो। अर यहुदी मिनखा क अरामहालै दिन लोगानै परबचन दर्यो हो। 32बे बिका बचानऊँ ताजुब करर्या हा कृयुँ क बो अधिकार क सागै बानै सीखार्या हो। 33बठै यहुदी मिनखा की अरदास करबाली झाल्यो, 34“ओ ईशु नासरी थारो म्हारो काँई लेण-देण? तू के म्हानै नास करबा आयो ह? म तनै जाणू हूँ तू कूण ह? तू परमेश्वर को पबितर जण ह।” 35ईशु बिनै दकालर कह्यो, “चुप रेह अर ईमैऊँ निकळ जा,” जणा बा बलाय बिनै पटकर बिको कोइ नुकसान कर्या बिनाई बिमैऊँ निकळगी। 36आ देखर देखबाळा हा जखा ताजुब करबा लाग्या अर सगळा आपसरी म बतळाबा लाग्या ओ काँई बचन ह? अधिकार अर शक्ति क सागै ओ मिनख सुगली आत्मानै हुक्म देवै अर बे निकळर भाग ज्यावी। 37अर ईशु की चर्चा बी इलाका म च्यांरुमेर फैलगी।

बिमारानै निरोगो करबो

38ईशु अरदास करबाली झाँघाऊँ शमैनै क घरा गयो। अर शमैन की सासु बी टेम बुखार म पड़ी ही, अर बे ईशुऊँ हाथ जोड़र खयो माराज इनै निरोगी करो। 39अर ईशु बिकै सिराणै खड़यो होर

अधिकारऊँ बुखार उतरबा ताँई खयो अर बुखार सटदई उत्तरगी। अर बा आपकी खट खड़ी होर बाकी सेवा-पाणी करबा लागगी।

40 अर दिन आथबा की टेम लोग बा सगळानै ईशु क कनै ल्याया जखा भाँत-भाँत की बिमारयाँ म पड़या हा अर बो बा सगळा क माथा प हाथ धर-धर सनै निरोगो कर्यो। 41 अर बामैऊँ घणकरा मऊँ ओपरी-बलाय अंयां चिल्लाटी मारती निकलगी क तू “परमेश्वर को पूत ह,” पण ईशु बानै दकालतो अर बोलबा कोनी देतो, क्युँक बे जाणती ही की ओ मसी ह।

दुसरी नगर्या म ईशु को जाबो

42 भागपाटचा (अंधेरै) ई बो एक उजाड़ म चल्योग्यो। पण भीड़ बिनै ढुंडती-ढुंडती बिकैन पूचली। अर बे सगळा बिका न्योहरा खाया की बो बानै छोडर न जावै। 43 पण बो बाऊँ कह्यो, “परमेश्वर का राज को चोखो समचार मनै दुसरी नगर्या म बी सुणाणो ह, अर मनै इ ताँई इ धरती प भेज्यो गयो।”

44 अर अंयां करता-करता बो एहूदिया देश म एहदी मिनखा की अरदास करबाली झंघा म हेल्पो पाड़बा लागगो।

चेलानै बुलाबो

5 एक बर ईशु गन्नेसरत झील कि नारै खड़यो हो, अर परमेश्वर को बचन सूणबा ताँई भीड़ बिनै च्यांरुमेरऊँ ढ़क राख्यो हो, 2 जणा बो दो नावडी देखी जामै मछुआरा निकलर आपका जाळ साफ करा हा। 3 बा न्यावा मऊँ शमौन

हाळी न्याव प चढ़र बो न्यावनै कीनाराऊँ क्युंक थोड़ी घणी हटाबा ताँई खयो। अर पाछै बी खड़ी नावडी प बैठर बो जनतानै सीखाबा लागयो। 4 सीखा सुखुर बो शमौनऊ कह्यो, “इ न्यावडिनै गेरा पाणी म ले-चाल अर मछली पकड़बा ताँई थारा जाळानै गेर।” 5 शमौन बोल्यो, “मालिक म्हें सारी रात जाळ गेर गेर दुखी होलीया अर क्युई हाथ कोनी लागयो पण थे खैर्या हो जणा एक बर जाळ ओर गेर देस्युँ।” 6 अर जद बे जाळ गेर्यो जणा बिमै घणीसारी मछल्या फ़ँसगी अर जाळ फ़ाटबा लागगो। 7 जणा बे दुसरी न्याव प सवार आपका साथ्यानै इशारो करर मदत ताँई बुलाया अर बे दोन्युँ न्यावनै अति ठाडी भरली क न्याव डूबबा लागगी। 8 आ देखर शमौन पतरस ईशु क पगा म पड़गो अर बोल्यो, “प्रबु म पापी हूँ मेरू दूर रह्यो।” 9 इको ओ कारण हो की बो अर बिकाळा सागैहाळा अति मछल्या पकड़ी जणा बानै ताजुब होयो हो। 10 अंयांई जबदी का बेटा याकूब अर यूहन्नानै क बी ताजुब होयो जखा शमौन का सीरी हा। इपै ईशु शमौनऊँ कह्या, “डैर मना, ईबऊँ तु परमेश्वर का राज म मिनखानै ल्याबाळो बणेगो।” 11 अर बे न्यावनै पाणी क बारे लि आया, अर सक्युँ छोड़-छाड़र ईशु क गेल होलिया।

कोढिनै निरोगो करबो

12 जद ईशु एक नगरी म हो, जणा बठै एक आदमी हो जिकै कोढ होर्यो हो, अर बो ईशुनै देखताँई बिकै पगा म पड़गो अर हाथ जोड़र खेबा लागयो तू चावै जणा मेरो कोढ धुप सकै ह। 13 जणा

ईशु आपको हाथ बिकै अड़ार खयो म
चाँऊं हुँ क तेरो कोढ धुपज्या इतो खेता
इ बिकौ कोढ धुपगो। 14जणा ईशु बिनै
कह्यो तू आ बात खीनैर्नै मना खीजै पण
तू याजकनै दिखार मुसा जखो चढ़ाबो
चढ़ाबा ताँई बता राख्यो ह बो चढ़ा जिऊँ
लोगानै तैरे कोढ धुपबा को सबूत मील
सकै। 15पण ईशु की चर्चा दिन दुणी
अर रात चौगुणी फेलती जारी ही अर
लोगा की भीड़ की भीड़ बिनै सुणबा
अर रोगाऊँ निरोगा होबा ताँई भेळी होरी
ही। 16पण ईशु उजाड़ा म एकलो जार
अरदास करतो हो।

ईशु भाळ भेयड़ानै ठिक कर्यो

17एक बर जद ईशु सीख देर्यो हो जणा
बठै गलिल, यहुदीया, अर यरूशलेम का
सगळा नगर्याऊँ आयड़ा फरिसि अर धर्म
की सीखदेबाळा बठै बैठच्या हा। अर
रोगलानै निरोग करबा ताँई प्रबु परमेश्वर
की शक्ति बिकै सागै ही। 18बी टेम एक
भाळ भेयड़ा आदमीनै च्यार-पाँचेक जणा
खाटली म घालर ल्याया अर बे बिनै ईशु
क कनै माइनै लेज्याबा की तक म हा। 19अर
बठै भीड़ अति जोर की ही क बे
माइनै कोनी बड़ सक्यां जणा बे छात प
जा'र खपर्यो हटार खाटली समेतई बिनै
ईशु क सामै निचै उतार दिन्यो। 20बाको
बिश्वास देखर बो बिऊँ खयो, भाईड़ा
“तेरा पाप धुपगा।” 21जणा शास्त्रि अर
फरिसि आपसरी म बुझबा लाया क
ओ पाप धोबाळो कुण होवै ह पाप तो
परमेश्वर ई धो सके ह जणा ओ क्यु
परमेश्वर को मजाक उड़ावै है। 22ईशु
बा की मना की बात जाणग्यो अर खयो,

“थे अंय्यां थारै मना म क्युँ-क्युँक्याले
सोचो हो। 23सोरो काँई ह? ओ खेबो
क तेरा पाप धुपगा नहीस खड़यो हो
अर डोला फीरी कर। 24पण ई ताँई क
थे जाणल्यो क मिनख क जायानै धरती
प पाप धोबा की बि शक्ति मीलेड़ी ह।
अर म तेरुं बोलूँ हुँ खड़यो हो अर तेरी
खाटली उठार तैरे घरा चल्योजा।”
25आ खेताँई बो खट उठयो अर आपकी
खाटली जिमै बो पड़यो हो बा उठार
आपकै घरा परमेश्वर को गुण गान गातो
चल्योगो। 26आ देखर सगळा धोळा
होगा अर परमेश्वर को गुण-गान गाबा
लागगा। अर डर क सागै कह्या आज
तो म्हें अनोरी ई बात देखी ह।

लेवीनै बुलाबो

27इकै पाछै ईशु बठैऊँ बारै गयो
अर चुंगी नाका प लेवी नाम का चुंगी
लेबाळानै बेठयो देखर बिनै खयो, “मैरै
गेल होले।” 28अर बो खड़यो होर सक्यूँ
छोड़ छाड़र बिकै गेल होलियो।

29इपै लेवि ईशु क सम्मान म एक
दावत दि अर बी दावत म चूगीं लेबाळा
अर दूसरा मिनखा की चोखी भीड़
होरी ही। जखा बिकै सागै रोटी खाबा
बैठच्या हा। 30इ बात प फरीसी अर
शासी बिका चेलानै ओळमो दिया, क
“थे चुंगी लेबाळा अर पापिया क सागै
खाई-पी क्युँकरो हो? 31इका जबाब म
ईशु खयो, “बैद रोगलानै चाए, भला-
चंगानै बैदा की काँई जरूत ह? 32म
धर्मि मिनखा का मनानै, नई पण पापिया
का मनानै पापाऊँ हटार परमेश्वर म
लगाबानै आयो हूँ।

बरत करबा प ईशु की राय

33 क्युंक मिनख बिँड़ खया, “युहन्ना अर फरीसीया का चेला- चपाटी तो बरत राखीं अर अरदास करीं, पण तेरा चेला तो सूल खावीं पीवीं हीं।” 34 ईशु बाँड़ खयो, “बींद क होता सोता थे बरातीयानै भूखा राख सको हो के? 35 पण बे दिन बि आसी जद बनड़ो बाँड़ न्यारो कर्यो ज्यासी अर बी टेम बे बरत करसी।” 36 बो बानै एकोर बात कही क, “किन्हें बी नया कुड़त्या मऊं कातर काट’र पुराणा कुड़त्या क कारी लगाता देखया हा के? अर अंयां कर बी दे जणा नयो कुड़त्यो तो फाटै जिखो फाटै इ बा कारी बी पूराणिया कुड़त्या प चोरी बी कोनी लागै। 37 अर न इ ताजा अंगुरी पुराणी बखाला म भरीं अर अंयां करदे जणा ताजा अंगुरी उठ’र बखालनै फाड़’र ढूळ ज्या अर बखाल को बी नुकसान करदे। 38 जणाइ तो लोग ताजा अंगुरीनै नई बखाल म भरीं ही। 39 अर पुराणी अंगुरी पी’र कोई मिनख नई कोनी माँगे क्युंक बिनै बीमै घणो सुवाद आवै इ ताँई बो बोलै ह ना, पूरानी ई चोरी ह।”

ईशु आराम हालै दिन को बी प्रबु

6 आराम हालै दिन ईशु अर बिका चेला गिवा का खेता मऊं जार्या हा, जणा बिका चेला हा जखा बाल्यां तोड़-तोड़ बानै हाथा’ऊ मसल्ता जाय अर बाको फांको मारता जाय। 2 जणा क्युंक फरीसी बा’ऊ बोल्या थे बो काम क्यु

कर्या हो? जिखो आराम हालै दिन करबो बर्जेड़ो ह। 3 जणा जबाब म ईशु बानै कह्या, “जद दाऊद अर बिका सीरी भूखा हा, जणा दाऊद काँई कर्यो हो? के थे आ कोनी बाँची?। 4 अर बो कर्यां परमेरबर का घर म जार चढ़ावा म चढ़ेड़ी रोटि खाई अर आपका सीर्या न बी खुवाई। थे तो जाणो इ हो बा रोटचाँनै याजक क सिवा दूसरा को खाणो बर्जेड़ो ह।” 5 अर बो बाँड़ कह्यों, “मिनख को बेटो आराम हालै दिन को बी प्रबु ह।”

अराम हालै दिन टुंडा मिनख न नीरोगो करबो

“दूसरा आराम हालै दिन बो एहूदी मिनखा की अरदास करबाली झाँঁगा म परबचन देयो हो। अर बठै एक अंयां को मिनख आयो जिको दायों हाथ सूखेड़ो हो।” शास्त्रि अर फिरिसी आँख गाड राखी की बो बिनै आछयो करै क कोनी करै। क्युंक बे तो बिपै दोष मण्डबा की तक म हा। 8 पण बो तो बाकै मना कि बात जानतोई हो जणा बो बि टुंडा मिनखनै कह्यो। “खड़यो हो अर सकै सामै आज्या” अर खेतोई बो खड़यो होगो। 9 जणा ईशु मिनखाँड़ कह्यो “म थारूं बुजूँ हुँ आराम हालै दिन बिधी गेल काँइ ह कोई को भलो करबो नहीस बुरो करबो? कोई की जान बचाबाँड़ मारबो चोखो ह कै?” 10 अर ईशु च्यारूँ-मेर बानै देख-दाख, बिँड़ कह्या, “तेरा हाथनै सीदो करले।” अर ईशु क कह्या गेल बंयाई बो आपका हाथनै सीदो कर लियो अर बिको हाथ ओज्युं ठीक होगो। 11 अंयां देख’र बे लाल ताता होगा अर

भेड़ा हो'र बत्ताबा लागगा की ईशु को
काँई करां?

बारा जणानै खास काम ताँई टाळबो

12 बा दिना म बो अरदास करबा डूँगरी
प गयो। अर सगळी रात परमेश्वरऊँ
अरदास करतो-करतो आंख्यां म ई काड
दि। 13 अर दिन उगाता ई बो आपका
चेला-चपाटच्यानै बुलाया अर बामऊँ
बारानै नाके कर बानै भेजेडा चेला नाम
दियो, 14 अर बाका नाम ऐ हीं शमैन
जिको दूसरो नाम पतरस जखो ईशु धर्यो
हो। अर बिका भाईडा अन्द्रियास, याकूब
अर युहन्नो, फिलिप्पुस, अर बरतुल्मै,
15 अर मती, अर थोमा, अर हलफई
को छोरो याकूब, अर देश भक्त शमैन।
16 अर याकूब को छोरो एहूदो, अर
एहूदो इस्करोति जखो ईशुनै धोखाऊँ
पकड़ाबालो हो।

ईशु मिनखानै सिखायो अर रोगलानै निरोगो कर्यो

17 जणा बो डूँगरी पँक बाकै सागै निचै
उतर्यो अर मैदान म आर खड़यो होयो,
अर बढै बिका बोला चेला-चपाटच्या क
सागैई सगळा एहूदिया, यरुशलेम, सूर
अर सेदा क समदर किनारा का मिनखां
को रेळो भेलो होर्यो हो। 18 बे बिनै
सुणबा अर बिमार्याऊँ निरोग होबा ताँई
बठै भेड़ा होया हा, अर ओपरी बलायऊँ
दुखी मिनखा को जापतो बी बठै होयो
हो। 19 अर सगळा बिकै अडबो चावा हां
क्युंक बिमैऊँ शक्ति निकळरी ही जखी
सगळानै निरोगो कररी ही।

दुख अर खुशी का बचन

20 इकै पाढे बो आपका चेला कानी
देखर कह्यो, “थे दीन हो जणाई धनै हो,
इ बजैऊँ इ परमेश्वर को राज थारो ह।
21 ‘थे धनै हो जखो भूख काडर्या हो, थानै
धपायो ज्यासी।’ ‘थे धनै हो जखो आज
रोर्या हो, क्युंक आगै थे हँसस्यो।’ 22 ‘थे
धन्य हो जद मिनख का जायानै मानबा
की बजैऊँ दुसरा मिनख थारूँ बैर राखी,
थानै समाज क बारै करी, थारी बेज्जती
करी अर थानै बुरो बतावै। 23 बि दिन
थे राजी होर नाचा कूदी करज्यो क्युंक
ईश्वर नगरी म थार ताँई बडो सारो इनाम
ह, अर ‘बाका बाप-दादा बी परमेश्वर
की खेबाळा क सागै अंख्यां ई करता
हा।’ 24 थार प हाय ह, ‘थे जखा पीसाळा
हो, क्युंक थे मजा ले लिया हो।’ 25 ‘हाय
थार प जखो धापेडा हो क्युंक थे बास्यां
मरस्यों हाय ह थार प जखा हाँसो हो,
क्युंक पाढे थे बार घालता रोस्यो’
26 ‘हाय ह थार प जाकी सगळा मिनख
बडाई करी हि, क्युंक बाका बाप दादा
बी बा मिनखा क सागै अंख्यां ई करता
हा जखा खैता हा म्है परमेश्वर कानीऊँ
बोला हा पण बे सच म परमेश्वर की
खैबा क बजाय खुद की खैता हा।’”

दुश्मनाऊँ प्रेम

27 सुणबालो म थारूँ रुयुं हू, दुश्मनाऊँ
प्रेम करो जखा थारो बुरो करीं, बाको
भलो करो। 28 थानै आप दे बिनै आशिर्वाद
दयो अर जखा थारै सागै बुरो बर्ताव करै
बी ताँई अरदास करो। 29 अर कोई थारा
गाल प सपाट मारै जणा थे दुसरो बी

आगै करद्यो अर जखो थारो कोटियो खोशै बिनै थारो कुडतियो लेबाऊँ बी मना मत करो। 30 अर जखो थारूँ क्यु मांगे थे बो देयो अर जखो थारी कोइ चीज खोशले बा बिऊँ पाढी लेबा की कोशिश इ मना करो। 31 मिनखाऊँ अंय्यां को बिवार करो जंय्यां को थे बाऊँ चावो हो। 32 “अर थे बाऊई जखा थारूँ प्यार करी प्यार करो जणा थारी काँई बडाई? क्युंक आपकाऊँ तो पापी बी प्यार करी। 33 अर थे थारो भलो करबाळा को भलो करो जणा इमै कूणसी बडी बात ह? अंय्यां तो पापी इ करी हीं। 34 थे थारा बिश्वासहाळानै ई कर्जो द्यो हो इमै कूणसी बडी बात ह। क्युंक पापी बी तो पापीयानै कर्जो देवीं ही, क बे बतोई ओटो चुक सके। 35 पण थारा दुश्मनाऊँ बी प्यार-प्रेम राखो, बाकै सागै बी भलाई करो, अर क्युं बी पाछो न आबा की आस करर बानै कर्जो दयो। अर अंय्यां करस्योंक जणा थारै ताँई बडो इनाम होसी। अर थे परम-परमेश्वर का टार्बार्या खुवास्यों क्युंक बो तो बुरा अर बिको धनवाद न करबाळा प बी दया दिखावै ह। 36 जंय्यां थारो पीता परमेसर दयालु ह अंय्याँई थे बी दयालु बणो।

खुद न जांचो

37 “कोइ को भलो बुरो करके न्याय मना करो जणा परमेश्वर बी थारो न्याय कोनी करसी। गळत मना ठेरावो जणा परमेश्वर थानै बी कोनी ठेरासी। माफ करो जणा परमेश्वर थानै बी माफ करसी। 38 दुसरानै दिया करो जणा परमेश्वर थानै बी निका नाप तोलर

दाब-दाब अर हिला-हिला आछि तरया ठोकर उन्दकतो देसी। क्युंक जि नापऊँ थे दूसरानै दयो हो बि नापऊँ ई थानै दियो जासी।

39 जणा बो एक बात खी, “आन्धो-आन्धानै गेलो दिखा सकै ह के? अंय्यां करसी जणा के बे दोन्युई खाढा म जार कोनी पडसी? 40 चेला गुरुऊँ बडा कोनी, पण जखो चेलो पुरो ज्ञान लेले जणा बो आपका गुरु जंय्यां को होज्या। 41 तनै डुंगर बळती तो दिखै पण पघा बळती कोनी दिखै। 42 थारा खुद की गळत्या तो थानै दिखैई कोनी अर चाल्या दुसरा की गळत्या सुधारबा। ओ ढोंगी पेली खुद की बडी बडी गळत्यानै तो सुधारले जणा पाछै कठै जार तु ओरा की छोटी छोटी गळत्यानै पिछाणबा म अर बानै सुधारबा म बाकी मदत कर सकै ह। जणा पाछै तु कय्यां खै सकै ह आ भाईडा म तेरी गळत्यानै सुधार द्युँ।

जस्यो पेड़ बस्योई फळ

43 बडिया पेड़ प बडिया फळ आविं अर घटिया पेड़ प घटिया फळ आविं। 44 इ बजैऊँ ई तो सगाळा पेड़ आपका फळऊँ ई पीछाण्या जावै ह मतबल ओ ह की झाडी क अंजीर कोनी लागै अर न इ झडबेरी क अंगुर लागै। 45 चोखो मिनख आपका चीतऊँ चोखी बात काडै अर बुरो बुरी इ चीतै, मतबल ओ ह क जखो भीतर होसी बो इ बारै आसी।

दो भाँत का मिनख

46 “जद थे मेरो कह्हो करोई कोनी जणा पाछै मनै है प्रबु है प्रबु क्याले ख्यो

हो? 47 जखो मेरै कनै आवै अर मेरी सूनै अर मानै ह बिनै म बतास्युं बो कयां को ह, 48 बो बी मिनख की जंय्यां ह जखो ऊंडी नीम खोद ढाड़ प चीणाई करी। अर जद बाड़ आई जणा पाणी की टकर बीकै लागी पण बी मकाननै हीला कोनी सकी क्युंक बो पङ्को चिणेड़ो हो। 49 पण जखो सुणर कोनी मानै बो बी मिनख की जंय्यां ह जखो माटी प बिना निम क घर चिण्यो अर जद पाणी की धार लागी जणा बो हात्यु-हात तबा होग्यो अर सक्यु ढेह्यो।

बिश्वास को कमाल

7 मिनखानै आप- हाळी सुणाबा क पाछै ईशु कफरनहुम गयो। 2 बी बढ़ै एक सूबेदार हो जिको एक दास बिमारीऊँ मरबाळो सो होर्यो हो इ दासऊँ सूबदारनै लगाव बी बोलो हो। 3 बी सूबदार क काना म ईशु की चर्चा पड़ी, जणा बो एहूदि मिनखा का बडकानै बाऊँ मिन्नत करबा भेज्यो क बे आर बीकाळा दास का पीराण बचा लेवै। 4 जणा बे आर ईशुऊँ सांचा मनऊँ मिन्नत करी “क मराज थे सुबेदार की मदत करो क्युंक बो इ जोगो ह। 5 क्युंक बो म्हारा मिनखाऊँ प्यार-प्रेम राखै ह अर बो म्हानै अरदास करबा ताँइ ठिङ्गो बणा’र दिन्यो ह। 6 जणा बे बाकै सागै हो लिया। पण जद बे बीकाळा घरा क साँकड़े लाग्याक बी टेम बो सूबेदार क्युंक भायला क हाथ आ खूवा-भेजी “की प्रबु म अतो बडो आदमी कोनी, क थे मेरी छात क तलै आवो। 7 इ बजैऊँ ई तो मं खूद थारै कनै आबा की कोनी बिच्यारी। पण थे तो बस खे द्यो, मेरो

दास निरोगो हो ज्यासी। 8 म खूद दूसरा क तलै काम करबाळो आदमी हुँ अर मेरै तलै बी सीपाइड़ा काम करी हीं, अर जद म बामैऊँ एकनै ओडाऊँ क तु जा जणा बो चल्यो जावै अर दसरानै ओडाऊँ क आ जणा बो आज्यावै, अर जद म मेरा दास न ख्युं “ओ कर” तो बो बिनै करै ह। 9 आ सुणर ईशु बी मिनख प बोलो राजी होयो, बे मुड़र बाकै गेल आर्या मिनखाऊँ ख्या इ जयांलको पङ्को बिश्वास तो म इज्जाएल का मिनखा म बी कोनी देख्यो। 10 बे संदेशो लेर आबाळा जद पाढा घरा पुग्या, जणा बो दास बानै निरोगो लाध्यो।

मरेडा को जिन्दो होबो

11 इकै आगला दिन ईशु नाइन नाम की नगरी म गयो, जठै बाका चेला-चपाटी अर एक बडी भीड़ बाकै सागै होरी ही 12 बे जंय्याई नगरी का दरुजा प पृथ्यांक, जणा देख्या क बठिकी एक अर्थी जारी हि, अर बो एक खाली होयड़ी को एकलोतो पूत हो जी बजैऊँ नगरी का घणकराक बिका दाग म सामिल हा। 13 जणा बी खाली होयड़ीनै देखर ईशुनै बीपै दया आई अर बे बिऊँ बोल्या, रोवै मना। 14 जणा ईशु गया अर अर्थी क हाथ लगाया अर कांध्या हा जखा डटगा। जणा ईशु कह्या, “मोट्यार म तेऱै खैऊँ हुँ उठ”। 15 अता म बो मरेडो आदमी उठर बैठयो होगो अर बाता करबा लाग्यो, ईशु बिनै बीकी मानै समळा दिन्या। 16 आ बातानै देख बे सगळा मिनख डरगा अर ईश्वर को गुणगाण गाबा लाग्या। बे कह्या, “आपणै माईनै

एक बड़ो परमेश्वर की खेबालो प्रगट होयो ह। परमेश्वर आपका मिनखानै बचाबा आयो ह। 17ईशु की आ खबर सगळा यूहन्निया दिसावर अर बिका च्यांरुमेर का इलाका म फैलगी।

यूहन्ना को सुवाल

18अ बात यूहन्नानै बीका चेला बताया, 19जणा यूहन्ना आपका दो चेलानै बुलार बनै ईशु क कनै ओ बेरो पाड़बानै भेज्यो क “थे कुण हो? कणाह थे आबाला बेर्ई तो मसी कोनी हो नहीस फेर म्हें कोई ओरनै उडिका?” 20जणा बे ईशु क कनै जार बाऊँ खया यूहन्ना बतिष्मो देबालो म्हानै थारूँ आ बुजबा ताँई भेज्या हीं क थे आबाला मसी हो? के नहीस म्है कोई दूसरानै उडिका? 21बी टेर्मई ईशु बोला रोगलानै बाकी पीड़ाऊँ निरोगा कर्या, लाय-बलायाऊँ मिनखानै छुड़ाया अर बोला आंदानै आंख्याँ दि। 22जणा ईशु बाऊँ कह्या “जो क्युँ थे सुण्याँ अर देख्या हो बो जार यूहन्नानै खे दयो की आंदा ओज्यूँ देखी ही, लंगडा चाली ही, कोढीया को कोढ धोयो जार्यो ह अर बेरा सूण्याँ हीं, मुर्दा जिंदा कर्या जार्या ही अर गरिबानै चोखो समचार सुणायो जार्यो ह। 23धनै ह बो जखो मेरै प भेम कोनी धरै।”

24बा चेला-चपाट्या क जाबा क पाछै, ईशु बठै बैठी भीड़नै यूहन्ना क बारा म बताबा लाग्या, “थे उजाड म काँई देखबा गया हा? के भालूँ हालतो कुंच्चो? 25नई, जणा थे काँई देखबा गया हा? के कोई चोखा गाबल्या पेरेड़ा मिनखनै? चोखा गाबल्या पेरेबाला अर मोजऊँ

जीबाला तो मेहला म मीली ही। 26जणा थे ई बताओ, थे काँई देखबा गया हा? के कोई परमेश्वर की खेबालानै? हाँ, थे जिनै देख्या बो परमेश्वर की खेबाला’ऊँ बी बडकै ह। 27यूहन्नो बोइ ह जिकै बारा म ओ मंडर्यो ह, ‘देख म तेरुं पेली मेरो दूत भेजूँ हु जखो तेरो गेलो त्यांर करसी।’ 28म थारूँ रुह्यु हु, ‘लूगाईऊँ पेदा होबाला म यूहन्नाऊँ बडो कोइ कोनी। पण ईश्वर का राज म रेहबालो छोटोऊँ छोटो मिनख बी बिऊँ बडो ह।’

29जणाई हर - कोई उरै ताँई चुंगी लेबाला बी बिनै सुणार परमात्मा का गेलानै साझ्यो मान लिया क्युँक बे यूहन्नाऊँ बतिष्मो लिया हा। 30पण फरीसी अर शास्त्रानै सीखाबाला, यूहन्ना को बतिष्मो न लेर परमेश्वर बा ताँड जो क्युँ ध्यार राखी हि बिनै टाळ दिन्या।

31ईशु ओज्युँ कह्यो, “जणा म इ पीढ़ी का मिनखाकी बराबरी किकी सागै कर सकूँ हू? क बे बिकी जंयां ह? 32बे बजार म बेठ्या बा टाबरा की जंयां ही जखा एक दूसरानै हेल्लो देर खी ही, ‘म्हें थार ताँई बाजो बजाया पण थे नाच्याई कोनी। म्हें थार ताँई बार-घाली पण थे रोया ई कोनी।’ 33खेबा को मतबल ओ ह की यूहन्ना बतिष्मो देबालो न रोटी खातो अर न ई अगूंरी पीतो, अर थे ख्यो हो बीमै शैतान रळ्यो ह। 34अर इकै पाछै मिनख को बेटो आयो जिखो खातो-पीतो हो, जिनै थे डाकी अर दारुड़यो बतायो, चुंगी लेबाला अर पाप्याँ को भायलो बतायो। 35परमेश्वर की बुद्धि गेल चालबाला बिकी बुद्धिनै सइ साबित करी हि।

पापण लूगाई

36एक फरीसी ईशुनै आपकै घरा मिजबानी को नूतो दिन्यो। जणा बे फरीसी क घरा गया अर मिजबानी खाबा बेठगा। 37अर बी नगरी म एक पापण ही, बीनै जद बेरो पड़यो क ईशु फरीसी क घरा मिजबानी खार्या ही, जणा बा संगमरमर की एक बरणी म अत्तरं ल्याइ। 38बा बाकै गेलनैऊँ आर बाका पगा कनै उबी होगी। अर बा रोती जाय, अर आपका आँसुआऊँ बाका पग धोती जाय, पग धोर आपका बालाऊँ पगानै पूछैर पग पकड़ लिया अर बी अतंरनै बिका पगा प उंदका दिनी। 39आ देख'र ईशुनै मिजबानी घालबालो फरीसी आपका हिया म विच्चार्यो ज ओ परमेश्वर की खेबालो होतो जणा ज्याण ज्यातो के आकै हाथ अड़ाबाळी आ कूण ह? अर कच्चालकी ह? ओ ज्याण ज्यातो की आ पापण ह।

40जणा ईशु शमोनऊँ खया, “शमोन मनै तेरूँ क्यु खेणो ह” इपै शमोन खयो “बोलो महराज”, 41ईशु बोल्या “सूण एक साहूकारऊँ दो मिनख कर्जो लियो एक तो पानसौ चाँदी हाला सिङ्का लिया अर दुसरो पचास सिङ्का। 42पण बे दोन्यूइ बिको कर्जो कोनी चूकतो कर सक्यां जणा साहूकारनै बापै दया आगी अर बो दोन्या कौ कर्जो माफ कर दीन्यो। ईब तु बता बा दोन्या मऊँ बीनै ज्यादा प्यार कूणसो करसी? 43शमौन खयो “मेरा विच्चारऊँ जिका ज्यादा पीसा माफ कर्या घणो प्यार तो बोई करसी। “जणा ईशु खया तू साँची खे ह!” 44जणा

बी लूगाई कानी घूम'र ईशु शमोनऊँ खया “तु इ लूगाईनै देख'र्यो ह के? म तैरे घरा आयो, अर तू मनै पग धोबा ताँई पाणी तक की कोनी बुजी अर आ मेरा पगानै आँसुआऊँ धो'र बानै आपका बालाऊँ पूछी ह। 45तू मेरो सत्कार करबा ताँई मेरे गलै बी कोनी लागयो अर जदऊँ म आयो हु आ मेरा पगानै छोड़री कोनी। 46तू मेरा सीर प तेल कोनी लागयो पण आ मेरा पगा प अत्तरं उंदकाई। 47जणा म तेरूँ रुखुं हुं क इको ओ आन्दो प्रेम ओ दिखावै ह क इका बोला-सारका पाप माफ कर्या गया हीं। पण जिका थोड़ा पाप माफ कर्या गया ही बो थोड़ो प्यार दिखावै ह। 48जणा ईशु बि लूगाईऊँ कह्या तेरा पाप धुपगा हीं। 49जणा बे जखा ईशु क सागै मिजबानी खार्या हा, बे आपका मन म सोच्या ओ कुण ह जखो पापानै बी धोवै ह? 50पण ईशु बी लूगाईऊँ खया तू राजी खुशी जा क्युँक तेरो बिश्वास ई तनै बचायो ह।”

ईशु आपका चेला - चपाटचा क सागै

8 इकै पाछै ईशु परमेश्वर का राज का चोखा समचार को हेलो पाड़ता गाँव-गाँव अर नगर - नगर म्हाकर गया। अर बीका बारा चेला बी बिकै सागै - सागै रेहता। 2अर बिनै मानबाळी क्युंक लुगांयां बी बिकै सागै हि, जानै बो लाय-बलाय अर बिमारीऊँ छुडायो हो, बामैऊँ एक लूगाई ही जिको नाम मरियम मगदलीनी हो जिमऊँ बो सात ओपरी बलाय काडी। 3अर हेरोदेस का मुंशी खुजा की लूगाइ योअन्ना, अर सुसन्नाह और बी बाळी ही। ये सगळी लुगांयाँ आपका बलबूता

पई ईशु अर बिका चेला-चपाटया की मदत करती।

बीज बोबाळा की बात

4जद नगरी नगरी का मिनखा को एक बड़ो रेठो ईशु कनै आर भेठो होयो जणा बो बानै एक निति कथा खी। 5“एक बर एक किसान हो बो बिज बोबानै गयो। जद बो बिजानै फेक्यो जणा क्युंक बीज गेला क सारै पड़या जखा पगा क तलै आर मसलया गया। अर चिड़कल्याँ बानै चूगलेगी 6अर क्यूंक कांकरा म जार पड़या बे उगया तौ सही पण नमी ना मिलबा की बजैऊँ बलगा। 7अर क्यूंक झाड़या म जार पड़या अर झाड़ी बाकै सागै बढ़र बानै दाब दिनी। 8अर “क्यूंक उपछी धरती प पड़या अर बे सो गुणा फळया” अत्तो खेता ई बो जोरूँ हेल्लो मारर खयो जिकनै सूणबा ताँई कान ही बे बानै खोलले।

9बीका चेला बिऊँ बुज्याँ ई बात को काँई मतबल ह?” 10जणा बे खया “परमेश्वर क राज का भेद को ज्ञान थानै दियड़ो ह पण दूसरानै म आ भेदा क बारै म निति कथा म बताऊँ हुँ। जिऊँ बे देखर बी कोनी देख सकी अर सूणर बी कोनी सुण सकी।

चेलानै बात को मतबल समझाबो

11“इ निति कथा को मतबल ओ ह की बीज ह जखा परमेश्वर का बचन ही। 12बे बिज जखा गेला क सारै पड़या, अ बे मिनख ही जखा बचन सूणी, पण शैतान आर बाका मना मऊँ बीनै काडले क्युंक बो कोनी चावै क बे बिश्वास

कर बच जावै। 13कांकरा प पड़बाळा बीज बे ही जखा बचन सूणर बीनै राजी होर मानली। पण बाकै मना म बो गेराई कोनी पकड़े बे थोड़ी देर ताँई बिश्वास करी पण जद बानै बिचास्यों ज्यावै जणा बे ओटा सरक ज्यावै। 14“अर जखा बीज काँटा म पड़या बिको मतबल ओ ह की बे मिनख जखा बचननै सूणी पण जद बे बापै चाली जणा चिन्तया, धन-धौलत अर जिंदगी का मजा बानै दबा देवै ह जिऊँ बे सुल कोनी फळै। 15अर उपछी जमीन प पड़या बिज बे ही जखा बचन सूणर बीनै चोखा अर खरा हियाऊँ मानै अर थ्यावस राखर समाळ राखी हि जद ताँई कि बाका करम बि बचन गेल ना होज्यावै।”

दिया की निती कथा

16“कोई बी दियानै कुण्डा क तलै कोनी धरै अर न माचा तलै सरकावै पण बिनै आळया म धरै जिऊँ माइनै आबालानै बिऊँ च्यानणो मील सकै। 17क्युंक क्युं बी ओलामै कोनी जिनै चोड़ा म ना लैयायो जा सकै अर न क्युं ढकेड़ो ह जखो उघाड़यो ना जावै। 18इ ताँई चेता म रह्यो जिकनै ह बिनै और दियो ज्यासी अर जिकनै कोनी बिऊँ जो क्युं ह बो बी ले लियो जासी।”

ईश्वर का बचना प चालबाला ही ईशु को कुणबो

19बि टेम ईशु की माँ अर बिकाळा भाइड़ा बिऊँ मीलबा ताँई आया पण भीड़ अत्ती जोर की ही बे बिकनै पूच कोनी सक्याँ। 20जणा बीनै बतायो गयो की

तेरा भाइड़ा अर तेरी माँ तेरुँ मीलबा ताँई बारै खड़या ही। 21 ई प ईशु बानै खयो “मेरी माँ अर मेरा भाइड़ा तो बे ही जखा परमेश्वर का बचनानै सुणी अर बीपै चाली।”

ईशु आँधी-तौफाननै थाप्यों

22 एक दिन ईशु आपका चेला क सागे न्याव प चढ़यो अर बानै खयो आओ आपा झील क परली पार चाला। जणा चेला ह जखा न्याव हाङ्क दिनी। 23 अर चालती न्याव म ईशुनै नींद आगी। अर आँधी चालबा लागगी, जिऊँ न्याव म पाणी भरबा लागगो अर बे सागेडी आफत म फसगा। 24 जणा बे बिकनै आया अर बिनै जगार खया, “महाराज, महाराज आपां डूबबाळा हा।” जणा बो ऊबो हो’र आँधी अर पाणी कि झालनै दकाल्यों जिऊँ सक्युं शान्त होगो। 25 जणा बो बाँऊँ बुज्यों, “कठै गयो थारो बिश्वास?” पण बे ईशु अर बिकाळी शक्तिऊँ डरर्या हा अर जोक्युँ बो कर्यो बिपै ताजूब करर्या हा। अर आपसर्या म बतल्यार्या हा ओ कूण ह? जखो भाल अर पाणी दोन्या प हुकम चलावै, अर बे इको खयो करै।

ओपरी बलायानै काडबो

26 अर बे गलील क सामला देश गिरासेनीयो म न्यावऊँ पुग्या। 27 जंय्यांई बो किनारा प उतर्यो, बानै बी नगरी को एक आदमी मील्यो जिमै ओपरी-बलाया ही जि बजैऊँ कई दिनाऊँ न तो बो गाब्बा पेर्या अर नई घरा रिह्यो बो तो मूसाणा म ई रेहतो। 28 ईशुनै देखर बो बिका पगा

म पड़गो अर जोर-जोरूँ बार घालतो खयो, तेरो मेरो काँई लेणदेण? “ओ परम प्रधान का बेटा ईशु म थारै हाथ जोड़ै मनै दिन मना घालै। 29 क्युँक बो बी ओपरी-बलायनै बिमैऊँ निकलबा को हुकम दिन्यो। आ ओपरी-बलाय बार-बार बिमै रळ जाती, जणा अंय्यां होतो क बी आदमीनै साँकलाऊँ बाँध देता पण बा हीक जखी साँकलानै तोड़र बिनै उजाड म ले ज्याती। 30 अर ईशु बिऊँ बुज्यों तू कूण ह? बा खई “सेना” क्युँक बिमै बोली-सारी ओपरीयां रळरी ही। 31 बे ईशु क आगै हाथ जोड़र खी क, “म्हानै पताळ म मना भेजै।” 32 बि टेम सारैई ढूँगरी प सुल्डा को रेवड चरबा लागर्यो हो जणा बे बी रेवड म जाबा ताँई ईशुऊँ हाथ जोड़र खी। अर ईशु बानै बि रेवड म जाबा की हामळ भर दि। 33 जणा बे बि आदमी की खोल तो दि छोड अर बा सूल्डा म जार बड़गी। अर सुल्डा को रेवड बठैऊँ गुळगंडी खार तलाब म डूब मर्यो। 34 सूल्डानै चरबाला जोक्युँ हौयो हो बिनै देखर बठैऊँ भाग छुट्या अर नगरी का आस-पास का गाँवा म खे सूणायो। 35 जणा जोक्युँ बठै घट्यो बिनै देखबा ताँई लोग गया, अर जद बे ईशु क कनै पुच्या जणा बी आदमीनै जिमैऊँ ओपरी बलाय निकलगी हीक बिनै ईशु क पगा म, पूरा गाब्बा पेर्या अर सरोदा म बैठयो देखर बे सगळा का सगळा डरगा। 36 जत्ता बि, ई बातनै होता देखी बे बठै आयड़ा मिनखानै बताया क ओ कंय्या चोखो होयो। 37 जणा गीरासेन का रेबाला ईशुऊँ हाथ जोड़र खया की थे अठैऊँ

चल्या जावो। क्युंकि सगळा डरगा हा जणा ईशु न्यावडी म बेठ'र चालबा लाग्योक 38बि टेमका बो मिनख जीमैऊँ ओपरी बलाय निकळी हीक बो ईशुऊँ हाथ जोड़'र खयो मनै बी थरै सागै ले चालो पण ईशु बिनै आ खेर पाछो भेज दिन्यो, 39क घरा जार आ बात सगळानै बता क परमेश्वर तेरे आडो आयो। अर बो जार नगरी म हेल्लो पाड़यो क ईशु बी ताँई काँई कर्यो?

बिमार लूगाई अर मरेडी छोरी

40झिल क परलै नाकै लोग बिनै उडिकर्या हा अर जद ईशु पाछो आयोक जणा लोग बिऊँ राजी होर मील्या। 41बि टेमका याईर नाम को कोई मिनख आर बिकै पगा पड़ग्यो जखो बैठका यहुदि मिनखा का अरदास करबा का घर को मुखियो हो अर बिनै आपका घरा चालबा ताँई हाथ जोड़'र खयो। 42क्युंकि बिकै बारा-बरस की एक छोरी ही अर बा मरबाळी ही अर ईशु जद जार्या हा जणा भीड़ उपर-तळी बापै टूट'र पड़री ही।

43अर बैठई एक लूगाई बि ही जखी बारा बरसऊँ न्याहणी की बिमारीऊँ दुखी ही अर जोक्युँ बि बिकै कनै हो बिनै बा बैदानै बोया बैठी ही अर बिनै कोई बी निरोगो कोनी कर सकयो। 44जणा बा गेलऊँ जार ईशु का कूड़त्या की कोर क हाथ लगाई अर हाथ लगाताँई बिको लोय भेबो थमगो। 45जणा ईशु बुज्यो “मेरै कूण हाथ अडायो? जद सगळा नटगा, जणा पतरस बोल्यो” माराज भीड़ की भीड़ तो थारपै टूट'र पड़री ह।” 46पण ईशु खया, “कोइ ना कोइ

तो मेरै पक्काई हाथ अडायो ह क्युंकि मेर मऊँ शक्ति निकळी ह। 47जद बी लूगाईनै अंयां लाग्यो क मं कोनी लूख सकुं जणा बा धूजती-धुजती आई अर ईशु क पगा म पड़गी। अर सगळा क सामै ईशुनै बताइ की बा बिकै क्याले हाथ लगाई ही अर कंयां बा हाथ्यूँ-हाथ निरोगी होगी। 48ईशु बिऊँ खया बेटी तु तेरा बिश्वास की बजैऊँ निरोगी करी गई ह ईब राजी खुशी जा। 49बो हाल बोलर्यो ई हो क अत्ता मई यहुदि मिनखा का अरदास करबा का घर का मुखिया क घराऊँ एक जणो आर बोल्यो क, “तेरी छोरी तो मरगी, ईब गुरुजीनै और तंग मना करै।” 50ईशु आ बात सूनक्ली अर याईरऊँ खया “डरै मना, खाली बिश्वास राख, तेरी छोरी बच ज्यासी।” 51जद ईशु बिका घर म आयोक जणा बो भीतर कोठा म आपकै सागै पतरस, याकूब, यहन्ना अर बी छोरी का माँ-बापा क सीवा और दूसरानै आबा की इजाजत कोनी दि। 52अर जत्ता बि बैठै हा बे जोर-जोऊँ बार-घाल'र रोर्या हा। ईशु बोल्यो “रोवो मना आ मरी कोनी ह, आ सुती ह। 53जणा बे बिपै हाँस पड़याँ। क्युंकि बानै बेरो हो क छोरी मरगी। 54पण ईशु माईनै गयो अर बि छोरी को हाथ पकड़'र जोर'ऊँ खयो,” बेटा उबी हो। 55अत्तो खेताँई बीमै पिराण पाछा पड़ग्या अर बि टेम बा उबी होगी जणा ईशु खया ईनै क्यू खाबा ताँई दे द्यो। 56इ चमत्कारनै देखर बिका माँ-बाप ताजूब म पड़गा पण ईशु बानै हुकम दिन्यो, “इ बात को जीकर कोईऊँ मना करज्यो।

बारा चेलानै भेजबो

9 ईशु आपका बारा चेलानै एक सागै बुलार, बानै औपरी-बलायानै काडबा अर रोगलानै निरोगा करबा की शक्ति अर अधिकार दियो। 2इकै पाछै बो बानै परमेश्वर का राज को हेल्सो पाड़बा अर रोगलानै निरोगा करबा ताँई बारै भेज्या। 3अर बो बानै खयो, “गेला ताँई थारी जुरत को क्यूर्ह समान मना ल्यो न तो लाठी न झोलो, न रोटि टुक न रुपया अर न ई पेरबा ताँई अलगऊँ कुड़त्यो। 4थानै जी घर म सत्कारऊँ बुलायो जावै, जणा थे की घर म ई रिहज्यो जद ताँई की थे बा नगरी ना छोड़ दयो। 5अर जि जठै थारी सुणाइ कोनी होवैक जणा बठै का मिनखानै चेताबा ताँई थारा पगा की धुळ झाड़ दिज्यो।

6जणा बे बठैऊँ बिदा लेर गाँव-गाँव जार परमेश्वर को चोखो समचार सुणाया अर मिनखानै निरोग कर्या।

हेरोदेस को भेम

7अर जो क्युं होर्यो हो बि बात की भणक जद गलील का राजपाल हेरोदेसनै लागी जणा बो घबराग्यो क्युंक क्युंक खेर्या हा क “यूहन्नो जिन्दो होगो”। 8अर क्युं खेर्या हाँ क “ऐल्लियो धरती प उतर्यो ह”। क्युंक खेर्या हा क परमेश्वर की खेबाला पूराणिया मऊँ कोई जिन्दो होयो ह। 9पण हेरोदेस बोल्यो, यूहन्ना को सिर तो म खुद धड़ऊँ अलग करवा दिन्यो हो। ईब ओ कूण आगो जिका बारा म, म अ बाता सूणर्यो हूँ? जणा हेरोदेस बिऊँ मीलबा की कोशिश करी।

पाँच हजारऊँ बत्ती मिनखानै जीमाबो

10जणा पाछै ईशु क कनै आर बे भेजेड़ा चेला जो क्युं बे कर्या बिकी जाणकारी बिनै दि। जणा बो बानै आपकै सागै लियो अर बे चुपचाला बैतसदा नाम की नगरी म गया। 11पण आ बात लोगा न बेरो पाटगी अर भीड़ की भीड़ बिकै गेल - गेल होली। बो राजी राजी बाऊँ मिल्यो अर बानै परमेश्वर का राज क बारा म बतायो अर जखा रोगला हा बानै निरोगो कर्यो। 12जद दिन आथबा लाग्योक जणा बे बारां का बारां बिकनै आर बोल्या, “इ भीड़ न ईब बिदा कर जिऊँ अ आस-पड़ोस का गाँव अर ढाणयां म जार आपका खाबा पीबा अर आसरा को जोगाड़ करी क्युंक आपा इ उजाड़ म पड़या हा। 13बो खयो “थेर्इ आनै खाबा ताँई क्युं दयो, जणा जबाब म चेला खया “आपणै कनै तो बस पाँच रोटड़ी अर दो मछली इ ह पण आ तो हो सकै, म्हें जावा अर आ सगळा ताँई रोटी मोल ल्यावा। 14बठै लगभग पाँच हजार तो मोटचार मोटचार इ हा। जणा ईशु चेलानै खयो आनै पचास-पचास की पंगत म बिठा दयो। 15बे बंयांई कर्या जंयां बाऊँ खयो गयो। बे सगळानै पंगत म बिठा दिन्या। 16जणा ईशु बा पाँच रोटया अर दो मछल्यानै लेर ऊपर देखर परमेश्वर को धनैवाद कर्यो अर बाका टुकड़ा कर-कर चेलानै देतो गयो क बे लोगा न जिमावै। 17अर जद सगळा खार धापगा जणा बचेड़ा रोटया का टुकड़ाऊँ चेला बारा चोल्या भर्या।

पतरस मानी ईशु ई मसी ह

18एक बार ईशु एकलो प्रार्थना करै हो बी टेम बिका चेला बिकै कनै आया, जणा ईशु बाँड़ बुज्यो “म कुण हूँ, ई बारा म लोग काँई खेवै ह?”। 19बे खया “घणकराक तो तनै युहन्नो बतिष्ठो देबाळो खेवै। पण क्यूंक खी तु एलियो ह। अर क्युंक तो तनै पूराणा जमाना को परमेश्वर की खेबाळो समझी हीं जखो जी-दो होर आगो। 20बो बाँड़ बोल्यो ईब आ बताओ थे मेरै बागा म काँई समझो हो? की मं कुण हूँ? जणा पतरस खयो “तू परमेश्वर”ऊ भेजेडो मसी ह। 21ईशु बा सगळानै सूल चेतार खयो, “ईको जिकर दुसरा क आगै मना करज्यो।”

ईशु आपकी मोत क बागा म कह्यो

22ईशु आपका चेलानै खियो, “आ तो होणी ह क मिनख को बेटो बोळा दुख उठासी। अर बढ़का, प्रधान याजक अर शास्त्रानै सीखाबाळा बिनै तजसी अर जिकै पाढै बो मार्यो जासी। पण बो तीसरा दिन मरेडा मठं जि’ज्यासी। 23बो बा सगळा ऊं खयो, “ज कोई मेरै गेल आबो चावै जणा बिनै खुदनै तजणो पड़सी अर रोजिना दुख उठाबा ताँई राजी होणो पड़सी, जिमै ज्यान बी जा सकै ह। 24इऊं ओ होसी क जखो बी आपका पिराण बचाबो चावै बो बाकी हानी उठासी। अर जखो बी मेरै ताँई आपका पिराण तजसी बो बिनै बचासी। 25ज आदमी सगळी दुनियानै जीत ले अर आत्मानै खो दे नहिस बिकी हानी उठावै जणा बिनै काँई फाइदो? 26जखो बी,

मिनखा क सामै मनै अर मेरा बचनानै मानबाँड़ सरम करसी, जणा मिनख को बेटो बी बाँड़ नातो राखबो आपकी बेज्जती मानसी जद बो पबीतर ईश्वर नगरी दुता, आपका बाप अर खुद की मेहमा म आसी। 27म थानै साँची खेवूँ हूँ, अठै खड़्या मिनखा म’ऊं कई-कई तो अंय्यो का ह की बे जद ताँई परमेश्वर का राजनै नई देखले जद ताँई बानै मोत कोनी आवै।”

ईशु एलिया अर मूसा क सागै

28आ बाता क ससा भर पाढै ईशु पतरस याकूब अर यूहन्ना न सागै लेर ढूँगर प अरदास करबा गयो। 29अर जद बो अरदास करर्यो हो जणा बिकी सकल बदलगी अर बिका गाब्बा भळका मारता धोळा धप्प होगा। 30-31अर बढ़ते दो जणा परमेश्वर का प्रताब क सागै परगट होया जीमऊं एक मूसा अर दूसरो एलिया हो। बे ईशु की मोत क बारा म ईशुऊं बतळार्या हा जीनै बो परमेश्वर की मर्जीऊं यरुशलेम म पूरी करबाळो हो। 32पतरस अर बिकाळा साथी निन्द्या म हा जद बे सूल चेतो कर्योक् जणा बे बिको परताब अर बा दो जणानै जीखा बिकै सागै खड़्या हा बानै देख्या। 33अर जंय्याँई बे बिऊं बीदा ले हाक, जणा बी टेम पतरस बिऊं बोल्यो, “महाराज कत्तो चोखो ह क म्हें उरै हां! म्हानै तीन पंडाल बणाबा दे, एक थार ताँई, एक मूसा ताँई, एक एलिया ताँई!” बो साच्याँई कोनी जाणतो हो की बो काँई बोलर्यो हो। 34बो हाल ताँई खेर्योई हो क अत्ता म ई एक बादली घुठी अर

बा सगळानै ढकली जिऊँ चेला डरगा। 35बी टेम हाथ्यूँ-हाथ बादला मऊँ हेल्लो आयो, “ओ मेरी बेटो ह जिनै म टाळयो हुँ थे इकी सूणो। 36ओ हेल्लो होबा क पाछे बानै ईशु क सिवा बठै कोडि कोनी दिखयो। अर बे अ बात आप ताँई राखी। अर जोक्यूं बे देख्या बिको जिकर बा दिना म बे खीऊँई कोनी कर्या।

ईशु एक छोरा म ऊँ बलाय काढी

37आगलै दिन जद ईशु अर बिका तीन चेला डूँगरीऊँ तळै उतर्या जणा बानै मिनखा को रेळो अगाऊँ लाध्यो। 38बी रेळा मऊँ एक जणो कूकर बोल्यो, “गुरु म थारऊँ हाथ जोड़ खेऊँ हुँ मेरा छोरा की सूदी ल्यो। मेरै तो बो एक ई ह। 39बिमै क्यू रळेडो ह अर बो आपको असर दिखावै जणा मेरो छोरो बूताऊँ बारै होज्यावै, अर मुण्डा होर झाग बगावै, बिनै आछ्या तरोड़े-मरोड़े अर छोरानै छोडबा को नामई कोनी ले अर बिनै दिन घालरी ह। 40म थाकाळा चेलाऊँ अरदास करी क बिमैऊँ बिनै काड दे पण बाऊँ तो पार कोनी पडी। 41जणा ईशु बोल्यो, “अरै अविश्वासियो अर भटकेडा मिनखो, म कद ताँई थारै सागै रेहस्यू अर थानै भोगस्यू? जा अर तेरा छोरानै उरै ल्या। 42जद बो छोरो आर्यो हो जणा बिच म इ बा बलाय बिनै रोडली अर मरोडी देर जमीन प दे मारी। जणा ईशु जोरऊँ बि बलायनै दकालर बी छोरा मऊँ बिनै काड दि। अर छोरानै राजी खुशी बिका बापनै समळा दिन्यो। 43बे सगळा परमेश्वर का इ बडा कामऊँ ताजुब म पडगा। अर

जद मिनख ईशु का करेडा सगळा कामा प ताजुब करै हा, बि टेम इ ईशु आपका चेलाऊँ कह्यो। 44“थे इ बात प कान लगाओ क मिनख को बेटो मिनखा क हाथा म सोप्यो जासी।” 45पण अ बातां बाकै पलै कोनी पडी। अर अ बाता बाऊँ लुखायडी ही जणा बे कोनी जाण सक्या। अर बे आ बातानै बुजबाऊँ डरपता हा।

सऊँ बडो कुण

46एक बर अंय्यां होई क, ईशु का चेला आपसर्या म इ बात प जिद्बा लागगा क आपणा म सऊँ बडो कुण? 47पण ईशु बाका मना का बिच्यार जाणतो हो जणा बो एक टाबरिया न लेर आपकै कनै खड्यो कर्यो, 48अर बाऊँ कह्यो, “जखो कोई मेरै ताँई इ टाबरिया को मान करै बो मेरो बी मान करै। अर जखा मेरो मान करीं बे मनै भेजबाळा परमेश्वर को बी मान करीं ही। इ बजैऊँ जखो थारमालो सऊँ छोटो ह बो ही सऊँ बडो ह।”

जखो थारै साम्है कोनी बो थारै कानी ह

49जणा यूहन्नो कह्यो, “ओ माराज, म्हें एक आदमीनै देख्या जखो तेरा नामऊँ औपरी-बलाय काडर्यो हो, अर म्हें बिनै अंय्यां करबा ताँई नटच्या क्युँक बो आपणै मालो कोनी हो।” 50ईशु कह्यो, “बिनै मना रोको क्युँक जखो थारै सामै कोनी बो थारै कानी ह।

सामरी नगरी

51जद ईशु का ईश्वर नगरी म उठाया जाबा का दिन साँकडै हा जणा बो

यरूशलेम जाबा ताँई आपका हियानै पक्को कर लिन्यो। ५२ अर बो आपकै अगाऊँ दूत भेज्या जखा रेहबा स्वाबा को सलीको देखबा सामरिया का एक गाँव म गया। ५३ पण सामरिया का मिनख बढ़ै बानै बड़बा कोनी दिया क्युंक बो यरूशलेम जार्यो हो।^c ५४ आ देखर बिकाळा चेला याकुब अर यूहन्नो बिऊँ बोल्या, “थे स्व्यो तो मे हुकम करा की आसमानऊँ आग बरसै अर आनै बाल गेर। ५५ पण बो पाछो मुड़र बानै दकाल्यो।^d ५६ जणा पाछै ईशु अर बिकाळा चेला दूसरा गाँव चलेगा।

ईशु को चेलो बणबा को मोल

५७ जद बे गेला म जार्या हा, जणा एक मिनख ईशुऊँ बोल्यो जठे-जठे तू जासी बढै-बढै म तेरे गेल आस्यूँ।^e ५८ ईशु बिऊँ कह्यो, “गादडा की घुर अर पंछिया का घुरसळा होवीं पण मिनख का जाया को तो सिर लुखाबा को बी ठिकाणो कोनी।” ५९ बो दूसरा मिनखनै बोल्यो, “मेरे गेल होले।”। जणा बो मिनख बोल्यो, “ओ माराज मनै पेलि जाबा दे की म मेरा बापनै गाडचाऊँ।” ६० जणा ईशु कह्यो, “मेरेडानै बाका मेरेडा को किर्याक्रिम करबा दे। पण तू जा अर परमेश्वर का राज को हैल्लो पाड़।” ६१ एक जणो ओर कह्यो, ‘ओ प्रबु म तेरे गेल चल्यो चालश्यू पण पेली मनै

मेरा घरकाऊँ बिदा लियाबा दे।”^f ६२ जणा ईशु कह्यो, “जखो मिनख आपको हाथ हळ प धरर गेलनै देखै बो परमेश्वर का राज जोगो कोनी।

भत्तर चेलानै परमेश्वर का काम ताँई भेजबो

१० इकै पाछै प्रबु, जि नगरी अर झांधां जाबालो हो बढै जाबा’ऊँ पैली बो ओर भत्तर मिनखानै टालर आपकै अगाऊँ बानै दो-दो करकै बा नगरीया अर झांधां म भेज्या। २ अर बो बानै बोल्यो, “लावणी आयेडी फसल घणी ह पण लावणी करबाळा ध्यानग्या थोड़ा हि। इ ताँई फसल का मालिक’ऊँ हाथ जोड़ अरदास करो की बो लावणी आयेडी फसल ताँई ध्यानग्या भेजै। ३ जाओ, पण ध्यान रेवै म थानै ल्याळ्या क माइनै उन्या की जंयां भेजर्यो हूँ। ४ थे बटुओ, झोली अर लितरा मना लिज्यो अर न गेला म खड़्या होर खिन्है नमस्कार करज्यो। ५ अर जि घर म जावो बिमै बड़ता पेली इ खिज्यों, “इ घर को भलो होवै। ६ थारा आसिरवाद जोगो ज कोई बी घर म होसिक तो थारो आसिरवाद बिकै लागसी नहीस बो पाछो थार कनै आज्यासी। ७ अर जोक्युँ बे थानै दे, बिनै खा-पी बढै ही रीज्यो, क्युंक ध्यानगी ध्यानग्या को हक ह। अर बासो लेबा

^c ९.५३ पण सामरिया का मिनख बढै बानै बड़बा कोनी दिया क्युंक बो यरूशलेम जार्यो हो। क्युंक सामरिया म गरासेन पहाड़ प सामरी परमेश्वर की अराधना करता हा। जणा जखो बी एहूदी सामरिया होर अराधना करबा ताँई यरूशलेम जातो बिमै बे आपकी बजजती मानता। ^d ९.५५ पण बो पाछो मुड़र बानै दकाल्यो क्युक हाथाऊँ माडेडी पोथया म “थे कोनी जाणो के? म धरती प आत्मा को नाश करबा कोनी पण बचाबा आयो हु” आ बात बी ह।

ताँई घर-घर मना भटकज्यो। 8 अर जि नगरी म थारी आवभगत होवै। अर थारै सामै जोक्युँ परूश्यो जाय बो ही खाज्यों। 9 अर बि बठै का रोगलानै निरोगो कर बानै बोलो परमेश्वर को राज साँकड़ोई ह। 10 अर जि नगरी म थारी आवभगत कोनी होवै। जण बठै का गळियारा म जार ख्यो, 11 “थारी नगरी की धुळ जखी म्हारै पगा क लागरी ह, बा म्हें थानै चिताबा ताँई थारै सामैई झाडा हा। पण कान खोलर सूणल्यो परमेश्वर को राज साँकड़ै ई आग्यो ह। 12 म थानै यकीन दिवाऊँ हुँ न्याय हाळे दिन सदोमऊँ बती, बी नगरी की दसा बुरी होसी।

परमेश्वर की सूणाइ न करबाढी नगरी प धिक्कार

13 खुराजिन अर बैतसैदा म रेबाळा मिनखा प हाय ह अत्ता-अत्ता जोर का काम आ नगर्या म कर्या गया, ज अ काम सुर अर सैदा म कर्या जाता जणा बठै का मिनख बोरी का गाबा पेरर खुद प राख बुरकार, कद का इ दिखा देता की बे हियो फिरा लिया ही। 14 पण न्याय हाळे दिन सूर अर सेदा की दशा थारी दशाऊँ बोला बाँटा चोखी होसी। 15 अर कफरनहूम म रेबाळो थे के राजी होवो हो, की ईश्वर नगरी जास्यो? पण थानै तो सीदो नरग म पटक्यो जासी। 16 ईशु आपका चेला'ऊँ बोल्यो, जखो थारी सूणे, बो मेरी बी सूणे। अर जखो थानै कोनी बदै, बो मनै बी कोनी बदै, अर जखो मनै कोनी बदै, बो मनै भेजबालानै बी कोनी बदै।”

भत्तर चेला को पाछो आबो

17 बे भत्तर का भत्तर राजी होता ओटा आर ईशु'ऊ बोल्या, “प्रबु जद थारा नाम'ऊँ म्हें शैतान की आत्मानै ओडावा हा जणा बाबी बिनै मानै ह।” 18 ईशु बाऊँ बोल्यो, “म ईश्वर नगरी'ऊँ बिजळी की जंयां शैतान न तळै पड़ता देख्यो हूँ। 19 अर सूणो, म थानै साँप अर बिछुआनै ऐडी तळै मसळबा अर शैतान की सगळी शक्तिनै हराबा ताँई ताकत दि ह। थारो कोई क्युई कोनी बिगाड़ सकै। 20 पण इ बात प राजी मना होवो की शैतान की आन्मा थारै बछ म ह पण इ बात प राजी होवो की थारा नाम ईश्वर नगरी म मण्डर्या ही।

ईशु को राजी होबो

21 बि घडी ईशु परमेश्वर की आत्मा'ऊ भरर राजी होर कह्यो, “ओ परम पिता ईश्वर नगरी अर धरती का मालीक म तेरो गुण-गान करुँ की तू अण बातानै ज्ञानि-ध्यान्या'ऊँ लखोर राखी अर अंगुठा छाप प आका भेदानै खोल्या। क्युँक तनै ओई चोखो लाग्यों।

22 मेरो बाप मनै सक्युँ दे दियो अर परमेश्वर पीता क सिवा कोई कोनी जाणै क बेटो ईशु कूण ह? अर बेटा ईशु क सिवा कोई कोनी जाणै क पीता परमेश्वर कूण ह? अर के बो जाणै जिनै बेटो ईशु बतावै। 23 जणा पाछै ईशु चेला कानी मुड़र चुपकेसीक कह्यो, “थे बडा भाग का हो जो थानै अ बाता देखबा को सोभाग मिल्यो। 24 क्युँक म थानै बताऊँ हूँ, “थे जखो देखो हो बानै बोला

परमेश्वर की खेबाला अर राजा देखबो चावै हा। पण बे देख कोनी सक्या अर जो थे सुणो हो बा बे कोनी सुण सक्या।”

चोखा सामरी की निती कथा

25एक दिन शास्त्रानै सीखाबालो बठै आर ईशुनै फसाबा ताँई बिऊँ बुज्यों, “गुरु, जुगजुग को जीवन पाबा ताँई म काँई करूँ?” 26इपै ईशु बिनै जबाब दिन्यो “इ बारा म बिधी-बिधान म काँई मंडर्यो ह? अर तू बिऊँ काँई समझै ह?” 27बो बोल्यो, “तु प्रबु थारा परमेश्वरऊँ सगळा हिया अर सगळा पिराण सगळी जान अर सगळा मनऊँ प्यार कर। अर सागै ई खुद का पडोसी’ऊँ बी खुद की जंयां प्यार कर।” 28ईशु बिऊँ कह्यो, “तु ठिक बोलर्यो ह, “ईब तु तेरै कह्या गेल करै, जणा तनै जुगजुग को जीवन मिलसी।” 29पण बो खुदनै सई दिखाबा क चक्कर म ईशु’ऊँ कह्यो, “मेरो पडोसी कुण ह?” 30जणा ईशु बिनै एक निती कथा सुणाई, “एक आदमी यरुशलेम’ऊँ यरियो जार्यो हो। जणा गेला मई बिनै डाकु मिलग्या। अर बिका गाबल्या काड लिया अर जोक्युँ बिकै कनै हो, बो सक्यं लुट-लाट बिनै ठोक-ठाकर अदमर्यो कर बठैई गेरगा। 31कुदरती बठिकी एक याजक निकळ्यो पण बो बिनै देखर मुण्डो फेर आपका गेलै चलेगो। 32अंयांई एक मनदर को सेवादार बी बठिकी आयो पण बि याजक की जंयांई बो बी मुण्डो फेर चलेगो। 33इकै पाछै बठिकी एक सामरी मुसाफिर आयो। अर बो बि आदमीनै देखयोक जणा बिनै बिपै दया आई। 34जणा बो

बिकनै आर बिका घावा प जैतून को तेल अर अँगुरी गेरर पट्टी बाँधी। इकै पाछै बिनै आपकी सवारी प चढ़ार एक धर्मशाल म लेगो। अर बठै बिकी चोखी दवा-दारूं करी। 35अर आगलै दिन बो धर्मशाल का मालिकनै दो चाँदी हाला सीङ्का काढ़र दिया अर कह्यो, “इकि दवा-दारूं करज्यो अर जोक्युँ उपर ओर लागै तो लगा दिज्यो म ओटो आवतो चुकता कर देस्यु।” 36ईशु अंयां बतार, बिऊँ बुज्यो “तेरा बिच्यार”ऊँ जिनै डाकु ठोक्या बि आदमी को बा तीन्या मऊँ पाड़ोसी कूण होयो? 37जणा बो शास्त्रानै सीखाबालो बोल्यो, “जखो बिपै दया करी।” जणा ईशु कह्यो, “जा अर तूबी बंयांई कर।”

मार्था अर मरियम क घरां ईशु

38जद ईशु अर बिकाळा चेला आपका गेला जार्यो हा, जणा बो एक गाँव म पूँच्या। बठै एक मार्था नाम की लूगाई आपका घर म बीकी मनवार करी। 39अर बिकी एक भाण हि जिको नाम मरियम हो, बा प्रबु का पगा कनै बैठर बिका बचन सूणरी ही। 40अर मार्था मिजबानी की करेडी त्यारी क बारै म चिंत्या म डुबेडी बठै आई अर बोली प्रबु मेरी भाणनै मेरो हाथ बटाबा ताँई खैवो, आ सगळो काम मेर पई गेर दियो। 41जणा प्रबु कह्यो, “मार्था सूण तु बोली बातानै सोचै ह अर बाकी चिंत्या करै ह। 42पण बस एक बात की जुरत होवै ह। अर मरियम जो चोखो ह, बिनै आप ताँई ली ह अर बो बिऊँ खोश्यो कोनी जावै।

अरदास के बारा म
ईशु की सीख

11 एक दिन अच्याँ होयो क ईशु
एक झाघा अरदास करै हो। जद
बो अरदास कर'र हट्योक जणा बिका
चेला मऊँ एक कह्यो, “प्रबु म्हानै बी आ
अरदास करबो सिखाओ। जंयां की
बतिष्ठो देबाळो युहन्नो आपका चेलानै
सिखायो हो।” 2बो बाऊँ कह्यो, “जद
थे अरदास करो जणा अंयां बोलज्यो

‘बापूः थारो पवित्र नाम ऊँच्यो मान्यो
जाय,
थारो राज आवै।

3 म्हारी रोज की रोटी रोजिना म्हानै
द्यो।

4 म्हारा पापानै माफ करो, जंयां म्हें
म्हारो बुरो करबाळा न माफ
कर्या हा,

अर म्है बिचास्या ना जावा इ
बातऊँ बचाओ।

5 अर ईशु आपका चेला’ऊ कह्यो,
“मानल्यो थार मऊँ कोइसा क एक
भाईलो होवै, अर बिकनै आधी रातनै
जार बिनै बोलै, “ओ भाइला मनै तीन
रोटचाँ दे। 6 क्युँक मेरो एक भाइलो
सफर मऊँ ईबी-ईबी मेरै कनै पुंच्यो ह
अर बिकै सामै परुसबा ताऊँ मेर कनै
क्युर्ई कोनी। 7 अर मायऊँ उवाज आवै
मनै दुखी मना करै, म सक्युँ ढक ढकार
मेरा टाबरा क सागै बिछावणा म हूँ।
अर इ टेम उठर तनै क्यूर्ई कोनी दे
सकूँ। 8 म थानै ख्यूँ बो कोनी उठै अर
क्यूर्ई कोनी दे। पण थारो भाइलो होबा
क नातै अर थारै बेशर्मा होर बार-बार

मांगंबा की बजैऊँ बोई उठर थानै थारी
जुरत गेल देसी।

9 अर इ ताऊँ म थारूँ बोलू हूँ, “माँगो
थानै मिलसी, हेरो थानै लाधसी, कुवाड़
खुड़खुडाओ जणा थार ताऊँ खोल्योजासी।
10 क्युँक जखो माँगै ह बिनै मिलै। जखो
हेरै बिनै लाधै। अर जखो खुड़खुडावै
बी ताऊँ कुवाड़ खोल्यो जावै। 11 थार
मऊँ अंयां को बाप कुण ह जिको बेटो
मछी माँगै जणा बिनै सांप पकड़ा दे?
12 अर ज बो अंडो माँगै जणा बिकै हाथ
म बिच्छु धरदे। 13 थे बुरा होर बी थारा
टाबर टीकरानै चोखी चीज देबो जाणो
हो। जणा ईश्वर नगरी म बिराजमान बो
सको बाप आपका माँगबाळानै पवित्र
आत्मा क्युँकोनी देसी?

ईशु अर ओपरी बलाया को
सरदार बालजबूल

14 एक दिन ईशु एक मिनख मऊँ गूँगी
बलायनै काडी। जद बा बलाय नीकळी
जणा गूँगो मिनख बोलबा लाग्यो, अर
आ देखर लोग ताजुब म पड़गा। 15 पण
बाम’ऊँ क्युंक बोल्या ओ तो ओपरी
बलाया का सरदार बालजबूल की
शक्ति’ऊँ आनै काडै ह। 16 दसरा बिनै
परखबो चावै हा ई ताऊँ बे ईशु’ऊँ माँग
करी की, “तू म्हानै ईश्वर नगरी की कोई
शेलाणी दिखा जिऊँ ओ बेरो पाट सकै
क तू ईश्वर कानी’ऊँ भेजेडो ह।” 17 ईशु
जाणतो हो, की बे काऊँ सोचर्या ही। जणा
बो बाऊँ कह्यो, “जि राज म फूट पड़ज्या
बो राज खत्म हो ज्यावै ह। अर बंयाईं
जी घर म फूट होवै बो घर उजड़ जावै
ह। 18 अंयाँई ज “शैतान का राज म फूट

पड़ज्या जणा बिको राज कय्यां बण्यो रेहसी? क्युंक थे मेरै बारा म स्वयो हो क म ओपरी बलाया का सरदार बालजबुल की शक्ति'ऊ बलायानै काडू। 19अर ज अंय्यां ह जणा थारला बी बालजबुल की शक्ति'ऊ काडता होगा? जणा इ बात ताँई बेर्ई थानै गळत साबित करसी। 20पण ज म परमेश्वर की शक्ति'ऊ ओपरी बलायानै काडू हूँ, जणा जाणल्यो की परमेश्वर को राज थारै कनै आलियो ह। 21जद ठाड्हो मिनख राछ ले'र आपका घर की रुखाली करै। जणा बिको घरबार बच्चो रेवै ह। 22पण जद शेर न सवा शेर मीलज्या जणा बो बिषै हमलो कर'र बिनै हरार बिका सगळा राछ खोश'र बिकी चिजानै औरा म बाँट दे ह। 23जखो मेरै सागै कोनी बो मेरै खिलाप ह। अर जखो मेरै सागै सौरै कोनी बो बिनै खिंडावै ह।

स्वाली मिनख म बुरी बलाया को बास 24जद कोई बुरी बलाय मिनख म'ऊ निकलै ह। जणा बा आराम हेरती उजाड़ म डोलै अर जद बिनै बैठैबी अराम कोनी मिलै। जणा बा खेवै ह म मेरा पूराणीया घर म जिम'ऊ म आई हू पाछी चली जास्युँ। 25अर बा पाछी आवै जणा बो बिनै भार्यो- झाड़यो अर जच्यो-जचायो लाधै। 26जणा बा जार आप'ऊ बी सात बुरी बलायानै आपकै सागै कर'र बिकै माहिनै बड़ ज्यावै। अर बि आदमी की दशा पेलड़ी'ऊ घणी बुरी होज्यावै।

बडा भाग को कूण

27अ बाता सूण'र भीड़ म'ऊ एक लूगाइ ईशु'ऊ बोली, “तनै जलम देर दूध

प्याबाली माँ बडा भाघाली ह।” 28पण ईशु बोल्यो, ईऊं बी “बडा भाघाला तो बे ही जखा परमेश्वर का बचना सूणी अर बीपै चाली ही।”

चिन - चमत्कार की माँग

29ईशु क च्यारुमेर भीड़ भेळी होगी ही। जणा बो कह्यो, “आ पिढी बोली बुरी ह। जो अ चमत्कार देखबो चावीं ही पण योना क अलावा आनै ओर कोई सेलाण कोनी दि जाय्य। 30जंय्यां निनवै का मिनखा ताँई योनो सेलाण हो। बंय्याँई इ पिढी का मिनखा ताँई मिनख को बेटो सेलाण होसी। 31शिबा की राणी न्याय हाला दिन खड़ी होर इ पिढी का मिनखा प दोष मंढसी। क्युंक बा धरती क इ कूणा'ऊं लेर बी कूणा ताँई सुलेमान क कनै ज्ञान की सीख लेबा गई, पण म थानै बताऊं अठै सुलेमान'ऊं बी बडो कोई ह। 32न्याय हाला दिन निनवै का मिनख बी खड़या होर इ पिढी का मिनखा प दोष मंढसी। क्युंक बे हा जखा योना की सूण'र आपका हियानै कुगेला'ऊं फिराया। पण अठै तो बो ह जखो योना'ऊं बी बोलो बडो ह।

दिया को काम

33“दिया न जला'र कोई बी बिनै ओला म कोनी राखै। अर न कुण्डा तळै धरै, पण बिनै ऊँचा सा आळया म धरै जिऊँ माइनै आबालानै च्यानणो दिखै। 34अंय्यां ई थारी काया को दियो थारी आँख ह। इ ताँई जद ताँई थारी आँख्या सही ह, थारी काया म बी च्यानणो ह, अर जन्नाड़ै, अ खराब होज्या बी दिनऊँ

ई थारी परी काया म अंधेरो छा ज्यासी। 35इ ताँई चेता म रेह्यो थारै मांय को च्यानणो अंधेरा म ना बदल जावै। 36ज थारी सगळी काया म च्यानणो ह। अर इका कोइसा ई कूणा म अंधेरो कोनी जणा ओ थारै प जळता दिया की जंयां जगमगासी।

ईशु फरीसी अर शास्त्रानै सीखाबालो क फटकार लगाई

37ईशु आपकी सूणा'र चूप होयो, जणा एक फरीसी बिनै आपकै घरा रोटी खाबा ताँई नूत्यो। जणा बे बिकै घरा जार चौकी प रोटी खाबानै बैठगा। 38पण आ देख'र की ईशु रोटी खाबा'ऊँ पेली बाकी रीत गेल हाथ कोनी धोया बि फरीसीनै ताजुब होयो। 39जणा ईशु बिऊँ बोल्यो, “थे फरीसी हो जखा थाळी कचोळानै बारै-बारैऊ तो मान्जो हो। पण बो मायऊँ तो गंदो को गंदो रेह बंयांई हाथ धोया काँई जद थारै माइनै लालच अर बुराई भरी पड़ी ह। 40अरै बावळो, जखो बारला हिस्सानै बणायो बो मायलानै कोनी बणावै के? 41पण जो-क्यु मायनै ह बिको दान कर द्यो, जिऊँ थारै ताँई सक्युँ शुद हो ज्यासी। 42‘पण ओ फरीसीयो, थारै प हाय ह! थे पोदिनो, कढी-पत्ता अर भाँत-भाँत की सारी-जड़ी बुटी को दसवो हिस्सो तो परमेश्वर न द्यो हो। पण परमेश्वर ताँई थारै प्यार-प्रेम अर न्यायनै टाळ दयो हो। होणो तो अंयां चायो हो की थे दुसरी बातानै छोड़र आ सगळी बातानै करता। 43फरीसीयो थारै प हाय ह! क्युंक थानै यहुदिया का अरदासहाळा घर म उच्चो

आसन अर बजारा म लोग थारै आगै हाथ जोड़ै अंयां भावै। 44हाय ह थार प! क्युंक थे बा ना दिखबाली कबरां की जंयां हो जापै लोग अणभोळ म चाली ही। 45एक शास्त्रानै सीखाबालो बोल्यो, “गुरजी अंयां खेर थे म्हारी बेज्जति करो हो।” 46जणा ईशु बिनै टको सो जबाब दियो” ओ शास्त्रानै सीखाबालो थार प बी हाय ह। क्युंक थे मिनखा प अंयां का बोझ लादो हो। जिनै उठाबो कलडो ह। अर थे बि बोजनै उठाबा ताँई बानै आँगळी को ई सारो कोनी द्यो। 47थार प हाय ह! थे बा परमेश्वर की खेबाला मिनखा की कबर बणाओ जानै थारा बडका मारगेया। 48अंयां करर थे आ दिखावो हो क थे थारा बाप-दादा क गेल चालर्या हो। क्युंक बे तो बानै मारया अर थे बाकी कबर बणाओ हो। 49जणा इ तो परमेश्वर को जान बोलै ह, “म बाकनै परमेश्वर की खेबाला अर बानै भेजस्यु जिखा भेजेडा चेला खुवावी ही। अर बे बामैऊँ क्युंकनै तो मार देसी अर क्युंकनै दिनघालसी। 50ई धरती की रचनाऊँ लेर जत्ता बी परमेश्वर की खेबाला को लोय बहायो गयो। बा सगळा का लोय को हिसाब इ पीढी का मिनखाऊँ चुक्यो ज्यासी। 51म थानै बोलू हूँ, हाबिलऊँ लेर जकरया ताँई की मोत को हिसाब, जीनै मन्दीर अर बलीनै जळाबा की झाघा क बीच म मार्यो गयो हो। बा सगळा ताँई ई पीढ़ि का मिनखाऊँ लेखो लियो जासी। 52शास्त्रानै सीखाबालो हाय ह थार प! थे थार हाथ म ज्ञान हाळा घर का ताळा की ताळी तो लेली। पण न तो खुद बढया

अर न दसरानै बढबा दिया। ५३ अर जद ईशु बैठेऊँ चलेग्यो जणा बे फरीसी अर शास्त्रि बिऊँ बेर बांध लिन्यो अर बोली बाता म बिऊँ उळजबा लागगा। ५४ क्युँक बे हा जखा बिनै बिकी ई बात म उळजाबा की फिराक म हा।

ढोंग क खिलाफ ईशु की सीख

12 जद हजारा की तदाद म मिनख बैठे पग धरबा की ई जगा कोनी ही जणा सऊँ पेली ईशु आपका चेलानै कह्यो, “फरिसया का खमीर’ऊँ बचर रेह्यो-मेरो मतबल बाकै ढोंग’उ ह। २ जो’क्यु बंद ह बो खोल्यो ज्यासी। अर जो क्यु ओला म ह बो चोड़ा म ल्यायो ज्यासी। ३ जो’क्यु थे अंधेरा म कहो बो दिन का चानणा म सुण्यो ज्यासी। अर जो’क्यु थे कोठा म बड़र कुळबै-कुळबै काना म कही ही बिको हेल्लो छात पऊँ पाड़यो ज्यासी।

बस बी मालिक’ऊँ डरो

४ मेरा भाईड़ो म थारऊँ बोलूँ हूँ, “बाऊँ मना डरो जखा थारी कायानै नुकसान पुंचाबा क अलावा ओर क्युई कोनी कर सकीं। ५ पण म थानै चिताऊँ हूँ की परमेश्वर’ऊँ डरो जखो थानै मार’र नरग म गेरबा की ताकत राखै ह, सगळा बिऊँ इ डरो। ६ दो तांबा का सिका की पाँच चिड़कल्याँ कोनी बिकै के? इकै बावजूद बि परमेश्वर एक न इ कोनी भूलै। ७ थारै सीर को एक-एक बाल बी गीणेड़ो ह। डरो मना थे तो चिड़कल्याँऊँ बढ़र हो।”

ईशुनै मानबो अर न मानबो

८ “म थानै खेवूँ हूँ जखो कोई मिनखा क सामै मनै मान लैसी। जणा म मिनख को बेटो बी परमेश्वर क दूता क सामै बिनै अपणा लैसी।” ९ पण जखो मिनखा क सामै मनै कोनी मानसी। जणा म बी बिनै परमेश्वर क दूता क सामै कोनी अपणास्यु। १० एक मोसर बि मिनखनै तो माफ कर्यो जा सकै जखो मिनख का बेटा क बारा म क्यु गळत बोलै। पण जखो पबितर आत्मा क बारा म गळत बोलसी बिनै माफ कोनी कर्यो जासी। ११ जद थानै पकड़र अरदास करबाला घर का अगुवा क सामै नहिस राजा या न्याय करबाला क सामै लेज्यावै। बी टेम थे चिंत्या मना करज्यो की थे थारा बचाव म काँई बोलनो ह? १२ क्युँक पबितर आत्मा बी घडी थानै आपैइ सिखा देसी की थानै काँई खेणो चाये।”

खुद की गरज चोखी कोनी

१३ भीड़ मऊँ एक जणो ईशुऊँ बोल्यो, “गुरु मेरा भाइड़ानै बोल की बो बाप की जायदाद की पाँति करले। १४ आ सुण’र ईशु कह्यो, “अरै भला मिनख मनै थारी पाँति करबालो नहिस पंच कूण बाणायो?” १५ अर ईशु कह्यो, “चेता म रह्यो अर सगळी तर्या का लोभ लालचऊँ बच्या रह्यो क्युँक जीवन म धन दोलत इ सक्युं कोनी।” १६ बो बानै नितीकथा कही, “एक पीसाला मिनख क चोखी पैदावार होई। १७ जणा बो आपका मन म सोचबा लागयो की नाजनै म कठै धर्हूँ। क्युँक मेर कनै तो इनै धरबा ताँई कोई

झधार्ड बोनी। 18 पाछे बो कह्यो, “म अंय्यां करस्युँ क बुखारयाँ न तोड़र अणऊँ बडी-बडी बुखारी चिणवास्युँ अर बठै ई मेरो ओ सगळो नाज अर बाकी की चीजा धरस्युँ। 19 अर म मेरा जीवडाऊँ कहस्युँ, अरै जीवडा तेर- कनै अत्तो नाज अर धन दोलत ह की बरसाई कोनी निमडै। जणा आराम कर मजाऊँ खापी अर मजा लुट। 20 पण ईश्वर बी’ऊँ बोल्यो, “अरै बावळा आज ई तेरो जिव तेर मऊँ काढ लियो जाय जणा तेरा इ धन-दोलत को काई होसी। 21 बो मिनख बी अंय्यां ह जखो आप ताई धन भेळो करै, पण ईश्वर की नजरा म बो क्युंई कोनी।”

परमेश्वर ऊँ बडो क्यूंई कोनी

22 जणा ईशु आपका चेलाऊँ बोल्यो, “थे थारा जीव की चिंत्या करबो छोड़द्यो की थे काई खास्यो अर कथ्याऊ थारी कायानै ढकस्यो? 23 क्युँ’क गाब्बा’ऊँ काया अर रोट्याऊँ जीव बडो ह। 24 कागलानै देखो बे न तो बोचीं अर न काटी अर न ई बाकनै भेळो करबा ताई नाज की बुखारयाँ इकै पाछै बी परमेश्वर बानै चुगो देवै। जणा पाछै थे तो पंछ्याऊँ बोळा-बोळा बडर हो। 25 थार मऊँ कोई इसो ह के जखो चिंत्या कर आपकी उमरनै चिन्नी-सी बी बढा सकै? 26 थे अत्तो-सोई कोनी कर सको जणा पाछै दसरी बाता की चिंत्या क्युँ कर्याकरो हो? 27 जंगली फूलानै देखो बे कथ्यां बढच्या जाई ही! बे न तो क्युँ महनत करीं अर न इ खुद ताई गाब्बा बणावीं। अर म थार ऊँ खेवूँ सुलैमान बी

आपका राजपाट म बामैऊँ एक क जंय्यां का ई गाब्बा कोनी पेर्या। 28 ओ थोड़ो बिश्वास राखबाळो जंगल म उगबाळी घास जखी आज ह अर तड़कै बाळी जासी बिनै ई परमेश्वर चोखा गाब्बा पिरावै। जणा पाछै बो थानै इऊँ कत्ता ई चोखा गाब्बा क्युँ कोनी पीरासी? 29 अर थे इ बात की चित्या मना करो की काई खास्यो अर काई पिस्यो। 30 क्युँ’क दूनियाँ का सगळा मिनख अण चीजा क गेल भागर्या ही। पण थारा बापनै ओ बेरो ह की थानै अण चीजा की जुर्त ह। 31 पण थे तो परमेश्वर का राजनै खोजो, बाकी की सगळी चिजा थानै आपई दे दि जासी।” 32 मेरा छोटा रेवड़ डैरे मना, शारो बाप परमेश्वर थानै आपको राज देबो चावै।

पिसा प भरोसो मना करो

33 अर थारी सगळी चिजानै बेच’र जखो धन मिलै बिनै गरीबा म बाँट द्यो। अर खुद ताई अंय्यां का बटुवा सिवो जखा कणाई पुराणा ना होवै। मतबल ओ ह की कणाई न निमड़ बालो धन ईश्वर नगरी म भेळो करो। जठै न बिकै चोर लागै अर न कीड़ा मकोड़ा। 34 क्युँ’क जठै थारो धन ह बठै इ थारो मन रेहसी।

चेता म रेहबाळा दास

35 “कड़त्यू बाँध ल्यो अर दिया जळार राखो, 36 अर थे बा दासा की जंय्यां इनै उडिकता रह्यो की बाको मालिक ब्याह मऊँ के बेरो कणा आर किवाड़ बजावै। अर बे फट इ बि ताई किवाड़ खोल दे। 37 बे दास बडा भाग-हाला ही, जखा

मालिकनै चेता म लाधै। अर म साँची-साची रख्यु हु, “बो बी आपको गमछचो खोलर बान बिठार रोटी परुससी। 38जणा इब चाए बो आधी क आवै अर चाए आधी क पाछै ज बो बानै चेता म पावै जणा बे दास बडा भाग-हाळा ही। 39पण आ जाण ल्यो ज घर का मालिकनै ओ बेरो होतो की चोर की टेम आसी जणा बो चोरनै घर म आबाई कोनी देतो। 40इब थे बी चेता म रेह्यो क्युँ क मिनख को बेटो बी बि टेम आसी जी टेम क बारा मे थे बिच्यार ई कोनी कर सको।”

भरोसा जोगो दास कूण

41जणा पतरस बोल्यो, “ओ प्रबु आ निती कथा थे म्हार ताँई बोलो हो, नहिस सगळा ताँई?” 42आ बात सूणर ईशु बोल्यो, “समझदार अर बिश्वास जोगो दास कूण ह? जिनै बिको मालिक घर चलाबा अर दुसरा दासानै टेमुटेम रोटी-टुक देबा ताँई मुकदम बणावै ह। 43अर बो दास भागाळो ह। जखो आपका मालिक क पाछो आबा प बिनै बिका कह्या गेल करतो लाधै। 44म साँची-साँची बोलू हु बो बिनै आपकी सगळी जमिन जायदाद प मुकदम बणासी। 45पण ज बो दास आ सोचर क मेरा मालिकनै तो हाल आबा म टेम ह, अर बो पीया चरी करर दुसरा दास दासयानै मारबा कूटबा लागज्यावै। 46जणा बिको मालिक बी दिन आ ज्यासी जी दिन क बारा म बो सोच्यो ई कोनी। अर बिको मालिक बिका टुक-टुक कर देसी अर बिको भाग बात न मानबाळा क सागै होसी। 47बो दास जखो आपका मालिक

की इंच्छा जाणर बिका कह्या गेल कोनी रीयो बीपै जोर की मार पड़सी। 48अर जखो दास मार खाबा को काम कर्यो पण मालिक की इंच्छा’ऊँ अणजाण हो बिकै थोड़ी मार ई पड़सी। जणाई तो म बोलु हु जिनै घणो दे राखयो ह बिऊँ घणो माँगसी, अर जिनै बोळो सोप राख्यो ह बिऊँ बोळो लेसी।

फूट को कारण

49“म धरती प लाय लगाबा आयो हु, अर मेरी आ ईछ्या ही की आ इबी को स्यात इ सुलग जावै। 50पण मनै तो एक दुखा को बतिष्ठो लेणो ह अर जद ताँई म बिनै न लेल्यू मनै चैन कठै? 51थे काँई सोचो हो की म धरती प मेळ-मिलाप कराबा आयो हु? नई, पण म तो फूट गेरबा आयो हु। 52क्युँ क ईब’ऊ एक घर म ज पाँच जणा ही जणा बे एक दुसरा क खिलाप होज्यासी, तिन ह जखा दो क अर दो ह जखा तीन क। 53बाप बेटा क अर बेटो बाप क, माँ बेटी क अर बेटी माँ क सासू भुह क अर भुह सासु क खिलाप होज्यासी।”

टेम की पिछाण

54बो भीड़’ऊ बी कह्यो, “जद थे अगुणा’ऊ बादळानै आतो देखो। जणा झट ख्यो हो क आज तो मी आसी अर साच्याँ ही मी आवै। 55अर जद आथुणा’ऊ भाल चालै जणा बोलो हो लू चालसी अर अंय्याई होवै। 56जणा ओ कपटयो जद धरती आकास का रंग-रूप न देखर बिका हाल बता द्यो हो। जणा पाछै इ जुग म काँई होर्यो ह बिनै क्युँ कोनी जाणो?

बेर्या'ऊ सुळजेटो

57“काँई सही ह अर काँई गळत ह इकै बारा म थे खुद ई फैसलो क्यु कोनी करल्यो? 58ज कोई तेरै खिलापत म मुकदमो लेर आवै। अर तनै कचेरी म लेज्यावै जणा चोखो ओई ह क बि'ऊ कचेरी म जाबा'ऊ पैल्याई सुळजेटो करले। नहीं तो बो तनै पंच क कनै लेज्यासी। अर पंच तनै सिपाईड़ा क हाथा म देदेसी। अर सिपाईड़ा तनै काळ कोठड़ी म बंद कर देसी। 59म तनै बोलू हाँ, तू बठै'ऊ जद ताँई कोनी छुटसी जद ताँई पाई-पाई न चुकती करदे।

मन फिराओ

13 बि टेम बठै भेळा होयडा मिनख ईशुऊँ कह्या, पिळातुस क्युंक मिनखानै मरवाबो को हुक्म दिन्यो जद बे चढावो चढार्या हा। 2आ सूण ईशु बानै जबाब दिन्यो, “थे काँई सोचो हो बे अ सगळी बाता भगत्या, जणा काँई बे दूसरा गलीलयाऊँ घणा पापी हा? 3नई, पण म था सगळा'ऊ खेऊँ हु, ज थे बी थारा पापा'ऊँ कोनी फिरस्यो। जणा थार म बी आइ होसी जंय्यां बे मरया हा बंयांई थे बी मरस्यो। 4अर थे काँई समझो हो, की जद शिलोह को गुम्मट गिर्यो बी टेम का बिकै नीचै दबर मरबाळा अठारा जणा दुसरा यरुशलेम म रेबाळा जिंदा मिनखाऊँ घणा पापी हा के? 5नई, पण म थारऊँ खेऊँ हु ज थे बी मननै कोनी बदलस्यो। जणा थारै सागै बी अंय्यां ई होसी जंय्यां बे मरया बंयांई थे बी मरस्यो।”

बिना फळा को दरखत

6पाछै बो बानै समझाबा ताँई एक निती कथा कही, “कोई आदमी हो अर बिकै एक अंगूरा की बाड़ी ही। अर बी बाड़ी म एक अंजीर को दरखत लागर्यो हो। जणा बो बि दरखत का फळ तोड़बानै आयो पण बिनै बिमै एक इ फळ कोनी दिखयो। 7आ देखर बो मालिक बि बाड़ीनै समाळबाळा माळी'ऊ कह्यो, ‘मनै तीन बरस होगो इ बोजानै देखता इमै एक इ फळ कोनी लाग्यो। ईब तु अंय्यां कर इनै काट दे क्युंक ओ झुठी ई झँघा रोक राखी ह।’ 8जणा बो माळी बी मालिक'ऊँ हाँथ जोड़र कह्यो, ‘इनै इ बरस तो ओर देखल्यो म इमै ईबकै खोदी देर ओर खाद देस्यु। 9इकै पाछै ओ फळ दे तो ठिक नहीस इनै काट दिज्यो।’”

आराम हाळै दिन लूगाईनै निरोगी करबो

10आराम हाळै दिन ईशु अरदास करबाळी एक झँघा सीख दर्यो हो। 11बठै एक लूगाई ही जिमै अठारा बरस'ऊँ ओपरी बलाय रळरी ही। अर बा बलाय बिनै अपाईज कर राखी ही। अर बा आपकी बिमारी की बजै'ऊँ लुड़ड़ी रेहती। 12ईशु बिनै देखर आपकै कन्नै बुलार खयो, “माई जा तु तेरी बिमारी'ऊँ निरोगी होगी।” 13अत्तो खेर बो बिका माथा प आपको हाथ धर्यो। अर धरता इ बा सीधी होगी अर नाचती गाती इशबर को गुणगान गाब्बा लागगी। 14ईशु बिनै आराम हाळै दिन निरोगो

कर्यों आ बात एहूदि अरदास घर का मुख्या क कोनी जच्छी, जणा बो रीस-खार बठै भेला होयड़ा मिनखा'ऊँ खड़यो होर खेबा लाग्यो, “काम करबा ताँई छ: दिन ह अर बा छ: दिना मई आर आप-आपकी बिमारी'ऊँ गेल छुड़ावो पण आराम हाँझे दिन निरोगा होबा मना आवो।” 15जणा प्रबु बानै जबाब दिन्यो, “अै औ कपट्यो, थे कथ्यां आराम हाँझे दिन थारला गदेड़ा अर बल्दनै ठाण म'ऊँ खोल'र पाणी पयाबा लेज्यावो हो। 16थे जद आराम हाँझे दिन अंत्यांका काम करो। जणा फेर बा लूगाई जखी अब्राहम की छोरी ह, जिनै शैतान अठारा बरसा'ऊँ बाँध राखी ही बिनै शैतान'ऊँ आराम हाँझे दिन कोनी छुटाणो चाये के?” 17बो जद अंत्यां कह्यो, जणा बे बोलबाळा की गुद्दी निची होगी। अर बठिनै भीड़ ही जखी बिका करेड़ा ताजुब भर्या कामा न देख-देख'र राजी होरी ही।

राई का दाणा अर खमीर की निती कथा

18ईशु बुज्यों, “परमेश्वर को राज किकै जंयां को ह अर म बिकी बराबरी किऊँ करुँ? 19बो तो राई क दाणा की जंयां को ह, जिनै एक मिनख आपकी बाड़ी म बोयो अर बो बढ'र बोजो होयो, चिड़कल्या अर उड़बाळा जानबर बिकी डाळ्या प घुर्षलो घाल्या।” 20ओज्यू ईशु बुज्यों, “म परमेश्वर का राज की बराबरी किऊँ करु? 21ओ बि चिनासाक खमिर की जंयां ह, जिनै लेर एक लूगाई घणा सारका आटा म रळाई अर देखता देखता सगळा आटा को खमिर उठगो।

सकड़ो बारनो

22ईशु जद नगर्या-नगर्या अर गाँव-गाँव का मिनखानै परमेश्वर की सीख देतो यरुसलेम जार्यो हो। 23जणा बि टेम कोई बिंकु बुज्यों, माराज के थोड़ा ई मिनख बचाया जासी? ईशु बिऊँ कह्यो, 24“सकड़ा बारना होर परमेश्वर का राज म बड़बा ताँई मेनत करो क्युंक बोला जणा माइनै बड़बो चासी पण कोनी बड़ सकिंगा। 25जद घर को मालिक खड़यो होर बारनो ढक लेसी, अर जणा थे बारनै खड़्या हो'र कुवाड़ खुड़कास्यो अर गिड़गिड़ास्यो, ‘माराज, म्हार ताँई किवाड़ खोल द्यो। पण बो थानै खेसी ‘मनै कोनी बेरो थे कुण हो अर कठै'ऊँ आया हो।’ 26जणा थे खेस्यो म्हे तैर सागै खाया-पिया अर तु म्हारा गळीयारा म म्हानै सीख दिनी ही। 27पण बो तो एक ई बात खेसी, ‘म कोनी जाणू थे कुण हो अर कठै'ऊँ आया हो। अै बुरा काम करबाळो मेरी आख्यां क आगैऊँ चल्या ज्यावो।’ 28थे इब्राहीम, इसाक, याकूब अर दूसरा परमेश्वर की खेबाळानै परमेश्वर का राज म देखस्यो। पण थानै बठै'ऊँ बारै काड्यो जासी जठै थानै दात पीसबो अर कन्पट्या हाथ धर'र रोणो होसी। 29इकै पाछै च्यारूँ दिशा'ऊँ मिनख आ'र परमेश्वर का राज म जिम्बा बेठसी। 30अर जखा बठै आगनै ही बे गेलनै अर गेलड़ा आगनै होज्यासी।”

हिरोदेस को बेर

31बि टेम ईशु क कनै क्युंक फरीसी आ'र बोल्या, “हिरोदेस तनै ज्यान'ऊँ

मारबो चावै ह इ ताँई तू अठैँऊँ पैरे चल्योजा।” ३२जणा बो बाऊँ कह्यो, “जार बि लूगंटीनै बोलद्यो म आज अर तड़कै ओपरी बलायानै लोगा मऊँ काडस्यु अर रोगलानै निरोगो करस्यु। अर तीजै दिन मेरो काम पूरो करस्यु। ३३इकै पाछै बि मनै आज तड़कै अर परस्यु चालतो ई रेट्णो पड़सी। क्युँकै परमेश्वर की खेबाळा पकाई यरुशलेम म ई मरै हा।”

यरुशलेम ताँई छाती पिटबो

३४“ओ यरुशलेम! ओ यरुशलेम! तू परमेश्वर की खेबाळानै मारै ह अर जानै परमेश्वर तेरे कनै भेजै, बापै भाठा बगावै ह। जंयां मुर्गा आपका चुजानै पंखा क तळे लुखार राखै ह बंध्याई म कत्ती बार तेरा मिनखानै मेरी छाया म भेळो करबो चायो पण तू आ कोनी होबा दि। ३५देख ओर्यो तेरो मंदर जखो परमेश्वर क हाथा उजड्यो पड़यो ह अर म तेरु ख्यूँ हु, जद ताँई तू तेरा मुन्डाऊँ आ कोनी खवेदै की प्रबु का नामऊँ आबाळो धन्यै ह, जनाउँ ताँई तू मनै कोनी देखसी।

ईशु रोगलानै निरोगो कर्यो

१४ एक बार यहुदि मिनखा क आराम हालै दिन ईशु मान्याथान्या फरिसया मऊँ एक क घरा रोटी जिमबा गयो, अर बठै लोग बिपै आँख धरया बैठचा ई हा। २बठै एक आदमि बिकी आँख्या क सामै हो। जिका हाथ पग पाणी भरबा की बजैऊँ सुजर्या हा। ३आ देखर ईशु शास्त्रानै सीखाबाळा अर फरिस्याऊँ बुज्यों, “आराम हालै दिन

कोईनै निरोगो करबो बिधी-बिधाना गेल सही ह क कोनी?” ४पण बे क्युँई कोनी बोल्या, जणा ईशु बिनै पकड़यो अर निरोगो करर बिनै भेज दिन्यो। ५जणा पाछै बो बानै कह्यो, “ज थारो छोरो नहिस्तो बल्द कुआ म पड़ज्या जणा थे आराम हालै दिन होबा की बजैऊँ बिनै तावळासा कुआ मऊँ कोनी काडो के? ६पण इ बात को बाकै कनै कोई जबाब कोनी हो।

खुदनै छोटो करर मिजमानी करबो

७जद ईशु आ देख्यो की बुलायड़ा पावणा जिमबा बैठबा ताँई चोखी चोखी झाघा टोर्या हा। जणा ईशु बानै सिखाबा ताँई एक निती कथा कही, ८“जद थानै कोई ब्याह म जिमबा ताँई बुलावै जणा थे खुद जार चोखी झागा प मना बैठज्यो, क्युँकै अंयां न होवै के बो तेरु बी बडानै नूत राख्यों होवै। ९अर थार दोन्यानै नूत बाळो आर तेरैऊँ खैवै, ‘ईनै अठै बैठबा दे।’ जणा तनै शर्मऊँ आँख्याँ झुकार सऊँ निचली झाघा म बैठणो पड़सी। १०ई ताँई जद थानै नूतो मिलै जणा थे जार सऊँ निचली झैंघा बैठज्यो, क्युँकै थानै नुतो देबाळो थानै आर देखसी जणा बो खेसी “ओ भाईला अठै क्याले बैठयो ह उपर आर बैठ। जणा थारै सागै बैठबाळा म तेरो मान और बढ ज्यासी। ११क्युँकै जखो खुदनै ऊंचो दिखासी बिको सिर सकै सामै निचो कर्यो ज्यासी अर जखो खुदनै निचै दिखासी बिको सिर ऊंचो कर्यो ज्यासी।”

१२इकै पाछै ईशु आपका नूतबाळाऊँ कह्यो, “जद बी तेरे कोई काण-ठिच्छो

होवै जणा तू सगा संबन्धिया, भाईड़ा अर पिसा हाळा मिनखा, अर भाईलानै मना बुलाजे क्युंक बे बी आपका ठिच्छा म तनै नुतर इको बदलो उतार देसी। 13पण तू कोई काण करै जणा गरिब, लँगड़ा-लुला अर आँधानै बुला। 14आ बात तेर ताँई आसिरवाद होसी क्युंक बाकै कनै तेरो बदलो उतारबा ताँई क्युंई कोनी। अर इको बदलो परमेश्वर तनै बि दिन देसी जि दिन धर्मा मर्या पाछै ओज्युं जी उठसी।”

बड़ा ठिच्छा की निती कथा

15ईशु की सुणर बिकै सागै चोकी प बैठर जिमबालो एक जणो बिऊँ कह्यों, “बे कत्ता भागहाळा ही जखा परमेश्वर का राज म बैठर जिमसी।”

16जणा ईशु बिऊँ कह्यो, “कोई मिनख बडो ठिच्छा करै हों, अर बो बिमै आबा ताँई बोला जणानै नुतो दिन्यो। 17जद बा जिमबा की घडी आई जणा बो जिमबा ताँई सगळानै आपको आदमी भेजर बुलावो दिवा भेज्यों, क आबो स क्युंत्यार ह।

18पण बे सगळा का सगळा टाळम-टोळ करबा लाग्गा। पेलो कह्यों, ‘म एक खेत मोल लियो हूँ अर बि खेतनै जा’र मनै समाळनो ह, म तो माफी चाऊँ हूँ।’ 19पाछै बो दुसरा कनै गयो जणा बो कह्यों, ‘म तो आज इ पाँच जोड़ी बल्द मोल लिया ही अर म बानै बिचासण जार्यो हूँ। दया कर मनै माफ इ करो।’

20एक जणो और कह्यों, ‘म तो लूगाई ब्यार ल्यायों हूँ जणा म कोनी आ सकुँ।

21जणा बो दास हो जखो सगळी बात आर आपका मालिकऊँ खी आ सुण

झाळा भरर बो मालिक हो जखो आदेश दिन्या तावक्लासो जा अर नगरी क माहिनै जत्ताबी गछियारा अर बजारा म लुला-लंगड़ा अर मंगता ही बानै बुला-त्या। 22दास पाछो आर बिऊँ कह्यों, “मालिक जो कह्यों हो बो म कर दियो पण ईब बी बोली झाँघा बच्चगी। 23जणा बो मालिक हो जखो ओज्युं बिनै कह्यो, “तू जा अर गछियारा अर सड़का प जिता बी मिनख लाधै बानै हाथ जोड़र अठै लिया, जिऊँ मेरो घर भर्यो-भर्यो दिखै। 24अर म थारऊँ रुयुँ हूँ, जिनै म सऊँ पेली नुतो भेज्यो हो बामऊँ एकई, इ जिमणबार को गास्योई कोनी ख्वा।”

चेला बणाबा को मोल

25जद ईशु क गेल-गेल भीड़ की भीड़ जारी ही बि टेम ईशु गेलनै मुड़यो अर भीड़ऊँ कह्यों, 26“ज कोई मेरो चेलो बणबा की ईच्छा राखै ह। अर मेरऊँ ज्यादा आपका माँ-बाप, बाल्ड-बच्चा, भाई-भाण अर खुदऊँ प्रेम करै ह जणा बो मेरो चेलो कोनी बण सकै। 27अर जखो बी मेर ताँई दुख उठाबा अर मरबानै त्यार कोनी बो मेरो चेलो कोनी हो सकै।

28ज थार मऊँ कोई बडी सारी मचाण बणाबो चावै जणा के बो पेली आपको हिसाब-किताब जोड़र आ कोनी देखसी की मेर कनै इनै बणाबा ताँई पिसा-पाई पुरा हींक कोनी? 29कदै अंय्यां ना होज्या बो निम-निम भरके रेज्या, ज अंय्यां हो ज्यावै तो देखबाला आ खेर बिकी हँसी उडासी। 30ओ बणाबा तो लागगो पण बिनै पूरो कोनी बणा

सक्यो। 31 नहीं स्तो कोई अंयांलको राजा ह, जखो दूसरा राजाऊँ बिस हजार की सेना लेर लड़बा जावै। अर बिकै चढाई करबाऊँ पेलीइ बिको सामलो राजा ओ कोनी बिच्यारै क म दस हजार की सेनाऊँ बिकी बिस हजार की सेना को सामनो करलएस्यूँ क कोनी? 32 नहीं स बो बि राजा की सेना क दुर रेहता ही आपको दुत भेजर स्यांतिऊँ बात सलटासी। 33 अंयांई सक्युँ तज्या पेली थे मेरा चेला कोनी बण सको।”

बे सुवादलो नमक

34 नमक चोखो ह पण ज बो आपको सुवाद खोद्ये जणा बिनै कथ्याँ नमकिन कर्यो जा सकै ह? 35 न तो बो माटी क अर न ही खाद क काम आ सकै। लोग बिनै अंयांई बारनै बगा दि हीं। जिकै सुणबा ताँई कान ही बो सुणल्यो।”

खुईड़ी लल्डी

15 एक बर चुंगी लेबाला अर पापी ईशुनै सुणबा ताँई भेला होया। 2 जणा फरीसी अर शास्त्रानै सीखाबाला आपसर्या म बड़बडाबा लाग्या, ओ तो पापीयाऊँ मीलै अर बाकै सागै खावै। 3 जणा ईशु बानै एक निती कथा सूणाई।

4 “मानल्यो थार मऊँ कोयसा क कनै सौ लल्डयाँ ही अर बामैऊँ एक खुज्याँ जणा थे काँई करस्यो? के बा निन्याणमनै बठैई छोडर जद ताँई बा खुईड़ी लल्डी कोनी मिलज्यावै बिनै कोनी दुँडस्यो? 5 अर जद बा खोईड़ी लल्डी लाध्द ज्यावै जणा थे बिनै राजी होर थार कंधा प चढार थारै घरा ल्यावो हो। 6 अर घरा

आबा क पाछै थारा आडोस-पडोस अर थारा भायलानै बुलार बाकै सागै लल्डी मिलबा की खुशी मनावो हो।

7 म थानै बोलू हूँ अंयांई मन फिराबाला पापी की खुशी ईशबर नगरी म ओर बि घणी होसी। जत्तो की बा निन्याणवै धर्मियाँ क बदलै कोनी होवै जानै मन फिराबा की जुरतई कोनी।

खोयड़ो चाँदी को सिङ्को

8 नहिस तो अच्या सोचो एक लूँगाई ह अर बिकै कनै दस चाँदी का सिङ्को ही जिमैऊँ एक खुज्या, जणा बा जद ताँई बो सिङ्को मिल न जा घरनै झाडी भारती अर दियो लेर बिनै सूल टोती कोनी रे के? 9 अर जद बा बी सिङ्को न टोले। जणा पाछै बा राजी होर आपकी भाईल्या अर आस-पडोसनै बुलार बानै बोलै ह मेरो खोयड़ो सीक्को पाछो मीलगो। 10 म थारुऊँ बोलू हूँ ठिक अंयांई जद कोई पापी मन फिरावै ह। जणा परमेश्वर का दुता क सामै खुशी मनाई जावै ह।”

खाऊँ उडाऊ बेटो

11 इकै पाछै ईशु कह्यो, “कोई मिनख हो बिकै दो छोरा हा। 12 छोटक्यो छोरो हो जखो आपका बापऊँ आपकी पाँती माँग ली जणा बो बाप आपकी सगळी जायदाद दोन्यूँ बेटा म बाँट दी।

13 थोडाई दिन बित्या जणा बो छोटक्यों छोरो आपकी पाँती को सगळो धन भेलो करर दुर दिसावर चलेगो। अर बठै बि धन न उदफेली म उडा दियो। 14 अर जद बो सगळो धन बिलै लगा दियो, जणा बा दिना म बि देश म घणो जोर को

काल पड़यो। अर बिकै तो खाबा काई लाला पड़गा। 15जणा बो बी देश का एक मिनख क मजुरी करबा गयो। अर बो बिनै आपका खेत म सुलडा चराबा को काम दिन्यों। 16बो आ सोच'र की कम'ऊ कम बठे पेट भरबा ताँई मटर का छिलकाई मिलज्यासीं। जिनै सुलडा खाया करी ही, पण कोई बिनै एक छिलको ई कोनी दियो। 17जद बो आपका आपा म आयो तो बड़बड़ाबा लाएयो मेरा बाप क कनै कत्ता ई मजुर ह जखा धाप'र खावी हीं बिकै पाछै बी बाकनै बच ज्यावै ह। अर म अठै बास्यो मरू हूँ। 18जणा ईब म मेरा बापुजी क कनै जास्यु। अर बाऊँ खेस्यु बापुजी म परमेश्वर क अर थारै खिलाफ पाप कर्यो हूँ। 19मेरा करम अंयां का कोनी की ईब म थारो बेटो खुवाऊ। ईब थारऊँ हाथ जोड़'र अरदास ह की थे मनै थारो मजुर समझार राख ल्यों। 20“आ ध्यार'र बो आपका बाप कनै चाल पडच्यों, अर बो जद घरा'ऊँ क्युंक दुर हो जणा बीका बाप की निंग्या बिपै पड़ी, आपका छोरानै देख'र बिको हेज पावस्यायो अर बो भागर बिनै आपकी छाती'ऊँ लगा'र बिका माखा लिन्या। 21जणा पाछै बो छोरो आपका बापऊँ कह्यों, ‘बापुजी म परमेश्वर अर थारी खिलाफ बोला पाप कर्या हीं, जणा ईब म ई जोगो कोनी की थे मनै बेटो खेओ।’ 22पण बिको बाप आपका दासानै कह्यो, ‘जावो अर तावळा सा बढियाऊँ बढियो गाबो ल्यार मेरा छोरानै पिरावो इका हाथा म मुन्दडी अर पगा म जुत्यां पिरावो। 23अर मोटो तगड़ो ज्यानबर काटो अर बिनै

आपा सगळा मिलर खास्या अर खुशी मणास्या। 24क्युंक मेरो छोरो जिखो म्हार कानी को मरया समान हो, बो पाछो जियायो ओ गुमगो हो, जखो ईब लाध्यों ह।’ अर बे सगळा मिलर खुशी मनाबा लाग्या। 25अर बी टेम बिको बडोडो बेटो जखो खेत'ऊँ घरा आर्यो हो अर ज्युंई बो घरा क कनै पुचयों जणा बिकै काना म नाचबा-गाबा को रोळो पड़यो।’ 26जणा बो एक दासनै बुलार बुज्यों, ‘ओ काँई होर्यो ह?’ 27दास बिऊँ कह्यों, ‘तेरो भाईडो पाछो घरा आगो ह। अर तेरो बाप बिकै राजी खुशी आबा की बजै'ऊ एक मोटो तगड़ो ज्यानबर कटवायों ह।’ 28अत्ती सुणताँई बो लाल तातो होगो अर मरोड़ कर माइनै इ कोनी गयो, जणा बिको बाप हो जखो बारै आर बिनै मनाबा लाग्यो। 29बो आपका बाप'ऊँ कह्यों, ‘मं बरसा'ऊ थारी सेवा एक दास की जंयां करतो आर्यो हूँ, अर थारो अंयां को कोई हुक्म कोनी जखो म कोनी मान्यो हो, ईके बावजुद बि थे मनै कणाई एक टाँट को बघ्यियो ई कोनी दियो की मं बिनै मेरा भायला क सागै मिलर खाऊँ। 30पण तेरो ओ बेटो जखो तेरी धन-दोलतनै रांडबाजी म उडा दी, बो आयो जणा मोटो-तजा ज्यानबर कटवा दिन्यो।’ 31जणा बो बाप कह्यों, ‘बेटा तु सदा ई मेरै सागै हो अर जो क्युं मेरो ह बो सक्युं तेरो ई तो ह। 32पण ईब आपनै राजी होणो अर खुशी मनाणो चायै। क्युंक ओ तेरो भाईडो जखो आपणै कानी को मरयो समान हो पाछो जी आयो ओ गुमगो हो ईब लाध्यायों।’

चलाक मुन्शी

16 ईशु आपका चेलाऊँ कह्यों, “कोई साऊकार हों! बिकै एक मुन्शी हो जिपै ओ बलेम लगायों गयो की बो बिका धनै सनकै-सनकै ठिडै लगायों ह। २जणा बो साऊकार हो जखो बिनै बुलार कह्यों, ‘म तेरा बारा म आ काँई सुणर्यो हूँ? ईब तू अंयां कर बे बही-खाता त्यार मनै हिसाब किताब दे, क्युं’क ईब म तनै मुन्शीपुणा प कोनी राख सकुं।’ ३जणा बो मुन्शी आपका मना म ई कह्यों, ‘आ तो गडबड होगी ईब म काँई करस्यु? क्युं’क ईब साऊकार मनै काम प तो राखसी कोनी अर तगारी मेरुं गौरै कोनी, माँग के खाबा म मनै शर्म आवै। ४ईब म जाणगो मनै काँई करनो चायै जि’ऊँ मेरो काम छुटबा क पाछै लोग आपकै घरा म मेरी आव भगत करी।’ ५जणा बो साऊकार का सगळा कर्जदारानै एक एक कर बुलाया। अर पेला मिनखनै बुज्यों, ‘तेरपै मेरा मालिक को कत्तो कर्जो ह?’ ६जणा बो कह्यों, ‘मुन्शी जी मेर प तो साऊकार को सौ पिपा तेल मण्डर्या ही’, जणा बो मुन्शी कह्यों, ‘आले बही अर तावळोसो ईनै पचास पिपा करदे।’ ७अंयां ई दूसराऊँ बुज्यों, ‘हाँ बोल तेर प कत्तो कर्जो ह?’ बो कह्यों, ‘मालिक अड़सट मण गियु’, जणा बो कह्यों, ‘आ ले बही अर अड़सट को चोवन मांड दे।’ ८आ देखर बो साऊकार बि बेर्इमान मुन्शीनै खुब सरायो क्युं’क बो तेज-पुणाऊँ काम कर्यो। दुनिया का मिनख परमेश्वर का मिनखाऊँ बिवार म तेज पड़ी हीं। ९जणा

मं थारूँ ख्युं हूँ दुनिया का धन’ऊँ भायला बणाओ, ईको ओ फायदो होसी की जी दिन ओ धन निमड़ ज्यासी जणा थारी आव-भगत सदाई बण्या रेबाळा घर म करी जासी। १०जखो थोड़ा म बिश्वास जोगो ह, बो बोळा म बी बिश्वास जोगो ह, अर जखो थोड़ा म बिश्वास जोगो कोनी बो बोळा म बी कोनी रेवै? ११खेबा को मतबल ओ ह की जद थे दुनिया का धन म हीं बिश्वास जोगा कोनी रिया जणा थार प कुण बिश्वास करगो की थे बी सांझा धन म बिश्वास जोगा हो सको हो? १२जद थे बी पराया धन म ई सझा कोनी रिया जणा जखो थार ताँई धेरडो ह बो थानै कुण देसी? १३कोई बी नोकर दो मालिका की सेवा एक सागै कोनी कर सकै, अंयां होसी तो एकऊँ तो बेर राखसी अर दुसराऊँ प्रेम, बो एक क सागै तो बफादार रेसी अर दुसरानै छोटो जाणसी। अंयां ई थे परमेश्वर अर धन की सेवा एक सागै कोनी कर सको।”

ईशु की भाँत-भाँत सिख

१४पिसा का भुखा फरीसी आ सुणर ईशु की हँसी उड़ाबा लागगा। १५ईशु बा’ऊँ कह्यों, “थे तो मिनखां म देख-दिखावा का धर्मी हो। पण परमेश्वर तो थारा हियानै जाणै ह, क्युं’क जखी चिज मिनखा की नजरा म बोळी खास ह बिको परमेश्वर की नजरा म काँई मोल?”

१६“मुसा की बिधी अर परमेश्वर की खेबाळा की माण्डेड़ी बाता को हेल्लो बतिष्मा देबाळा युहन्ना का दिना ताँई

पाड़यो गये। पण बतिष्मा देबाळा युहन्ना का टेमऊं परमेश्वर का चोखा समाच्यार को हेल्लो पाड़यो जार्यो ह। अर सगळानै परमेश्वर का राज म बड़बा ताँई नहोरा खार नुतो दियो जार्यो ह। 17 ईश्वर नगरी अर धरती मिट सकै ह पण बिधी का बिधान को एक आँक ई कोनी मिटै।”

18 “जखो बी मोट्यार आपकी लूगाईनै छोड़र दुसरो ब्याह करै बो कुकर्म करै ह। अंयां ई छोडेडी लूगाईऊँ ब्याह करबाळो मिनख बी कुकर्म करै ह।”

पिसाढो आदमी अर गरिबीयों लाजर

19 “एक साऊकार हो। अर बो मेंगा-मेंगा गाबा पेरतो अर रोजकी म्हेफिल बाजी करतो। 20 अर बठै एक लाजर नाम को गरीबियो बी हो। जिके झघा-झघा गुमड़ा निकळ्या हा बिनै बी साऊकार की थळी प ल्यार छोड़ दियो जातो हो। 21 अर बिका घावानै गण्डकडा चाटता रेता। अर बो आपको पेट भरबा ताँई बि साहुकार की जूँठ का माखणा ताँई ई तरसतो हो। 22 एक दिन बो गरीब लाजर मरगो। अर बिनै लेज्याबा ताँई ईश्वर नगरी का दुत आर बिनै सिधा ईब्राहिम की गोदी म लेगा। एक दिन बो साहुकार बी मर्यो अर बिनै लोग लेज्यार गाडचायां। 23 ईब सांय बो सिधो नरग म अर बी लाय म तोबा तिल्ली घालतो

जद बो उपरनै देख्यो जणा बिनै इब्राहिम की गोदी म लाजर दिख्यायों। 24 जणा बो बठैऊँ हेल्लो मारर बोल्यो ओ बापू इब्राहिम मेर प रेम खा। अर लाजरनै भेजर बिनै बोल की बो आपकी आँगळी डबोर एक बूँद पाणी की मेरी जिभ प

गेरर बिनै शिळी करै क्युँक ई आग म म बळ्यो हूँ। 25 पण ईब्राहिम कह्यों, ‘बेटा याद राख की तु तेरी जिंदगी म सदाई चोखी-चोखी चिजा भोगी जदकी ओ बिच्यारो सदा ई आपकी जीन्दगी म दुख देख्यों। पण ईब अठै ओ मजा’ऊँ ह, अर तू पिड़ा म। 26 अ सगळी बात तो बळी बुझी इकै अलावा म्हारै अर तेरै बिच एक उन्डी खाई ह जि बजैऊँ न तो अठिनऊँ परनै कोई जा सकै अर न ई परनैऊँ अठिनै कोई आ सकै।’ 27 जणा बो कह्यों, ‘ओ बाबा इब्राहिम म हाथ जोड़र थारूँ ख्युँ हूँ थे लाजरनै मेरा बाप क घरा भेज द्यो। 28 क्युँक मेरै पाँच भाइडा और ही ओ जार बानै चितासी कमऊँ कम बे, ई पीडा हाळी झाघा म आबा’ऊँ बच ज्यासी।’ 29 इब्राहिम बि’ऊँ कह्यों, ‘बाकै कनै मुसा अर दुसरा परमेश्वर की खेबाळा की किताबा की बातानै बानै सुण्णी अर मानणी चायै।’ 30 जणा बो कह्यों, ‘इऊँ पार कोनी पडै बाबा इब्राहिम पण ज मेरेडा मऊँ कोई बाकै कनै जासी जणा बे जरुर पापाऊँ आपको हियो बदल लेसी।’ 31 जणा बो बि’ऊँ कह्यों, ‘जद बे मुसा अर परमेश्वर की खेबाळा की ई कोनी मानै जणा बे मर्या पाछै जिबाळा की कय्या मानसी?’”

पाप अर क्षमा

17 ईशु आपका चेलाऊँ कह्यों, “आ तो हो कोनी सकै क मिनखानै भटकाबाळी बाता कोनी घटै, पण बि मिनख प धिकार ह जिकी बजैऊँ बे बाता होवीं ही। 2 आ नान्या मऊँ एकनै बी पाप म गेरबाळा ताँई ओ चोखो ह क

बिकी नाड़ म घरट घाल'र बिनै समदर म गेर दियो जावै। 3चेता म रेह्हो ज थारो भाइड़ो पाप करै जणा बिनै दकालो अर पछतावै जणा बिनै माफ करो। 4ज बो रोजकी सात बार तेरो बुरो कैरे, अर सात्युई बार पाछो आर तेरऊँ बोले, 'मरू गळती होगी मनै माफ करो', जणा तु बिनै माफ कर।"

बिश्वास

5भेजेडा नाम'ऊ खुआबाला चेला कह्या प्रबु, "म्हारा बिश्वासनै बढ़ा।" 6प्रबु कह्या, "मं थारूँ ख्युं हुं ज थार म राई क दाणा जतो बी बिश्वास होतो तो थे ई शेसुत का दरखत'ऊँ कह्त जड़ समेत उपड़र समंदर म लाग ज्या, जणा बो थारी बात मान ज्यातो।"

दास को काम

7“मानल्यो थार मऊँ कोइसा क एक दास ह जखो खेत म हळ जोतै अर लल्डया को रेवड़ चरावै ह। जद दास खेतऊँ आवै जणा काँई बिको मालिक बिनै अंयां खैवै ह क आ बैठ अर रोटड़ी खालै? 8पण इकी बजाय बो खेसी, 'रोटी टुक बणालै अर जद ताँई म रोटी खाई पी करु जणा ताँई तू मेरी सेवा म खड्यो रैह। इकै पाछे तू बी रोटी खा लिजै।' 9बिको कह्यो करबा क पाछै के बो बी दास को एसान मानसी? 10अय्या ई थारै सागै ह, बे सगळा काम जखा थानै करबा बेर्ई कह्या गया ही। बानै करबा क पाछै थे आई खिज्यो, म्हें तो ख्याँ जोगाई दास कोनी अर म्हें तो म्हारो फर्ज निभायो ह।"

दस कोढ़चा को निरोगो होबो

11ईशु सामरिया अर गलील नगर्या का काकड़ होर यरुसलेम जार्यो हो। 12जणा बठै बिनै एक गांव म भेलाई दस कोढ़ मिल्या, बे बिऊँ परै ई खड़्या हा। 13अर जोर-जोरऊँ बोलबा लाग्या, "ओ मराज ईशु म्हार प दया कर।" 14जणा बो बानै देख'र कह्यो, "जावो अर खुदनै याजकानै जारै दिखाओ। अर गेला मई बांको कोढ धुपगो। 15जणा बामैऊँ एक जणो आ देख'र की म निरोगो होगो हूँ। बो परमेश्वर को जोरऊँ गुणगान गातो पाछो आयो। 16बो मुण्डा वाणी ईशु का पगा म पड़गो अर बिको जयकारो लागाबा लाग्गो। अर बो एक सामरी हो। 17ईशु बिऊँ बुझ्यो, "बे नौ कठै ही, के दस का दस निरोगा कोनी होया? 18ई परदेशी मिनखनै छोड़र कोईसो ई अस्यो कोनी जखो आर परमेश्वर को गुणगान गातो?" 19जणा ईशु पाछो बिऊँ कह्यो, "खड़्यो हो अर जा तनै तेरो बिश्वास निरोगो कर्यो ह।"

परमेश्वर को राज आर्यो ह

20एक बार क्युंक फरीसी ईशु बुज्यां, क "परमेश्वर को राज कद आसी?" जणा बो बानै कह्यों, "परमेश्वर को राज दिखबाला रूप म कोनी आवै। 21कोई आ कोनी खे सकै, की देखो परमेश्वर को राज ओर्यो नहिस तो बोर्याँ, क्युंक परमेश्वर को राज तो थारै माईनै ई ह।" 22जणा बो चेलानै बतायो, 'अयांलकी घड़ी बी आसी जद थे मिनख क जायानै देखबो चाओगा पण बिनै देख कोनी

सकोगा। 23 अर अयांलका बी होसी जखा थानै खेसी, ‘देखो बो बठै ह! नई बो अठै ह!’ पण थे बाकी मना मानज्यो। 24 क्युं^e क जंयां बिजली आकास का एक छोर म चमक सगळा आकासनै चमका दे ह, बंयांई मिनख को बेटो आपका दिन म होसी जी दिन बो आसी। 25 पण पेली बो बोलो दुख देखपी अर ई जुग का मिनख बिनै तज देसी। 26 जंयां नूह क दिना म होयो हो बंयांई मिनख क जाया क दिना म होसी। 27 जी दिन ताँई नूह झाज प कोनी चढ़यो हो बी दिन ताँई मिनख खाता पिता हा, बामै ब्याह होर्या हा। पण परले आयो अर सक्यानै नास कर दिन्यों। 28 अंयां ई लुत क दिना म होयो हो। जद बी मिनख खार्या-पिर्या हा, मोल खरिदता अर बेचता हा खेती करता अर घर बणार्या हा। 29 पण जी दिन लुत सदोम^{अँ} बारै पग धरयों बि दिन ई आकास^{अँ} परमेश्वर आग अर भबकता तिजाब भर्या खीरा बरसाया अर बे सक्यानै बाल गेर्या। 30 बी दिन बी अंयां होसी जी दिन मिनख को बेटो प्रगट होसी। 31 बी दिन जखो मिनख छात प होवै अर बिको समान घर म होवै जणा बो बिनै लेबा तळै न उतरै। अर बंयांई जखो खेत म होवै बो पाछो न आवै। 32 याद राखो लुत की लूगाई क सागै काँई होयो, 33 जखो आपको पिराण बचासी बो बिनै खोसी अर जखो बिनै मेरी बजै^{अँ} खोसी बो बिनै जुग-जुग का जिवन ताँई बचासी। 34 म थानै बताऊँ हूँ बि रात एक खाटली प दो मिनख

सुत्या रेहसी। बामै^{अँ} एकनै उठा लियो जासी अर दुसरो बठैर्ड छोड़ दियो जासी। 35 एक सागै चाक्कि म दाणा पिसती दो लुगांयां मऊँ एक लेली जासी अर दुसरी बठैर्ड छोड़ दि जासी। 36 खेत म काम करता दो जणा मऊँ एक न लेलियो जासी अर दुसरो छोड़ दियो जासी।”^e 37 अ बाता सुणर चेला बुज्यां, “प्रबु अ बाता कठै होसी?” बो बाऊँ कह्यो, “जठै क्यु मरेडो पड़यो ह बठै गिरज कांवळा भेळा होसी।”

परमेश्वर आपका भक्ता की सुणै

18 जणा ईशु चेलानै आ बताबा करता रेवी। अर हिमत ना छोडी एक निती कथा सुणाई। 2 “कोइ नगरी ही बिमै एक पंच रिया करतो हो, जखो न तो परमेश्वर^{अँ} डरतो अर न ई कोई मिनख की परवा करतो। 3 अर बि नगरी म एक खालि होयडी बी रेहती बा बार बार बिकी छाती प आर खेती मरो न्याय कर। 4 कई दिना ताँई तो बो बिकी सुणाई कोनी कर्यो। पण हारर आपका मन म सोची म न तो उपरलाऊँ डरु अर न कोई मिनख कि परबा करु, 5 जणा बी आ खालि होयडी मेरा कान खागी, ई ताँई म इको न्याय चुकास्युं नहिस तो आ घडि-घडि आर मनै दुखी कर देसी।” 6 प्रबु बोल्या, “सुणो बो अधर्मी पंच काँई कह्यो हो? 7 जणा पाछै परमेश्वर आपका टालैडा मिनखानै न्याय कोनी देसी के जिखा रात-दिन परमेश्वर की रोर दुहाई

^e 17.36 क्युंक यूनानी पूराणी हाथ^{अँ} लिखेडी पोथ्या म आ आयत कोनी ह।

दि ही? बानै न्याय देबा म के बो देर करसी? 8म थारूँ खेऊँ हूँ बो बेगोई बाको न्याय चुकासी। पण मिनख का जायानै जद बो ई धरती प आसी जणा विश्वास लादसी के?”

साँच्ची भक्ति

9ईशु बानै जखा खुदनै धर्मी अर दुसरानै क्युंई कोनी समझता हा, बानै एक निती-कथा कही, 10“एक बर मन्दर म दो जणा अरदास करबा गया। बामैऊँ एक फरसी अर दुसरो चुंगी लेबाळो हों। 11बो फरीसी नाकै ई खड़यो होर अंय्यां खेर अरदास करबा लाग्यो, ‘परमेश्वर थारी जै हो, क म दुसरा की जंय्यां लोभी, दुसरा को बुरो करबालो, दुसरी लुगाया क कनै जाबाळो कोनी अर न, इ म ई चुंगी लेबाळा की जंय्यां हुं। 12म सप्ता म दो बार ब्रत करूँ अर मेरी सगळि आमदनी को दसवो भाग दान द्युँ हूँ।’ 13पण बो दुसरो जखो चुंगी लेबाळो हो बो दुर खड़यो होर आपकी छाती कुट-कुटर खेबा लाग्यो, ‘परमेश्वर मेर प दया करो म पापी हूँ’, बो खुदनै ईश्वर नगरी कानी मुण्डो उठार देखबा जोगोई कोनी जाण्यो। 14म थानै साँच्ची-साँच्ची बोलु हूँ परमेश्वर की नजर्या म फरीसी नई, पण ओ चुंगी लेबाळो ई धर्मी होर आपके घरा ग्यां। क्युंक जखो खुदनै बडो मानसी बिनै छोटो अर जखो खुदनै छोटो मानसी बिनै बडो कर्यो ज्यासी।”

टाबरानै आशिर्बाद

15एक दिन मिनख आपका नान्यानै आशिर्बाद द्युआबा ताँई बानै ईशु क कनै

ल्याया। पण आ देखर चेला बानै दकाल दिन्या। 16जणा ईशु टाबरानै आपकै कनै बुलार चेलाऊँ कह्या, “टाबरानै मेरै कनै आबा द्यो, आनै आबऊँ मना नटो, क्युंक परमेश्वर को राज अय्या का मिनखा ताँई ह। 17याद राखज्यो क जखो परमेश्वर का राजनै टाबरा की जंय्यां कोनी मानसी बो बिमै कोनी बड़सी।”

पिसाळो मिनख

18एक यहुदी सरदार ईशुऊँ बुज्यों, “चोखा गुरुजी जुग-जुग को जीवन पाबा ताँई मं काँई करूँ?” 19ईशु बिऊँ कह्यों, “तु मनै चोखो क्याले बोलै ह? परमेश्वर क अलावा कोई चोखो कोनी। 20तु परमेश्वर का हुकमानै जाणै ह, जंय्यां पराई लूगाई क कनै मना जाजै, हत्या मना करज्ये, झुठी गुवांई मना दिज्ये, चोरी-चकारी मना करज्ये अर माँ-बाप को मान करजै।” 21बो कह्यो, “आ सगळी बातानै म टाबरपुणाऊ ई मानतो आयो हूँ।” 22आ सुणर ईशु बिऊँ कह्यो, “तेर म हाल ताँई एक बात की कमी ह, तेरै कनै जोक्यूँ बी ह बिनै बेचर बिऊँ मिलेड़ा रिप्पानै गरीबा म बाँट दे अर तू मेरै गैल होले इकै सांटा को धन तनै ईश्वर नगरी म मील ज्यासी। 23पण आ सुण ताँई बोतो बोलो दुखी होगो, क्युंक बिकै कनै अणाप सणाप धन हो। 24आ देखर की बिनै साँप सुघंगो ईशु कह्यो, “परमेश्वर का राज म पीसाळा को बड़बो बोलो ओखो ह, 25ऊँट को सुई का नाका मऊँ निकळबो परमेश्वर का राज म पिसाळा मिनखा क बड़बाऊँ सोरो ह।” 26आ सुणर बे सुणबाला हा

जखा बुज्यां, “जणा पाछै किनै बचायो जासी?” 27जणा बो कही, “जो मिनखा क बसको कोनी बिनै परमेश्वर कर सकै ह।” 28ई बात प पतरस कह्यों, “देखो म्हें तो म्हारो घर-बार छोड़ेर थारै गैल आया हा।” 29-30ईशु बानै कह्यो, “इसो कोई कोनी जखो आपका घर-बार, लूगाई अर भाई-भाण, माँ-बाप अर आपका टाबरानै परमेश्वर का राज ताई छोड़यो हो अर बिनै ई जुग म कई गुण बत्ती अर आबाळा जुग म जुग-जुग को जीवन न मिलै।

ईशु को आपकी मौत क बार म तिसरका बताबो

31ईशु आपका बारा चेलानै एक नाकै लेजार कह्यों, “सुणो! आपा यरुशलेम जार्या हा जठे जोक्यू मिनख का जायाकै बारा म परमेश्वर की खेबाळा मांडी ह बे बाता पुरी होसी। 32बो गेर यहुदि मिनखा क हाथां म सुंप्यो जासी। बे बिकी हँसी उडासी, बिकी बैजती करसी, बिपै थुँकसी, 33बिकै सोटक्या प्यासी अर बिनै जान’ऊ मार गेरसी। पण बो तिजै दिन जी उठसी। 34चेला क आ बाता म क्युई पलै कोनी पड़ी आ बाता को मतबल बाकै कानी को तो लुखेड़ो ई रेधो, ईशु किकै बारा म बोलर्या ही बे कोनी जाण्या।

ईशु आँधा भिखारीनै आँख्या दि

35ईशु जद यरिहो क साकड़े पुच्यों जणा बिनै भीख मांगतो एक आँधो गेला क सारै बेठ्यो मिल्यों। 36जणा बो आँधो भिखारी भीड़ क पगा की

उवाज सुण’र बुज्यों ओ काँई होर्यो ह? 37बे बिऊं कह्या, “ईशु नासरी जार्यो ह।” 38जणा बो आँधो हेल्लो मारतो ई बोल्यो, “ओ दाउद का बेटा ईशु, मेर प दया कर।” 39आगै-आगै चालबाळा बिनै चुप होबा ताई दकाल्या, पण बो ओर बी जोरऊ हेल्लो मारबा लागगो, “दाउद का बेटा! मेर प दया कर!” 40जणा ईशु बर्थैई डट’र बी आँधानै आपकै कनै ल्याबा ताँड कह्यो, बिकै आता ई बो बिऊं बुज्यों, 41“तु काँई चावै ह जो म तेर ताँई करूँ?” बो बोल्यो, “प्रबु म ओज्युं देखबो चावुँ।” 42ईशु बिऊं कह्यो, “देखबा लागज्या तेरो बिश्वास ई तनै आँख्या दिनी ह।” 43जणा अति खैताइ बो देखबा लागगो अर परमेश्वर की बडाई करतो बिकै गैल होलियो। देखबाळा आ देख’र परमेश्वर को गुण-गान गाबा लागगा।

चुंगी लेबाळो जङ्कई

19 जद ईशु यरियो नगरी होतो होयो जार्यो हो। 2जणा बढ़ै जङ्कई नाम को एक मिनख हो जखो चुंगी लेबाळा को सरदार हो अर बो पिसाळो हों। 3बो ईशुनै देखबा की तक म हो पण भापड़ो देख कोनी पार्यो, क्युंक भीड़ रेगी घणी अर बो रेगो बावन्यो। 4जणा बो ईशुनै देखबा ताँई भीड़ऊं आगाऊं भाग’र ईशु, जी गेला माकै जाबाळो हो बि गेला म एक अंजीर का दरखत प जार चढ़गो। 5जद ईशु बी बड़ का दरखत क कनै पुच्यों जणा बो बठै खड्यो होर उपरानै देख’र जङ्कई’ऊ कह्यो, “जङ्कई बेगोसो तळै उत्तर्या क्युंक

आज म तेरै घरा ई बासो लेस्यूँ।” ६जणा जङ्क्वाई बेगोसोक दरखतऊँ तकै उत्तर्यो, अर बानै राजी राजी आपकै घरानै लेगो। ७आ देखर जत्ता बी बठै भेडा होर्या हा बे सगला आपसर्या म बड़बड़बा लागग्या की ओ तो पापी क घरा पावणा-पुड़ी खाबा गयो ह। ८पण जङ्क्वाई ह जखो भापडो खड़यो होर प्रबुऊँ कह्यो, “ओ माराज मेर कनै जत्ती बि धन दोलत ह बिको आदो म गरीबा म बाँट देस्युं अर ज बेर्इमानीऊँ कोई भाइडा को क्युं बी दाब लियो हो जणा म बिको बिनै चोगुणो पाछो दे देस्युं।” ९अत्ती सुणर ईशु बिनै कह्यो, “ई घराणा म आज उद्धार आगो ह क्युंक ओ बिश्वास कर दिखा दियो की ओ इब्राहीम की औलाद ह। १०क्युंक मिनख को बेटो गुमेडानै ढुँडबा अर बानै बचाबा ई धरती प आयो ह।”

परमेश्वर जोक्युं दे बिनै बर्तो

११जद बे बिकी बाता सुणर्या हा जणाई बो बानै एक बात और खी क्युंक ईशु यरुशलेम क साकडै ई हो अर मिनख आ मन म कर राखी ही क परमेश्वर को राज बस प्रगट होबाळोइ ह। १२जणा बो खेबा लाग्यो “एक आदमी जिकनै अणापसणाप धन दोलत ही बो राज करबा की सिख लेबा ताँइ दुर दिसावर चलेग्यो। १३जाबाऊँ पेल्या बो आपका दस दासानै बुलाया, अर बुलार बानै एक-एक सोना की मोहर दिनी अर कह्यो, म जी दिन ताँई पाछो न आऊँ बी दिन ताँई आसै लेण-देण करज्यो। १४पण बिकी नगरी का दुसरा मिनख बिऊँ जळता बळता हा बे बिकै गेल एक

टोळी क हाथ आ खुवा भेज्यो की म्हें कोनी चावा की ओ म्हार प राज करै।

१५पण बो राजा बणर पाछो आपकै घरा आग्यो। अर आता ही बो बा दासा न बुलायो जाने बो सोना की मोहर देर गयो हा क्युंक बो आ जाणबो चावो हो की बे बा मोहराऊँ क्युं कमाया हींक कोनी। १६जणा पेलो आर कह्यों, “मालिक थारी एक मोहरऊँ म दस मोहरा ओर कमाली। १७जणा बो मालीक बि दासनै कह्यो तु मेरो चोखो दास ह जखो तु इती सी बात म बी मेरै बिश्वास क जोगो रीयो। जणा ईब म तनै दस नगरा की जमिदारी द्युं हूं। १८दुसरो आर कह्यों, ‘मालिक थारी मौहर’ऊँ म पाँच और कमाई १९पेला की जंय्यां इ बो बिनै बि कह्यो तु पाँच नगरा प जमिदार होसी। २०ईब तिसरो आर कह्यों, “ये ल्यो थारी मोहर जिनै म बी दिन इ गमछा म गाँठ देर बाँध लिनी हि। २१क्युंक म थारूँ डरतो हो, थे हो जखा अंय्यां का आदमी हो जखो थारो कोनी बिनै लेल्यों अर जखो थे कोनी बोयो बिनै काटल्यों। २२जणा बो मालिक बिऊँ कह्यों, “तु बुरो दास ह! म तेरा कह्या गेल ई तेरै सागै करस्युं। तु जाणता बुजता की म टेडो आदमी हूं जखो म कोनी धरूँ बिनै लेल्युँ अर जखो कोनी बोऊँ बिनै काट ल्युं। २३तु बिनै ब्याजुणा क्यूँ कोनी दियो? जिऊँ म पाछो आर बानै ब्याज समेत ले लेतो। २४जणा जखा बठै बिकै कनै खड़या हा बाऊँ बो बोल्यो ईकी मोहर इऊँ पाछी लेल्यों अर जखो दस कमाई ह बिनै दे द्यो। २५आ सुणर बे बोल्या “मालिक इकनै तो पेलीऊँ दस मोहरा ही।” २६मालिक

कह्यों, “म थानै बोलू हू जिकनै ह बिनै और दियो जासी अर जिकनै कोनी बिऊँ जोक्युँ बिकनै ह बो बि पाछो खोस लियो जासी। 27 अर बे जखा मेरा बेरी ही जखा मनै ई राज गदि प बेठयो कोनी देख सकै बानै मेरै सामै ल्यार बाका सिर धड़ऊँ नाकै कर द्यो।

ईशु को यरुशलेम म आबो

28 अ सगळी बाता खे-खार ईशु यरुशलेम की ओर बा'ऊ पेली आपका पाऊण्डा बढ़ाया। 29 अर जद बो जैतुन डुँगर प बैतफगै अर बैतनिया क साकड़े पुच्यों जणा बो आपका चेला मऊँ दोनै आ खेर भेज्यो, 30 “सामला गाँव म जावो अर जंयाई थे बड़ोगा थानै एक गधेड़ि को बच्यों बन्धेड़ो लादसी जिपै आज ताँई कोई कोनी बेठयो बिनै खोल'र ल्याओ। 31 ज थारूँ कोई आ बुझै की थे इनै क्याले खोलर्या हो जणा थे बिनै बोल दिज्यो प्रबुनै इकी जुरत ह। 32 जानै भेज्या बे जार बठै देख्या जणा बानै ठिक बंयाईं जंयां बानै बो कह्यों हो लाध्यों। 33 जंयाईं बे बिनै खोलर्या हा जणा बि गधेड़ि का बच्या का धणी बाऊँ बुज्यां, ‘ई बचियानै क्याले खोलो हो? 34 जणा बे बोल्या, ‘प्रबुनै इकी जुरत ह। 35 अर बे बी गधेड़ी का बच्यानै ईशु क कनै लि आया अर आपका गाबा बिपै गेर बिपै ईशुनै बिठा दिन्या। 36 अर ईशु जी गेलाऊँ जार्या हा बि गेला म ईशु क आगै आगै लोग आपका गाबा बिछाता जार्या हा। 37 अर जद बो जैतुन की पाड़ीऊँ ढाल म आयो जणा सगळा का सगळा चेला राजी हो होर जोर'ऊ परमेश्वर की

बडाई करबा लागगा क्युं क बे बिका सगळा अचरज का कामानै देख्या हा। 38 बे जोर जोर'ऊ कह्या “धनै ह बो राजा जखो प्रबु क नामऊँ आवै। ईश्वर नगरी म शान्ति अर परमेश्वर की मेमा होवै। 39 जणा भीड़ मऊँ क्युंक फरीसी बोल्या, “माराज थारा चेलानै थामो।” 40 बो बानै जबाब दियो, “ज अ चुप हो ज्यासी जणा भाट्या चिल्ला उठसी।”

यरुशलेम पर ईशु को रोबो

41 अर कनै आर जद बो यरुशलेमनै देखयो जणा बिनै बिपै रोज आयो। 42 अर बोल्यो, “ज तु आज आ जाणतो की तनै शान्ती क्याऊँ मिलसी! पण हाल बिनै तु तेरी आँख्याऊँ कोनी देख सकै! 43 अर बे दिन बी आसी जद तेरा बेरी तेरै च्यारूँ मेर आडी देर तनै दबोच लेसी। 44 बे तनै अर तेरा टाबरानै धुळ म मिला देसी। अर तेरै माइनै भाट्या प भाट्योई कोनी छोड़सी। क्युंक तु बी टेमनै कोनी जाणयो जद परमेश्वर तनै बचाबा आयो।

ईशु मन्दर म

45 जणा ईशु मन्दर का आंगणा म जार बेपारयानै बारै काड़बा लागगो। 46 अर बानै कह्यों, “शास्त्रा म मंडर्यो ह, ‘मेरा घरनै अरदास को घर बोल्यो ज्यासी। पण थे इनै डाकुआ की खोल बणा लिनी ह। 47 अर ईशु रोजीना मन्दर म सीख देतो हो। पण महायाजक, शास्त्रानै सीखबाला अर लोगा का नेता बिनै मारबा की ताक म रेबा लागगा। 48 पण बाकै अंयां करबा को कोई मोको हाथ

कोनी लाग्यों। क्युंकि सगळा मिनख बिका बचनानै बोला मानता हा।

ईशु का अधिकार को सवाल

20 एक दिन ईशु मन्दर म मिनखानै समचार सुणायों हो जणा प्रधान याजक अर शास्त्रानै सीखाबाला बडका क सागै भेळा होर बिकै कनै आया। 2 अर वे बिऊँ खेबा लाग्या म्हानै बता तू अ सगळा काम कूणसा अधिकार'ऊ करै ह? बो कुण ह जखो तनै अंच्यां करबा को अधिकार दिन्यो? 3 जणा ईशु बानै कह्यों, ‘म बि थारूँ एक बात बुजु हू। 4 थे आ बताओ युहन्नानै बप्पिसमो देबा को हक ईश्वरऊ मिल्यो नहिस मिनखाऊँ?’ 5 ईपै वे आपसर्या म बतळाबा लागगा। ज आपा खेबा की ईश्वर नगरीऊ जणा ओ खेसी पाढै थे बिको बिश्वास क्युंकोनी कर्या? 6 अर ज आपा अंच्यां खेस्या की बिनै ओ काम मिनख दिन्यो जणा आ सगळी भीड़ आपणा प भाठा बगासी, क्यु क अ सगळा यूहन्नानै परमेश्वर की खेबालो मानै ह। 7 जणा वे कह्या म्हें तो कोनी जाणा की बिनै ओ हक कुण दिन्यो। 8 बाको जबाब सुण'र ईशु बानै कह्यो, ‘जणा म बि थानै कोनी बताऊँ की म ओ काम की हकऊँ करू हू।

बुरा ठेकेदारा की निति कथा

9 जणा बो मिनखानै एक निति कथा कही, “एक आदमी अँगुरा को बाग लागार बिनै किसानानै ठेका प देर बोली दुर चल्योगो। 10 जद अँगूर लागबा की रुत आई। जणा बो अँगुरा मऊँ आपको

हिसो लेबा ताँई एक नोकरनै अँगुरा की बाडी म भेज्यो। पण वे ठेकेदार बिनै मार कुट'र रितो-फाकोइ पाछो काड दिन्यो। 11 जणा बो एक दुसरा दासनै ओज्यु बाकनै भेज्यो। पण वे बिनै बि मारकुट'र बिकी दुरगति कर'र रितो-फाको ई पाछो काड दिन्यो। 12 अंच्याई बो तिसरानै भेज्यों पण वे बिनै बी अधमर्यो कर'र बारै फिक दिन्यो। 13 जणा अँगुरा की बाडी को मालिक कह्यो, “म काँई करूँ? म ईब मेरा लाडला छोरानै भेजस्युं। कम'ऊँ कम बिको तो वे लिहाज राखसी। 14 पण जद वे बिनै देख्या जणा आपसर्या म खेबा लाग्या। ‘ईब क तो मालिक को छोरोई आर्यो ह क्युनै आपा ईको टन्टो मेट'र ई बाडी प कब्जो करल्यां। 15 अर वे बिनै अँगुरा की बाडी'ऊँ बारै काड'र मार गेर्या। जणा ईशु बा'ऊ बुज्यों ईब बाग को मालिक बाकै सागै काँई करसी? 16 बो आर बा ठेकेदारानै मार अँगुरा की बाडी दुसरानै समाळबा ताँई दे देसी। “आ बांत सुण वे बोल्या अंच्यां कदई न हो।” 17 जणा ईशु बाकै कानी देख'र कह्यों, “जणा शास्त्र म मंडेडा इ आक को काँइ मतबल ह:

‘जी भाठानै चेजारा क्युंई जोगो
कोनी जाण्या

बोई कुणानै समाळबालो होगो।’

18 जखा बी ई भाठा प पड़सी वे टुकड़ा-टुकड़ा हो ज्यासी। अर ओ भाठो जीपै पड़सी बिनै ओ पिस गेरसी। 19 बि घडी ई शास्त्रानै सीखाबाला अर प्रधान याजक बिनै पकड़बो चावा हा। क्युंकि वे समझगा हा की बो आ बात म्हार प कही ह, पण वे मिनखाऊँ डरता।

यहुदी नेता की जाळसाजी

20 अर बे सगळा ई तक म रेबा लागगा। की बो कोई गळती करै बे बिके गेल जासुस छोडया। जखा ईमानदारी ताँई जाणया जाता हा। अर इ आस म कि बे ईशुनै बाता म उळजार बिँऊ क्यु गळत खुवा देसी। जिँऊ बे बिनै रोमी सरकार क हाथा म सपुर्द कर पकड़वा दि। 21 जणा बे जासुस बिनै उळजाबा ताँई सबाल बुज्यों। “गुरु म्हें जाणा हा तू जखी बी बोलै अर सिखावै बे सही ह अर न तू कोईनै छोटो बडो देखर र कोई पक्ष पात करै पण परमेश्वर को गेलो ईमान्दारी’ऊ बतावै है”, 22 जणा थे म्हानै बताओ, “आपणा विधि-विधान क गेल रोमी सप्राटनै कर देबो ठिक ह क कोनी?” 23 ईशु बाकी बात पकड़ लियो अर बाँऊ कह्यो। 24 “मनै एक रोमी सरकार को सिक्को दिखावो। अर ईनै देखर बताओ इपै कीको नाम अर शकल ह? बे कह्या, “रोमी सप्राट की!” 25 जणा बो कह्यो, “जो रोमी सप्राट को ह बो सप्राटनै अर जो परमेश्वर को ह बो परमेश्वरनै द्यों।” 26 बिको जबाब सुणर बे सुना होगा अर मिनखा क सामै ई बात म बिनै कोनी पकड़ सक्यां।

ईशुनै उळजाबा ताँई सदुकियां की जाळसाजी

27 ईब क्युंक सदुकी ईशु कनै आया, सदुकी बे हा जखा मरया पाछै जी उठबानै कोनी मान्या करता हा। 28 बे बिँऊ बुज्यों, “गुरु मुसा को म्हार ताँई

ओ कानून मांडेडो ह, क कोई को भाईड़ो आपकी लूगाई क रेता सोता बिना औलाद क मर जावै। जणा बिको भाई बिकी लूगाईनै ब्याले अर आपका भाईड़ा ताँई टाबर पैदा करै। 29 ईब देखो कोई सात भाईड़ा हा। पेलो हो जखो एक लूगाईऊँ ब्याह करकै बिना आस औलाद क ई मरगो। 30 अर बिकै मरया पाछै दुसरो भाई बिनै ब्याली। पण बो बी बिना औलाद ई मरगो। 31 ईब तिसरो बी अंयां ई मरगो, अंयां करता करता बे सातु का सातु भाईड़ा हा जखा बिना औलाद क ई मरगो। 32 अर आखिर म बा लूगाई बी मरगी। 33 ईब तू म्हानै आ बता बी दिन जद मरेड़ा ओज्यु जीसी जणा बा बामैऊँ कुणसा की लूगाई होसी? क्युंक बिका तो सातु का सातुर्ई धणी हा। 34 जणा ईशु जबाब म कह्यो, “ई जुग म तो ब्या शादी होवीं हीं, 35 पण बे मिनख जखा मरेड़ा मऊँ जी उठबा क जोगा ही आबाढा जुग म बाकी ब्या शादि कोनी होसी। 36 अर बे मरेड़ा म’ऊ जी उठबा की बजैऊँ परमेश्वर की ओलाद होसी। बिके पाछै बे कणाई कोनी मरसी जिकी बजैऊँ बे ईश्वर नगरीदूता क जंयां होसी। 37 अर मरेड़ा क जी उठबा की बातनै मुसो बी बल्ती झाड़ी हाढा आंक म प्रगट करी ह। क्युं क बो परमेश्वरनै इब्राहिम, इसाक अर याकुब को परमेश्वर बतायो ह।

38 परमेश्वर मरेड़ा को कोनी पण जीवता को परमेश्वर ह। क्युंक सगळा बी ताँई जिवता रेवी ही। 39 आ सुणर शास्त्रनै सीखाबाढा मऊँ क्यु बोल्या, “आ बात तो थे चोखी कही गुरुजी।”



मुसो अर बल्ती छाइ (20.37)

40 अर ईकै पाछै बाकिं ओर कोई सवाल बुजबा की हिम्मत कोनी बगी।

मसीह किको बेटो

41 ईशु बाँच कह्यो, “बे बोली ह ‘आ क्यां हो सकै ह की मसी दाऊद की ओलाद होसी? 42 क्युंक भजना हाळी पोथी म खुद दाऊद अंयां बोलै ह,

प्रबु मेरा प्रबुँक हह्यों”, “मेरा दाया

हाथ बैठ 43 जद ताँई म तेरा

बेर्नैं तेरै पगा तळे को पाटो न
कर दयुं।

44 दाऊद खुद बिनै ‘प्रबु’, बोलै जणा
बो बिकी औलाद क्यां हो सकै ह’?”

शास्त्र न सीखाबाला’ऊ बचर रेह्यो

45 सगळा सुर्णा हा जणा बो आपका
चेलाँक हह्यों 46 शास्त्रनै सीखाबालाँ
बचज्यो जानै लाम्बा लाम्बा चोळा

पेरबो, बजरा म आदर सत्कार, अरदास करबाळी झगा म ठेंच्यो आसन अर ब्या-शादीया म मानहाळी झघां भावै ह। 47 बे खाली होयडी लुगांया का घरानै खा ज्यावीं अर देख दिखावा ताँई लम्बी लम्बी अरदास करीं हीं, आकी बोळी बुरी दशा होसी।”

गरीबणी खालिहोयडी लूगाई को दान

21 ईशु आपकी आख्यां उठार देखयों की पीसाळा आप-आपको दान दानहाळी पेटी म घालै हा। 2 बो एक गरिबणी खालीहोयडी लूगाईनै बी बिमै ताँबा का दो सिङ्का घालता देख्यो। 3 जणा बो बोल्यो “म थार’ऊ साँझी बोलू हूं आ गरिबणी खालिहोयडी लूगाई दुसरा सगळा मिनखाऊँ बत्ती दान घाली ह। 4 क्युंक अ सगळा आपकी बढती मँडँ दिया ही। पण आ भापडी आपकी घटती मँडँ जिबा ताँई इकै कनै जो क्युं बी हो, बो सक्यु इमै घाल दियो।”

मन्दर का बिनाश क बारा म बत्ताबो

5 जद क्युंक जणा मन्दर क बारा म चर्चा करै हा, की मन्दर सोवणा सोवणा भाठा अर परमेश्वरनै चढाईडी चिजा’ऊँ कत्तो सोवणो लागर्यो ह। जद ईशु कह्यो, 6 “बे दिन बी आसी जामै थे जो क्युं बी देखर्या हो बामै एक भाठा प भाठो बी कोनी टिक्यो रेसी। बा सगळानै ढाह दियो जासी।” 7 जणा बे बि’ऊ बुज्यां, “की गुरु अ बात कद

घटसी? अर अ बाता जखी होबाल्ही ह बाकी काँई शेलाणी होसी?” 8 ईशु कह्यों, “चोकन्ना रीज्यों कणा कोई थानै भरम म न गेर दे, क्यु क मेरा नाम’ऊं बोल्हा आविंगा अर खींगा बे मसी ही, अर बा घड़ी आगी ह। पण थे बाकै गैल मना हो ज्याज्यों। 9 लडाई अर बगावत की खबरा सुण’र डरज्यो मना, क्यु क आ अन्त की घड़ी कोनी होसी अर अ बाता तो पेली होणी जरुरी ह। 10 बो बा’ऊ खेबा लाग्यो, “एक राज दुसरा राज प चढाई करसी अर देश-देश’ऊ लड़सी अर। 11 सगळी झङ्घा खतरनाक भूचाल आसी, काळ पड़सी अर मरी फैलसी, बठै आसमान’ऊ अजिब-अजिब अर डराबाली चीजा आसी। 12 पण आ सगळी बाता क होबा’ऊ पेली हर कठै थानै मेरी बजै’ऊ पकड़यो अर सतायो जासी। थानै पंचायता क सपुर्द कर्यो जासी अर जेल म बन्ध कर्यो जासी थानै राजा अर राज करबाला क आगै लेज्यायो जासी। 13 ओ थारै कनै चोखा समचारनै बोलबा को मोको होसी। 14 जणा आ बाता क होबा’ऊ पेली थे थारा मनै त्यार कर ल्यो। अर थे थारो बचाव कर्या करस्यो ई बात की चींत्या मना करो। 15 क्युंक म थानै अंयां का बचन अर बुद्धी देस्यु जिऊं जो क्यु बी थे बोलस्यो जणा थारा बेरी थारै सामै कोनी खड़या रेह सकिंगा अर न बिनै गळत साबित कर सकिंगा। 16 थारा खुद का माँ बाप, सगा संबन्धी, भाई भाण अर भायला ई थानै पकड़वासी अर थार मऊं क्युंकनै तो मरवा गेरसी। 17 अर मेरी बजैऊं सगळा थानै देखबो ई पसंद कोनी

करींगा। 18 पण थारा सीर को एक बाल ई बाँको कोनी होसी। 19 थे पक्का रीयो जिऊं थे खुदनै बचास्यो।

यरुशलेम को उजाड़

20 “थे जद सेनानै यरुशलेम क बारकी फीरेड़ी देखो। जणा जाण जाज्यो यरुशलेम को उजाड़ होबाल्हो ह।” 21 बी घड़ी जिखा यहुदीया दिसावर म रेही बानै दुंगरी प भाग जाणौ चाए। अर जिखा यरुशलेम नगरी म होबीं बानै नगरी छोड़ देणी चाए। अर जिखा गाँव म रेहीं बे गाँव छोड़ नगरी म न जावीं। 22 क्युंक बा ताँई बे दिन ‘सजा भोगबा का होसी,’ जिऊं शास्त्र म मण्डेड़ा सगळा आंक पूरो कर्या जासी। 23 बा दिना म जखी लुगांया पेटऊँ अर जखी दुध प्याबाली ही बा ताँई बे दिन बोली पीड़ा का होसी। क्युंक बा दिना म ई देश प प्रकोप होसी अर बा मिनखा प परमेश्वर न घणी झाल आसी। 24 मिनख तलवाराऊं काँटचा जासी अर बाकी का सगळा दुसरा देशा का बन्दी होसी। अर जद ताँई गेर यहुदि मिनखा को टेम पुरो कोनी होसी बे यरुशलेमनै पगा तळै मसळीगा।

मिनख का जाया को पाछो आबो

25 “बी टेम सुरज चाँद अर तार म अनोरी बाता होसी अर धरती प झङ्घां-झङ्घां मिनखां म दुख आसी। अर समन्दर क गर्जबाऊं लेहरा उठसी अर बा लेहराऊं मिनख डर ज्यासी। 26 लोग दुनीया प पड़बाली मुसीबत अर डर की बजैऊं निरास हो ज्यासी। अर आगै

काँड होबालो ह, इ डर म जिसी क्युंक
आसमान की शक्तिया आपकी झगाऊ
हटा दी जासी। 27जणा पाछे लोग मिनख
का बेटानै मेमा भरी शक्ति क सागै
बादला म आता देखसी। 28थे जद अ
सगळी बातां होबा लागै जणा बी टेम थे
थारा सीरनै उपर उठाज्यों, क्युंक थारे
छुटकारो कनै ई होसी।

ईशु को बचन अमर ह

29बो बानै एक निति कथा कही,
“अंजीर का दरखत अर आ सगळा
दरखतानै देखो। 30जंयांई बामै कुपळा
फूटै जणा थे खुदई जाण ज्यावो की
उन्द्र्यालो आबालो ह। 31अंयां ई थे
जद आ बातानै होती देखो जणा जाण
जाज्यों परमेश्वर को राज आबालो
ह। 32म थानै साची रव्युं हुँ जद ताँई
अ सगळी बाता न होवीं जद ताँई ई
जुग को अन्त कोनी होवै। 33धरती अर
अकास टळ सकीं पण मेरो कह्यों कदैई
कोनी टळै।

चेता म रह्यो

34“ई ताँई चेता म रेह्हो, कणा अंयां
न होज्यां की थे तो लाग्या रेह्हो पिबा-
खाबा अर आटा चुन की चिंता म अर
बो दिन थार प फँदा की जंयां आ पडै।
35क्युंक सगळी धरती का मिनख ई
दिननै भोगसी। 36ई ताँई सदाई चेता म
रह्यो अर सदा अरदास करता रह्यो जिऊँ
थे सगळी होबाली बाताऊँ बच सको
अर मिनख का बेटा क सामै खड्या हो
सको। 37दिन म तो बो मन्दर म उपदेश
देतो अर रातनै जैतुन नाम का ढुंगरपै

रेतो। 38अर सगळा रोजकी सुवारई मंदिर
म बिका उपदेश सुणबा जाता हा।

ईशु न मारबा की जाळ-साजी

22 बिना खमिर की रोटी को
त्युहार जिनै फसै कहता हा
बो आर्यो हो। 2अर प्रधान याजक अर
शास्त्री ई फिराक म रेवै लाग्या की बिनै
क्यांसीक मारा क्युंक बे मिनखाऊँ डरता
हा।

ईशुनै धोखो देबा म यहुदा की हामी

3ईशु का बारा चेला मऊँ यहुदो जिनै
इस्करोती बी खेता हा बिमै शेतान
बड्गो। 4अर बो मंदर का प्रधान याजक,
अधिकारीयाँ अर सिर्पाईड़ा कनै जार
बाऊँ ईशुनै क्यांसी पकड़वाऊँ इपै
बतलायो। 5इ बात प बाकै तो घि का
दिया जळगा क्युंक बे तो आई चावा
हा अर बे इकै बदला म बिनै रिपिया
देबा की बात कही। 6यहूदो ई बात
म आपकी हामी मिलादी अर मोका
की फिराक म रेबा लाग्यो के ओ कद
भीड़ऊँ न्यारो होवै। अर म इनै धोखाऊँ
पकड़वा।

चेला क सागै ईशु को आखरी फसै को त्युहार

7ईब बिना खमिर की रोटी को दिन
आगो। बि दिन फसै ताँई ऊन्या की
बलि दि जाती ही। 8जणा बो पतरस अर
युहन्ननै कह्यों, जार आपणा ताँई फसै
की रोटी बाणाओ। 9बे कह्यो, “आ कठै
बणाणी ह। 10जणा बो कह्यो, “थे जंयांई
नगरी म बड़सयों बंयांई थानै एक

आदमी पाणी को घड़ो लिया मिलसी थे तो बिकै गेल गेल होजाज्यो अर जी घर म बो जावै थे बी, बी घर म बड़ ज्यायो। 11 अर बि घर का धणी'ऊ कहज्यों, “गुरु आ बुजबा भेज्या ही की बा बैठखकड़ी कठै ह जठै म मेरा चेला क सागै फसै की रोटी खास्यु? 12 जणा बो आदमी थानै बड़ो-सारो जच्यो-जचायड़ो चोबारो दिखासी थे। दोन्यु बठै ई सक्यु त्यार करज्यो। 13 जणा बे चलेगा अर जंय्यां बानै कह्यो गयों हो बंयाँई सक्यु मिल्यो जणा बे फसै की रोटी बणाई।

प्रबु भोज

14 जद बा घड़ी आई जणा ईशु आपका बा चेला क सागै रोटी खाबा बेठचो जिखा भेजेडा चेला खुवाता हा। 15 अर बो बाऊँ कह्यों, “की पीड़ा भोगबाऊँ पेली म चाऊँ हू क म थारै सागै फसै की रोटी खाऊँ। 16 क्युंक जद ताँई परमेश्वर का राज म ई रोटी को मतबल पूरो नइ होज्या आज क पाछै बि दिन ताँई म ओज्युं आ रोटी कोनी खाउँगो। 17 जणा बो कचोलो लेर अरदास करीं अर कह्यों ल्यों इनै आपसरी म बाँट ल्यों। 18 क्युंक आज'ऊ लेर जद ताँई परमेश्वर को राज न आज्यावै बि दिन ताँई म ओज्युं आ अँगुरा को रस कोनी पिऊ। 19 इकै पाछै बो रोटी लेर अरदास करी अर बिका टुकड़ा कर बानै देर कह्यो, ल्यो आ मेरी काया ह जखी थार ताँई दि गई ह मेरी याद म अंयाँई करज्यो। 20 अंयाँई रोटी खाबा क पाछै बो कचोलो लेर बानै कह्यो ल्यो ओ कचोलो मेरा लोय'ऊ बणाड़ा नया करार की निशानी ह। जिखो

थार ताँई बहायो जार्यो ह। 21 पण मनै पकड़ाबालो मेरे सागै ई खाबा लागर्यो ह। 22 मिनख का जायानै तो मरनो ई ह जंय्यां की परमेश्वर तै कर्यो ह। पण हाय बी मिनख प जखो बिनै पकड़ासी। 23 इ बात प बे एक दुसरा'ऊ बुजबा लाग्या आपणा म'ऊँ बो कुणसो ह जखो अंयां करसी।

बड़ो कुण इपै खिचां-तणी

24 चेला म इ बात प खिंचा तणी होई की बामै कुणसो बड़ो मान्यों ज्यावै। 25 ईशु कह्यों, “बे राजा जखा यहुदि कोनी बे आपकी प्रजा प जोर जमावी। अर राज करबाला मिनखा का भाईला खुवावीं। 26 पण थे अंयां का कोनी, इकै बदलै थार मऊँ जखो बड़ो ह बो छोटा की जंय्यां अर प्रधान ह बो दास की जंय्यां बणज्यो। 27 बड़ो कुण? जखो खाबा ताँई चौकी प बैठयो ह, नहिस परुसगारो? के बो कोनी जखो खाबा बेठयो ह, पण म तो थारै माइनै परुसगारा की जंय्यां हुं। 28 “पण थे बे हो जिखा मेरा दुख म सदाई मेरे सागै रिया हो। 29 राज करबा ताँई म थानै बो हक देर्यो हू जखो मेरा बाँप'ऊ मेरै मीलेडो ह। 30 क्युंक मेरा राज म थे मेरी चोकी प खाई-पी करस्यो अर राजगद्या प बेठ'र इज्जाएल का बारा गोता को न्याय करस्यो।

पतरस क मना करबा की बात ईशु पेली खेदी

31 ईशु पतरस'ऊ कह्यो, “शमोन ओ शमोन! मेरी बात सुण! जंय्यां एक कीसान ग्युनै फटकार बिनै तुड़ी'ऊ न्यारो

करै ह। बंयां ई थानै सगळानै बिचासबा की आज्ञा शैतान ले लिन्यो ह। 32पण म तेर ताँई परमेश्वरँ अरदास करी ह की तेरो बिश्वास बण्यो रै अर जद तु पाछो जिवन का गेलापै आवै जणा तेरा भायानै बिश्वास म पक्को करजै।” 33पतरस कह्यों, “प्रबु म तेरे सागै जेळ जाबा अर मरबाने बी त्यार हूं।” 34जणा ईशु कह्यो, “मेरी बात सूण जद ताँई तू तीन बार मेरै बेली कोनी नट देसी आज मुर्गो बाँग कोनी देसी।

दुख भोगबा ताँई त्यार रीज्यो

35इकै पाछे बो आपका चेला’ऊ बुज्यों, “म जद थानै बिना बटुवा, झाँचा अर चप्पला क भेज्यो जणा थानै क्यु चिज की कमी पडी ही के?” बे कह्या, “क्यांकी ई कमी कोनी होई। 36पण ईब म ख्युं हूं जिकनै बटुओ ह बो बिनै लेले अर अंयां ई झोळो अर जिकै कनै तलवार कोनी बो आपका गाबा बेचर बिनै मोल लेले। 37क्युंक शास्त्र म मण्डेडी बाता मेरै बेली पूरी होसी क बो उपराध्या म गिणयो जासी अ मण्डेडी बाता पूरी होबा जारी ह। 38चेला कह्यां, “प्रबु आ देखो अठै दो तलवार पडी ह, इपै बो कह्यो, “अ तो बोळी।”

जैतुन का डूँगरपै ईशु अरदास करी

39ईशु नगरीनै छोड़र आपकी बाँण गेल जैतुन का डूँगरपै चलेगो। अर चेला बिकै गेल गेल, 40बरै पुच्या

पाछै बो बाँऊ कह्यो, “अरदास करो की थे बिचास्या न जावो।” 41जत्ती दुर भाठो बगायो जा सकै ह बो बत्ती दुर बाँऊ न्यारो जार गोडा क पाण बेठर अरदास करबा लागगो। 42“बापु ज थे चावो तो इ दुख का कचोळाऊ मनै बचा सको हो, पण मेरी नई थारी इंच्छा पुरी होणी चाए।” 43जणा बरै बिकै सामै एक ईश्वर नगरीदूत प्रगट होयो अर बिनै हिम्मत बंधायो। 44अर बो बोळो दुखी होर ओर बी ज्यादा लगन क सागै अरदास करबा लागयो। अर बिको पसिनो खुन का टपका की जंयां धरती प गिर्यो हो। 45अर जद बो अरदासकै उठर आपका चेलानै समाळबा गयों जणा बे बिनै दुख क मार्या आखता होर सुत्या लाद्या। 46जणा बो बानै कह्यों “सौर्य क्याले हो खड़या होर अरदास म लाग ज्यावों जिऊं थे बिचास्या न जावो।”

ईशुनै पकड़बो

47बो हाल बोलर्यो ई हो, क बरै भीड़ भेली होगी अर बि भीड़ क आगै आगै यहुदा होर्यो जखो बा बारा चेला मऊं एक हो। बो ईशु क कनै आर बिको माखो, ले लिन्यो। 48पण ईशु कह्यो, “यहुदा मेरो माखो लेर के तु मिनख का जायानै धोखाऊं पकड़ावै ह? 49जणा बिका चेला आ भापर की आगै काँई होबालो हो कह्या प्रबु म्हें तलवार काडल्या कै? 50अर बामालो एक आपकी तलवार काड प्रधान याजक का दास को दायों

^f 22.47 मासो यहुदी मिनखा म माखो लेबो बंयाई ह जंयां आपणा म गळै लागबो बे जद आपसरी म मिलै जणा एक दुसरा को माखो लेवीं हीं।

कान काट दियो। 51 इपै ईशु कह्यों, “बस चुप-चाल्या रेह्हो!” अर बो बिका कान क हाथ अड़ार बिनै ओज्यूं जोप दिन्यो। 52 जणा पाछै बिपै चढाई करबा आया प्रधान याजक, मन्दर का सिपाईड़ा को अधिकारी अर बड़काऊं बो कह्यो, “म डाकू हूं के? जखो थे तलवार अर लाठी लेर मेर कनै आया हो। 53 जद म रोजीना थारै सागै मन्दर म रेह्तो हो बी टेम तो थे मेर प हाथ कोनी घाल्यो। पण आज थारो टेम ह जिपै अंधकार की ताकत राज करै ह।”

पतरस को मुकरबो

54 इकै पाछै बे बिनै पकड़र सऊं बड़ा याजक क घरा लेगा। अर पतरस छापळतो छापळतो बाकै गेल होर्यो हो। 55 याजक हाळी गुवाड़ी क बिच म जार बे आग सुलगाई अर जखा आग क च्यारूंमेर बैठया हा बाकै सागै ई पतरस बी बैठगो। 56 जणा एक दासी बिनै आग का च्याणणा म पिच्छाण'र कही ओ आदमी बी तो ईशु क सागैई हो। 57 पण पतरस नटतो नटतो कह्यों ए स्याणी म बिनै कोनी जाणू। 58 चिनेक देर पाछै एक और मिनख पतरसनै देखर बोल्यो, “तु बी तो बामै’ऊ ई ह पण ईबैक बी पतरस कह्यो, “अरै भला मानस म बो कोनी। 59 अर घंटाक पाछै एक जणो ओर जोर देर कह्यों ओ तो पकोई बामै’ऊ ई ह। क्युंक ओ बी गलिलीई ह। 60 पण पतरस कह्यों, “भला मानस मेरे क्युंई पलै कोनी पड़री, थे कि ताँई बोलर्या हो।” बो आ ख्येर्यो ई हो क मुर्गो बाँग दी। 61 जणा ईशु बिनै आपकी नाड़ घुमार देख्यो।

अर देखता ई पतरसनै प्रबु कि कहडी बात याद आगी क आज मुर्गा क बाँग देबाऊं पेली तु मेरै ताँई तीन बार नटसी। 62 जणा बो बारै आर बुर्या रोबा लागगो।

ईशु को मजाक बणाबो

63 जखा ईशुनै पकड़ राख्या हा बे बिको मजाक उडाबा अर पिटबा लागगा। 64 बे बिकी आँख्यां प पट्टी बाँध दी अर कह्या, “बुझा काड के तनै कुण मारै ह?” 65 अर बे बिको निरादर करबा ताँई ओर बी बोली बाता बोली।

यहुदि पंचा क सामै ईशु

66 दिन उगता ई बड़का, प्रधान याजक अर शास्त्रनै सीखाबाला भेला होया अर ईशुनै बी पंचायत म पेश कर्यो गयो। 67 अर बिऊं सवाल कर्यो, “तु मसी ह के?” ईशु कह्यों, “ज म ख्युं जणा थे मेरो विश्वास कोनी करस्यो। 68 अर ज म थानै बुजुं जणा थे जबाब कोनी देस्यो। 69 पण ईबौं ई मिनख को जायो परम प्रधान परमेश्वर क दाया हाथ कानी बेठसी।” 70 बे सगळा कह्या, “जणा के तु परमेश्वर को बेटो ह?” ईशु कह्यों, “जंयां की थे खुद ख्येर्या हो, क बो म हूं।” 71 जणा बे कह्या, “आपानै ओर सबूत की कोई जुरत कोनी क्युंक आपा अ बात तो इकै मुण्डाऊं ई सूण लिया हा।”

पिळातुस की ईशुऊं पुछताछ

23 इकै पाछै सगळी पंचायत खड़ी होगी अर बिनै पिळातुस क कनै लेगी। 2 बे बिपै बलेम लगाया, “म् है इनै मिनखानै बेकाता पकड़या

हा क सप्राटनै कर नइ देणो चाये अर ओ खुदनै मसी राजा बतावै ह। ३जणा पिळातुस बिँऊ बुज्यों, “तू यहुदिया को राजा ह के?” ईशु कह्यों, “जंय्यां तु खुद ही ख्येयो ह।” ४जणा पिळातुस मिनखा अर प्रधान याजकऊँ कह्यों, “मनै तो इ आदमी म क्युर्ह गळत कोनी दिख्येयो।” ५पण बे आपकी बात प अड़िया रिया। “नई ओ गलिल दिसावरऊँ लेर सगळा यहुदिया दिसावर अर उरै का मिनखानै आपकी सीखऊँ भड़कायो ह।” ६आ सुण’र पिळातुस कह्यों, “के ओ गलिल को रेहबाळो ह?” ७अर आ जाणर की बो हिरोदेश का इलाका को ह जणा बो बिनै हिरोदेश क कनै भेज दिन्यों जखो बा दिना म यरुशलेम म ई हो।

ईशु हिरोदेश क दरबार म

८ईशुनै देख’र हिरोदेश राजी होयो क्युर्क बो बोली पेलीऊँ बिकै बारा म सुणराख्यों हो बो बिँऊ मिलबो चातो हो अर बिँऊ क्युं चमत्कार देखबो चातो हो। ९जणा बो ईशुऊँ बोलि बाता बुजी पण बो एक कोई जुबाब कोनी दियो। १०प्रधान याजक अर शास्त्रनै सीखाबाला बढै खड़्या खड़्या एक की दो लगाता रिया। ११जणा हिरोदेश अर बिका सिपाईड़ा बिकी हंसी उडाया। अर बिको निरादर कर बिनै एक मेंगो चोळो पिरार उलटो पिळातुस क कनै भेज दिन्यो। १२बि दिन ई हिरोदेश अर पिळातुस एक दुसरा का भाइला बणगा इऊँ पेली बाकी कणाई कोनी बणी।

ईशुनै मोत की सजा

१३पिळातुस प्रधान याजका, अधिकार्य अर मिनखानै भेडा करर १४बाऊँ कह्यों, “थे ई आदमीनै, मिनखानै बेकाबा का जुर्म म मेरै कनै ल्याया। अर म थारै सामैइ ई बात की जाँच पड़ताल करी पण म बिमै अंय्यां की कोई बात ई कोनी पकड़ी। १५अर न हिरोदेशनै इमै क्युं सुज्यो जणाई तो बो ईनै पाछो आपणे कनै भेज दियो। ओ अंय्यां को क्युर्ह कोनी कर्यो जिकै चलते ओ मोत की सजा भोगै। १६जणा म ईकै तड़ा मरवा’र छोड़ दयु?” १७पीछातुस आई साल फसै का त्युआर प यहुदि मिनखा ताँई एक केदीनै छोड़तो हो।^८ १८जणा सका स जोरऊँ एक सागै कह्या, “तु म्हार ताँई बरब्बानै छोड़ दे पण इकौ काम जचा १९बरब्बानै नगरी म सरकार क खिलाप बगावत अर हत्या का जुर्म म जेळ म गेर राख्यो हो। २०पण पिळातुस ईशुनै छोड़बो चावो हो। जणाई बो लोगानै ओज्युं कह्यो। २१पण बे एक ई रट लगा राख्वी, “इनै सुल्ली प टांग द्यों।” २२पिळातुस तिसरका कह्यों, “क्युं बो अंय्यां को कुणसो पाप कर्यो ह? जिखो म ईनै मोत की सजा द्युं। क्युर्क मनै तो इमै अंय्यां की कोई बुराई कोनी दिख्वी जणा फेर म इकै तड़ा लगवार छोड़ द्युं।” २३पण बे और बी जोरऊँ चीलाबा लाग्गा, नई ईनै तो सुल्ली प टांगो अर बाकी ई जीत होई।^{२४}पिळातुस आदेश काड दिया की आकी मांग पूरी होवै।

^८ 23.17 क्युंक पूराणी हाथऊँ मांडेडी यूनानी पोथ्या म आ आयत कोनी।

25 अर बो एक आदेश ओर काडयो की बरब्बानै छोड़ दियो जावै जिनै मिनख छोड़बा की माँग करै हा जखो सरकार क खिलाप बगावत अर हत्या का जुर्म म जेळ म पड़यो हो अर ईशुनै बाका हाथा म सोप दियो जिंऊ बे बिकै सागै बा कर सकै जो बे चावै हा।

ईशुनै सुझी चढ़ाबो

26 सीपाईड़ा जद ईशुनै ले ज्यारा हा। जणा बे शमोन नाम का एक कुरेनै देख्यो जखो ढाणींऊ आर्यो हो अर बे बिनै पकड़र बिपै सूझी धर दिन्या अर बिनै ईशु क गेल गेल कर लियो। 27 अर मिनखा की भीड़ की भीड़ बिकै गेल-गेल होरी, जीमै बोली लुगांयां अंयां की ही जखी ईशु ताँई रोरी अर बिलखरी ही। 28 इपै ईशु पाछै मुड़र बाऊं कह्यों यरुशलेम म रेबाळी लुगायो थे मेरे ताँई मना रोओ पण थे खुद ताँई अर थारा टाबरा ताँई रोओ। 29 क्युंक बा घडी बी आबाली ह जद मिनख खैसी भागहाली ही बे लुगांया जखी बाँझडी ह। अर बा कोख जखी टाबर कोनी जणी अर बा छाती जखी कदैई कोनी चुंधाई। 30 बि घडी मिनख ढुँगरऊं बोलसी म्हार प पड़मरो अर ढुँगर्याऊं बोलसी महानै लुखा लो। 31 क्युंक जद मिनख हर्यौ दरखूतनै कोनी बकसै जणा फेर सुखा को तो खेबोई केत? 32 बे बिकै सागै दो उपराध्यानै बी मारबानै जार्या हा। 33 अर जद बे बि झँघा पुच्या जिनै भोडी खेता हा, बे ईशु

अर बा दो कुकर्मायानै न सुझी चढा दिया बा दोन्या मऊं एक न बिकै दायणा अर दुसरा न बांवळ्या हाथ कानी सुझी प टाँग दिया। 34 इपै ईशु बोल्यो, “परम-पिता अनै माफ कर द्यो क्युंक अनै कोनी बेरो ये के कर्या ही। अर बे सिपाईड़ा पासो फेकर बिका गाब्बानै आपसर्या म बाँट लिन्या। 35 बठै खड़्या मिनख देखा हा, अर बठै खड़्या यहुदि नेता आ बोलर बिको मजाक उडार्या हा की ओ ओरानै बचायो ज ओ साँच्याई परमेश्वर को टाळेडो मसी ह जणा खुदनै बचार दिखावै। 36 सिपाईड़ा बी बिको मजाक उडायो अर बिनै सस्ती अँगुरी पिबा ताँई दि। 37 अर कह्या, “तु साँच्याई यहुदिया को राजा ह जणा खुदनै बचा ले।” 38 अर बिकै सिर क उपरानै एक बात मांड दि ही की ओ यहुदि मिनखा को राजा ह।

39 बिकै साँगै लटकायडा दो उपराध्या मऊं एक जणो बिकी हँसी करतोई कह्यों, “तु मसी कोनी के? जणा पाछै खुद बी बच अर म्हानै बी बचा।” 40 जणा दुसरो हो जखो बिनै दकालर कह्यो, “तनै जमाई परमेश्वर को डर कोनी? तु बी तो बाई सजा भोगर्यो ह जखी ओ भोगर्यो ह। 41 क्युंक आपानै आपणी करनी गेल फळ मिलर्यो ह, पण ओ लाय तो क्युं कर्योइ कोनी।” 42 पाछै बो बोल्यो, “ईशु जद तु तेरा राज म आवै जणा मनै याद राखजै।” 43 जणा ईशु बिऊं कह्यो, “म तनै बचन देऊं हूँ क आज तू मेरे सागै प्रलोक” म होसी।”

ईशु की मोत

44बि दिन दोपारा बारा बजैँ लेर तीन बजे ताँई सगळी धरती प अंधेरो घट धूमर होगो। 45सुरज काळो होगो। अर मन्दर को परदो फाटर दो टुकड़ा होगा। 46ईशु जोर की उवाज म बोल्यो, “बापु म मेरी आत्मा थारा हाथां म देऊँ हूं आ खेताँई, बिका पिराण निसरगा।” 47अठै ज्यो क्यूं होयो बिनै देखर सुबेदार परमेश्वर कि बडाई करर कह्यो ओ पक्कोई धर्मी मिनख हो। 48अर बठै भेड़ा होयड़ा मिनख बठै जो क्यूं होयो बिनै देखर बी दुख म छाती कुटताँई आपकै घरा बावड़ायाया। 49पण बिका जाण-पिछाण का मिनख अर बे लगांयां जखी गलिलऊँ बिकै सागै आई बे दुर खड़ी होर सक्युं देखरी ही।

ईशुनै गाडबो

50-51यहुदीया दिसावर म अरमितीया नगरी कौं रेहबालो युसफ नाम को एक मिनख हो। जखो यहुदि पंचायत को सदस्य हो। पण बो सभा का दुसरा मिनखा की बाता म सामिल कोनी हो जिमै ईशुनै मारबा प सेमति होइ हि ओ धर्मी अर लोगा म मान्यो थान्यो हो। अर ओ परमेश्वर का राजनै उडीकै हो। 52बो ईशु की लाश माँगबा पिलातुस क कनै गयो। 53अर ईशु की लाश सुल्ली प'ऊ उतार बिपै मखमल को चादरो पछेटर बिनै ढाड म खुदेड़ी कबर म धर दिनी। जिमै इऊँ पेली खिकिई लाश कोनी धरी गई ही। 54बी दिन सकरवार हो अर आराम हालो दिन लागबालो हो। 55बे

लुगांया जखी गलील’ऊँ चालर आई ही बे युसुफ क गेल जार बि कबरनै देखी अर आ बी देखी की बिकी लाश कथ्यां धरी गई है। 56जणा पाछै बे ओटी आर लाश प लगाबा ताँई सुगन्ध देबालो लेव बणाई। अर बिधी बिधान गेल बे आराम हालै दिन आराम करी।

मरया पाछै ईशु को जि उठबो

24 सप्ता क पेलडा दिन दितवारनै भागपाटच्या ई बे लुगांया जखी बो सुगन्ध देबालो लेव जिनै बे त्यार करी ही बिनै लेर कबर प गई। 2बानै कबर का मुंडा आगै को भाठो सरकेडो लाध्यो। 3जणा बे माइनै जार देखी पण बानै बठै प्रबु ईशु की लाश कोनी लाधी। 4बे खड़ी-खड़ी सोचबा लागी क ईशु की



दो ईश्वर नगरी दूत अर कबर का बारना प खड़ी दो लुगांया (24.4)

लाश कठे गई, अति बारा मई बाकै कनै दो आदमी आर खड़या होगा जाका गाबा भळका मारै हा। ५जणा बे बानै देखर डर क मारी निचे घुण घालली। बे दोन्युं जणा बाऊं कह्या, “जखो जिन्दो ह बिनै मरेड़ा म क्यु ढुंढो हो? ६बो उरै कोनी। बो जी उठयो। बा बात याद करो जखी बो मरबाऊं पेली गलिल म थारूँ कही ही। ७बो कह्यों हो, ‘आ तो होणी ह क मिनख को बेटो पाप्यां क हाथां म पड़सी बिनै सुळि चढायो जासी पण तीसरे दिन जी-उठसी’।” ८जणा बा लुगांया क बिकी बातां याद आई। ९अर बैठेऊं पाढी आर बे बा ग्यारा चेला अर दुसरानै बे सगळी बाता बताई। १०अ बाता बताबाळी लुगांया म मरियम मगदलिनी, योअना अर याकुब की माँ मरियम अर और बी ही जखी बा चेलानै जखा भेजेड़ा खुवाता हा अ बाता बतारी ही। ११पण बाकी बाता बानै फांप लागी अर बे बांकी बाता प भरोसो कोनी कर्या हा। १२पण पतरस आ सुणर दिपटी जखो कबर प जार थम्यो अर बो झुकर देख्यो जणा बैठे गाबा क अलावा क्युंइ कोनी हो। जणा बो जो क्युं बैठे देख्यो बिपै ताजुब करतो घरा चलेगो।

इम्माउस का गेला म

१३बि दिन इ बिका चेला मऊं दो जणा यरुशलेमऊं करिब सात कोस पैरै इम्माउस गाँव जार्या हा। १४अर बे जो क्युं होयो हो बिपै चालता-चालता आपसर्या म बतलार्या हा। १५अर जद बे बतलार्या हा जणा ईशु बाँकै कनै आर बाकै सागै होलियो। १६पण बे बिनै देखर

बी कोनी पिछाण सक्या। १७ईशु बाऊं बुज्यों, “थे चालता- चालता आपसर्या म काँई बतलार्या हो?” जणा बे दुखी होर बैठे ई खड़या होगा। १८बामैऊं किलयुपास नाम को एक आदमी हो बो कह्यों, “तु एकलो इ अंयां को आबाळो जाबाळो मिनख ह जिनै गेलडा दिना म यरुशलेम म जो क्यु घटचो बिकै बारा म कोनी बेरो?” १९जणा ईशु कह्यो, “इसो काँई होगो?” जणा बे बिनै बताबा लाग्या की, “अ बाता ईशु नासरी क बारा म ह जखो सगळा मिनखा अर परमेश्वर की निजरा म खेबा अर करबा म शक्तिशाली अर परमेश्वर की खेबाळो हो। २०बिनै म्हारा नेता अर प्रधान याजक पकड़वार बिनै मोत की सजा दिवा दिन्या अर बिनै सुळी चढा दियो गयो। २१अर म्है ई बात कि आस लगाया बेठचा हा, की ओई ईज्जाएलनै छुड़बाळो मिनख ह, आ बातानै होया निमडया आज तिसरो दिन ह। २२अर म्हारी टोळी की लुगांया म्हाने ताजुब म गेर दिनी। होयो अंयां की आज भागपाटचा ई बे कबर प गई। २३अर बानै बैठे बिकी लाश कोनी मिली। बे पाढी आर म्हानै आ खी कि म्हानै ईश्वर नगरीदुता को दर्शव होयो ह जखो म्हानै आ बताई की बो तो जीवै ह। २४जणा म्हारमऊं क्युंक कबर प गया पण जंया लुगांया बताई ही बैठे ठिक बंयाई हो, अर बिको क्युई अतो-पतो कोनी हो।” २५जणा ईशु बानै कह्यो, “थे कय्यां का बादु अर परमेश्वर की खेबाळा की बाता प बिश्वास करबा म ढिल्ला हो। २६काँई मसि ताई ओ जरुरी कोनी हो क बो आ दुख-तकलिफानै भोगै

अर आपकी मेमा धारण करै?” 27 अर बो बानै मुसाऊँ लेर सगळा परमेश्वर की खेबाळा की बे बाता खोल’र बताँई जखी पबितर शास्त्र म बिकै बारा म मंडरी ह। 28 जद बे बी गाँव क साकड़ा पुच्चा जठै बे जावै हा। जणा ईशु क्युं अंयां को बर्ताव कर्यो जंयां बिनै आगै जाणो होवै। 29 पण बे बिनै जिदा जादी कर आ खेर डाट लिया कि इब दिन आँथगो ह। जणा बो मायनै गयो अर बाकै कनै डटगो। 30 अर जद रोटी खाबा बो बाकै सागै चोकी प बेठचो जणा रोटी उठार परमेश्वर’ऊ अरदास करी अर रोटी तोड़’र बानै दिनी। 31 बि घड़ी ई बा सगळा कि आँख्या खुलगी अर बे बिनै पिछाणग्या। पण बो बाकै सामैऊँ गायप होगो। 32 जणा बे आपसरी म बतळाबा लागगा, “बो गेला म जद आपणाऊँ बातचित कर्यो हो। अर आपनै शास्त्र की बाता समझार्यो हो। बी टेम आपणा मन म जोश पेदा कोनी होर्यो हो के?” 33 जद की जद ई बे खड़्या होर यरुशलेम रवाना होग्या। अर बेठे बानै बे ग्यारा चेला अर बाकी का एक सागै भेळा होयड़ा मिलया। 34 बे बोलर्या हा, “प्रबु साँच्याई जीगो क्युंक शमौन बिनै जीवतानै देख्यो ह।” 35 जणा बे दोन्यु जणा जखो क्युं बाकै सागै गेला म होयो बानै बतायो अर आ बी बता दिनी की बे कय्यां बिनै रोटी तोड़ता टेम पिछाणग्या।

ईशु आपका चेला न दिख्यो

36 हाल बै आ बाता क बारा म बतळार्याई हा क ईशु खुद बाकै मांय आर खडचो होगो अर बाऊँ बोल्यो,

“थानै शान्ति मिलै।” 37 पण बे बुरी ढाळ डरगा जंयां कोई आत्मा देख लियो होवै। 38 जणा बो बानै कह्यो, “थे क्याले चित उठा राख्या हो? अर थारा मना म ओ भेम कठैऊँ आग्यो? 39 मेरे हाथ लगा’र मेरा हाथ पगानै देखो। क्युंक आत्मा म हाडमाँस कोनी होवै जंयां थे मेर म देखर्या हो।” 40 अंयां बोल’र बो बानै आपका हाथ-पग दिखाया। 41 पण बे खुशी अर ताजुब क मार्या हाल ताँई बिपै बिश्वास कोनी कर सक्यां, जणा बो बानै बुज्यों, “थारै कनै खाबा ताँई क्युं ह के?” 42 बे बिनै भुंडेड़ी मछली को टुक दिन्यो। 43 बो बिनै लेर बाकै सामै खायो। 44 अर बाऊँ कह्यो, “अ बे बाता ही जखी म जणाड़े कही ही जद म थारै सागै हो। अ सगळी बात जखी मुसा का विधान म, परमेश्वर की खेबाळा अर भजना की पौथी म मण्डरी ह सगळी पुरी होणी ई ही।”

45 अर बो पबितर शास्त्रनै समझाबा ताँई बाकी अङ्कल का पाट खोल दिया। 46 अर बो बानै कह्यो, “अ बेर्इ बाता हीं जखी मंडेड़ी ह की मसी दुख भोगसी अर मर्या पाढ़ै तिजै दिन ओज्यूं जी उठसी। 47 अर बिका नामऊँ पापा की माफी ताँई मन फिराबा का चौखा समचार को यरुशलेमऊँ लेर सगळा देशा म परचार कर्यो जासी। 48 थे आ बाता का गुवा हो। 49 अर जिको करार मेरो बाप मैरूं कर्यो ह बा पबितर आत्मा म थार ताँई भेजस्यूं। पण थे बि दिन ताँई ई नगरी म ई टिक्या रिज्यो जद ताँई थानै पबितर आत्मा’ऊ शक्ति कोनी मिलज्यां।”

ईशु को ईश्वर नगरी
म उठायो जाबो

50जणा बो बानै बैतनिय्याह गाँव ताँई
बारै लेगो। अर बो बानै हाथ बढारे
आर्शिवाद दिन्यो। 51अर बानै आर्शिवाद

देतो देतानै ई नाकै कर ईश्वर नगरी
म उठा लियो गयो। 52जणा बे बिकी
भक्ति करी अर राजी खुशी यरुशलेम
बावड़याया। 53अर बे मन्दर म परमेश्वर
को गुणगान करता आपको टेम काटबा
लागगा।



ईशु को ईश्वर नगरी म उठायो जाबो (24.51)

टाळेड़ा खास चेला का काम

लुका क हाथऊँ मांडेड़ी दुसरी पौथी की जाणकारी

टाळेड़ा खास चेला का काम पोथी पेली विश्वासी मण्डळी की खाणी ह जखी यरुशलेमऊँ लेर एहूदिया, सामरिया अर इकै पार बी फेलरी ही, जय्या की ईश्वर नगरी म जाबाऊँ पेली ईशु आपका चेला न कह्यो हो। (टाळेड़ा खास चेला का काम 1:8) टाळेड़ा खास चेला का काम की पोथी लूका क हाथा माण्डेड़ी दूसरी पौथी ह ओ बोई लूको ह जिखो लूका को चोखो समचार मांडयो हो। ओ एक बैद हो अर ओ सूल अर सही ढंग बाता न मांडी ह। बो आप की दोन्यु पोथ्या (लूका क हाथा माण्डेड़ा चोखा समचार अर टाळेड़ा खास चेला का काम) ‘थियुफिलुस’ न मांडै ह जिखो एक यूनानी मिनख ह, पण सागै ही अ पौथ्या यूनानी अर एहूदि दोन्यूं मसिही समाज ताँई मांडी गई ह।

अनुमान ह की टाळेड़ा खास चेला का काम पोथी ईशु का जलम क 60-64 बरसा पाछै मांडी गई क्यु क सगळी पोथी मण्डबा क पेली पौलुस जेल स छुटगो हो। पौलुस की यात्रा म लुको बी बिकै सागै हो ओर अनुमान ह की टाळेड़ा खास चेला का काम की पोथी अन्ताकिया म मांडी गई। आ पोथी लूका क हाथा मण्डेड़ा चोखा समचार क आगै की घटना क बारा म बतावै ह, जखी ईशु क ईश्वर नगरी म जाबा की घटना क सागै चालू होवै ह। ई पोथी क माण्डया जाबा क पिछै बी लूका को बोई उदेश्य हो जिखो पेलेड़ी पोथी क पिछै हो। बो थियुफिलुस अर संख्या म बढता बिश्वास्या न जो क्यु बे सिख्या हा बा बाता म बनै निश्चित करबो चावतो हो जणा बो ईशु का जीवन अर मसिहत का फेलाव को एक लेखो-जोखो माण्डयो।

टाळेड़ा खास चेला का काम की पोथी आपणा ताँई पल्या की बिश्वासी मण्डळी अर ईशु का बिश्वास म जिबा को नमूनो पेश करै ह।

रूप रेखा

- पेली बात पबितर आत्मा चेला प उतर्यो अर बिश्वासी मण्डळी बढबा लागी। (1:1 - 8:1)

2. बिश्वासी मण्डली न दिन-घालबो अर मण्डली को यरुशलेम क बारै फेलबो । (8:2 - 12:23) ।
 3. पौलुस की पेली चोखा समचार परचार यात्रा (12:24 - 14:28) ।
 4. नया बिश्वास्या न काँई-काँई बाता न मानबो चाये ई बात का फेसला ताँई बड़का की सभा । (15:1-35) ।
 5. पौलुस की दुसरी चोखा समचार परचार यात्रा (15:35 - 18:22) ।
 6. पौलुस की तीसरी चोखा समचार परचार यात्रा (18:23 - 20:38) ।
 7. यरुशलेम म पौलुस न बन्द बणाबो (21-26) ।
 8. आखिर म पौलुस न रोम लेज्याबो (27-28) ।
-

शुरुआती बाता

1 प्यारा थियुफिलुस, म मेरी पेलडी । पौथी म बे सगळी बातां मांडी, जानै ईशु बी दिन'ऊ करतो अर बानै सीखातो आयो जी दिन'ऊ बो आपको सेवा को काम शरु कर 2ईश्वर की नगरी म उठायो कोनी गयो हो । इकै पेल्या बो परमेश्वर की आत्मा की शक्तीऊ खुद का भेजेडा ग्यारा चेला न काँई-काँई करबो ह बा कामा को हुक्म दियो । 3बो मरबा क पाछै बोला पुक्का सबुत देर खुद न मरेड़ा म ऊ जिंदो साबित कर्यो, अर बो चालिस दिना ताँई बानै दिखतो रिह्यो अर बा'ऊ परमेश्वर का राज क बारां म बतलातो रिह्यो । 4एक खास मौका प जद बे बिकै सागै जीमर्या हा जणा ईशु बानै हुक्म दिन्यो, “थे यरुसलेम क बारै पग मना धरज्यो, पण जी वरदान क बारा म थे मेरा मुँडाऊँ सुण्या हो बिकी बाट जोता रिज्यो क्युंकि बि बात कि जुबान परमेश्वर करी ह । 5अर युहन्नो तो पाणीऊँ बतिस्मो दिया करतो हो,

पण आबाढा दिना म थानै परमेश्वर की आत्मा को बतिस्मो मिलसी ।

ईशु को ईश्वर नगरी म उठायो जाबो 6बे भेला होर बिऊँ बज्या, “प्रबु, के तू ई टेम ई इज्जाएनियो न राज पाढो देसी?” 7जणा बो बोल्यो, बी दिन अर बि घड़ी न जाणबा को काम थारो कोनी, क्युंक बा परमेश्वर क हाथ तळै कि बात ह । 8पण जद परमेश्वर की आत्मा थानै मिलसी जणा थारै म परमेश्वर कि



ईश्वर नगरी दूत अर चेला (1.10)

शक्ति आज्यासी अर थे यरुसलेम, सगळा यहुदिया, सामरीया का ईलाका अर धरती का इ कूणा स बि कूणा ताँई मेरा गुवा होस्यों। 9आ खेर बो बाँके देखता-देखताँई ईशबर नगरी म उठालियो गयो अर एक बादळी बिनै ढकलिनी। 10अर बे बिनै जांवता न एकटोर आसमान कानी देखर्या हा जणा अता मई दो मिनख एकदम धोळा गाब्बा म बाँके कनै आर खड़्या होग्या। 11अर बासै बोल्या, “अैर गलीलीयो, खड़्या-खड़्या आसमान म काँई देखर्या हो? ओ ईशु जिनै थार म स ईशबर नगरी म उठायो गयो ह ओ जय्या गयो ह बंध्याँई पाढो आसी।”

यहुदा को ओदो मत्तिया न मिलबो

12जणा पाछै बे जैतून ढूँगरी पऊँ जखी यरुसलेम स करीब आदेक कोस पैरे ही, बठै स ओटा यरुसलेम आया, 13अर बठै पुगताँई बे उपरला चोबारा म चलेगा, जठै पतरस, युहन्नो, याकुब, अन्द्रियास, फिलिपुस, थोमो, बरतूल्मो, मत्ति, हलफाई को छोरो याकुब, देशभक्त शमौन अर याकुब को छोरो यहुदो रेहता हा। 14अर आके सागै क्युंकु लुगाया बी ही, अ सगळा एक चित होर अरदास करबा म लाग्या रेहता हा। बामै ईशु कि माँ मरीयम अर बिको भाई बी हो। 15जणा पाछै बा दिना म पतरस बा बिश्वास्या म खड़्यो होर बोल्यों जखा गिणत-माणत का एक सौ बिस हा, 16“मेरा भाईड़ो अर भाणों पवित्र शास्त्र को बो लेख जखो यहुदा (जखो ईशु न पकड़बाला की मद्द करी ही) क बारा म मंडेड़ो ह, जिनै

बोळी पेल्या परमेश्वर की आत्मा दाउद क मुन्डा होर बोल्यो हो, बो तो पुरो होणाँई हो। 17बो आपणा मालोई हो, अर ई सेवा म बिको बी शीर हो। 18बो आपकी पाप कि कमाईऊँ एक खेत मोल लियो, अर बो सिर बाणी पड़्यो जिसै बिकी काया फाटगी अर बिका सगळा अंतड़ा-ओजड़ा बारनै आ पड़्या। 19इ बात को बेरो सगळी यरुसलेम नगरी न पड़्यो। जणाई तो बाकी बोली म बि खेत को नाम ‘हकलदमा’ पड़्यो जिको मतबल ‘लोय को खेत होवै ह। 20अर भजना की पौथी म अंय्यां मन्डर्यो ह, बिको घर उजड ज्यावै, अर बिमै कोई कोनी बसै।’

अर अय्या बी मंडर्यो ह की ‘बिको ओदो कोई दुसरो लेले।’

21-22जणा आ जरुरी ह, क जद ईशु आपणै सागै हो अर बि टेम जखा सदा आपणै सागै रेहता हा बा दिन स युहन्नो पाणी स बतिस्मो देबो चालु कर्यो हो बि दिन स लेर ईशु न आपणा मऊँ ईशबर नगरी म उठाया जाबा का दिन ताँई बामैऊँ आपा न एक जणो गुवा होबा ताँई टाळ लेणो चाए। 23जणा बे, दो जणा न खड़्यो कर्या, जामै स एक यूसुफ हो जीनै बरसबा खेता हा, जिको दुसरो नाम यूसूतूस हो, दुसरो जणो मत्तियाह हो, 24अर बे आ खेर अरदास करबा लाग्या, ‘क प्रबु थे सगळा का चित न जाणो हो थे म्हानै बतावो क थे आ दोन्या म स किन्नै टाळया हो। 25जिसै बो थारी सेवा करबा ताँई ई टाळेड़ा चेला का ओदा न ले सकै, जिनै एहूदो छोड़र जी झागा जोगो हो बठै ई चल्योगो।”

26जणा बे बा दोन्या क बारा म पर्चि
गेरी अर पर्चि मतियाह क नाम प खुली
जिकै पाछै बो बा ग्यारा टाळेड़ा चेला
म गीण्यो गयो।

परमेश्वर की आत्मा को धरती प उतरबो

2 पेन्तिकुस्त^a का त्युहार हाँडे दिन
बे सगळा बिश्वासी एक झङ्घा भेला
होर्या हा। 2अति बारा म ई आसमाऊँ
आँधी की सी आवाज होई अर बो
सगळो घर जठै बे बेठचा हा गुंजबा
लागगो। 3अर बानै आग की लपटा
की जय्यां फेलती दिखी, अर बे लपटा
एक-एक प आ'र डटगी। 4बे सगळा
परमेश्वर की पवित्र आत्माऊँ भरगा अर
जय्यां आत्मा बानै बोलबा की शक्ति दि
बे बंयाईं दुसरी भाषा म बोलबा लाग्या।
5बी टेम यरुसलेम म दुनिया का सगळा
देशाऊँ यहुदि भगत आयड़ा हा। 6जद
बे बा आवाज सुण्या जणा बठै घणी-
सारी भीड़ भेली होगी अर बे आ सुण'र
ताजुब म पड़ग्या क अ सगळा तो म्हारी
ई भाषा म बोलर्या ह। 7बे सगळा उक-
चुक होगा अर ताजुब म पड़'र बोल्या अ
सगळा जखा बोलर्या ह अ गलिलि कोनी
के?, 8जणा ओ कय्यां होयो क आपां
सगळा आनै आपणी भाषा म बोलता
सुणर्या हा। 9आपा जखा पारसी, मेदी,
अर एलामी, मीसोपोटामिया, यहुदीया
अर कप्पुदुकिया, पन्तूस अर एशिया,
10फूगिया अर पंफुलिया, मिस अर
साइरिन क सारै पड़बाला लिबिया का
रेबाला। अर आपणा म स क्युंक रोमऊँ
आयड़ा मुसाफिर हा। 11जामै स जन्मजात

यहुदी अर यहुदी धर्म न मानबाला हाँ,
अर आपणा मऊँ क्युंक क्रेती अर अरबऊँ
बी आयड़ा ही। पण “आपा सगळा अठै
परमेश्वर का बडा-बडा कामा कि चर्चा
आपणी खुद की भाषा म ई सुणर्या हा।”
12बे उक-चुक होग्या अर ताजुब कर'र
आपसरी म बुझबा लागग्या क अठै
ओ काँई होर्यो ह? 13पण क्युंक जणा
बिश्वास्या की हाँसी उडाबा लाग्या अर
बोल्या अ तो पियड़ा ही।

पतरस को भाषण

14जणा पतरस बा ग्यारा टाळेड़ा
खास चेला क सागै खड़यो हो'र जोरूँ
बोलबा लाग्यो एहूदीयो अर यरुशलेम
का रेह्वालो मनै खैबा द्र्यो, क अठै
काँई होर्यो ह, अर मेरी बातां न गोर
लगा'र सूणो। 15थे जय्यां समझर्या हो
बंयां कोनी ह आमसै कोईसोई कोनी
पियड़ो अर बंयां बी हाँल तो ओ दिन
को पेलो पेहर ह। 16पण आ तो बा
भविष्यवाणी ह जखी योएल परमेश्वर
की खेबालो कही ही।

17परमेश्वर बोलै ह आखरी दिना म,
म मेरी आत्मा सगळा प
उतारस्युँ।

अर थारा छोरा-छोरी परमेश्वर की
बातां बतासी।

अर थारा जवान दर्शव देखसी अर
बडका सुपना देखसी।

18अर म मेरा दास दास्यां न बा
दिना म मेरी आत्मा स भर
देस्युँ।

अर बे मेरा संदेशा को हेल्लो
पाड़सी।

19म उपर असमान म चमत्कार अर
निचै धरती प अचरजभर्या काम
करस्युँ।
बा दिना म लौय, लाय अर धुँआ को
बादल होसी।
प्रबु का बि महान अर मेह्वाभर्या दिन
क आबाऊँ पेली

20सूरज काळो अर चाँद लोय की
जय्यां लाल हो ज्यासी।

21अर जखा बी प्रबु को नाम ले'र
बिनै पुकारसी, बे सगळा बचा
लिया जासी।

22इज्जाएल का रेहबाळो, ईशु जखो
नासरत को ह बिकै बारा म आ बचना
न सुणो। परमेश्वर ईशु क हाथा चिन
चमत्कार अर अचरजभर्या काम कर'र
आ साबित कर्यो क बो परमेश्वर कानीऊँ
थारै ताँई भेजेडो मिनख हो। जय्यां की
थे सगळा जाणो हो। 23परमेश्वर आपका
मकसद अर आबाली बातां न जाणबाला
ज्ञानऊँ पेल्याई तै कर्यो, क ईशु थारा
हाथा म सोप्यो ज्यासी अर थे पापी
मिनखा क हाथा बिनै पकड़ेर बिका
हाथा म किला ठोकर बिनै सुळी प
चढ़ा'र मार गेरस्यो। 24पण परमेश्वर बिनै
मोतऊँ ओज्युँ जिवा दिन्यो क्युँ क आ
होय कोन सकै ही क मोत बिकै जेवडो
घाल्या राखती। 25बी ताँई दाऊद खेवै ह,
“म सदाई प्रबु न मेरै सामै देखूँहुँ।
क्युँक बो मेरै सागै ह।
इ ताँई म कोनी डिगुं।
26ई ताँई मेरो जिवडो राजी ह।
अर मेरी जुबान राजी खुशी की
बात करसी। अर मं आस म
जीस्युँ।

टाळेडा खास चेला का काम 2:19-35

27क्युँ क तू मेरी आत्मा न पताळ म
कोनी छोडसी।
अर न ई तू तेरा बिश्वास जोगा
दास न कबर्या म सीड़बा
देसी।

28तू मनै जुग-जुग जीबा को गेल्लो
दिखायो ह।
अर तेरी संगत मनै राजी कर देसी।

29सूणो भाईडो म थानै आपणा कुणबा
का बडका मऊँ राजा दाऊद क बारा
म साफ-साफ बताऊ हूँ। बो मर्यो अर
बिनै गाड दिन्यो। बिकी कबर हाल ताँई
आपणै अठैर्इ ह। 30बो एक परमेश्वर
की खेबाळो हो। अर बो बी करार न
जाणतो हो जो परमेश्वर बिकै सागै कर्यो
हो। क परमेश्वर दाऊद का कुणबा मऊँ
एक न बिकी जंय्यां राजगद्दी प बिठासी।

31अर दाऊद होबाली बातां न पेल्या ई
देखर मसी क मर्या पाछै ओज्युँ जीबा
की बात बोल दिनी ही। क बीनै पताळ
म कोनी छोडयो जासी अर न ही बीकी
काया कबर म सीड़बा देसी। 32अर ई
ईशु न ई परमेश्वर मरेडा मऊँ जीवायो,
अर ई बात का आपां सगळा गुवा हा।

33परमेश्वर ईशु न उठार आपकै दायां
हाथ बिठायो जखी आदर की सऊँ उँझी
झघा ह। अर परमेश्वर का करार गेल
बिनै पबितर आत्मा मिली अर बि आत्मा
न बो आपणे उपर पूर दिन्यो। जीनै थे
ईब देखर्या अर सूणर्या हो। 34-35क्यु क
दाऊद ईश्वर नगरी कोनी गयो, पण बो
खुद बोलै ह, “प्रबु मेरा प्रबु ऊँ बोल्यो;
जद ताँई म तेरा दुश्मना न तेरै पगा तज्जे
को पाटो कोनी करद्यूँ मेरै दाया हाथ
कानी बैठ।”

३६ आ बात म ई ताँई खेर्यो हूँ, क
इज्जायल का रेहबाळा आ बात ढंगऊँ
जाणज्यावै क जी ईशु न थे सूली चढायो
हो। बीनै ई परमेश्वर प्रबु अर मसी
बणायो हो। ३७ अति सूणताँई बे पाणी-
पाणी होग्या अर पतरस अर दूसरा चेला
स बुझबा लागगा क भाइडो ईब म्हानै
काँई करणो चाए। ३८ जणा पतरस बोल्यो,
“थे थारा हिया न पापऊँ फेरर ईशु क
नाम म बतिस्मो लेल्यो जिसै थारा पाप
धोया जासी। अर थानै परमेश्वर की
आत्मा को बरदान मिलसी ३९ क्युं’क
ओ वादो थारै अर थारा टाबरा अर बा
सगळा ताँई ह जखा आंतरै ही। अर
ओ बा सगळा ताँई बी ह जानै प्रबु
आपणो इश्वर आपकै कनै बुलावै ह।
४० पतरस ओर बी बोळी बातां बोलर
बानै चितायो। अर अरदास करर बोल्यो,
“इ कुटिचर पीढी प पड़बाळा न्यायऊँ
खुद न बचाओ। ४१ बोळा जणा बिकी
बातां प बिश्वास कर्या अर हाथ्यू हाथ
बतिस्मो ले लिन्यो, अर बि दिन करिब
तीन हजार मिनख बाकी टोळी म सामिल
होयो। ४२ अर बे टाळेड़ा खास चेलाऊँ
उपदेश सुनबा, संगति करबा, एक सागै
प्रबु न याद करबा ताँई रोटी तोड़बा अर
अरदास करबा म रमग्या।

प्रबु प बिश्वास करबाळा को जीवन

४३ चेला क हाथा चमत्कार अर न
होबाळा काम बी होर्या हा। ई बजऊँ
सगळा ताजूब करता अर परमेश्वर को
भय मानता। ४४ सगळा बिश्वास करबाळा
एक मन और एक चित होर संगति करता
हा। अर जो क्युं बाकनै हो बिनै आपसरी

म बाँट लेता। ४५ बे आपकी जमिन-
जायदाद अर चीज-बस्त बेचर जिकी
जय्यां जुर्त होती बिनै बंयांई बाँट लेता
हा। ४६ बे रोजकी एक टोळी की जय्यां
मंदर म मिलता, एक-दुसरा का घरा म
रोटी तोड़ता। राजी खुशी अर सीधा
मनऊँ एक सागै मील जुलर रोटी खाता।
४७ अर परमेश्वर को गुणगान गाता। बे
सगळा ई दान दयाऊँ राजी हा। अर जखो
बी परमेश्वरऊँ उद्धार पातो, परमेश्वर
बिनै रोजकी बाकी टोळी म जोड़ देतो।

लंगड़ा मंगता को निरोगो होबो

३ पतरस अर यूहन्नो दोपारा तीन
बज्यां मन्दर म अरदास करबा ताँई
जार्या हा। २ अर बठै क्यूंक मिनख एक
जलम का लंगड़ा मिनख न रोजकी ल्यार
मंदर क बारना म बिठा देता। अर बी
बारना न बठै का मिनख ‘सोवणो बारनो’
खेता हा, जठै बो मंदर म जाबाळाऊँ
भिख माँगतो हो। ३ बो जद पतरस अर
यूहन्ना न माईनै जाता देख्यो। जणा बो
बासै क्युं मिलबा की आस म बाकै सामै
हाँथ फैलाया। ४ जणा पतरस यूहन्ना क
सागै बिपै गोर-धर्यो अर बिऊँ बोल्यो,
“म्हारै कानी देख। ५ जणा बो बासै क्यूं
मिलबा की आस म बाकै कानी आँख्या
गाड दिनी। ६ जणा पतरस बिऊँ बोल्यो
पीसो-टको तो मेरै कनै आथ कोनी। पण
जो क्युं मेरै कनै ह बो म तनै जरूर
देस्यू ईशु नासरी क नामऊँ उबो होज्या
अर डोला फिरी कर। ७ जणा बो बिको
दाँयो बावळयो पकड़र बिनै उबो कर्यो
अर अंय्यां करताँई बिका टकणा अर
टांगड़ा म सत आग्यो। ८ जिसै बो उछळर

आपका पगा प खड़्यो होगो अर बाकै च्यारूमेर डोलबा-फिरबा लाग्यो। जणा पाछै बो नाचतो कुदतो अर परमेश्वर को गुणगान गातो बाकै सागै मन्दर म गयो।⁹ अर बठै का सगळा मिनख बिनै डोलता-फिरता अर परमेश्वर को गुणगान गाता देखर¹⁰ पिछाणगा क ओ तो बोई ह जखो, सोवणा बासना म बैठयो-बैठयो भिख मांग्यां करतो हो। बिकै सागै जो क्यु होयो बिनै देखर¹¹ बे सगळा ताजुब म पड़गा।

मंदर म पतरस को परचार

11 अर बो पतरस अर युहन्ना को हाथ पकड़्या बाकै सागै हो, जणा लोग ताजुब करर बाकै कनै भागर आया अर बि दरुजा क कनै भेळा होग्या जिनै सुलेमान को दरुजो बोल्या करता हा।¹² आ देखर¹³ पतरस बा मिनखाऊं बोल्यो, “अरै इजाएल का रेहबाळो थे सगळा क्यालै ताजूब करो हो। अर म्हानै अंय्यां आँख्या फाड़र क्यालै देखर्या हो ज्य्यां म्हेर्ई इनै म्हारी शक्ती अर भगतीऊं निरोगो कर्या होवां?”¹³ ईब्राहम, इसाक अर याकुब को परमेश्वर आपणा बाप दादा को परमेश्वर अंय्यां करके आपका दास ईशु कि मेमा करी ह। जिनै थे अधिकार्या न पकड़वा दिन्या अर जद पिळातूस बिनै छोड़बो चावो हो, पण थे बिनै तज दिन्यो।¹⁴ बो पबितर अर धर्मी हो। पण थे बिनै तज दिया, अर एक हत्यारा न छोड़बा की पिळातूसऊं दरखास्त करी।¹⁵ अर बी जिन्दगी देबाळा न मार गैर्यो पण परमेश्वर बिनै मोतऊं जिन्दो कर दिन्यो, अर इ बात का म्हें गुवा हा।¹⁶ अर ईशु

हाळो नाम प बिश्वास करबाऊं ई, ईशु ई मिनख म सत गेर्यो अर बो समुळो निरोगो होगो, जिनै थे सगळा जाणो अर देखो हों।¹⁷ अर भाइडो म जाणू हूँ क थे अर थारा नेता जो क्युं बी कर्या बी अणभोळ म कर्या हा।¹⁸ पण ई बात न परमेश्वर बोळी पेल्याई परमेश्वर की खेबाळा क मुंडाऊं खुवा दिन्यो हो, क मसी पिड़ा भागसी जणा परमेश्वर बानै अंय्यां ई पुरी कर्यो।¹⁹ ई ताँई थे थारा हिया न पापाऊं फेरर ईश्वर कानी लगाओ जीऊं परमेश्वर थारा पाप धो देसी।²⁰ जद थे अंय्यां करस्यो जणा प्रबु क होता-सोता शांती को टेम आज्यासी अर परमेश्वर मसी ईशु न भेजसी जिनै बो थारै ताँई टाळ राख्यो ह।²¹ मसी बी दिन ताँई ईश्वर नगरी म रेहसी जद ताँई बे सगळी बातां पेली ज्य्यां कोनी होज्यावै। जानै परमेश्वर आपकी खेबाळा पबितर मिनखा क मुंडाऊं पलिई खुवायो ह।²² ज्य्यां मुसा बोल्यो हो, “प्रबु परमेश्वर थार ताँई ज्य्यां मनै भेज्यो बंयाई एक परमेश्वर की खेबाळो भेजसी। जखो थारा मालो ई होसी। अर बो जो क्युं थानै बोलै थे बा सगळी बातां न मानज्यो।²³ अर जखो बी बिकी कोनी सुणसीक, बिनै परमेश्वर का मिनखा मऊं नाकै करर नाश कर दियो ज्यासी,²⁴ अर शेमुएल अर बिकै पाछै आयड़ा सगळा परमेश्वर की खेबाळा आ दिना क बारा मई बताया हा।²⁵ अर थेर्ई बा वादा का वारिस हो जानै परमेश्वर आपका खेबाळा क जरियै कर्यो हो। ओ करार थार ताँई ह जिनै परमेश्वर थारा बडका ऊं कर्यो हो जंय्यां बो ईब्राहम ऊं करार कर्यो हो क तेरी ओलाद ऊं

सगळी धरती न आसीरबाद मिलसी। 26 अर परमेश्वर आपका दास ईशु न टाळेर बिनै सऊँ पेली थारै कनै भेज्यो। जिसै बो थानै थारा कुगेलाऊँ न्यारो करर आसीरबाद दे सकै।

पतरस अर यहुन्नो
महापंचायत क सामै

4 जद पतरस अर यहुन्नो मिनखा न बतार्या हा जणाई याजक, मन्दर क सीपाइड़ा को सरदार अर क्यूँक सदूकी बठै आया 2 अर बे आ दो चेलाऊँ झाता होग्या, क्युँ क बे बठै मिनखा न आ सीख देर्या हा क ईशु मरर ओज्युँ जिन्दो होगो अर ओ ई बात को सबुत ह की मरेड़ा ओज्युँ जिज्यासी। 3 जणा बे बानै पकड़ेर आगला दिन ताँई काळ-कोठडी म गेर दिन्यो क्युँ क दिन आथगो हो। 4 पण जत्ता बाकि सूण्या हा बामै बोळा जणा बिश्वास कर्यो जिसै बाकि संख्या बढ़ेर करीब पाँच हजार होगी। 5 आगला दिन एहूदी नेता, बडका अर बिधी-बिधाना न सीखाबाला यरूशलेम म भेला होया 6 अर बे याजका म सऊँ बडा याजक हन्ना, कैफा, यूहन्ना, सिकन्दर अर बडा याजका का परवार का घणकराक मिनखाऊँ मील्या। 7 अर बा टाळेड़ा खास चेला न आकै सामै हाजिर करर बाऊँ बुझ्बा लाग्या, “थे ओ काम किका नाम अर किकी शक्तिऊँ कर्यो। 8 जणा पतरस परमेश्वर की आत्माऊँ भरर जबाब देबा लाग्यो, “ओ पंचो अर बडको 9 ज आ थे ई लगड़ा मिनख क सागै होई भलाई क बारा म पूछताछ करो हो क बो कच्यां निरोगो होयो। 10 जणा थानै अर

इजाएल का सगळा रेहबाला न ओ बेरो होज्याणो चाये, क ओ मिनख जिखो थारी आँख्या क आगै चोखो-भलो निरोगो खड़यो ह ओ नाजरत का ईशु मसी क नामऊँ निरोगो होयो ह। ओ बोई ईशु ह जिनै थे सूली चढ़ायो हो अर जिनै परमेश्वर मर्या पाछै ओज्युँ जीवायो हो।” 11 ओ बोई ईशु ह जिकै बारा म शास्त्रा म मंडर्यो ह की,

“ओ बो भाठो ह, जिनै मिस्त्री
रुख्याई जोगो कोनी जाण्यो,
पण बोई कूणा को भाठो
निकळ्यो।”

12 ईशु क सिवा आपा न पापाऊँ कोई बी कोनी बचा सकै। अर ई धरती प अंय्यां को दुसरो नाम आर्थई कोनी जो मिनखा न बचा सकै। क्युँक परमेश्वर मिनखा न बचाबा ताँई ईशु न ई भेज्यो ह, अर बोई आपा न बचा सकै ह। 13 जद पंचा न ओ बेरो पड़यो क पतरस अर यूहन्नो दोन्यूँ कम पढ़या-लिख्या आम आदमी ही जणा बे बाकी हिम्मत देखर ताजुब म पड़गा। अर पाढ़े बानै बेरो पड़यो क अ दोन्यूँ ईशु क सागै रेहता हो। 14 पतरस अर यूहन्नो क आगै बाकी पावली कोनी चली क्युँ क जखो निरोगो होयो हो बो मिनख बठै ही खड़यो हो। 15 जणा बे बानै पंचायतऊँ बारै भेजदिन्या अर आपसरी म बतलाबा लाग्या क, 16 “आपा आकै सागै काँई कर सका हाँ। क्युँक यरूशलेम का सगळा जणा जाणै ह क आकै हाँथा ना होबालो चमत्कार होयो ह अर बिनै आपा झुठळा कोनी सका। 17 पण आ बात और न फेलै ई ताँई आपा आनै धमकार छोड़द्या क

बे आँइंदा ईशु क नाम की चर्चा किसैइ न करीं।” 18जणा बे बानै माइनै बुलार बानै चितार खियो, “ईशु क नामऊँ न तो कोइनै क्यूँ बतलाज्यो अर न ई बिका नामऊँ सिखाज्यो।” 19पण पतरस अर यूहन्नो बानै जबाब दिन्यो, “इ बात को थ्रैई न्याय करो क परमेश्वर की नजर्या म काँई ठिक रेट्सी-थारी बात मानणी नईस परमेश्वर की? 20क्युँ क आ तो होय कोनी सकै क जो क्यूँ म्हें देख्यो अर सूणयो ह बिनै कोनी खेवा।” 21जणा पंच बानै सूळ चितार छोड दिन्या, अर बानै सजा देबा को गेलो कोनी लाध्यो, क्युँक जो क्यूँ होयो हो बिकी बजै स लोग परमेश्वर को गुणगाण-गार्या हा। 22अर जि मिनख प ओ निरोगो होबा को चमत्कार होयो हो बो चालिस क पार हो।

बिश्वासीयां की अरदास

23बठैऊँ छुट-छुटार पतरस अर यूहन्ननौ सिधा आपकी टोळी म जार बानै बे बातां बताई जर्खी महायजक अर बडका बानै बोल्या हा। 24आ सूणताई बे सगळा बिश्वासी एक सागै एक चित्त होर अरदास करबा लाग्या क, ओ मालिक तूई धरती, आसमान, समदर अर जो क्यूँ आमै ह बानै बणायो ह। 25अर थे थारी आत्माऊँ म्हारा कुणबा का बडका अर थारा दास दाऊद क मुंडा बुलवायो हो, “अ जिखा एहूदी कोनी क्यालै झाळा म भर्या? अर क्यालै मिनख बेकार की बातां घडी हीं? 26धरती का राजा अर राज करबाळा आपसरी म एको कर प्रबु परमेश्वर अर बिका टाळेड़ा

मसी क सामै होग्या। 27साँच्याई थारो पबितर दास ईशु जिनै मसी बणायो हो बिकै खिलाप हिरोदेश अर पुन्तियुस को पिळातूस इ नगरी क मांय इज्ञायल का मिनखा अर दुसरी जात्यां क सागै कंधा स कंधो मिलार खड़या होगा। 28जो क्यूँ तू तेरी शक्ति अर इच्छाऊँ पेलीई तै कर राख्यो हो, बिनई बे पूरो कर्या। 29ईब प्रबु जी थे गोर धरो अर थारा दासा न हिम्मत क सागै थारा बचना न सूणाबा की शक्ति दयो। 30थारा पबितर दास ईशु क नामऊँ मिनखा न निरोगा करबा ताई, न होबाळा काम अर चमत्कार करबा ताई थारा हाथ बढाओ। 31बाकै अरदास करताई बा झाघा जठै बे भेळा होर्या हा हालबा लागगी अर बे सगळा म परमेश्वर की आत्माऊँ भरग्या अर हिम्मत क सागै बिका बचना न बोलबा लाग्या।

एक हियो राखबाढी मण्डळी

32बिश्वासीयां की टोळी एक हिया अर एक बिच्यार की ही जो क्यूँ बाकै कनै होतो बे बिनै आपसरी म बाँट लेता हा, अर कोइ बी तेरी मेरी कोनी करतो। 33चेला हिम्मताँ ईशु क जी उठबा की गुवाई देता रिह्या, अर बा सगळा प परमेश्वर की बोळी दया अर आसिरबाद हो। 34बा की टोळी म कोई बी गरिब कोनी हो क्यूँ क जिकै कनै जमिन अर घर हा बे बानै बेचर बिकेडी चीजा का दाम ल्यार 35टाळेड़ा खास चेला क हाथा म देता हा। अर बे बा दामा न जिकी जय्यां जूर्त होती बे बामै बा पीसा न बंय्याई बाँट देता हा। 36जणा बामै

युसुफ नाम को लेवि हो जखो साइप्रस को रेहबालो हो। जिनै चेला बरनाबास खेता हा, जिको मतबल हौसलो देबालो होवै ह। ३७ बिकै कनै जमिन को एक टुकड़ो हो जिनै बो बेच'र बिका दाम टाळेड़ा खास चेला क हाँथा म ल्यार दे दिन्या।

हनन्या अर सफिरा

५ बठै एक मिनख हो जिको नाम हनन्या हो अर बिकि लूगाई सफिरा नाम की ही बे दोन्युँ मील'र आपकी जमिन को एक टुकड़ो बेचयो। २ जणा बे दोन्युँ जणा मिल'र बी जमीन का रिपिया मऊँ क्यूंक थोड़ा घणा रिपिया आपकै कनै राखलिन्या अर बाकी का लेज्यार टाळेड़ा खास चेला क आगै कर दिन्या।

३ जणा पतरस बिऊँ बोल्यो, “हनन्या तेरा दिमाग प शेतान कय्यां कबजो कर लियो क तू जमीन क बिकबाऊँ मिल्या पिसा म स क्यूं राख'र परमेश्वर की आत्माऊँ झुठ बोलगो। ४ बेचबाऊँ पेली आ जमिन तेरी ई ही अर बिकबा क पाछै बी बिका दाम तेरा ई हा। जणा पाछै तू तेरा मन म आ बात क्यालै घड़ी? अंयां कर'र तू मिनखाऊँ नई पण परमेश्वर ऊँ झुठ बोल्यो ह। ५ आ सुणताई हनन्यो पड़गो अर पड़ताई पिराण त्याग दिन्या। अर जता बी आ सूणी अर देखी बा सगळा म डर बड़गो। ६ अर जवान मोटचार आगै आर बिकी लाश न कफन म लपेटी अर बारै लेज्यार बिनै गाड दिन्यो। ७ करिब तीनैक घण्टा पाछै बिकाळी लुगाइ बी बठै आई अर जो क्यूं बठै होयो बा बातां को बिनै कोनी

बेरो हो। ८ जणा पतरस बिनै बुझ्यो, तू बता थे बा जमीन अत्ता म ई बेची हि के? बा बोली हां, “अत्ता म ई बेची ही।” ९ जणा पतरस बिऊँ बोल्यो, थे दोन्युँ परमेश्वर की आत्मा न बिचासबा ताँई क्यालै सोची? ईब देख तेरा मोटचार न गाडबाला बारणा म ई खड़्या हीं अर बे तनै बी लेज्यासी। १० जणा बा जद की जद बिका पगा म पड़गी अर पड़ताई मरगी। जवान मोटचार माईनै आया जणा बा बानै मरैडी लहादि। जणा बे बिनै उठार बिका मोटचार क कनैई बिनै बी गाड दिन्यो। ११ सगळी बिश्वासी मण्डळी अर जता बी ई बात न सुणबाला हा, बा सगळा म ई बात को डर बड़गो।

चमत्कार अर अचरजभर्या काम

१२ टाळेड़ा खास चेला क हाथा बोला चिन्न चमत्कार मिनखा म होर्या हा अर बे एक चित होर सुलेमान का बरिडा म भेला होता हा। १३ बाकै सागै होबा की हिम्मत कोई म ई कोनी ही पण इ क बावजुद बी लोग बाकी बड़ाई करता।

१४ अर बठिनै प्रबु प बिश्वास करबाला लूगाई अर मिनख रोजकी बाकी टोळी म मिलता जार्या हा। १५ टाळेड़ा खास चेला जो क्यूँ कर्या हा बिको नतिजो ओ होयो क लोग रोगला न सङ्का प खाट अर बिछावणा बिछार बापै सुवा देता क्यूँ क जद पतरस बठिकी जावै जणा बिकी छाया बापै पड़ सकै। १६ यरूशलेम क आस-पास की नगर्याऊँ बी रोगला अर औपरी बलाय रळेड़ा मिनखा न लेर आबा लाग्या। अर बे सगळा निरोगा होता हा।

टाळेड़ा खास चेला को पकड़यो जाबो

17जणा महायाजक अर बाकै सागै का सदूकी पंथहाळा मिनख टाळेड़ा खास चेला प जळबा लागग्या। जिकै चलतै बे बाकै खिलाप क्युँकारवाई करबा की सोची। 18अर बे बा टाळेड़ा खास चेला न पकड़र कोठड़ी म बंद करवा दिन्या। 19पण ज्युँई रात होई जणा ईश्वर नगरी दूत आर बि कोठड़ी का कुवाड़ा न खोल दिन्यो अर बा टाळेड़ा खास चेला न बारै लेज्यार बाऊँ बोल्यो, 20“मन्दर म जार खड़या होवो अर ई नया जीवन की सगळी बातां मिनखा न सुणाओ। 21जणा बे बिकी बात मानर भाग-पाट्या ई मन्दर म जलिया अर बठै सिख देबा लागग्या। बठिनै महायाजक अर बीकाळा साथी, ईज्जाएल म रेहबाळा सगळा बूडा-ठेरा की पंचायत बुलार बानै भेळा कर्या अर कोठड़ी म खुवा भेज्यो क बानै पचांयत क सामै हाजीर करो। 22जणा सिपायड़ा बानै ल्याबा ताँई कोठड़ी म गया। पण बे बानै बठै कोनी ल्हाद्या, जणा सिपायड़ा ओटा आर ई बात की खबर पचांयत न दी। 23अर कह्या म्हें कोठरी का बारना म पुच्या जणा म्हानै बारना प कसर ताळो लागड़ो ल्हाद्यो अर पेरादार बी पेरो देताँई ल्हाद्या पण जय्याई म्हें ताळो खोलर माईनै बड़या क जणा म्हानै बठै कोई कोनी ल्हाद्यो। 24मन्दर की रुखाळी करबाळा अर महायाजक आ बात सुणर चङ्कर म पड़ग्या क आखीरकार बाकै सागै होयो तो होयो काँई? 25अत्ता म

ई कोई आर बानै बतायो, “थे जानै कोठड़ी म बन्द कर्या हा बै तो मन्दर म मिनखा न सिख देर्या ही। 26जणा मन्दर की रुखाळी करबाळा सिपायड़ा को सरदार आपहाळी सैना का क्युंक सिपायड़ा क सागै गयो अर टाळेड़ा खास चेला न बठैऊँ प्यारऊँ लियायो। क्युँक बे मिनखाऊँ डरा हा ई ताँई बठै जोर-जबरदस्ती तो चाल कोनी सकै हि क कणा बे भाड़ा नई बगाबा लागज्या। 27बे बानै ल्यार बडी पचांयत क सामै हाजिर कर दिन्या, जणा महायाजक बाऊँ बोल्या 28म्हें थानै ठोक बजार बोल्या हा क बि मिनख का नाम की सिख मना दिज्यो, पण थारै काना प तो जुई कोनी रेंगी। अर थे सगळा यरुसलेम न बिकी सिख ऊँ भर दिन्यो, थे काँई चावो हो? बिको खुन म्हारै माथा माण्डबो चावो हो के? 29जणा पतरस अर दुसरा टाळेड़ा खास चेला बोल्या, “मिनख ऊँ पेली परमेश्वर की बात न मानबो जस्ती ह। 30म्हारा बाप-दादा को परमेश्वर थारै हाथा सुळी प चढार मार्याग्या ईशु न मोतऊँ ओज्युँ जिवायो। 31अर परमेश्वर बिनैई आपका दाया हाथ कानी उँच्चा पद प बिठार राजकुमार अर बचाबालो बणायो ह। बो ईज्जाएल का मिनखा न पापाऊँ मन फिराबा को मोको अर पापा की माफी देसी। 32अर आ बातां का गुवा म्हें हा, बंयाई परमेश्वर को आत्मा बी गुवा ह जीनै परमेश्वर बिका मानबाळा न दि ह। 33“आ सुणर पचांयत का सदस्य लाल-ताता होर बानै मारबा की सोची। 34पण बामै गमलिएल नाम को एक फरीसी जखो एहूदी बिधी-विधान

सिखाबालो हो अर सगळा मिनख बिकी ईज्जत करता हा। बो पचांयत म खड़यो हो'र बा चेला न चिनेक देर बारनै लेजाबा ताँई हुक्म दियो। 35जणा पाछै बो बोल्यो, इज्जाएल का मिनखो, थे जखी आ मिनखा क सागै करबा जार्या हो बा सोच समझार ई करज्यो। 36थानै याद होवै तो क्यूंक बरसा पेली थियुदास आ खेतो होयो चमक्यो क म बी क्युं हूँ अर करीब च्यार सौ मिनख बिकै गेल होलिया, पण बो मार्यो गयो अर जत्ता बिनै मानता हा बे सगळा खिन्डग्या अर बिको आनदोलन मिटग्यो। 37अर बय्याँई नाम मण्डाई हालै दिना म गलिल को यहुदो चमक्यो अर क्युंक मिनखा न बो बी आपकै गैल कर्यो पण बो बी मिटगो अर जत्ता बिनै मानता हा बे बी खिन्डग्या। 38जणा म खेऊँ हूँ ई म टांग मना अड़ावो अर आ मिनखा न खुला छोड़ दयो क्युंक ओ काम ज मिनख कानीऊँ ह जणा अ सगळा मतैई मीट ज्यासी। 39पण ज आ योजना अर ओ काम परमेश्वर कानीऊँ होयो ह जणा थे आनै कोनी रोक सकोगा। कदै या न होज्या क थे परमेश्वर ऊँ लड़बाला बाज ज्यावो। 40जणा बे बिकाळी बात मान'र बानै बुलवाया अर बाकै तड़ा पड़वार आ खे'र छोड़ दिन्या, “आइन्दा ई ईशु नाम ऊँ कोई बात मना करज्यो।” 41बे राजी-खुशी पचांयत ऊँ चलेगा क्यूँ क ईशु नाम ऊँ परमेश्वर बानै पिड़ा अर बैज्जती भोगबा जोगा समझ्या। 42बै रोजकी मन्दर अर मिनखा क घरा म सीखाता अर चोखा समचार को परचार करता कोनी थक्या क ईशु ई मसी ह।

सात मदत करबाला न टाळबो

6 बा दिना म जद परमेश्वर न मानबाला बिश्वासीयां कि गीणती बढ़री हि, जणा युनानी रीती-रिवाजा न मानबाला एहूदि इब्रानी रीती-रिवाजा न मानबाला एहूदिया प बड़बड़ाबा लाग्या क म्हारी खाली होईडीया क सागै रोजकी बरतबाली चीजा बाटबा म दौगलच्यारो होर्यो ह। 2जणा बे बारा टाळेड़ा खास चेला सगळा बिश्वासीया न एक सागै बुलार ख्या, “म्हारै ताँई ओ चोखो कोनी क म्हे परमेश्वर का बचन को परचार छोड़र थारै ताँई खाबा-पिबा की चीजा को बाटो करां। 3ई ताँई भाईड़ो थारै मऊँ थे सात चोखी पेठ हाला मिनखा न टाळल्यो जखा म परमेश्वर को आत्मा अर बुद्धि होवै अर बानै ई काम कि जिम्मेवारी आपा दे देस्यां। 4अर म्हे म्हारो सगळो टेम अरदास करबा अर बचन को परचार करबा अर सिखाबा म लगास्यां। 5टाळेड़ा खास चेला की आ बात सगळी मण्डळी न चोखी लागी। जणा बे सतफुनुस नाम का एक मिनख न जखो बिश्वास अर परमेश्वर का आत्माऊँ भरेड़ो हो, अर फिलीप, प्रखुरुस, निकानोर, तिमोन, परमिनास अर अन्ताकिया को रेहबालो निकोलस जखो यहुदी धरम पंथ म आगो हो, आनै टाळ लिया। 6अर आनै टाळेड़ा खास चेला क सामै लेज्यार खड़या कर दिन्या जणा बे बापै हाथ धर'र अरदास कर दिनी। 7अंस्यां यरुसलेम म परमेश्वर को बचन दिन-दिन फैलतो गयो। अर

परमेश्वर न मानबाला कि गीणती दिन-दिन बढ़ती गई, अर घणकराक याजक बी ईशु प बिश्वास करबा लाग्या।

सतफनुस को पकड़यो जाबो

८ सतफनुस परमेश्वर की दया अर बिकाळी ताकत ऊँ भेरडो हो अर मिनखां म बड़ा-बड़ा चमत्कार अर अचरजभर्या काम कर्या करतो हो। ९ पण अजाद मण्डली नाम की एक एहूदि अरदास करबाली सभा का क्युक यहुदी मिनख जखा कुरेनी, सिकन्दरिया, किलीकिया अर एशियाऊँ आयड़ा हा, बे बिकै सागै जिरै करबा लाग्या। १० पण सतफनुस न जखी आत्मा देर्इड़ी हि अर जी बुझी ऊँ बो बातां कर्या करतो जणा बे बिकै सामै कोनी टिक सक्या। ११ जणा बे क्युक मिनखा न बिकै स्थिलाप भड़कार खुवायो, “क म्हे इनै मुसा अर परमेश्वर क स्थिलाप उलटो-सुलटो खेता सुण्या हां। १२ अंयां करर बे यहुदी मिनखा, बड़का अर शास्त्रा न सीखाबाला का कान भर दिन्या जिऊँ बे भड़कग्या अर चीड़ग्या अर बिनै पकड़र यहुदी पंचायत म लेग्या। १३ अर बे झुठी गुवाई देर बोल्या, “क ओ मिनख सदाई पबितर मन्दर अर मुसा का बिधान क स्थिलाप बोलै ह। १४ म्हे इनै आ खेता सुण्या हां क नासरत को ईशु ई मन्दर न ढाह देसी अर मुसा का देयड़ा रिति रिवाजा न बदल देसी। १५ जणा पंचायत म बेठ्या सगळा मिनख आपकी आँख्यां बिका मुंडा प गाड दिनी अर बानै बिको मुण्डो ईश्वर नगरी दुत कि जंयां दिख्यो।

टाळेड़ा खास चेला का काम 6:7—7:6

सतफनुस को भाषण

७ अर महायाजक बिऊँ बुझ्यो, “अ बाता साँची ह के? २ जणा सतफनुस बोल्यो, “भाइडो अर मेरा बाप समान बड़को मेरी सुणो। थानै बेरो होवै तो जद आपणो बाप इब्राहिम हारान देश म बसबा ऊँ पेली मीसोपोटामियाँ म ई हो। जणा मेराऊँ भेरडो परमेश्वर बिकै सामै परगट होयो। ३ अर बिनै बोल्यो, “तू तेरा देश अर तेरा कुणबा न छोड-छाडर बि झाघां म चल्योजा जखी म तनै दिखास्युँ। ४ जणा बो परमेश्वर क कह्या गेल कसदिया का देश न छोडर हारान देश म चलेगो अर बिका बाप क मर्या पाछै परमेश्वर बिनै, इ देश म ल्यायो जिमै आज थे रेहर्या हो। ५ पण परमेश्वर बिनै बापोत म क्युँई कोनी दियो अठै ताँई पग म्हेलबा की झाघा बी कोनी दिनी। पण बिऊँ करार कर्यो क म तनै अर तेरे पाछै तेरा कुणबा न ओ देश देस्युँ। जद परमेश्वर इब्राहीम ऊँ ओ करार कर्यो हो बि टेम बिकै कोई आश ओलाद कोनी ही। ६ अर परमेश्वर बिऊँ अंयां बोल्यो, “तेरी ओलाद दिसावर म च्यार



इब्राहिम अर बिकाला परिवार की यात्रा (7.4)

सौ बरस ताँई गुलामी म रेहसी अर बठचा का मिनख बानै दिन-घालसी। 7तेरा टाबरा न दिन घालबाळा देश को म न्याय करस्युँ जणा पाछै बे बि देश ऊँ अजाद हो'र अठै अर मेरी मेमा करसी। 8परमेश्वर इब्राहिम ऊँ बोल्यो, “ क आपणा बिच होयड़ा करार की शेलाण आ ह की तेरा कुणबा का सगळा छोरा की सुन्नत^b होणी चाये। ई बजैऊँ ईब्राहिम इसाक का जलम क पाछै आठवा दिन बिकी सुन्नत करी। अर अंयाँई इसाक याकुब की अर याकुब आपका बारा छोरा की सुन्नत करी जिखा आपणा बारा गोता का बाप-दादा हा। 9आपणा गोता का बाप-दादा आपका भाईड़ा युसुफ प चालता हा। जणा बे बिनै मिस्त्र देश का मिनखा न बेच दिन्या पण परमेश्वर बिकै सागै हो। 10अर बो बिनै सगळी तूम्ताऊँ बचायो। परमेश्वर बिनै बुद्धि देर मिस्त्र का राजा कि नजरा म उठायो, जिऊँ राजा बिनै आपको खास आदमी बणालियो, जणा ईब राज-काज की अर राज महल की सगळी जिम्मेवारी बिनई सुप दिनी। 11इकै पाछै बढै मिस्त्र अर कनान देश म काळ पड़यो जिऊँ तराई-तराई माचगी। अर आपणा बडका न खाबा का लाला पड़गा। 12अर जद याकुब क काना म आ बात पड़ी क मिस्त्र म ग्युँ ह जणा बो पेली आपणा बाप-दादा जखा बिका बेटा हीं बानै दाणा का जोगाड़ म मिस्त्र भेज्यो। 13अर जद बे दुसरका मिस्त्र आया जणा युसुफ

आपका भाया न आपकी पिछाण बताँई अर मिस्त्र का राजा न बी जणाई बिका परवार का बारा म बेरो पड़यो। 14जणा युसुफ आपका बाप याकुब अर आपका कुणबा न जखा कुल मिलार पिञ्चेत्तर जणा हा, बा सगळा न मिस्त्र बुलवालिया। 15जणा याकुब अर बे सगळा मिस्त्र गया, अर बो अर आपणा बाप-दादा बढैई पिराण तज्या। 16बढै ऊँ बणकी हाडया न सेकेन ल्यार बि कबर म धर्या जिनै इब्राहिम हमोर का बेटा ऊँ मोल लि ही। 17अर जद इब्राहिम न परमेश्वर का देयड़ा बचना को पुरो होबा को टेम आयो जणा मिस्त्र म आपणा मिनखा कि गीणती बोली बढगी ही। 18जणा पाछै मिस्त्र म दुसरो राजा होयो जखो युसुफ न कोनी जाणतो हो। 19बो आपणा मिनखा को फायदो उठार बानै बोलो दिन घाल्यो, जिऊँ आपणा बडका आपका टाबरा न मरबा ताँई बारै फेकबा प मजबुर होगा। 20अर बा दिना म ई मूसा को जलम होयो, अर बो परमेश्वर क सामै बोलो सोवणो हो। अर तिन महना ताँई बिका माँ-बाप बिनै घर म ई पाळयो-पोस्यो। 21अर जद बिका माँ-बाप बिनै बारै छोडयाया हा जणा बिनै मिस्त्र का राजा की छोरी उठार आपकै सागै लेगी अर बिनै आपको टाबर कर पालबा लागगी। 22अर बिनै मिस्त्री मिनखा की सगळी बिध्या पढाई गई ही, अर बो खेबा अर काम करबा म सागेड़ो होगो। 23जद बो चालिसेक बरस को होयो जणा

^b 7:8 जद परमेश्वर इब्राहिम क सागै करार कर्यो हो। अर ओडायो की ई करार की शेलाण क रूप सगळा यहुदी नर टाँबरा को बाका जलम क आठवा दिन सून्नत करणी जरूरी ह।


बिको मन आपका इज्जाएली भाईड़ा ऊँ मिलबा को कर्यो। 24 जणा बो आ देख्यो क एक मिस्त्री मिनख एक इज्जाएली मिनख क सागै बुरो बरताव बरतर्यो ह, जणा बो बिनै बचायो अर बी मिस्त्री मिनख न मार बिको बदलो लिन्यो 25 अर बो आ देखी क ईब बिका भाई बन्दु आ जाण ज्यासी क परमेश्वर बिनै बाका छुटकारा ताँई भेज्यो ह, पण बाकै क्युंइ पलै कोनी पड़ी। 26 आगलै दिन बो दो इज्जाएलीया न घुळता देख्यो जणा बो बाने छुटाबा ताँई बोल्यो थे तो दोन्युँ इज्जाएली हो जणा पाछै आपसिरिया म क्युं घुळो हो। 27 पण बामै ऊँ जिखो बुरो बर्ताब बरतै हो बो मुसा क धक्को मार बोल्यो, “तनै म्हार प कुण राजकरबाळो अर न्याय करबाळो बणायो ह? 28 काल जय्यां बि मिस्त्री मिनख न मार्यो हो बंयांई तू मनै बी मारबो चावै ह के? 29 आ सुणर मूसो भागर मिधान देश म बसगो, जठै बिकै दो टाबर होया। 30 चाक्लिस बरस और बितगा जणा बिनै सिनै ढूँगरी क कनै उजाड़ म एक बळती झाड़ी की ओँच म ईश्वर नगरी दुत दर्शाव दिन्यो। 31 आ देख ताँई मुसो उक-चुक होयो, जणा ओर सुल देखबा ताँई झाड़ी क कनै गयो, जणा बिनै प्रबु कि अवाज सुणी 32 म तेरा बाप दादा को परमेश्वर हूँ, म इब्राहिम, इसाक अर याकुब को परमेश्वर हूँ,’ आ सुणताँई मुसो तो थरथर धुङ्गाबा लाययो अर बिकी क्युं देखबा कि हिम्मत कोनी होई। 33 प्रबु बिऊँ बोल्यो, “पगा मऊँ खुसड़ा काड दे क्युंकि जि झघा तू खड़यो ह बा पबितर झघा ह। 34 म मेरा मिनख, जखा मिस्त्र म ही

बाकी दुरदसा देख्यो हूँ अर बाकि बारघोड़ो सुण्यो हूँ, जणा ईं तो म बानै बठैऊँ छुड़ाबा ताँई तकै उतर्यो हूँ, ईब तू आज्या म तनै मिस्त्र म भेजस्युँ।” 35 ओ बोई मुसो ह जिनै बे ओ खैर भगा दिन्यो हो क तनै कुण म्हार प राजकरबाळो अर न्याय करबाळो बणायो ह? बिनैई परमेश्वर बि ईश्वर नगरी दुत क जरिये जखो बिनै झाड़ी म दर्शाव दिन्यो हो, राजकरबा अर अजाद करबा ताँई भेज्यो। 36 ओ बोई मुसा ह जखो बानै मिस्त्र देश, लाल समदर अर बि उजाड़ म चाळीस बरसा ताँई चिन-चमत्कार दिखार बानै लियायो। 37 ओ बोई मुसा ह जखो इस्त्राएल का मिनखा न बोल्यो हो, “परमेश्वर थार मऊँ मेरी जय्यां को परमेश्वर की खेबाळो भेजसी। 38 ओ बोई ह जखो उजाड़ म इज्जालिया की मंडळी क सागै हो, जिसै सिनै ढूँगरी प ईश्वर नगरी दुत बतळायो हो अर बो आपणा बाप दादा क सागै बी हो। अर जिनै आपणा ताँई परमेश्वर ऊँ जीवन देबाळा बचन मिल्या। 39 “पण आपणा बाप दादा बिकी कोनी मानी, अर बे बिनै तजर ओज्यु मिस्त्र जाबो



बाछ्या की सोना की मुति
बणार बिनै पुजबो (7.41)

चावै ह। 40 अर हारुनऊँ बोल्या, “म्हारै ताँई अंयां का देवता बणा जखो म्हारै आगे-आगे चालै, क्यूँ क जखो मूसो म्हानै मिस्त्रऊँ ल्यायो म्हे कोनी जाणा क बिकै सागै काँई होयो? 41 बा दिना म बे आप ताँई एक गाय का बाछ्या की मूर्ति घड़र धर लिनी अर बिकै बली चढार खुद का हाथा ऊँ बणायडी मूर्ति प खुशी मनाई। 42 जणा परमेश्वर बाऊँ मुण्डो फेर लिन्यो, अर बानै आसमान का चाँद-तारा न धोकबा ताँई छोड दिन्यो जय्यां की परमेश्वर की खेबाळा की पोथया म मंडर्यो ह, “ओ इज्जाइल का कुणबा का मिनखो, थे चाळीस बरसा म मनै जानबर अर चढावो चढाया हो के? 43 पण थे तो मोलैक देवता का तम्बू अर तारा देवता रिफान की मूर्ति न सागै लिया हाँडता हा जखी मूर्तिया न थे धोकबा ताँई बणाई ही, ई ताँई म थानै बेबिलोन क पैरे लेज्यार गुलामी म देस्यूँ। 44 बि उजाड़ म परमेश्वर को तम्बू जिमै आपणा बापदादा परमेश्वर ऊँ अरदास करता हा बो बी आपणा बाप दादा क सागै हो। अर ओ ठिक बंयाई हो जय्यां परमेश्वर मूसा न दिखार बिनै बणाबा ताँई बोल्यो हो। 45 ईकै पाछै आपणा बाप दादा न ओ तम्बू बाका बापदादा ऊँ मिल्यो अर जद बे यहोशू क सागै अठै आया अर बिकाळी निंग्या म ई बे बा जात्यां ऊँ ई देश न ले लियो हो, जानै आपणा बाप दादा क सामैऊँ परमेश्वर भगा दिन्यो हो, अर बो तम्बू दाऊद क जमाना ताँई अठैई रिह्यो। 46 परमेश्वर दाऊद प दया करी, जणा बो बिऊँ इज्जाइल का मिनखा ताँई परमेश्वर को मंदर बणाबा की



परमेश्वर को तम्बू (7.44)

अरदास करी। 47 पण परमेश्वर को मंदर न राजा सुलेमान बणायो हो। 48 पण परम प्रधान परमेश्वर तो हाथा ऊँ बणायडा मंदर म कोनी रेहै। जय्यां की परमेश्वर की खेबाळा बोल्यो ह, 49 प्रबु खेवै ह, “ईश्वर नगरी मेरो सिंघासण अर आ धरती मेरै पगा तळै की चौकी ह, थे मेरै ताँई कय्यां को घर बणास्यो? धरती प अंयां की कोई झाघा ह कै जठै म अराम कर सकं? 50 अ सगळी चीजा मेरी ई तो बणाईडी ह। 51 आ खेर सतफनुस बानै सुणबाळा लाय्यो, परमेश्वर न कोनी मानबाळा अर बिका बचना न कोनी सुनबाळा ढीट मिनखो, थे सदा स ई थारा बाप दादा की जय्यां परमेश्वर की आत्मा को बिरोद करता आया हो। 52 अंयां को कोइ परमेश्वर की खेबाळो होयो हो के जिनै थारा बाप दादा कोनी सताया हो? बे बा परमेश्वर की खेबाळा न मार गेया जखा बि परमेश्वर का धरमी दास क आबा को समचार पेल्याई दिया करता हा। अर ठिक बंयाई थे बि बिनै धोखाऊँ पकड़ाबाळा अर मारबाळा होयो। 53 थानै ईश्वर नगरी दुता ऊँ परमेश्वर का विधी-विधान तो मिलग्या पण थे आनै कोनी मानो।



सतफनुस न भाट्ठाऊँ मारबो (7.58)

भाट्ठाऊँ सतफनुस न मारबो

54 अ बातां सुणताँई बे सतफनुस प लाल ताता होग्या, अर औँख्या काड़र जाड़ भिचबा लाग्गा। 55 पण बो तो परमेश्वर की आत्मा ऊँ भरर ईश्वर नगरी कानी देख्यो, जणा बो परमेश्वर की मेमा अर परमेश्वर क दाया हाथ कानी ईशु न खड़यो देखर 56 बोल्यो, “सूणो म ईश्वर नगरी न खुली अर मिनख का बेटा न परमेश्वर क दाया हाथ कानी खड़यो देखर्यो हूँ। 57 आ सुणताँई बे आपका कान बँद कर लिन्या अर जोँखं चिल्लाटी घालर एक सागै बिपै टुटर पड़या। 58 बे बिकै सागै धक्का मुक्की करता ई बिनै नगरी क बारनै लेगा अर बिपै भाट्ठा बगाबा लाग्या। अर बिकै खिलाप हाळा गुवा आप- आपको चादरो शाऊल क पगा म म्हेंल दिन्या। 59 अर बे बिपै भाट्ठा बगाबा लागर्या हा बि टेम इ बो परमेश्वर ऊँ आ खेतो अरदास करबा लाग्यो, ओ प्रबु ईशु मेरी आत्मा न थारै कनै बुलाल्यो। 60 इकै पाछै बो गोडावणि पड़यो अर जोरऊँ बोल्यो, “प्रबु ओ पाप आपै मना मंडो।” आ खेर बो पिराण त्याग दिन्या।

टाकेड़ा खास चेला का काम 7:54—8:6

8 सतफनुस की मौत न शाऊल सही ठैहरायो।

शाऊल को विश्वासी
मंडबी न सताबो

बि दिन स ई विश्वासीया प तूमत आ पड़ी जिऊँ ईशु का खास चेला न छोड़र बाकी सगळा विश्वासी एहूदिया अर सामरिया म बिखरगा। 2 बामै ऊँ क्युँक भगत सतफनुस न गाडचा अर बिकै मरबा को म्हातम मनायो। 3 अर शाऊल हो जखो विश्वास्या की मंण्डळ्या न उजाड़तो फिरतो हो अर मोटचार- लुगाया न घरा मऊँ काड-काडर बानै घिसर एक काळ कोठडी म बंद करबा लाग्यो।

सामरिया का मिनखा म
फिलिप्पुस को परचार

4 अर दुसरी कानी बे बिखरेड़ा विश्वासी जठै बी गया बठैर्ई ईशु को चोखो समचार सुणाबा लाग्गा। 5 फिलिप्पुस सामरिया नाम की नगरी म जार बठै ईशु ई मसी ह इकै बारा म परचार करबा लाग्यो। 6 फिलिप्पुस की बातां न सुणर अर बिका चिन चमत्कारा न देखर लोग



शाऊल को मंडळ्या न सताबो (8.3)



सामरिया को बजार अर दरूजो (8.5)

बिकी बातां प गोर धर्या। 7क्युं'क बिका हाथा ऊँ बोळा जणा मऊँ ओपरी बलाया बार-घालती ही निसर'री ही। अर बोळा भाळ भेयडा अर लंगडा बिका हाथा ऊँ निरोगा होया। 8ई बजैऊँ नगरी का मिनख बोळा राजी होया।

जादुगर शमोन

9बी नगरी म शमौन नाम को एक मिनख हो, जखो मिनखा न जातु मन्त्र दिखार ताजुब म गेर देतो। अर खुद न बडो आदमी बतातो। 10छोटाऊँ लेर बडा ताँई सगळा बिकी बातां प गोर धरता हा, अर बिका बारा म खेता हा क बो परमेश्वर की बा शक्ति ह जखी बोळी तगड़ी खुवावै ह। 11क्युं'क बो

बोळा दिना ताँई बा मिनखा न जादु मन्त्र दिखार ताजुब म गेर राख्यो हो ई ताँई मिनख बिकाळी बातां प गोर धरता हा। 12पण जद फिलिप्पुस मिनखा न परमेश्वर का राज अर ईशु मसी को चोखो समचार सुणायो जणा बे बिकी बातां प बिश्वास कर्या अर सगळा मोटचार लगाई बतिस्मो लियो। 13आ देखर शमौन खुद बी बीकी बातां प बिश्वास कर्यो अर ईशु मसी का नामऊँ बतिस्मो लेर बिकै गेल हो लियो, अर बो बा बड़ा-बड़ा चिन-चमत्कारा अर अचरजभर्या कामा न देखर चोरंगो हो ज्यातो हो। 14अर जद ईशु का टाळेड़ा खास चेला न ओ बेरो पड़यो क सामरिया का रेहबाळा परमेश्वर का बचना न मानबा लागाया हीं जणा बे पतरस अर यहून्ना न बाकै कनै भेज्या। 15अर बे बैठी जार बा सगळा ताँई अरदास करी क बा सगळा न परमेश्वर को आत्मा मिलै। 16क्युं'क हाल ताँई बे प्रबु ईशु का नाम ऊँ बतिस्मो ई लिया हा, बामै ऊँ किनैई परमेश्वर को आत्मा कोनी मील्यो हो। 17जणा पतरस अर यहून्नो बापै हाथ धर्या अर बानै परमेश्वर को आत्मा मिलगो। 18शमोन आ देख्यो क बाकै हाथ धरबाऊँ मिनखा न परमेश्वर को आत्मो मिल ज्यावै ह जणा बो बाकै सामै रिपिया धरर बोल्यो, 19“अ ल्यो रिपिया अर आ शक्ति मनै बी द्यो जिऊँ म बी जिपै हाथ धरूँ बिनै परमेश्वर को आत्मो मिलै। 20जणा पतरस बोल्यो, “तेरा रिपिया बी तेरै सागै नास होज्यावै क्युं'क तू परमेश्वर का बरदान न रिपिया ऊँ मोल लेबो चावै ह। 21ई चीज म



फिलिप्पुस अर हिंजड़ो रथ म (8.28)

तेरी कोई पांती कोनी क्युंक परमेश्वर
बेली तेरै मन म पेटा पाप ह। 22 ई ताँई
तू बुरा कामाऊं तेरा हिया न बदल'र
प्रबुऊ अरदास कर जिऊं तेरा हिया का
बुरा बिच्चार माफ होज्यासी। 23 क्युंक तू
बल्कोकड़ो ह अर पापा म उलजयो ह।”
24 जणा शमोन बाऊं बोल्यो थे मेरै ताँई
अरदास करो क थारा मुंडा ऊं निकलेड़ी
कोईसी ई बात मेरै प ना पड़े। 25 जणा
पाछै बे आपकी गुवाई देर अर परमेश्वर
को बचन सुणा'र यरूशलेम हाला गेला
म सामरिया का कई गाँवा म ईशु को
उपदेश सुणाता ओटा यरूशलेम पुगया।

फिलिप्पुस अर कुश देश को अधिकारी

26 जणा पाछै परमेश्वर को एक दुत
फिलिप्पुस न आर बोल्यो, “खड़ो हो
अर दिखणाद कानी बि सुन्ना गेला म
जा जखो यरूशलेम ऊं गाजा नगरी म
जावै ह। 27 जणा बो त्यार हो'र चाल
पड़ो अर बि गेला म ई कुश देश को
एक मिनख अरदास कर'र यरूसलेम ऊं
आर्यो हो जिनै हिंजड़ो बणायो गयो हो

अर ओ कुश देश की राणी कन्दाकी
को खजांची हो। 28 बी टेम बो आपका
रथ म बेठचो-बेठचो यशायाह परमेश्वर
की खेबाला की पौथी म उँ बांचर्यो
हो। 29 जणा परमेश्वर को आत्मा
फिलिप्पुसऊं बोल्यो, “इ रथ क सागै
हो ले। 30 जणा बो भाग'र बि रथ क
कनै गयो जणा बो बिनै यशायाह की
पौथी बांचता सुण्यो अर आ सुण'र
बो बिनै बुझ्यो तू जखा बाचै ह बानै
समझै ह के? 31 जणा बो फिलिप्पुसऊं
बोल्यो, “जद ताँई कोई मनै आ बचना न
कोनी समझावै जद ताँई म कथ्यां आकां
भेदा न जाण। अर बो बिऊं बोल्यो थे
उपर मेरै कर्नै आर बिराजो। 32 शास्त्रऊं
जखो पाठ बो बांचर्यो हो बो अंय्यां हो,
“ बिनै मारबा ताँई बी ललूटी की जंय्यां
लेज्यायो गयो जखी कट बाल्ही होवै, अर
जय्यां उन्यो ऊन कतर-बाला क आगै
चुप-चाप सिथो खड़्यो रेहवै ह बंयाईं
बो बी आपको मुण्डो कोनी खोल्यो।
33 बिकी दुर्दशा करी गई। बिनै न्याय
कोनी मिल्यो। ई धरतीऊं बिको जीव
तो खोस लियो गयो। अर ईब बिकी
पीढी क बारा म कूण बतावै? 34 ईपै बो
हिन्जड़ो हो जखो फिलिप्पुसऊं बुझ्यो
मनै अंय्यां बता अठै आ बात की ताँई
बोली गई ह, ओ परमेश्वर की खेबालो
आपकी बात करै ह, क ओर कोई की।
35 जणा फिलीप्पुस बोल्बा लाग्यो अर
बिनै इ पौथी की आ बाताऊं लेर ईशु
का चोखा समचार ताँई सुणा दिन्यो।
36 अर बे चालता-चालता एक पाणी
हाली झघा पुग्या, जणा पाणी न देख'र
हिंजड़ो बिऊं बोल्यो अठै पाणी तो ह ई



शाऊल को आँदो होबो (9.8)

जणा पाछै मनै बतिस्मो लेबा म काँई दिलाई ह। ^c 37 फिलिप्पुस बिनै जबाब दियो तू तेरा मनऊं पूरो बिश्वास करै जणा तनै कूण डाट सकै ह। बो बोल्यो हा म मेरा पूरा मनऊं मानू हूँ क प्रबू ईशु मसी ई परमेश्वर को बेटो ह।) 38 जणा पाछै हिंजडो रथ न रुकायो अर बे दोन्यु जणा पाणी म उतर्या अर फिलिप्पुस बिनै बतिस्मो दिन्यो। 39 अर जय्याई बे पाणी क बारै निकल्याक प्रबू की आत्मा फिलिप्पुस न उठा लेगो अर बिकै पाछै बो हिंजडो बिनै कोनी देख्यो अर बो राजी खुशी आपका गेलै चलेग्यो। 40 अर दुसरी कानी फिलिप्पुस खुद न अशदोद नगरी म पायो, अर नगरी-नगरी ईशु को चोखो समचार सुणातो-सुणातो केसरिया पुगग्यो।

शाऊल को बदलबो

9 हाल बी शाऊल नाम को मिनख हो अर जान स मार्यो हो, बो महायाजक क कनै गयो। 2 अर दमिश्क नगरी की अरदास करबाली झाध्यां क नामऊँ इ बात को अधिकार कागद माँगयो क ज कोई मिनख बिनै प्रबु का इ पंथ म लाधैगोक चाए बो मोट्यार हो चाएसै लूगाई, सगळा न बाँधर यरुसलेम लया सकै। 3 अर जद चालता-चालता बो दमिश्क क साकडै लाग्योक जणा चाणचुको ई असामन मऊँ एक च्याण्णो बिपै चमक्यो। 4 अर जि बजै ऊँ बो धरती प पड़ग्यो। बिका काना म उवाज आई, “ओ शाऊल, ओ शाऊल तू मनै क्यालै दिन-घालै ह?” 5 जणा शाऊल बुझ्यो “प्रबु थे कूण हो?” जणा उवाज आई, “म ईशु हूँ जिनै तू सतावै ह”。 6 पण ईब खड़्यो होर नगरी क मांय चल्यो जा अर बठै तनै काँई करणो ह बो तनै बता दियो जासी। 7 जणा जखा मिनख बिकै सागै हा बे एक झग्गा ई खड़्या होगा अर बाकी जुबान कोनी उपड़ी क्युंक बानै उवाज तो सुणै पण कोई दिखै कोनी। 8 जणा पाछै शाऊल धरती प ऊँ खड़्यो होयो अर जय्याई बो आपकी आँख्यां खोली बिनै क्युई कोनी सुजयो अर बिनै बिकै सागै हाल्हाई बिको हाथ पकड़र दमिश्क नगरी म लेगा। 9 तीन दिना ताँई बिनै क्युई कोनी सुजयो अर आ तीन दिना म बो बिना


^c 8:37 क्युंक मानी-थानी पुराणी पौथीयां म 37 की बाता कोनी मंडरी।

खाया पिया ई रियो। 10 बी दमिश्क नगरी क माईनै एक चेलो हो जिको नाम हनन्या हो बिनै प्रबु दर्शाव देर बोल्यो, “हनन्या” जणा बो बोल्यो, “प्रबु म अठै हूँ” 11 जणा प्रबु बिँकं बोल्यो, ‘खडयो होर सीधी नाम की गळी क माईनै एहूदा क घरा जार तरसुस का रेहबाला शाऊल नाम का एक मिनख क बारा म बूज। देख बो ईब अरदास करर्यो ह अर 12 बिनै दर्शाव म दिखर्यो ह की हनन्या नाम को एक मिनख बिकनै आर बिपै हाथ धर्यो ह जिकं बो पाछो देख सकै। 13 पण हनन्यो जबाब देवै ह क प्रबु म तो बोला मिनखाँ इ मिनख क बारा म सूण्यो हूँ, क ओ मिनख यरूशलेम म तेरा मिनखा न बोलो दिन घाल्यो ह। 14 अर अठै बी ओ प्रधान याजकाँ आज्ञा लेर तेरो नाम लेबाला न गिरबदार करबा ताँई आयो ह। 15 पण प्रबु बिनै बोल्यो, “तू तो जा! क्युँक म इनै दुसरी जात्यां, राजा माहाराजा अर इजालि मिनखा म मेरो नाम फैलाबा ताँई मेरो दास करर टाळ्यो हूँ। 16 अर मेरा नामकं दुख उठाबो कतो जरुरी ह आ बात म खुद बिनै दिखास्यु। 17 इकै पाछै हनन्यो खडयो होर बी घर म गयो जठै शाऊल हो अर बिपै आपका हाथ धरर बोल्यो, “भायडा मनै प्रबू ईशु जखो गेला म तेरे सामै प्रगट होयो हो बो भेज्यो ह, जिकं तू ओज्युँ देखबा लागै अर पबितर आत्माँ भर ज्यावै। 18 अर जद की जद मछी का छिलका जय्यां की कोई चीज बिकी आँख्याँ गीरी अर बिनै सुजबा लागगो जणा बो खडयो होयो अर बतिस्मो लियो। 19 इकै

पाछै रोटी टुकड़ो खार बिमै ओज्युँ सत आयो।

दमिश्क म शाऊल को परचार

अर बो कई दिना ताँई चेला क सागै दमिश्क नगरी म ई टिक्यो रिह्यो। 20 अर बो बिना देरी कर्या ई दमिश्क नगरी की अरदास करबाली झाघा म जार परचार कर्यो क ईशु परमेश्वर को बेटो ह। 21 अर जखा बी बिकी सुणता बे ताजुब करता अर खेता, “ओ बोई कोनी के जखो यरूशलेम म ईशु को नाम लेबाला न जानऊँ मार गेर्यो हो?



शाऊल न चोल्या म बिढार उतारबो (9.25)

अर के अठे बी ओ बिको नाम लेबाल्ला
न पकड़'र महायाजक क कनै लेज्याबा
ताँई कोनी आयो के?" 22पण शाऊल को
परचार ओर बी तगड़ो होतो गयो अर
ईशु ई मसी ह इ बात का सबूत देर बो
दमिश्क नगरी का यहुदिया न बोलबा
जोगो ई कोनी छोड़यो। 23पण क्युँक
दिन बित्याक जणा एहूदी मिनख बिनै
मारबा की साजिश घड़ी। 24अर शाऊल
न इ बात को बेरो पड़ग्यो, क बे नगरी
का दरुजा पै बिनै मारबा की ताक म
दिन रात रेवी ही। 25जणा रातनै बीकाळा
चेला-चपाटी बिनै नगरी की दिवाल पऊँ
बडा सारा चोल्या म बिठायो अर रस्सा
क सारै लटकार बठैऊँ पार कर दिन्यो।

यरूशलेम म शाऊल

26अर बो यरूशलेम गयो। इकै पाढ़ै
बो चेला म मिलबा की कोशीश करी पण
चेला बीऊँ डरपता हा क्युँक बानै ओ
बिश्वास कोनी होर्यो हो क ओबी ईब ईशु
को चेलो बणग्यो। 27जणा बरनाबास बिनै
टाळेड़ा खास चेला क कनै लेगो अर
बानै बतायो क कथ्यां ओ गेला म प्रबु
न देख्यो, अर कथ्यां प्रबु बिऊँ बतव्यायो।
अर इकै पाढ़ै कथ्यां ओ हिम्मत क सागै
दमिश्क नगरी म ईशु का नाम को परचार
कर्यो। 28जणा शाऊल बाकै सागै सगळा
यरूशलेम म आतो जातो हो अर बेधड़क
प्रबु का नाम म परचार करतो हो। 29अर
यूनानी भाषा बोलबाला क सागै जिरै
बाजी करतो हो, जि बजैऊँ बे बिनै मारबा
की ताक म रेह्बा लागाया। 30अर जद
बिश्वास्या न ई बात को बेरो पड़यो जणा
बे बिनै केसरिया लियाया अर बठैऊँ

तरसुस भेज दिन्या। 31जणा अंय्यां
सगळा एहूदिया, गलील, अर सामरिया
की बिश्वासी मंडळया न चेन मील्यो।
अर बिश्वास्या की मण्डली मजबूत होती
गई अर परमेश्वर का गुण-गाण करती
गई। अर पबितर आत्मा का हियावतैँ
गिणती म बढती गई अर परमेश्वर का
भेय म रेहती।

याफा अर लुद्दा नगर्या म पतरस

32पतरस च्यारुमेर होर लुद्दा नगरी
का प्रबु का मिनखाऊँ मिलबा आयो।
33बठै बिनै आठ बरसाऊँ खाटली म
पड़यो, एनियास नाम को एक मिनख
मील्यो जिमै भाल भेयड़ी ही। 34बिनै
पतरस बोल्यो एनियास खड़यो हो अर
तेरा बिछावणा समेट क्युँक प्रबु ईशु
मसी तनै निरोगो करै ह। अत्ति बोलताँई
बो खड़यो होग्यो। 35अर बिनै देख'र
लुद्दा अर शरोन नगरी का रेह्बाला प्रबु
प बिश्वास कर्या। 36बठै याफा नगरी
म तबिता नाम की एक बिश्वासी रिह्या
करती ही जिनै यूनानी भाषा म दोरकास
खेवै ह जिको मतबल हिरणी होवै। बा
बोळा चोखा-चोखा काम कर्या करती
अर गरिबा न दान दिया करती ही। 37बा
दिना म बा बिमार पड़ी अर पिराण त्याग
दिन्या अर लोग बिकी लाश न नुहार
चोब्बारा म धर दिन्या। 38याफा नगरी
लुद्दा नगरी क सारैई ही, चेला आ सुन
क पतरस लुद्दा नगरी म आयड़ो ह
बिकै कनै दो मिनखा न भेज्या क बे
बिऊँ अरदास करै क, "बिना देर कर्या
दया कर म्हाहै कनै आज्या"। 39जणा
पतरस त्यार होर बाकै सागै हो लियो

अर बिकै बठे पुगताँई बे बिनै चोबारा म लेगा अर बे सगळी खालिहोयड़ी बार घालती पतरस क च्यारुमेर खड़ी होगी अर बीनै बे कुरता अर गाबा दिखाबा लागगी जखा दोरकास जिता जी बणाई ही। 40 जणा पतरस बा सगळा न कोठा क बारै भेज्यो अर आपका गोडा टेकर अरदास करी अर बी लाश कानी देखर बोल्यो, “तविता उठ।” जणा बा आपकी आँख खोली अर पतरस न देखर बेठी होगी। 41 जणा बो बिनै हाथ को सारो देर खड़यो कर्या अर बा बिश्वास्यां अर खालिहोयड़या न बुलार जीती जागती बानै सूप दि। 42 आ बात सगळा याफा नगर म फेलगी अर बोळा जणा प्रबु का नाम प बिश्वास कर्या। 43 अर पतरस याफा नगरी म चमड़ा को धन्दो करबाला शमोन नाम का एक मिनख क घरा बोळा दिना ताँई रिह्यो।

पतरस न कुरनेलियुस को बुलावो


10 कैसरिया म कुरनेलियुस नाम को एक मिनख हो, जिखो सौ सिपाईड़ा की रोमी फोज की इतालियानी पळटन को सूबेदार हो। 2 बो परमेश्वर को भगत हो जिखो आपका प्या परिवार समेत ईश्वर को भेय मानतो हो, बो सदा ई गरीबा न दान दिया करतो हो अर परमेश्वरऊँ अरदास कर्या करतो हो। 3 जणा भई एक दिन बिनै दिन क तीसरा पेर म दर्शण होयो की परमेश्वर को एक दुत बिकै कनै आर बिँड़ बोल्यो, “ओ कुरनेलियुस!” 4 जणा कुरनेलियुस डरतो ई बिकै कानी देखर बोल्यो, ओ प्रबु काँई ह?” जणा बो बोल्यो तेरी अरदास अर

दिन दुखिया न देयड़ो तेरो दान परमेश्वर क कनै पुंचगो ह अर बिनै बो बोळो चोखो लाग्यो ह। 5 अर ईब तू अंग्यां कर याफा म क्युंक मिनख भेजर शमौन जिनै लोग पतरस बोली ही बुलवा लै। 6 बो चमड़ा को धन्दो करबाला शमौन क घरा रुकरयो ह जिको घर समदर क किनारा प ह। 7 परमेश्वर का दुत क जाबा क पाछै बो आपका दो नैकरा न अर एक सिपाही न जखो एक भगत हो अर बिको खास सेवक हो बिनै बुलवायो। 8 अर बानै सक्युं बतार याफा भेज्यो।

9 आगला दिन बे चालता-चालता दोपारी म नगरी क साकड़े लागया अर ठिक बी टेम ई पतरस अरदास करबा छात प चढ़यो। 10 ईकै पाछै बिनै भूख लाग्याई अर बो क्युं खाबा की मन म करी। अर जद रोटी बणावा ई हा जणा बिनै दर्शण होयो। 11 अर बिनै दिख्यो की आसमान खुलगो अर एक बड़ी चादर जंयां की चीज न, कोई च्यारु कुणा पकड़र नीचै धरती प उतार्यो ह। 12 बिपै धरती का च्यार टाँगा हाला अर रेंगबाला जानबर अर आसमान का



पतरस को दर्शाव (10.11)



चोबारा प पतरस की अरदास (10.19)

पंछी हा। 13बिनै सुण्यो पतरस खड़यो हो आनै मार'र खालै। 14जणा पतरस बोल्यो, “नई प्रबु कदै ई नई क्युंक म हाल ताँई कोई बी सुगली अर बरजेड़ी चीज कोनी खाई। 15इके पाछै ओज्यु बिका काना म उवाज आई जो क्युं परमेश्वर शुध कर्यो ह बिनै बरजेडो मना ख। 16तीन बार अंय्याई होबा क पाछै हाथ्यु हाथ ई बी चादरा सा न आसमान म उठा लिन्यो गयो। 17पतरस बी दर्शण क बारा म सोच ई रियो हो की ओ काँई होबो चाये अता म ई कुरनेलियुस का भेजेड़ा मिनख शमौन का घर को पतो बुझता बिका बारणा प ही आर खड़या होगा। 18अर हेल्लो देर कह्या, “शमौन जिनै पतरस बोली ही बो उरे ई ह के? 19पतरस हाल बी दर्शण क बारा म बिच्यार कर्यो हो की पबितर आत्मा बीनै बोली देख बारै तीन मिनख तनै ढूढ़ी ही। 20जणा ईब तू खड़यो होर तलै जा अर बेझीजक बाकै सागै होलै क्युंक बानै म ई भेज्यो हूँ। 21आ सून'र पतरस तलै आगो अर बाऊं बोल्यो, “जिनै थे ढूंडो हो बो म ई हूँ बोलो

थारै आबा क पिछै काँई बात ह।” 22जणा बे बिंकूं बोल्या, “म्हारी पळटण को सूबेदार कुरनेलियुस जखो धर्मी अर परमेश्वर ऊं डरबाळो मिनख ह, सगळा यहुदी मिनखां म जिकी बुझ ह बो एक परमेश्वर का दुत न दर्शण म देख्यो अर बो दुत बिनै बोल्यो ह की बो तनै बुलार तैरऊं परमेश्वर को बचन सुणै। 23जणा बो बानै माईनै बुलार बाकी आव-भगत करी।

कुरनेलियुस क घरा पतरस

दुसरा दिन बो उठर बाकै सागै गयो अर क्युंक याफा का भाईड़ा बी बिकै सागै हो लिया। 24आगला दिन बे कैसरिया म पूच्या अर कुरनेलियुस आपका रिस्तेदारा अर भायला न भेळा कर बानै उडिकै हो। 25जद पतरस मायनै बड़यों हो जणा कुरनेलियुस पतरसऊँ मीलयो अर बिकै पगा म माथो टेक्यो; 26जणा पतरस बिनै खड़यो करर बोल्यो म बी तेरी जय्यां एक मिनख ई तो हूँ। 27जणा पाछै पतरस बिंकूं बतलातौ मायनै आयो अर बठै बोला सारका मिनख भेळा होर्या हा। 28जणा बो बाऊं बोल्यो जय्यां की थे पेलीऊँ जाणो ई हो की एक एहुदि मिनख को दुसरी जात का मिनखऊँ कोई समंध राखबो अर बिका घरा आबो जाबो बरजेडो ह, पण परमेश्वर मनै दिखायो ह, कि न तो कोई मिनख सुगलो ह अर न ई निची जात को ह। 29जणाई तो थे जद मनै बुलाया जणा म बिना क्युं बोल्याई आगो। ईब थे मनै बतावो, मनै क्यालै बुलवाया हो? 30जणा कुरनेलियुस खेबा लागयो,

“आजऊँ ठीक च्यार दिन पेल्या जद म दिन का तीसरा पेर म मेरे घरा अरदास करबा लागरयो हो जणा म देख्यो कि एक मिनख मेरै सामै आर खड़्यो होगो बिका गाब्बा भल्का मारै हा। 31 अर बो मेरऊँ बोलबा लागयो कुरनेलियुस तेरी अरदास अर दिन दुखिया न देयडो तेरो दान परमेश्वर क कनै पुंचगो ह अर बिनै बो बोलो चोखो लागयो ह। 32 जणा तू ईब अंय्यां कर याफा म कोई न भेजर शमौन नाम का मिनख जिनै पतरस बी बोली ही बुलवा भेज, बो चमड़ा को धन्धो करबाला शमौन क घरा डट रयो ह। 33 जणा म हाथ की हाथ तेर कन मिनख भेज्या, अर तू बी ठिक करयो जो आकै सागै आगो। अर ईब म्हें परमेश्वर क आगै ई ताँई भेला होरया की जो क्युँ तनै प्रबु बोल्यो ह बे सगळी बातां तेरऊँ सूण सका।

34 जणा पतरस खेबा लागयो, “ईब मनै पक्को बेरो पड़गो की परमेश्वर कोई भेदभाव कोनी करै। 35 बो जगत का सगळा मिनखा न अपणावै जिखो बिको भय मानै अर नेक काम करै चाय पाछै बो कोई क्युँ ना हो। 36 परमेश्वर इज्जाएल्या न घोखो समचार को संदेश दियो क ईशु मसी बिऊँ थानै शान्ति मिलसी। जिखो सगळा को प्रबु ह। 37 यूहन्ना लोगा न बतिस्मा लेबा क बारा म परचार करबा क पाछै स, गलीलऊ चालू होर सगळा एहूदिया म जखी बाता होई बानै थे जाणो हो। 38 जय्यां की थे जाणो ई हो की परमेश्वर आपकी आत्मा अर शक्ति ईशु नासरी प कंय्यां उतारी अर बो च्याँरुमेर जार भलाई करतो अर शैतान

का सतायडा सगळा न आछयो करतो क्युँक परमेश्वर बिकै सागै हो। 39 म्हें बा सगळा कामा का गुवा हा जिखा बो एहूदिया अर यरूशलेम म करयो हो अर बिनै ई बे सूळी प लटकार मार गेयो। 40 पण तीसरा दिन बिनै परमेश्वर ओज्युँ जिन्दो कर म्हार प प्रगट करयो। 41 सगळा प नई पण बा गुवा प जिखा न परमेश्वर पेल्याऊँ टाळेड़ा राख्या हा, अर जिखा बिकै औज्युँ जिबा क पाछै बिकै सागै खाया अर पीया हा। 42 अर बो म्हानै हेल्लो पाड़बा अर गुवाई देबा को आदेश दिन्यो की परमेश्वर बिनै ई मरेडा अर जिवता को न्याय करबालो ठेरायो ह। 43 अर सगळा परमेश्वर की खेबाला बिकै बारा म गुवाई दि ही की जखो बी बिषै बिश्वास करसी बिका पाप ईशु मसी क नाम म धुप ज्यासी।

दुसरी जात्यां प पबितर आत्मा को उतरबो

44 पतरस बोल ई रयो हो अत्ति बारा म बा सगळा सुणबाला प पबितर आत्मा उतरयो। 45 पतरस क सागै आयडा एहूदी बिश्वासी आ देखर उकचुक होगा की पबितर आत्मा को बरदान जिखा एहूदी कोनी बानै बी दियो जार्यो ह। 46 क्युँक बे बानै भाँत-भाँत की भाषा म परमेश्वर को गुण गाण करता सुणर्या हा। जणा पतरस बोल्यो, 47 “आ सगळा न आपणै जंय्यां ई पबितर आत्मा मीली ह, जणा ईब कोई आनै पाणी को बतिस्मो लेबाऊँ मना कर सकै ह के?” 48 अर जणा पाछै पतरस बानै पाणीऊँ बतिस्मो लेबा ताँई आदेश दियो। इकै पाछै बे सगळा पतरसऊँ हाथ

जोड़ेर कहया की बो थोड़ा घणा दिन
ओर बाकै सागै रेवै।

पतरस को सक्यु यरुसलेम बिश्वासी मण्डकी म ख सुणाबा

11 परमेश्वर का बचन न गेर यहुदि
मिनख बी मान ली ह, आ बात
ईशु का टाळेड़ा चेला अर एहूदिया का
सगळा बिश्वास्या का काना म पड़ी।
2जणा पतरस क यरुशलेम पंचता ई
यहुदि बिश्वासी बिकै सागै जीरे करी।
3अर बोल्या, “पेली बात तो तू गेर यहुदि
मिनखा^१ घरा गयो अर उपर स बाकै
सागै खायो पीयो।” 4जणा पतरस जो
क्यु बठै घटयो बो बानै सुणाबा लाग्यो।
5“म जद याफा नगरी म अरदास करयो
हो जणा मनै दर्शण होयो अर म काँई
देख्यो की आसमानऊँ च्यारू कूणाऊँ
लटकायड़ी एक बड़ी सारकी चादर की
जय्यां कोई चीज आसमानऊँ उतर मेरै
कन्नै आई। 6अर म बिमै काँई देखू की
बिमै धरती का च्यार टाँगा का जाँनबर,
रेंगबाला अर आसमान म उडबाला पंछी
हा। 7अर ईकै पाछै मेरै काना म एक
अवाज पड़ी पतरस खड़यो हो आनै
मार^२ खालै। 8यण म खयो “नई प्रबु
कदै ई नई क्युंक म हाल ताँई कोई बी
सुगली अर बरजेड़ी चीज कोनी खाई।
9जणा आसमानऊँ दुसरका उवाज आई,
जो क्युं परमेश्वर शुध करयो ह बिनै
सुगली मना ख। 10तीन बार अंय्यां ई
होबा क पाछै हाथ्यु हाथ ई बी चादरा
सा न आसमान म उठा लिन्यो गयो।

11बी बगत ई जठै म रुकरयो हो बठै
कैसरीयाऊँ भेजेड़ा तीन मिनख मेर कनै
आया। 12अर परमेश्वर को आत्मा मनै
बांकै सागै बेझीजक जाबा ताँई खीयो,
अर अ छ: भाईड़ा बी मेरै सागै हो लिया,
अर म्हें बी मिनख क घरा गया। 13बो
म्हानै बतायो की बो एक ईश्वर नगरी
दुत न अपकै घरा खड़यो देखयो जिखो
बिऊँ बोल्यो की याफा म मिनख भेज^३
शमौन जिनै पतरस बी बोली ही बुला
लै। 14बो तनै बचन सुणासी जिऊँ तेरो
अर तेरा कूणबा को उद्धार होसी। 15अर
जद म परमेश्वर का बचन बानै सुणाबा
लाग्यो, जणा ठिक बय्या ई बापै पवित्र
आत्मा उतरयो जय्यां शरू म आपणा
प उतर्यो हो। 16जणा मनै प्रबु की खई
बात याद आई की यूहनमो तो पाणी स
बतिस्मो दियो पण थानै पवित्र आत्माऊँ
बतिस्मो दियो जासी। 17अर परमेश्वर
बानै बी बोई बरदान दियो जिखो आपा
न प्रबु ईशु मसी प बिश्वास करबाऊँ
मील्यो हो जणा फेर मेरी काँई मजाल
की म परमेश्वर न रोकतो। 18अ बातां
सुण^४ बे बिऊँ जिरै करबो बंद कर दिन्यो
अर सगळा परमेश्वर की आ खेर बडाई
करबा लाग्गा की परमेश्वर गेर यहुदि न
बी साचो जिवन जिबा ताँई पापाऊँ मन
फिराबा को दान दियो ह।

अन्ताकिया म चोखो समचार

19सतफनुस क मोत क पाछै बिश्वास्या
म आया सताव की बजैऊँ बे तितर-
वितर होगा। अर बे फीनीके, साइप्रस

^d 11:3 गेर यहुदि मिनखा यहुदि मिनख चावता हा की अ गेर यहुदि मिनख बी सून्नत करवावै।

अर अन्ताकीया ताँई जा पूंचया। अर ईशु को समचार सुणाता हा पण ये यहुदि मिनखां न ईशु को समचार सुणाता हा। 20 आ मऊँ क्युंक साइप्रस अर कुरैन का हा। अर जद बे अन्ताकीया म आया जणा बे गेर यहुदि मिनखा म बी ईशु को समचार सुणाबा लाग्गा। 21 प्रबु को हाथ बा प हो, जिकी बजैऊँ घणा-सारा मिनख बिश्वास कर'र ईशु क कानी मुड्या। 22 अर जद बांकी चर्चा यरुसलेम की बिश्वासी मण्डली क काना म पड़ी जणा बे बरनाबास न अन्ताकीया भेज्या। 23 बरनाबास बठै परमेश्वर की भलाई न देख'र राजी होयो। अर बानै उपदेश दियो की तन मनऊँ बिश्वास जोगा अर परमेश्वर म बण्या रेवो। 24 बो पवित्र आत्मा अर बिश्वासऊँ भरेडो एक भलो मिनख हो। इकै पाछै ओर बोळा मिनख परमेश्वर प बिश्वास कर्या। 25 बरनाबास शाऊल न टोबा तरसुस नगरी चल्योगो। 26 अर जद शाऊल बिनै लाहृधगो जणा बो बिनै लेर अन्ताकीया आगो। अर बे पूरा बरस भर मण्डलीऊँ मीलता अर बौळा-सारा मिनखां न उपदेश देता रिया अर चेला सऊँ पेली अन्ताकीया म ई मसी का मिनख खुवाया। 27 आ दिन म ई क्युं परमेश्वर की खेबाळा यरुशलेमऊँ अंताकीया म आया। 28 बामऊँ एक जिको नाम अगबुस हो बो परमेश्वर की आत्मा क कहया गेल बतायो की सगळा जगत म काळ पड़सी अर ओ काळ राजा क्लौदियुस क टेम म पड़यो। 29 जणा सगळा चेला जता बी बठै हा बे आपकी पाइना गेल यहुदिया म रेहबाळा भाया ताँई मदद भेजबा को फेसलो करयो।

30 अर बरनाबास अर शाऊल क हाथाऊँ यरुशलेम की बिश्वासी मण्डली का बडका क कनै थोड़ी घणी मदद भेजी।

हिरोदेस को बिश्वासी मण्डली न सताबो

12 बी टेम को राजा हिरोदेस बिश्वासी मण्डली का क्युंक मिनखा न सताबो शरु कर दियो। 2 बो यूहन्ना का भाई याकुब न तलवारऊँ मरवा दिन्यो। 3 अर आ देखर की अंय्यां करबाऊँ एहूदि लोग राजी होवी ई जणा बो पतरस न बी पकड़वाबा की मन म करी, अर बे अखमीरी रोटी खाबाळा त्युंहार का दिन हा। 4 अर बो बिनै पकड़र कोठड़ी म बन्द करवार बिषे च्यार-च्यार सिपाईड़ा का च्यार पेरा बिठा दियो, अर मन म करी की फसै का त्युंहार क पाछै बिनै मिनखां क सामै ल्यावै। 5 अर जद पतरस कोठड़ी म बन्द हो बि टेम सगळी बिश्वासी मण्डली बी ताँई पूरा मनऊँ परमेश्वरऊँ अरदास करबा लागरी ही।

पतरस को छुटबो

6 जद हिरोदेस पतरस प मुकदमो चलाबा ताँई बिनै ल्याबाळो हो, बी रात पतरस दो साँकळाऊँ बँधेड़ो दो सीपाईड़ा क बिच म सूतयो हो। अर कोठड़ी क बारणा प रूखाळा पेरो देर्या हा। 7 अर बठै च्याणचुको के होयो की प्रबु को एक ईश्वर नगरी दुत बी कोठड़ी म प्रकट होयो। जिऊँ बी कोठड़ी म जोर को च्यानणो होगो अर बो पतरस की पासड़या प हाथ धर बिनै जगार

बोल्यो बेगोसो खड़यो हो। अत्ता म ई बिकै हाथऊँ सांकळा खुलर पड़गी। 8अर ईश्वर नगरी दुत बिऊँ बोल्यो, “तेरो कोटीयो, कमर पट्टो बाँधर जूती पेरलै अर फटाफट त्यार होज्या, जणा पतरस बिकै कह्या गेल सप दे ई त्यार होगो जणा पाछै बो बिनै आपकै गेल आबा ताँई बोल्यो। 9अर बो बिकै गेल होगो पण बो आ कोन समझ सक्यो की ओ जो क्युं बो प्रबु को ईश्वर नगरी दूत कर्यो हो बो सच ह के? बिकै भावऊँ तो ओ एक दर्शाव ई हो। 10बे पेला अर दुसरा पेरा स निकळर लो का बारणा क कनै पूच्या जिखो नगरी म खुलतो हो। बि बारणा को दरूजो बा ताँई आपै ई खुलगो, अर बे बठैऊँ एक गळी मायिकी गया, इकै पाछै ईश्वर नगरी दुत बिनै छोडर चल्यो गयो। 11जणा जार पतरस चेता म आयो अर आपका मुण्डाऊँ बोल्यो, “ ईब म जाणगो की सांच्याई प्रबु ईश्वर नगरी दुत न भेजर मनै हिरोदेस क हाथऊँ छुड़ा लियो अर एहूदि मिनखां की सगळी मनसा प पाणी फेर दियो। 12आ जाणर बो युहन्ना जिनै मरकुस बोलै ह बिकी माँ मरियम क घरा आयो, बठै पेल्या स ई बोला सारा मिनख भेला होर अरदास करबा लागर्या हा। 13बिकै कुवाड खटखटाबा प रुदे नाम की एक दासी बारणा प आई। 14पतरस की उवाज पिछाणर बा कुवाड तो खोली कोनी पण राजी होर पेली मायनै गई अर सगळा न ख सुणाई की पतरस बारणा म खड़यो ह। 15बे बिऊँ कह्या तू बावळी तो कोनी होगी ह? ओ कंयां हो सकै ह, पण बा तो

आपकी बात प अड़ी री: जणा जार बे कह्या, “हो सकै ह कि ओ बिको ईश्वर नगरी दुत होगो। 16अर बठिनै पतरस कुवाड बजातो रिह्यो जणा बे कुवाड खोलया अर बिनै सामै देखर सुना होगा। 17जणा बो मुण्डा प आँगळी धर बानै इशारो करयो की चुप रेवै अर बो बानै बे सगळी बातां बताँई की प्रबु कय्यां बिनै जेळऊँ अजाद करयो। अर आ खेर की याकुब अर दुसरा भाया न बी आ बात बता दिज्यो, बो बठैऊँ दुसरी झाघा चल्योगो। 18दिन उगता ई बा सीपाईड़ा क घाल-मेल लाग्यी की पतरस को काँई होयो बो कठै चल्गो। 19हिरोदेस बिकी तलाश करवाई पण बो बिकै हाथ कोनी लाग्यो, जणा बो बा रुखाळा न बुलाया अर बाऊँ पुछताछर बानै मारबा का आदेश काढ्या। अर हिरोदेस एहूदिया न छोडर कैसरिया म जार क्युंक दिना ताँई बसगो।

हिरोदेस की मोत

20हिरोदेस सूर अर सैदा म रेबाळा मिनखाऊ नराज हो जि बजैऊँ बे सगळा मिलर बलास्तूस जिखो राजा कि राण्या कि देखबाल करबालो खास कर्मच्यारी हो। बिनै बुलार बिऊँ मेल करबो चायो क्युंक राजा क देशऊ ई बाका देश म खाबालो समान भेज्यो जातो हो। 21एक दिन हिरोदेस राजा हाळी पौशाक धारण कर जनता न भाषण देबा लागरयो हो। 22जणा बिकी सूणर लोग जोरऊँ बोलबा लाग्या की आ बाणी तो कोई देवता की ह मिनख की तो आथ कोनी। 23बि टेम ई प्रबु को ईश्वर नगरी दुत बिनै मारयो

क्युंकि बो परमेश्वर न मेमा कोनी दि। अर बिकी काया म कीड़ा पड़या अर बिनै खाबा लाग्या जिऊँ बो मरगो। 24पण परमेश्वर को बचन फेलतो अर बढ़तो गयो। 25बरनाबास अर शाऊल यरुसलेम म आपको काम खत्म कर युहन्ना न जिनै मरकुस खेता हा आपकै सागै अन्ताकिया लोर आया।

बरनाबास अर शाऊल न टाळर भेजबो

13 अन्ताकिया की बिश्वासियां मण्डली म परमेश्वर की खेबाला अर उपदेश देबाला कई हा, जय्यां की बरनाबास, शमौन जिनै काल्यो बि बोलता हा अर कुरेन को लूकियुस अर देश की चोथी पाँती को राज-पाल हेरेदेस को गोद आयड़ो भाई मनाएम, अर शाऊल। 2जद बे ब्रत क सागै परमेश्वर की मेमा करा हा बी टेम ई पवित्र आत्मा बाऊँ बोली, “मेर ताँई बरनाबास अर शाऊल न बि काम ताँई नाकै टालो जी काम ताँई बानै बुलायो गयो ह।” 3जणा बे ब्रत अर अरदास करर बाकै माथा प हाथ म्हेलर बानै बिदा करया।

पौलुस अर बरनाबास की साईप्रस की जात्रा

4पवित्र आत्मा क कह्या गेल बरनाबास अर शाऊल सिलूकिया गया जठेरूँ झाज म बेठर साइप्रस नाम का टापू प पूँच्या। 5अर बे बी टापू कि सलमीस नगरी म पूचर बढै का अराधनालया म परमेश्वर का बचन सुणाया, अर यूहन्नो जिनै मरकुस बी बोली ही, एक मद्दगार की जय्यां बाकै

सागै हो। 6अर बे, बी सगळा टापूँ होता होया बी टापू क परलै नाकै की नगरी पाफुस म पूचयां। जठै बानै बार-ईशु नाम को एक यहुदि जादुगर अर झुठी परमेश्वर की खेबालो मिनख मील्यो। 7अर बो राज-पाल सिरगियुस-पौलुस जिखो दिमागऊँ बोलो तेज हो बिकै सागै हालो मिनख हो, ओ सिरगियुस-पौलुस बरनाबास अर शाऊल न आप क कनै बुलार बाऊँ परमेश्वर को बचन सुणबो चातो हो। 8पण बार-ईशु जादुगर जिको नाम यूनानी भाषा म अलिमास हो, बो बाको बिरोद करर टापू-पती न परमेश्वर प बिश्वास करबाऊँ रोकबो चायो। 9जणा शाऊल पवित्र आत्माऊ भर’ र जिनै पौलुस बी बोली ही बिकै कानी एक टक देखयो। 10अर बोल्यो, “सगळा छल कपटाऊँ भरेड़ा शैतान की ओलाद, भलाई का बेरी। तू परमेश्वर का सांचा अर सीधा गेला न तौड़बो मोड़बो कोनी छोड़ै के?” 11जणा ले इब तेर प परमेश्वर को हाथ पड़यो ह, अर ईब तू आँधो हो ज्यासी अर क्युंक टेम ताँई दिन का च्यानणा न देख कोनी सकगो। अति खेता ई बिकी आँख्या क आगै अंधेरो छागो अर अठिनै बिठिनै टप-टोला मारबा लाग्यो जिऊँ कोई बिको हाथ पकड़र बिनै लेज्यावै। 12जणा टापू-पति आ देखर प्रबु की सिख प ताजुब क सागै बिश्वास करयो।

पौलुस अर बरनाबास पिसिदिया का अंताकिया म

13पौलुस अर बिकाला साथी पाफुसऊँ झाज म बैठर पंफूलिया की पिराग नगरी

म आया; पण यूहन्नो जिनै मरकुस बोलता हा बानै छोड़र यरुसलेम चल्योगो। 14 अर बे बठैऊँ चालर पिसिदिया का अन्ताकिया म आया अर आराम-हालै दिन यहुदिया कि अरदास करबाळी झगा म जार बेठगा। 15 मूसा का बिधी-बिधान अर परमेश्वर की खेबाळा की पौथी मऊँ बाचर अराधनालय का सरदार बाऊँ बोल्या भाइडो मिनखां न देबा ताँई थार कन कोई उपदेश ह तो आर खयो। 16 जणा पौलुस खड्यो होर अपका हाथ को इसारो मिनखां कानी करर बोल्यो, “परमेश्वरऊँ डरबाळो गेर यहुदियो अर इज्राइलीयो गोरऊँ सूणो। 17 इज्राइलीया को परमेश्वर आपणा बाप-दादा न आप ताँई टाळ लियो हो। अर जद अ मिस म परदेशी की ढाळ रेहता हा जणा बो आनै बठै फळायो अर आपकी ताकतऊँ बानै बठैऊँ छुड़ा ल्यायो। 18 अर करीब चाळीस बरसा ताँई बो बानै रेगिस्तान म बर्दास करतो रियो। 19 अर कनान देश का सात राज न नाश करर बो बा धरती इज्राइलिया न बाकी बापोत होबा ताँई दे दि। 20 आ बातां म करीब साडे च्यार सो बरस लाग्या हा। इकै पाछै परमेश्वर की खेबाळा शेमूएल क टेम ताँई परमेश्वर बानै न्याय करबाळा दिया। 21 इकै पाछै बे परमेश्वरऊँ एक राजा की माँग करी जणा परमेश्वर बिन्यामीन का गोत मऊँ एक मिनख कीश का छोरा शाऊल न बा प चाळिस बरसा ताँई राजा बणायो। 22 इकै पाछै परमेश्वर शाऊल की झगा दाऊद न बांको राजा बणायो; जिकै बारा म बो कह्यो कि, “यिशै को छोरो दाऊद जिखो मेरा हिया जय्यां को ह मनै मीलगो,

जिखो मेरी सगळी इंछया न पूरी करसी।” 23 इ मिनख क कुणबा मऊँ ई परमेश्वर आपका वादा गेल इज्राइल का मिनखा न छुड़ाबाळा ईशु न भेज्यो। 24 बिकै आबाऊँ पेली यूहन्नो सगळा इज्राइलिया म मन फिरर पाणीऊँ बतिस्मो लेबा को परचार करतो हो। 25 जद यूहन्नो आपको काम पूरो करबाळो हो जणा बो मिनखां न बोल्यो, “थे जो मनै समझर्या हो, म बो कोनी हू बो तो मेरै पाछै आसी अर म बिकाळा जूता का सळू खोलबा क जोगो ई कोनी हू। 26 “सूणो मेरा भाईडो, इब्राम की संतानो अर गेर एहूदियो परमेश्वर का भगतो! छुटकारा का अ बचन थार कन ई पूंच्या ही। 27 यरुशलेम का रेबाळा अर बाका राजा आ कोनी जाण्या की ईशु ई छुड़ाबाळो ह, अर अराम-हालै दिन सिखाया जाबाळा बे बचन जिखा परमेश्वर की खेबाळा क कानीऊँ माण्डया गया हा, बाका भेद बी कोनी जाण्या। पण ईशु प दोष लगार शास्त्र का बा बचना न बे पूरा कर्या। 28 बानै बिमै मारबा जय्यां को कोई दोष कोनी लाध्यो इकै पाछै बी बै पिळातूसऊँ बीनै मरवाबा की माँग करी। 29 अर जद बे बिकै बारा म मण्डेडी सगळी बातां न पूरी कर लि, जणा बे बीनै सूळी ऊँ तकै उतार बिकी लाश न एक कब्र क मायनै धरदिन्या। 30 पण परमेश्वर बीनै मरेडा मऊँ ओज्यु जिन्दो करयो। 31 अर बो बानै जिखा बिकै सागै गलीलऊँ यरुसलेम आया हा, बोला दिना ताँई दिखतो रिह्यो अर ईब बेर्ड मिनखां क सामै बिका गुवा ही। 32 म्हें थानै बा वादा का चोखा समचार क बारा म बतार्या हा

जिखा आपणा बडका क सागै कर्या गया हा। ३३ परमेश्वर ईशु न ओज्यु जिवा'र, बा बात आपणा ताँई पूरी करी ह, जिखा बिकी संतान हा, जय्यां की दूसरा भजन म मण्डेडो ह, 'की तू मेरो छारो ह, अर म आज ई तेरो बाप बण्यो हू।' ३४ अर बिनै अंय्यां मरेडा मऊँ ओज्युं जिंदो कर दियो जिऊँ बो कदै ई न सीडै। ई ताँई परमेश्वर बोल्यो, "कि म दाऊद क सागै वादो करेडी सगळी पवित्र अर पक्काई ऊँ होबाळी बरकत तेर प करस्यु।"

३५ जणाई बो एक दुसरा भजन म अंय्यां बोल्यो की तू तेरा पवित्र मिनख न कबर म सीड़बा कोनी देवै। ३६ अर दाऊद तो परमेश्वर की ईछ्या गेल आपका टेम म सेवा कर मरगो अर बिनै बठैर्ई गाड्यो गयो जडै बिका बडका गडर्या हा अर बाकी लाश सिड़गी। ३७ पण परमेश्वर जिनै मरेडामउँ जिंदो करयो बो कोनी सीड़यो। ३८ जणा भाईडो थे जाणल्यो की ईशु ई ह जिकै जरिये थारपै पापाऊँ माफी की घोषणा करी ह। ३९ थे मुसा का बिधी-बिधान क गेल छुटकारो कोनी पा सको, पण जिखो बि बिमै बिश्वास करसी बिनै सगळा पापाऊँ आजाद कर्ये जासी अर परमेश्वर क सामै धर्मी ठेरायो जासी। ४० ई ताँई चेता म रेवो अंय्यां न हो की जो क्युं परमेश्वर की खेबाळा बोल्या ही बा थारै सागै न होवै। क्युंक परमेश्वर की खेबाळा की पोथी म मंडर्यो ह, ४१ हँसी करबाळो! अचरज कर मरज्यावो! क्युंक म आ दिना म अंय्यां को काम करबाळो हू, जिकै बागा म ज थानै कोई बतातो जणा बी थे बिपै जमा ई बिश्वास कोनी करता।

टाळेडा खास चेला का काम 13:32-50

४२ अर जद बे आपको उपदेश देर बठैऊँ जार्या हा जणा बा न सूणबाळा मिनख बाऊँ बोल्या, "आगला अराम-हालै दिन म्हानै अ बातां ओज्यु सुणाज्यो।" ४३ सभा क खत्म होबा क पाछे एहूदी अर गैर एहूदी जिखा एहूदी धर्म म आयडा भगत हा बे पौलुस अर बरनाबास क गेल हो लिया। पौलुस अर बरनाबास बाऊँ बात कर बानै समझाया की परमेश्वर की दया म बण्या रेह्वो।

गैर एहूदीयां म प्रबु को बचन

४४ इकै पाछे आगला अराम-हालै दिन करीब सगळी नगरी प्रबु को बचन सुणबा ताँई भेळी होई। ४५ इ भीड़ न देख'र एहूदी बलगा अर पौलुस की बातां क खिलाप बोलता होया बिकी बेज्जती करी। ४६ जणा पौलुस अर बरनाबास हिम्मत कर'र बोल्या ओ जरुरी हो के प्रबु को बचन सज्जे पेली थानै सुणायो जावै पण थे इनै थारऊँ दूर कर्या अर खुद न जुग-जुग का जिवन को भागी कोनी मान्या जणा ईब मँडें गैर एहूदीयां क कनै जावा हा। ४७ क्युंक अ आदैश म्हानै प्रबु दियो ह। बो बोलै ह, 'दुसरा देशा ताँई म थानै च्यानणो बणायो हू। जिऊँ ओ होवै की थारै जरिये मुक्ति कौ ओ संदेशो सगळी धरती का मिनखा म फैल ज्यावै। ४८ आ सुण'र गैर एहूदी मिनख बोला राजी होया अर ईश्वर का बचना की मेमा करबा लाग्गा। अर जत्ता बी जुग-जुग का जिवन ताँई टाळेडा हा बे बिश्वास करया। ४९ अर सगळा प्रदेश म प्रबु को बचन फैलगो। ५० पण एहूदी मिनख, गैर एहूदीया की मानी थानी एहूदी धर्म न मानबाळी

लुगाया अर नगरी का पैठहाळा मिनख जिखा परमेश्वर न मानबाळा हा बाका कान भेर पौलुस अर बरनाबास क खिलाप उपद्रव करेर बानै, बी नगरी क बारै कढ़वा दिन्यो। 51जणा पौलुस अर बरनाबास बानै चेताबा ताँई आपकै पगा की माटी झाड़ेर बठचाऊँ इकोनियुम चल्यागा। 52अर बठिनै अन्ताकिया का बिश्वासी राजी होरया हा अर बे पवित्र आत्माऊँ भर्यापुर्या होता गया।

इकोनियुम म पौलुस अर बरनाबास

14 इकोनियुम म पौलुस अर बरनाबास एहूदि मिनखा की अरदास करबाळी झागा म गया अर बैठे उपदेश दिया जिऊँ एहूदी अर गैर एहूदी का बोळा मिनख बिश्वास करया। 2पण बे एहूदी जिखा बिश्वास कोनी करया हा बे गैर एहूदी मिनखा न बिश्वासी भाया क खीलाप भड़काया अर बाकै मना म झैर भर दियो। 3पौलुस अर बरनाबास बोळा दिना ताँई बैठे ई रीया अर बिना कोई डर क परचार करता रीया। अर प्रबु बी बाका हाथाऊँ अचरजभर्या काम अर चमत्कार दिखार आपका अनुग्रह का संदेश न साबित कर्यो। 4अर नगरी म अय्यां होयो की मिनखा म फुट पड़गी। कोई चेला को तो कोई एहूदिया को हिमायतयो होयो। 5पण जद एहूदी अर गैर एहूदी मिनख आपका सरदारा सेत्यु बाकी बेज्जती करबा अर भाट्ठा मारबा की सोची। 6जणा बानै इको पेल्याई बेरो पड़गो अर बे बाकै आबाऊँ पेली ई लाईकोनिया का लुस्त्रा अर दिरबे नाम की नगरया अर साकड़ा का इलाका म

भाग छुट्या। 7अर बैठे परमेश्वर को बचन सूणाबा लाग्या।

लुस्त्रा अर दिरबे म पौलुस अर बरनाबास

8लुस्त्रा म एक अंयां को मिनख हो जिकी टाँगा म जमा ई जान कोनी ही बो जन्मऊँ ई लंगड़ो हो। 9बो पौलुस न ध्यानऊँ सूणबा लागरयो हो जणा पौलुस बिकै कानी देखयो अर बिमै निरिगो होबा को बिश्वास देख्वर 10जोरऊँ बोल्यो, “खड़यो हो अर अत्ती खेता ई बो खड़यो होगो अर उछलबा कूदबा लाग्यो। 11ओ चमत्कार देख्वर लुस्त्रा का मिनख लाईकोनिया भाषा म बोलबा लाग्या की मिनख रूप म खुद देवता आपणा कनै आया ही। 12बे बरनाबास न जयुस अर पौलुस न हेरमेस कहया क्युंक बो बोलबाळा म मुख्यो हो। 13नगरी क बारलै नाकै जयुस को मंदर हो। अर बी मंदर को पुजारी सौँड अर माळा लेर नगरी का बाराणा प आयो क्युंक बो मिनखां क सागे पौलुस अर बरनाबास ताँई बली देबो चावो हो। 14अर जद पौलुस अर बरनाबास न इ बात को बेरो पड़यो जणा बे आपका गाब्बा फाड़ेर बी भीड़ म कूदगा अर बासै जोरऊँ खेबा लाग्या 15थे कैई करो हो म्हें बी तो थारी जय्यां का मिनख हा, म्हें तो थानै ओ संदेश देबानै आया हा की थे आ फालतू चीजा न छोड़ेर बी जिवता ईश्वर न जाणो, जिखो ईश्वर नगरी, धरती, समदर अर जो क्युं बिमै ह बानै बणायो हा। 16बितेड़ा टेम म बो जगत का सगळा मिनखा न बाकी इंछ्या

गेल चालबा दियो। 17 इकै पाछै बी बो खुद न सावित करतो होयो, भलाइ करी अर आसमानउँ टेम-टेम प मी बरसार धरती प चोखी फसल उगार आपाणा न देवै ह जिऊँ आपणो मन राजी होवै ह। 18 अ सगळी बातां बोलबा क पाछै बी, बे बोली मुश्किलउँ भीड़ न बली देबाऊँ रोक्या।

19 इकै पाछै अन्ताकिया अर इकोनियुस नगरीया मऊँ क्युंक एहूदि आर भीड़ न भड़कार खुद म मिला लिन्या। अर बे पौलुस न भाट्हाऊँ मारर बिनै मरेड़ो समझार बिनै नगरी क बारै घिसर गेर्याया। 20 पण जद बिश्वासी बिकै च्यास्त-मेर भेळा होया जणा बो खड़यो होर नगरी म आयो अर दुसरा दिन बरनाबास क सागै दिरबे चल्योगो।

सीरिया का अन्ताकिया म ओज्यूं आबो

21 बी नगरी म बे परमेश्वर का समचार न सुणार बोला चेला बणार लुस्त्रा अर इकुनियस होता होया पिसदिया का अन्ताकिया म आगा, 22 अर चेला न समझाता अर हिममत बँधाता हा की बिश्वास म बण्या रेहयो अर परमेश्वर का राज म बड़बा तौई आपा न बोला दुख उठाणा पड़सी। 23 अर बे सगळी मण्डलीया म मुखिया बणाया अर बरत क सागै अरदास कर बानै प्रबु क हाथा म सोप दिन्या जिपै बे बिश्वास कर लिया हा।

24 जणा पाछै बे पिसिदिया क गेला होर पम्फुलिया नाम का इलाका म गया। 25 अर पैरगे म बचन सुणार अत्तालिया

आया। 26 बठैऊँ बे न्याव प सवार होर अन्ताकिया गया जठै बे बि काम न हाल ई पूरो कर्यो हो जि ताँई बानै परमेश्वर का हाथा म सुप्यो गयो हो। 27 बठै जार बे बिश्वासी मण्डली की सभा बुलार बानै बे सगळी बातां खे सूणाई जखी परमेश्वर गैर एहूदीयां क मायनै बाकै हाथा करवायो अर कय्यां गैर एहूदी मिनखा ताँई साँचा परमेश्वर न मानबा को गेलो खुल्यो। 28 बे बोला दिना ताँई बठै ई बिश्वासीयां क सागै रीया।

यरुशलेम की सभा

15 इकै पाछै एहूदिया प्रदेशाऊँ आर क्युंक मिनख मण्डली का भायडा न सिखाया की, ज मूसा की रीत गेल थारी सुननत न करी ज्यावै जणा थानै उद्धार कोनी मील सकै। 2 इ बात न लेर पौलुस अर बरनाबास बाऊँ खुब लड़या, बोली खींचाताणी होबा क पाछै बिश्वासीयां की मण्डली पौलुस न, बरनाबास अर क्युंक बिश्वासी मिनखा न टाळया क जिऊँ बे अन्ताकियाऊँ यरुसलेम म जार टाळेड़ा खास चेला अर बडकाऊँ फेसलो करवावै। 3 जणा बिश्वासी मण्डली बानै थोड़ी घणी दुर छोड़र गई अर बे फीनिके अर समरिया क गेला गैर एहूदी क्यासिक मन फीरायो ह आ बात बिश्वासीया न बताता गया, जिनै सुणार सगळा बोला राजी होया। 4 बाकै यरुसलेम पूचता ई बठै की मण्डली टाळेड़ा खास चेला अर मण्डली का बडका बाऊँ राजी होर मील्या, अर बे बानै बताया की परमेश्वर बाकै सागै होर कय्यां का बडा-बडा

काम करया ही। ५पण फरिसिया मऊं बिश्वास म आया क्युंक मिनख खड़या होर बोल्या, “गैर एहूदीयां न सुन्नत करा’र मुसा का बिधी-बिधान मानबो चाये। ६जणा मण्डली का बड़का अर टाळेड़ा चेला इ बात प बिच्यार करबा ताँई भेला होया। ७बोली देर खीचाताणी होबा क पाछे पतरस बामैऊं खड़यो होर बोल्यो, “भाईड़ो जय्यां की थे जाणो ई हो के थार मऊं परमेश्वर मनै टाल्यो की गैर एहूदी मेरै मुंडाऊं परमेश्वर को समचार सूणर बिपै बिश्वास करै। ८अर हिया न जाणबालो परमेश्वर आपणी जय्यां बानै बी पबितर आत्मा देर अपणायो। ९अर बिश्वासऊं बाका हिया न धोर आपणा म अर बा म कोई फरक कोनी करयो। १०जणा पाछे ईब थे क्यालै परमेश्वर न बिचासर बिश्वासीया की गरदना प जुवो धररया हो, जिनै न तो म्हारा बाँप-दादा उठा सक्या अर न म्हें उठा सका। ११मै हौ ओ बिश्वास करा हा की परमेश्वर की दयाऊं मै हौ बी बचा लिया गया हा जय्यां की बे बचा लिया गया ही।

१२जणा सभा म बेठया सगळा का सगळा चुप चाप पौलुस अर बरनाबास की बातां सुणबा लाग्या, की परमेश्वर कय्या बाकै जरियै गैर एहूदीयां म अचरज-भर्या चिन चम्तकार करया।

१३अर जद बोलर बे चुप होया जणा याकुब खड़यो होर बोल्यो भाईड़ो मेरी सुणो। १४जय्यां कि शमैन अबार बतायो ह की परमेश्वर क्यासिक गैर एहूदीयां की समाळ करी ह जि ताँई बो बा गैर एहूदीयां मऊं क्युंक मिनखा न बिका खुद

का मिनख होबा ताँई बुलायो ह। १५अर इऊं परमेश्वर की खेबाळा की बातां बी मेळ खावै ह। जय्यां की मण्डरयो ह, १६‘इकै पाछे म ओज्यु आ’र दाऊद का राज न पाछो बसासयुं।

इको राज नाश हो गयो हो, म इनै ओज्यु बसार खड़यो करस्यु।

१७सगळा जगत का मिनख जिखा मनै ढुंढी हि अर हाँ बे सगळा गैर एहूदी मिनख बि जिखा न म मेरा खुद का मिनख कर बुलायो हु बे बचेड़ा सगळा मेरे कनै आसी।

१८ प्रबु बोलै ह कि, “म अ बाता बोली पेल्याऊं ई बता दिनी हि।”

१९याकूब और खयो, जणा ईब मेरे बिच्यार ओ ह की गैर एहूदी मिनखा मऊं जिखा परमेश्वर क कनै आया ही, बानै आपा दिन न घाला। २०पण बानै आ जरुर माण्डर भेज्या की बे मूरत्या प चढायड़ी चीज न खावै अर पराई लुगाया क सागै गळत काम न करै अर गळो म्होसेडो मास न खावै अर लोय न पिवै। २१क्युंक पुराणा टेमऊं ई अ बात मुसा का बिधी-बिधान मऊं अराम हालै दिन यहुदिया का अरदास करबाली झग्गा म बांची जावै ह अर नगरी-नगरी आंको परचार कर्यो जार्यो ह।

गैर एहूदी बिश्वासीया न चिट्ठी

२२जणा पाछे टाळेड़ा चेला, बड़का अर सगळी मण्डली क्युंक न टालर पौलुस अर बरनाबास क सागै अन्ताकिया भेजबा की तै करी। जणा बे एहूदो जिनै

बरसब्बा बोलता हा अर सीलास न टाळेर, जिखा बामै चोखी पेठ राखता हा बानै बाकै सागै भेज्या। 23बाकै हाथ बे अंय्यां माण्डेर भेज्या की, “अन्ताकिया, सीरीया अर किलिकिया म रैहबाळा गैर एहूदी बिश्वासी भाया न टाळेड़ा खास चेला अर यरूशलेम की मण्डळी का बडका को नमस्कार। 24म्हारै काना म आ बात आई ह की म्हारमऊँ क्युंक मिनख बठै थारै कन्नै आर थानै आपकी बाताऊँ घबरा दिन्या अर भंगरा दिन्या। पण अंय्यां करबा ताँई म्हें तो बानै खया कोनी जणाई तो 25म्हें एक चित होर आ सोची की म्हारा पयारा बरनाबास अर पौलुस क सागै टाळेड़ा मिनख न थारै कनै भेज्या। 26अ अंय्यां का मिनख ही जिखा प्रबु ईशु मसी का नाम ताँई आपकी जान की परवा कोनी करी। 27जणाई म्हें थारै कनै एहूदा अर सीलास न भेजर्या हा जिखा आपका मुंडाऊँ अ सगळी बातां थानै खै देसी। 28पबितर आत्मा अर म्हानै अंय्यां लाग्यो की आ जरूरी बातां न छोडेर थारै प और बेसी बोज न गेरी। 29की थे मूरत्या प चढायडी चीजा, गळो मोसेडा मास, लोयऊँ अर पराई लुगाया क सागै गळत कामाऊँ परै रेह्यो, अर थारो भलो होवै।

30“इकै पाछै बे अन्ताकिया गया अर बठै बिश्वासी मण्डळी की सभा बुलार बा चीटी बानै दे दि। 31अर बे बी आस बंधाबाळी चीटी न बाचर बा बाताऊँ बोळा राजी होया। 32एहूदा अर सीलास जिखा परमेश्वर की खेबाळा

हा, बे आस बंधाबाळी अर बिश्वास न मजबुत करबाळी बातां बता’र बानै मजबुत करया। 33बे बाकै सागै थोड़ा-घणा दिन रेह्बा क पाछै बाऊँ प्रेमऊँ बिदा लेर पाछा आपका भेजबाळा क कनै जाबा ताँई रवाना होया। 34(पण सीलास न बठै रेह्बो चोखो लाग्यो।)^e 35पौलुस अर बरनाबास अन्ताकिया म ईरेह्गा अर बोळा मिनखां क सागै प्रबु का बचन न सिखाता अर बिको परचार करता रिह्या।

पौलुस अर बरनाबास को नाकै होबो

36थोड़ा-घणा दिन बीत्याक जणा पाछै पौलुस बरनाबास ऊँ बोल्यो, “आओ ल्यो आपां बा नगर्या म चाला जामै आपां प्रबु को बचन सुणार आया हा बठै चालर बानै समाळा की बे कथ्यासिक ही। 37जणा बरनाबास यूहनना न जिनै मरकुस बोली ही आपकै सागै लेबा की सोची। 38पण पंफूलिया म मरकुस बानै एकला छोडेर चोखा समचार परचार म बाकै सागै कोनी गयो हो ई बजैऊँ पौलुस बिनै सागै कोनी लेज्याबो च्यार्यो हो। 39बी बाताऊँ बाकै बिच अंय्यां की खीचाताँणी होई की बे एक दुसरा ऊँ नाकै-नाकै होगा अर बरनाबास मरकुस न लेर साइप्रस चल्यो गयो। 40पण पौलुस सीलास न टाळ्यो अर बिश्वासी भाईड़ा बानै परमेश्वर क हाथा म सोपर अरदास कर दि जणा पाछै बे बठैउँ चल्योगो। 41अर बो मण्डळ्या न मजबुत करतो

^e 15:34क्युंक मानी-थानी पुराणी पौथीयां म 34 की बाता कोनी मंडी।

सीरीया अर किलिकिया इलाकाऊं होतो होयो गयो।

दिरबा अर लुस्त्रा म पौलुस

16 इकै पाछै पौलुस दिरबा अर लुस्त्रा म गयो बठै बीनै तिमुथियुस नाम को एक चेलो मील्यो जिकी माँ एहूदी विश्वासनी ही पण बिको बाप यूनानी हो। २बो मिनख लुस्त्रा अर इकुनियुस का मिनखा म पेठ हाळो हो। ३पौलुस क आ मन म ही की बो बीकै सागै चालै, जणा बठचा का एहूदि मिनखां क चलतै बो बीकी सून्नत करी क्युंक बे सगळा जाणता हा की इको बाप यूनानी ह। ४अर नगरी-नगरी जार बे, बा नियमा न जानै यरूशलेम का टाळेडा खास चेला अर बडका बणाया हा बानै सिखाता हा अर मनवाता हा। ५अंयां करता-करता मण्डळीया विश्वास म मजबुत होती गई अर गीणती म बढती गई।

पौलुस न दर्शाव

६बे फूगिया अर गलातिया प्रदेशा म होर गया, क्युंक पबितर आत्मा बानै एशिया म बचन सुणाबा ताँई मना कर दिन्यो हो। ७बे मूसिया क कन्नै पूंचर बितूनिया जाबो चावा हा पण ईशु की आत्मा बानै बठै बी जाबा कोनी दि। ८जणा बे मूसियाऊं होर त्रोआस म आया। ९बठै पौलुस एक दर्शाव देखयो। अर बी दर्शाव म बो काँई देखै ह की एक मकीदुनिया को मिनख बिनै हाथ जोड़र खर्यो ह की, “थे मकीदुनीया आर म्हारी मदद करो। १०बिकै ओ दर्शाव देखता

ई म्हें मकीदुनिया जाबो चाया क्युंक परमेश्वर म्हानै बठै चोखो-समाच्यार सुणाबा ताँई बुलायो ह।

फिलिष्पी म पौलुस

११त्रोआस नगरीऊं रवाना होबा क पाछै म्हें पाणी का झाज म बैठर समोथ्राके, दुसरा दिन नेआपोलिस पूंच्या १२अर बठैऊं बे जमिन क गेला फिलीष्पी पूंच्या। फिलीष्पी मकीदुनिया प्रदेश की मानेडी नगरी अर रोमीया की बस्ति ही। म्हें क्युंक दिन बठै रीया। १३यहुदिया क अराम हाळै दिन म्हें आ सोचर नगरी का दरुजा क बारै नदी किनारै गया की बठै कोई अरदास करबा की झघा होगी। म्हें बठै बेठगा अर बा लुगायाऊं बतळाबा लागया जखी बठै भेळी होरी ही। १४बा लुगाया म थुआतिरा नगरीऊं लुदीया नाम की एक लूगाई ही जखी मेंगा भाव का गाबा बेचया करती ही अर बा ईश्वर म श्रद्धा राखती ही। प्रबु बीका मन का पाट खोल दिन्या अर बा पौलुस की बातां प गोर करी। १५अर आपका बाळ बच्चा सेतू बतिस्मो लेबा क पाछै बा म्हारऊं बोली ज थे मनै प्रबु की सांची विश्वासनी मानो हो जणा चालर मैरे घरा रेवो, “अर बा म्हानै मनार लेगी।

पौलुस अर सीलास को पकड़यो जाबो

१६म्हें जद अरदास करबा हाळी झघा म जार्या हा जणा म्हानै एक दासी मीली जिमै हूण बताबाळी स्याँप की आत्मा ही अर मिनखां की हूण बतार बा आपका मालीका न बोला पिसा कमार देरी ही।

17 जणा बा म्हारै गेल आर कूकबा लागी की अ मिनख साँचा परमेश्वर का दास ही जिखा थानै उद्धार को गेलो दिखावी ही। 18 बा बोला दिना ताँई अंयां ई करती री जणा पौलुस दूखी हो'र बि नुगरी आत्माऊँ बोल्यो, “म ईशु मसी का नामऊँ तन्नै ओडाऊँ हूँ की तू इमै स निकळ ज्या। अर बा अन्तो खेता ई बिमैऊँ निकळगी।

19 बिका मालिक आ देखर की आपणी कमाई को साधन तो जातो रियो जणा बे पौलुस अर सीलास न खींचर चोक म प्रधान क कनै लेगा। 20 बे बानै न्याय करबाळा क आगे लेगा अर बाऊँ कह्या की अ यहुदि मिनख ही जखा आपणी नगरी म खलबली मचा राखी ह। 21 अर अ आपण मिनखां न अंयां का रिति-रिवाज सीखार्या ही जानै मानबो अर बापै चालबो रोम्या का नियमा क खिलाप ह। 22 बाकै खीलाप भीड़ बी भेड़ी हो'र बोलबा लागी जणा पाछै न्याय करबाळा बाका गाब्बल्या फड़वार बाकै तड़ा मरवाबा का आदेश दिन्या। 23 बाकै अणमेदा का तड़ा पड़वार बे बानै पाछा कोठड़ी म बन्द कर दिन्या अर कोठड़ी का दरोगा न सुल पेरो देबा ताँई ओडायो। 24 जणा बो दरोगो हो जखो बानै मांयली कोठड़ी म बन्द कर बाका पगा न काठ म ठोक दिन्या।

25 आधी रात न पौलुस अर सीलास अरदास अर परमेश्वर का भजन गाबा लागर्या हा अर बानै सगळा कैदी सुै हा। 26 अति बारा म ई धरती हालगी अर कैद खाना की नीम तकात हालगी अर सगळा कैदीया की सांकळा टुटगी

अर कुवाड़ बी आपैई खुलगा। 27 दरोगो जागयो अर सगळा कुवाड़ खुला देखर सोचयो की सगळा कैदी भाग छुट्या जि बजैऊँ बो खुद न मारबा ताँई आपकी तलवार काढी। 28 जणा पौलुस जोरऊँ बोल्यो, “खुद न नुकसान मना पुंचावै! म्हें सगळा उरै ई हा। 29 जणा बो मशाल मंगार माईनै गयो अर धूज्तो-धूज्तो पौलुस अर सीलास क पगा म पड़गो। 30 अर बो बानै बारै लेज्यार बुझ्यो मराज छुटकारो पाबा ताँई मनै कॉई करणो चायै? 31 जणा बे बिऊँ कह्या प्रबु ईशु म बिश्वास करा। अंयां करबाऊँ तू अर तेरो सगळो कुणबो छुटकारो पासी। 32 इकै पाछै बे बिनै अर बिका घर म भेड़ा सगळा मिनखा न प्रबु को बचन सुणाया। 33 बी रात ई बो बानै लेज्यार बाका घाव धोया अर आपका सगळा कुणबा सेत्युं रात्युं-रात ई बतिस्मो लियो। 34 जणा बो बानै आपकै घरा लेज्यार जिमायो अर आपका पूरा कुणबा सेत्युं परमेश्वर म बिश्वास कर खुशी मनाई। 35 दिन उगयो जणा न्याय करबाळा सीपाइड़ा क हाथ खुवा भेज्या की बा मिनखा न छोड़ द्यो। 36 जणा बो दरगो ह जखो पौलुस न आर बोल्यो न्याय करबाळा था दोन्या न छोडबा ताँई ओडाया ह जणा इब थे बारै आर राजी खुशी जावो। 37 पण पौलुस अकड़गो अर बा सीपायड़ाऊँ बोल्यो म्हें रोमी होता सोता बी, बे म्हार प लगाया गया ईलजाम की जाँच पड़ताळ कर्या बिना ई म्हारै सगळा क सामै तड़ा मरवार म्हानै कोठड़ी म बन्द कर दिन्या। अर ईब चुप-चाप मानै छोडरया ही, अंयां कोनी चालै जद ताँई

बे खुद आर म्हानै न छोड़े म्हें कोनी जावा। ३८ आ बात सीपाईड़ा जार बा न्यायकरबाळाऊं कही जणा बे आ सूणर की बे रोमी ही डरगा। ३९ जणा बे खुद आर बाकै सामै हाथा जोड़ी करी अर बठैऊं बानै बारे ल्याया अर हाथ जोड़र कह्या थे दया कर ई नगरीऊं चल्या जावो। ४० जणा बे बठैऊं छुटबा क पाछै सीधा लुदिया क घरा गया अर बिश्वासी भायाऊं मील-मीलार बानै तसली देर बठैऊं चलेगा।

थिस्लुनीके नगरी म पौलुस अर सीलास

17 इकै पाछै बे अम्फिपुलिस अर अपुल्लोनिया होता होया थिस्लुनीके म आया, जठे एहूदि मिनखां की एक अरदास करबाळी झागा ही। २ पौलुस आपकी बाण गेल बाऊं मीलबा गयो अर बाऊं यहुदिया क तीन अराम-हाळै दिन बचना न लेर चर्चा करी। ३ अर धर्म ग्रंथ की व्याख्या कर आ साबित कर्यो की दुख भोगबो अर मरेड़ाऊं जिन्दो होबो मसी ताँई जरुरी हो। सागै ई बो आ बी बोल्यो, “की ईशु ई छुटकारो देबाळो राजा ह। जिकी बाता म थानै बताऊं हू। ४ बामैऊं क्युंक जणा बिश्वास कर्या अर पौलुस अर सीलास म जार मीलगा। अंयां का बोला परमेश्वर को भय मानबाळा यूनानी मिनख अर मानीथानी लुगाया बी अंयां ई करी।

५ ईपै एहूदी जळता-बळता पीसा देर क्युंक बदमास मिनखा न आपकै सागै कर लिन्या अर नगरी म उपद्रव मचाबा लाग्या। बे पौलुस अर सीलास न भिड़

क सामै ल्याबा क चकर म यासोन क घरा धावो बोल्यो। ६ बठै बानै बे कोनी लाध्या जणा बे यासोन अर क्युंक भाया न नगरी का अधीकारया क कनै लेगा अर चिलार कह्या, “बे सगळी दुनिया म उथळपुथळ मचार ईब उरै आया ही। ७ यासोन बानै आपकै घरा राखयो अर अ सगळा बोली ही ईशु नाम को कोई ओर राजा ह, अर ये रोम का राजा कैसर को ओडायडो कोनी मान्यो। ८ आ सूणर नगरी का मिनख अर अधिकारी लाल-ताता होगा। ९ जणा अधिकारी यासोन अर दुसरा बिश्वासियां न जमानत लेर छोड़ दिन्या।

बिरीया नगरी म पौलुस अर सिलास

१० जणा बठया का बिश्वासी भाईड़ा पौलुस अर सिलास न रात्यु-रात ई बठैऊं बिरीया भेज दिन्या अर बे बठै पूंचर सीधा यहुदिया क अरदास करबाळी झागा गया। ११ उरे का एहूदी थिस्लुनीके का एहूदि मिनखाऊं चोखा हा अर बे पुरा मनऊं बचन न अपणाया अर बे रोजकी बाकी कहेड़ी बातां न शास्त्र म टोता हा की बे बय्यौई ह की कोनी। १२ जिऊं बोला मिनख बिश्वास करयो अर बामै यूनानी मिनख अर मानीथानी लुगाया ही। १३ अर जद थेस्सलुनिके का एहूदि मिनखा न ओ बेरो पड़यो की पौलुस बिरीया म बी परमेश्वर को बचन सुणायो ह जणा बे बठै आर भिड़ न बाकै खीलाफ भर दिन्या। १४ जणा बठै का मसी भाईड़ा तावळा सा पौलुस न बिदा कर समदर कीनारे भेज्या पण सीलास अर तीमुथियुस बिरीया म ई

रेगा। 15 पौलुस का साथी बिनै एथेंस नगरी ताँई छोड़ बिको ओ संदेशो लेर आया की जल्दि स जल्दी सीलास अर तिमुथियुस मेरे कनै आवी।

एथेंस म पौलुस को परचार

16 पौलुस जद एथेंस म बाकी बाट देखर्यो हो। जणा बो बी नगरी म मूर्तिया की भरमार देखार बोझो दुखी होयो। 17 जि बजै ऊ बो एहूदिया की अरदास करबाली झागा म एहूदि अर गैर एहूदी मिनखा क सागै जखा परमेश्वर न मानता हा। अर रोजकी चौक म आबाला जाबाला क सागै बी चर्चा करतो हो। 18 बठै बो क्युंक एपिकूरी अर स्तोइकी ज्ञानी मिनखा क सागै बी चर्चा करी। क्युंक मिनख कद्या ओ गेलो म्हारऊँ काँई खेबो चावै ह? अर क्युंक खेता हा, लागै ह क ओ कोई पराया देवता की बात करै ह। क्युंक बो ईशु अर बिकै मरया पाछै दुबारा जिबा का चोखा समचार को परचार करतो हो। 19 जणा बे बिनै अरियुपगस^f की सभा म लेग्या अर बिकूँ बुज्या थे आ कूणसी नई सिख देर्या हो। 20 थे म्हानै अणजाणी सिख बतावो हो, जणाई म्हें आको मतबल जाणबो चावा हा। 21 सगळा एथेंस का रेबाला अर दुसरा देशाऊँ आर बसेड़ा प्रदेश्या को करीब-करीब सगळो टेम नई-नई बातां खेबा अर सूणबा म ई बिततो हो।

22 अरियुपगस की भरी सभा म पौलुस खड़यो होर बोल्यो, “एथेंस म रेबालो म आयो जणा ऊँ देखबा लागरयो हूँ की

थे सगळी बाता म बोळा धार्मिक हो। 23 म जद हाण्डतो-फिरतो थारी पूजबा की चीजा देखर्यो हो जणा बठै मनै एक अंय्यां की वेदी देखी जिपै मंडर्यो हो अणजाण ईश्वर ताँई। थे जि ईश्वर न बिना जाण्या पूजो हो म थानै बी ईश्वर क बारा म ई बताऊँ हूँ। 24 बो परमेश्वर जखो ई धरती अर इष्ठै जो क्युं बी दिखै ह बिनै बणायो अर बोई ईश्वर नगरी अर धरती को मालीक ह। बो हाथाऊँ बणायड़ा मंदिरा म कोनी रेवै। 25 बीनै काँई बात की कमी? जो बो मिनखा की सेवा लेवै? बो तो सगळा जिवा न सांस, जीवन अर सक्यु देवै ह। 26 बो एक ई मिनख क जरिये इ धरती प च्यारू-मेर मिनख फेलाया। अर बाका टेम अर प्रदेशा की सीमा निश्चित करी। 27 अर बो अंय्यां इ ताँई करयो, की मिनख बिनै टोवै अर बिनै पावै, पण बो आपणाऊँ दूर कोनी ह। 28 क्युंक क्युंक बोली ही, “बिमै ही आपणा पीराण, बिमै ई आपा चाला फिरा हा अर बिमै ई आपणो अस्तित्व ह” जय्यां की थारा कवी बोलगा की, “आपा बिका टाबर हा।” 29 अर आपा ईश्वर का टाबर हा, जणा आपा न ओ समझणो चाए की ईश्वर आपणे हाथाऊँ गढेड़ी सोना चाँदी अर भाठा की चीजा जय्यां को कय्यां हो सकै ह? 30 परमेश्वर बी टेम का मिनखा को लेखो कोनी लेबो चायो जद बे बिनै कोनी जाणा हा, पण ईब बो ओडावै ह की सगळी धरती का सगळा मिनख आपका मन न पापाऊँ बदलै। 31 क्युंक एक दिन

^f 17:19 एथेंस का ज्ञानि मिनखा की एक टोछी जखा न्याय करबाल की जय्या हा।

परमेश्वर पेल्याँ तैय करेडा मिनख क हाथऊँ धरती का सगळा मिनखा को सध्वाई क सागै न्याय करसी। इ बात को सबूत देबा ताँई परमेश्वर बीनै मरेडा मऊँ जिवायो। 32मरेडा मऊँ जीबा की बात सूणर क्युंक मिनख बीपै हँसबा लाग्गा। अर क्युंक बिऊँ बोल्या की इ बारा म म्हें ओज्यूँ कदै सूणस्यां। 33जणा पौलुस बठैऊँ चल्योगो। 34इकै पाछै कई मिनख बिश्वास कर्या अर बिकै गेल गया। आ मिनखा म अरियुपगस सभा को एक मिनख जिको नाम दियोनुसिस अर दमरिस नाम की एक लुगाइ अर ओर बी बोळा मिनख हा।

कुरन्थुस नगरी म कलीसिया को बणबो

18 जणा पाछै पौलुस एथेंस ऊँ कुरन्थुस म आयो। 2जठै बो अक्विला नाम का एक एहूदी मिनख ऊँ टकरायो। जिकी जन्मभौम पुन्तूस ही। अर बो इटली ऊँ आपकी लुगाई क सागै हाल ई आयो हो। क्युंक बठचा को महाराजो क्लौदियुस सगळा यहुदिया न रोम ऊँ निकळ जाबा की आज्ञा काडी ही। जणाई पौलुस बाऊँ मीलबा गयो। 3अर बो बाकै सागै रेह्बा अर काम करबा लाग्गयो क्युंक बाको एकसोई धंधो हो। बे तम्बू बणाबाला हा। 4पौलुस हर एहूदियां का अरामहाला दिन एहूदियां की अरदास करबाली झग्गा म एहूदी अर यूनानी मिनखा क सागै चर्चा करतो अर बनै समझातो हो।

5अर जद सीलास अर तीमुथियुस मकिदुनियाऊँ आया जणा पौलुस

आपको सगळो टेम बचन का परचार म ई बितातो हो अर एहूदी मिनखा म आ साबित करतो की ईशु ई मसी ह। 6पण जद बे मिनख पौलुस को बिरोध अर बिकी बेजति करबा लाग्गया जणा बो आपको पल्लो झाडलियो अर बोल्यो, “थारी करनी थे ई पावो! ईमै मेरी कोई जबाबदारी कोनी अर ईबऊँ म गैर एहूदी मिनखा क कन्नै जास्यूँ।” 7बठैऊँ बो तितूस यूस्तूस नाम का एक परमेश्वर का गैर एहूदी भगत क घरा आयो; अर बिको घर हो जखो एहूदिया की अरदास करबाली झग्गा क अड़कैई हो। 8जणा अराधनालय को सरदार आपका सगळा परिवार सेत्युँ प्रबु म बिश्वास कर्यो अर बाकै सागै बोळा कुरिन्थुस म रेह्बाला पौलुस की बातां सुणर बिश्वास कर्या अर बतिष्ठो लियो। 9अर एक रात प्रबु पौलुस न दर्शयाव देर कहया तू “डरै मना बोल्तोई रेह चुप मना रेह 10क्युँक म तेरै सागै है, कोई तेरो बाल ई बाको कोनी कर सकै। अर ई नगरी का बोळा मिनख मेरा बणसी।” 11अर पौलुस बठै डेढ बरस ताँई रेहर मिनखां न परमेश्वर का बचना की सीख देतो रिह्यो।

पौलुस की गल्लियो क सामै पेशी

12जद गल्लियो अखाया प्रान्त को राजपाल हो बी टेम सगळा यहुदी एको कर पौलुस न पकड़र कच्चेरी म खड्यो कर दिन्यो अर बे कहया, 13“ओ मिनख मिनखां न परमेश्वर की भगती करबा की अंयां की रीती सीखावै जखी मुसा का विधि-विधाना क खिलाफ ह। 14पौलुस बोलबालोई हो की अत्ता म ई गल्लियो

बोल्यो, “ओ एहूदी मिनखो! ज आ गलत अर अपराध की बात होती जणा म थारी बात शान्तिऊँ सूणतो। 15पण ओ झमेलो तो थारा शब्दा को, नाम अर थारा खुद का रीती रीवाजा को ह इ मामला न थ्रई जाणो म इ मामला को न्याय कोनी करूँ। 16आ खेर बो बानै कच्चेरी क बारनै निकल्वा दिन्यो। 17जिकै पाछै बे अराधनालय का सरदार सोस्थिनेसऊँ कच्चेरी क सामै मार पीटाई करी पण गल्लियो प आ बातां को कोई फरक कोनी पड़यो।

पौलुस को पाछो अन्ताकिया आबो

18पौलुस क्युँक दिन कुरिन्थुस म रेह्बा क पाछै भाया ऊँ बिदा होर प्रिसकिल्ला अर अकिवला क सागै किखिया आयो अर बठै आपको सीर मुंडायो क्यु क बो कोई मननत माँगी ही। पाछै पाणी का झाज प सवार होर सीरिया ताँई रवानगी करी। 19अर इफिसुस पूँचर प्रिसकिल्ला अर अकिवला न बठै छोड़र खुद अराधनालय जार एहूदी मिनखाऊँ चर्चा करबा लाग्यो। 20अर बे पौलुस का ओर थोड़ा दिन बठै रेह्बा ताँई नौहरा खाया पण बो कोनी मान्यो। 21-22अर बो बाऊँ बिदा होर बोल्यो ईश्वर च्यायो तो आपा ओज्युँ मीलस्यां आ खेर बो इफिसुस छोड़र पाणी का झाज ऊँ कैसरिया गयो अर बठैऊँ यरुसलेम जार बठै की मंडळी ऊँ नमस्कार कर अन्ताकिया गयो। 23क्युँक दिन बठै रेहर बो बठैऊँ बिदा होर गलातिया अर फूगिया ठिकाणा म सगळा चेला चपाटच्या न समाळतो कियो।

इफिसिया अर कुरन्थिया म अपुल्लोस नाम को एक मिनख

24अपुल्लोस नाम को एक एहूदी जिकी जन्मभौम सिकन्दरिया ही बी बोलबा म बोलो माहिर हो अर धर्मशास्त्र को आछयो ज्याता हो बो बा दिना इफिसुस आयो। 25बिनै प्रबु का गेला की सीख मीली ही अर बो आपका सगळा मनऊँ ईशु क बारा म सई-सई बातां सूणातो अर सिखातो हो, पण बो खाली यूहनना बतिष्मा देबाळा क बारा म ई जाणतो हो। 26अर बो अराधनालय म बेधड़क बोलबा लाग्यो। प्रिसकिल्ला अर अकिवला बिकी बातां सूणबा क पाछै बिनै आपकै घरा ल्याया अर बिनै और बी चोखा ढंगऊँ ईश्वर का गेला क बारा म समझाया। 27अर जद अपुल्लोस अखाया प्रदेश जाबा की मन म करी जणा बठचा का भाईड़ा बिकी मदद करी अर बिकै हाथ चेला न एक चीटी भेजी की बे बीकी आवभगत करै। अर बो बठै जार बा मिनखा की मदद करी जीखा परमेश्वर की दयाऊँ बिश्वास म आया हा। 28क्युँक बो धर्म-शास्त्रऊँ “ईशु ई मसी ह” ई बात न सावित करर सगळा मिनखा क सामै यहुदि मिनखा को मुंडो बन्द कर दिन्यो।

इफिसुस नगरी म पौलुस

19 अपुल्लोस जद कुरिन्थुस म हो जणा पौलुस एशिया का माईला प्रदेशा को दोरो कर इफिसुस पूँच्यो। जठै बीनै क्युँक चेला मील्या 2जणा बो बाऊँ बुझ्यो, “थे जद बिश्वास

करयो हो बी टेम थानै पवित्र आत्मा
मील्यो हो के”? जणा बे बोल्या औ
काँई होवै ह म्हें तो इकै बारा म पेली
कदैई कोनी सूण्या। ३बो बाऊँ बोल्यो
जणा पाछै थानै किको बतिस्मो दियो
गयो ह, बे बोल्या “यूहन्ना को”。 ४जणा
पौलुस बानै खेबा लाग्यो, “यूहन्नो
मन फिराबा ताँई बतिस्मो दिया करतो
हो। अर मिनखां ऊँ बोल्या करतो हो
की जखो मैरै पाछै आबाळो ह बीपै
बिश्वास करज्यो। बोई ईशु ह।” ५आ
सूणर बे प्रबु ईशु का नाम ऊँ बतिस्मो
लियो। ६अर जद पौलुस बापै हाथ धर्यो
जणा बे भाँत-भाँत की बोली बोलबा
लागग्या अर परमेश्वर का चोखा
समचार को हेलो पाड़बा लागग्या। ७अर
बे कुलमीलार करीब बारा जणा हा।
८पौलुस यहुदिया का अराधनालय म
तीन म्हेना ताँई बेधड़क बोलतो अर
परमेश्वर का राज क बारा म मिनखां
न समझातो रिह्यो। ९पण बामैऊँ क्युंक
ढीट हा अर बे ईपै बिश्वास कोनी कर्या
अर परमेश्वर की आ बातां क बारा
म बुरो भलो बी बोलता हा। जि बजैऊँ
पौलुस बानै बठै छोड़र बिश्वासीयां
न लेर रोजकी तूरनुस का समुदाय
भवन म धर्म की सीख देबा लागग्यो।
१०करीब दो बरस ताँई अंयांई चालतो
रिह्यो अर अंयां करता-करता एशिया
का सगळा रेहबाळा चाए बे एहूदी हो
चाएसै यूनानी ईश्वर को बचन सूण्या।

स्केवा का बेटा

११अर ईश्वर पौलुस क हाथाऊँ
मिनखां न अनोखा काम दिखातो हो।

१२अर उरै ताँई जद लोग बिका शरीरऊँ
क अड़ेङ्गा रूमाल अर गमछ्यो मरीजा
प गेरता जणा बे निरोगा हो ज्याता अर
ओपरी बलाय निकळ जाया करती ही।
१३पण क्युंक एहूदी मिनख जखा स्याणा
भोपा हा अर ओपरी बलाय निकळता
फिरता हा। बे प्रबु ईशु को नाम लेर
ओपरी बलाय काढबा की कोसीस
करता हा अर बे जखा म ओपरी बलाय
ही बाऊँ अंयां खेता हा की “ ईशु
का नामऊँ निकळज्या जिको परचार
पौलुस करै ह।” १४सऊ बडा याजक
स्केवा का सातू बेटा अंयांई करता
हा। १५जणा ओपरी बलाय बाऊँ बोली,
“ ईशु न म जाणू हू अर पौलुस क
बारा म बी जाणू हू, पण थे कूण हो?”
१६अर जि मिनख म बा ओपरी बलाय
ही बो बापै झपटचो अर बा सगळा न
पछाड़र बाकी अंयां की दुर्गति करी
के बे अदमर्या होर उघाड़ाई घराऊँ भाग
छुटच्या। १७अर आ बात सगळा इफिसुस
म फेलगी अर बठचा का सगळा एहूदी
अर यूनानीया न ई बात को बेरो पड़गो,
जिऊँ बे सगळा डरग्या अर प्रबु ईशु
का नाम न बोलो आदरमान दिन्यो।
१८जता ईशु का नाम को बिश्वास कर्या
बामैऊँ घणकरा सगळा क सामै आप-
आप का बुरा कामा न मान्या। १९जादू
मन्त्र करबाळा घणकराक आप-आप
की पौथया न भेळी कर बानै स क
साम्हें बाळ गेरी अर जद बाको मोल
जोड़यो गयो जणा बो करीब पचास
हजार चाँदी हाळा सीका क बराबर
निकळयो। २०अर इ ढाळ प्रबु को बचन
मजबुत होर फेलतो रियो।

ईफिसिया म बबाल

21 आ बातां क पाछै पौलुस मकिदुनिया अर अखायाऊँ होर यरुसलेम जाबा की सोची अर बोल्यो क बठै जाबा क पाछै मनै रोम बी जाणो ह। 22 जणा बो आपका दो साथ्या तिमुथियुस अर इरास्टूस न मकिदुनिया भेज्यो, अर आप खुद क्युंक दिन ताँई एशिया म रिह्यो। 23 बी टेम बोला मिनख प्रबु म आर्या हा जि बजैऊँ घणो जोर को बबाल माच्यो। 24 क्युंक देमेत्रियुस नाम को एक सुनार चाँदीऊँ अरतिमिस देवी हाळा मंदीर का खीलोणा बणवार कारीगरा न बोलो फायदो दिवाया करतो हो। 25 जणा बो आ कारीगरा न अर इ कामऊँ जुडया दुसरा मिनखा न भेळा कर बोल्यो, “भाइडो! थानै बताबा की जुर्त कोनी की इ कामऊँ आपा न कत्तो फायदो होवै ह। 26 अर थानै जय्यां बेरोई ह की पौलुस इफिसुस मई नई पण सगळा एशिया म मिनखा न भरमार ई बात न मनवावै ह क हाथऊँ बणाइडी मूर्ति ईश्वर कोनी। 27 जिकी बजैऊँ आपणा धंधा की बदनामी होबा कोई डर कोनी पण महान देबी अरतिमिस का मन्दर की म्हेमा बी खत्तम होबा को डर ह। अर आपणी देबी जिनै सगळो एशियो अर जगत पूजै ह बीकी म्हेमा बी खत्तम हो ज्यासी। 28 आ सुणताँई बे झाळा म लाल ताता होगा अर जोर-जोरऊँ खेबा लागण्या की “इफिसुस की देवी अरतिमिस की जय हो!” 29 अर अंय्यां पूरी नगरी म हो-हल्सो मचगो अर बे लोग मकिदुनिया का रेहबाळा गयुस अर अरिस्तर्खुस न जखा यात्रा म पौलुस क सागै हा बानै पकड़

लिन्यो अर सगळा बानै नगरी का मैदान कानी भगाताँई लेगा। 30 अर जद पौलुस बठै जार मिनखा क सामै बोलबा की मन म करी जणा बिश्वासी बीनै जाबा कोनी दिया। 31 एशिया प्रदेश का क्युंक अधिकारी पौलुस का भाईला हा बे बी पौलुस न खुवा भेज्यो की बो मैदान म न आवै। 32 बी बैठक म धांधळी मच रीही क्युंक कोई क्युं खेवै हो अर कोई क्युं, कया न तो ओई कोनी बेरो हो की बे क्यालै भेळा होया ही। 33 जणा यहुदी सिकन्दर न आगै भेज्या अर बो आपका बचाव पक्ष म मिनखा न हाथ हला-हलार बोलबा लाग्यो। 34 पण जद भीड़ न ओ बेरो पङ्ग्यो की बो एहुदी ह। जणा बे सगळा करीब दो घण्टा ताँई जोर-जोर ऊँ रोला मचाता रीह्या की “एफिसुस की अरतिमिस की जय हो अरतिमिस की जय हो।” 35 ईकै पाछै नगरी को सचिव मिनखां न चुप करार बोल्यो, “अरै इफिसुस का मिनखो, “कूण कोनी जाणै क इफिसियो की नगरी महान देबी आरतिमिस अर आसमानऊँ गीरी बीकी मूर्ति को रूखाळो ह। 36 अर जद आ बातां न कोई झुठळाई कोनी सकै जणा पाछै थानै चुप हो ज्याणो चाये अर बिना सोचै बिच्यारै क्युंई नई करणो चाये। 37 अर थे जखा आदम्यां न पकड़ उरै ल्याया हो बे न तो मन्दिर न लुट्यो अर नई आपणी देबी क बारा म बुरो भलो बोल्या। 38 अर देमेत्रियुस अर बीका साथी कारीगरा न कोइऊँ क्यूं शिकायत ह, जणा कचेरी खुली ह अर न्याय करबाळा बी बैठच्या ह अर बठैर्ई थे थारो मुक्दमो दर्ज करा सको हो। 39 अर मिनखो ज थारी

बी कोई शिकायत ह जणा बीकै बारा म कानूनी मान्यता प्राप्त नगरी की सभा म बिच्चार कर्या जा सके ह। 40 क्युंकि आज का इ बबाल को दोष कहै आपणा सीर न मंद ज्यावै अर इनै सही बोलबा ताँई आपणै कनै कोई बजै बी कोनी। 41 आ खेर बे बी सभा न बर्खास्त करदी।

पौलुस को मकिदुनिया अर अखाया जाबो

20 बबाल क थमबा क पाछै पौलुस बिश्वासीया न बुलार बानै आस बंधा'र अर बाऊँ बिदा ले'र मकिदुनिया कानी रवाना होयो। 2 अर बा प्रान्ता को दोरो कर्यो अर बठ्या का बिश्वासया न ढाह्स बंधा'र बो यूनान का अखाया प्रदेश गयो। 3 अर बढै तीन म्हेना रेहबा क पाछै बो पाणी का झाजऊँ सीरिया जाबो चायो जणा बीनै भण्क लागी की एहदी बिकी ताक म ही। जणा बो मकिदुनिया होर जाबा की मन म करी। 4 जणा बिरिया को पुर्खस को छोरो सोपत्रुस अर थिस्लुनीकियाऊँ अरिस्तर्खुस अर सिकुन्दुस, दिरबे को गयुस, एशिया को तूखिकुस अर त्रुफिमुस एशिया ताँई बिकै सागै हो लिया बाकै सागै तीमुथियुस बी हो। 5 वे म्हारै आगाऊँ जार त्रोआस म म्हानै उडिकबा लागया। 6 अर जय्यांई बिना खमिर की रोटी को त्योहार सलटचोक म्हें पाणी का झाजऊँ पाँच दिना बाद त्रोआस पूँच्या जठै म्हेसात दिन ताँई रीह्या।

त्रोआस म पौलुस क हाथा चमत्कार
7 हस्त क पेलड़ा दिन म्हें एक सागै प्रबु की याद म रोटी खाबा ताँई भेला

होया। पौलुस जखो दुसरा दिन बढैऊँ जाबाळो हो बो बाऊँ बातां करी अर आँधी रात ताँई बो बाऊँ बतवातो रिह्यो। 8 अर जि माळया म म्हें भेला होर्या हा बिमै बोलासारका दिया जळबा लागर्या हा। 9 अर यूतूखुस नाम को एक मोटचार खिडकी म बेठचो हो अर बिनै निंद का लटका आर्या हा। अर जद पौलुस देर ताँई बातां करतो रिह्यो जणा बिकी आँख लागगी अर बो तीसरा माळा ऊँ निचै गीरगो अर जद बिनै उठायाक जणा बो बानै मरेडो ल्हाध्यो। 10 जणा पौलुस तळे आ'र बिनै आपकी छातीऊँ लगा'र मिनखाऊँ बोल्यो घबरावो मना क्युं'क हाल तो ओ जिवै ह। 11 अर इकै पाछै बो उपर जार प्रबु की याद म रोटी तोडी अर रोटी खार भागपाटया ताँई बाऊँ बातां करतो रिह्यो। अर इकै पाछै बो बढैऊँ चल्योगो। 12 अर बे बी मोटचार न जीवतो घरां ल्याया अर बानै इसै बोलो चैन मिल्यो।

त्रोआसऊँ मिलेतूस की यात्रा

13 म्हें पेल्याई पाणी का झाजऊँ अस्सोस ताँई चाल पड़या। बढै म्हानै पौलुस न बी बिठाणो हो। ओ प्रबन्ध बो ई ताँई कर्यो की बो पैदल जाबाळो हो। 14 अर जद पौलुस अस्सुस म म्हानै मील्यो जणा म्हें बिनै पाणी का झाज म चढार मितूलेने लियाया। 15 बढैऊँ पाणी का झाजऊँ दुसरा दिन खियुस टापू प पूँच्या। अर आगला दिन समदर पार कर सामोस टापू अर बिकै दुसरा दिन मिलेतूस नगरी जा टिक्याँ। 16 पौलुस इफिसुस स बारै-बारै होर जाबा की मन

म कर राखी ही, क्युंकि बो एशिया म टेम काटबो कोनी चावै हो, क्युंकि बो पिन्तिकुस्त हालै दिन ताँई यरूशलेम पूँचबा की तावल्या म हो।

इफिसुस का बढ़का न पौलुस को भाषण

17पौलुस मिलेतूसऊँ इफिसुस म खुवा भेज्यो अर कलिसिया का बढ़का न आपकै कनै बुलावो भेज्यो। 18अर जद बे बीकै कनै पैच्या जणा बो बानै बोल्यो, “थे तो जाणोई हो की जद म एशिया म पेली बार आयो हो। बी दिनऊँ लेर हाल ताँई मेरो चालचलन किसोक रिह्यो ह। 19अर थानै आ बताबा की जरुत तो आथ कोनी क एहूदी मिनख जद एको कर मेरै खिलाप होग्या हा। जिऊँ मेर प कत्ती तूमत आई ही पण आकै बावजुद बी म दिन रात नरमाई अर आँसूआ क सागै कंय्या प्रबु की सेवा करतो रिह्यो। 20अर जखी बात थार ताँई चोखी ही बानै बताबा ताँई म कदई मन म दबार कोनी राखी पण बा बार्ता की सीख सगळा क सामै अर घरा-घरा जार देतो रिह्यो। 21अर म एहूदी अर यूनानी मिनखां न पापऊँ मन किरार ईश्वर कानी मुड़बा अर प्रबु ईशु प बिश्वास करबा ताँई खेतो रिह्यो। 22अर इब म पबितर आत्मा क कहया गेल यरूशलेम जार्यो हूँ अर मनै कोनी बेरो क बठै मेरै म काँई-काँई बितसी। 23पण म खाली ओई जाणू हूँ क सगळी नगर्या म पबितर आत्मा मनै होश्यार कर दिन्यो ह, क तूमत अर कैद मेरी बाट म त्यार की बेठी ह। 24पण मनै मेरी ज्यान की परवा कोनी म तो

बस मेरी भाग दोड़नै पुरी करबो चाँऊँ हूँ। अर परमेश्वर की दया का चोखा समचार न सुणाबा को काम जखो प्रबु मनै सोप्यो ह बिनै पुरो करबो चाँऊँ ह। 25अर ईब म थानै बताबो चाँऊँ हूँ की थे सगळा जणा जाकै माईनै म परमेश्वर का राज क बारा म सूणायो हूँ मेरो मुण्डो ओज्युँ कोनी देखस्यो। 26ई ताँई म आज थानै गुवाई देर बोलू हूँ क ज थरै मालो कोई बी नाश होसी बिकी मेरी जबाबदारी कोनी। 27क्युंकि म परमेश्वर की सगळी ईच्छा थानै बता दिन्यो ह। 28जणा ईब थे बिश्वास्यां की मण्डळी की साळ-समाळ करो जिनै समाळबा की जिम्मेदारी थानै पबितर आत्मा सोपी ह। बा लल्ड्या का रेवड़ा का गुवाल्ड्या बणो, जिनै बो आपका बेटा का लोयऊँ मोल लियो ह। 29अर म आ बी जाणू हूँ की मेरै जाबा क पाछै थरै मऊँ अंय्यां का खुंखार ल्याली आज्यासी जखा कोई बी लल्डी न कोनी छोड़सी। 30अर थारै मऊँ बी अंय्यां का मिनख खड़ा होसी जखा टेड़ी मेढ़ी बातां बोलर बिश्वासिया न आपकै गेल कर लेसी। 31जणा ईब थे चेता म रह्यो अर आ कदई मना भूलज्यो की तीन बरसा ताँई दिन रात आँसुआ क सागै थानै एक-एक न चिताबो कोनी भूल्यो। 32अर इब म थानै परमेश्वर की साळ समाळ अर बिकी दया का बचना म सोपूँ हूँ जखो थानै तगड़ो करसी अर जखी बापोत परमेश्वर का सगळा मिनखा ताँई ह बा थानै बी देसी। 33म कोई का चाँदी सोना या कपड़ा को लालच कोनी कर्यो। 34अर थानै आ बताबा की बी जूर्त कोनी की म मेरा

आ हाथा ऊँ ई मेरी अर मेरा साथ्या की जुर्त पूरी करी। 35म प्रबु ईशु का बे बचन याद राख'र की “लेबाऊँ देबो चोखो ह।” मेरा हाथाऊँ म्हेनत कर'र माड़ा न समाळ'र थानै दिखायो हूँ। 36आ खेर बो आपका गोडा क पाण बेठगो अर सगळा क सागै अरदास करबा लागयो। 37जिकै पाछै बे सगळा जणा बोळा रोया अर पौलुस क बांध घाल'र बिकै प्यारऊँ गळै मीलबा लागया। 38अर बे ज्यादा दुखी तो ई बात प हा की बो बाऊँ बाल्यो हो की मेरो मुण्डो थे ओज्युँ कोनी देखस्यो। जणा पाछै बे बिनै पाणी का झाज प बिठाबा आया।

पौलुस को यरुसलेम जाबो

21 बठैऊँ बिदा हो'र म्हें पाणी के गेला कोस अर रुदुस टापू होता होया दो दिन पाछै पतरा नगरी म पूँच्या। 2जठै म्हानै फिनीके जांवतो एक झाज हाथ आगो जिपै म्हें सवार हो'र चाल पड़या। 3म्हानै साइप्रस टापू दिखयो जणा म्हें बिकै दिखणाद दिसा म जार सीरिया जाबाळो गेलो पकड़ लियो अर सूर नगरी म रुक्या क्युंक बठै झाजऊँ माळ उतारणो हो। 4अर बठै क्युंक बिश्वासीयां न देख'र म्हें बाकै सागै सात दिना ताँई रीया अर आत्मा क बताया गेल बे पौलुस ऊँ बोलता हा की यरुसलेम म जाबा को बिच्यार छोड़ दे। 5आठवा दिन म्हें बठैऊँ रवानगी करी अर बे आपका टाबर टिकरा समेत म्हानै नगरी क बारनै छोड़'र गया अर समदर क कीनरा प पूँचर म्हें गोडा टेक'र अरदास करी, 6जणा बाऊँ बिदा

होर म्हें तो पाणी का झाज प चढ़गा अर बे आप-आप क घरा चलेगा।

7जणा म्हें पाणी क गेला पतूलिमयिस आया अर बिश्वासीया न नमस्कार कर बाकै सागै एक दिन रीद्या। 8अर दुसरा दिन बठैऊँ चाल'र म्हें कैसरिया पूँच्या अर फिलिप्पुस जखो चोखा समचार को परचार कर्या करतो हो बिकै घरा रुक्या जखो यरुसलेम म टाळेड़ा बा सात जणा मऊँ एक हो। 9बिकै च्यार कुँवारी छोरया ही जखी परमेश्वर की खेबाळी ही। 10अर जद म्हानै बठै रेहता बोळा दिन होगा जणा अगबुस नाम को एक परमेश्वर कि खेबाळो एहूदियाऊँ आयो। 11बो म्हारै कनै आर पौलुस को कमर बाँधबा को पट्टो ले'र बिऊँ आपका हाथ पगा न बाँध लियो अर खेबा लागयो, “जिको ओ कमर-पट्टो ह बिनै यरुसलेम म एहूदी मिनख अंय्यांई बाँधसी अर बिनै गैर एहूदी मिनखा क हाथा म सोपसी आ बात मनै पबितर आत्मा बतावै ह। 12अर आ बात सूण'र म्हें अर बठै का मिनख पौलुसऊँ अरदास करबा लागया की यरुसलेम ना जावै। 13पण पौलुस बाऊँ बोल्यो, “थे ओ काँई करो हो? अण ढंगा रो-रो'र थे मेरो मन काढ़ो करो हो, म तो प्रबु ईशु का नामऊँ यरुसलेम म खाली बन्दी बणबाई नई पण मरबा ताँई बी त्यार हूँ। 14अर जद बो कोनी मान्यो जणा म्हें अंय्यां खे'र की “प्रबु की इच्छा पूरी होवै” चुप होग्या।

15आ दिना क पाछै म्हें त्यार हो'र यरुसलेम ताँई रवानगी करी। 16कैसरीयाऊँ बी क्युंक बिश्वासी म्हारै सागै होग्या अर म्हानै साइप्रस का

मनासोन नाम का एक मिनख क घरं
ल्याया जखो शरूपोत का बिश्वासीयां मऊं
एक हो अर म्हें बठैई डटच्या।

पौलुस को याकुबऊँ मीलबो

17म्हारै यरुसलेम पूँचबा क पाछै
बिश्वासी भाईडा राजी हो'र म्हाऱूँ मिल्या।
18अर दुसरा दिन पौलुस अर म्हें याकुब
क कनै गया जठै सगळा बडका बी
हा। 19जणा बो बानै नमस्कार कर'र
सगळा कामा क बारा म बतायो जखा
काम परमेश्वर बिकी सेवा क जरिये गैर
एहूदियां क माईनै कर्यो। 20आ सूण'र बे
परमेश्वर की बढाई करबा लागण्या अर
इकै पाछै बोल्या, “ भाई तू देखै ह की
एहूदियाऊँ मिनख हजारा की तदाद म
बिश्वास कर्या ही अर मूसा का बिधी-
विधाना प चालबा ताई पक्का ही। 21अर
बानै तेरा बारा म आ पट्टी पढाई गई ह
की तू गैर एहूदियां म रेहबाळा एहूदिया
न आ सीखावै ह की थानै न तो मूसा
का बिधी-विधाना न मानबा की जुर्त ह
अर न थानै थारा टाँबरा की सून्नत करबा
की अर नई पेलडा रीती रीवाजा की
लिकटी पीटबा की जुर्त ह। 22ईब काऊँ
कर्यो जाय? क्युँक मिनखां न तो बेरो
पड़सी की तू आयडो ह। 23जणा ईब तू
म्हारो खेणो मान, अठै च्यार मिनख ही
जखा मननत माँगी ही। 24ईब तू अंय्यां
कर बाकै सागै शुद्ध हो अर बानै सीर
मुंडाबा को खर्चो दे। अर जद तू अंय्यां
करसी जणा किन्है बी सफाई देबा की
जुर्तई कोनी क्युँक बे तनै अंय्यां करता
देखसी जणा सगळा आपैई ज्याण ज्यासी
की जखी बातां बे तेरा बारा म सुणी ही

टाळेडा खास चेला का काम 21:16-31

बे सगळी झूठी ह अर थे खुदई बिधी-
विधान न मानबाळो ह। 25अर जठै ताई
गैर एहूदीयां का बिश्वासीयां को सवाल ह
बा ताई म्हें चीट्टी मांड'र देदी ही की बे
मूर्ति क आगै चढायडो मांस, खुन अर
गळो घोटेडो ज्यानबर को मांस खाबाऊँ
अर पराई लुगाया क सागै गळत कामाऊँ
पैर रेहै। 26जणा पौलुस दुसरा दिन बा
मिनखा क सागै शुद्ध हो'र मंदर म गयो
अर आ बतायो की कुणसा दिन शुद्ध
होबा का दिन पूरा होसी अर बा सगळा
ताई चढावो चढायो जासी।

पौलुस को पकड़यो जाबो

27अर जद बे सात दिन पूरा होबाळा
हा जणा एशिया का एहूदि मिनख मंदर म
पौलुस न देख'र भीड़ का सगळा मिनखा
का कान भर दिन्या अर अंय्यां चिलार
बिनै पकड़ लिया। 28“ओ इजरायल
का रेहबाळा म्हारी मदद करो ओ बोई
मिनख ह जखो हर कठैई मूसा का बिधी-
विधान, आपणै अर इ मंदर क स्वीलाफ
सीख देतो फिरै ह। अर ओ युनानिया न
मंदर म ल्यार इ पबितर झांधां न सुगलो
कर्यो ह।” 29क्युँक ईऊँ पेली बे बिनै
इफिसुस को रेहबाळा त्रिफिसुस क सागै
देख्या हा अर आ समझ्याहा की बो
बिनै मंदर म लेर आयो हो। 30ईकै पाछै
पूरी नगरी म बबाळ माचगो अर लोग
भाग-भाग'र भेळा होग्या अर पौलुस
न पकड़'र मंदर मऊँ बारनै घसिटोई
ल्याया अर हाथ्यु हाथ मंदर का कीवाड़
बन्द कर दिन्या। 31अर जद बे बिनै
मारबाळा ई हाक जणा रोमी पळटण
का सरदार न खबर लागी की सगळी

यरूशलेम नगरी म बबाल माचर्यों ह। 32जणा बो सैनिक अर सुबेदार न लेर बेगोसो मोका प पूच्यो जणा भिड़ सैनिका अर सरदार न देखर पौलुस न पीटबो बन्द कर दिन्यो। 33जणा पळटन को सरदार बिकै कनै आर बिनै साकळऊँ बाँधबा ताँई ओडार बुज्यो, “ओ कूण ह अर ओ काँई अपराध कर्यो ह?” 34पण भीड़ मऊँ कोई क्युं बकबा लागर्यो अर कोई क्युं अर ई रोळा-बेदा क चलते पळटन का सरदार न कोनी बेरो पाटचो क आखीर होयो के ह, जणा बो बिनै सेना हाळा गढ म लेज्याबा ताँई ओडायो। 35अर जद बे सीढीया प पूँच्या जणा झाळा भरेड़ी भीड़ की बजैऊँ सैनिका न पौलुस न अधर उठार लेज्याणो पड़यो। 36क्युंक बे अंय्या चिलाता बिकै गेल होर्या हा की इनै मार गेरो।

पोलुस क मुंडा खुद को बचाव

37अर जद बे बिनै सेना-हाळा गढ म लेज्याबाळा हा, जणा पळटन का सरदार न पौलुस बोल्यो, “थे ओडावो तो म थार ऊँ क्युं बोलबो चांऊँ हूँ, जणा बो बोल्यो तनै यूनानी बोलबो आवै ह के? 38जणा तो तू बो मिसी कोनी के? जखो क्युँक दिना पेली बगावत करर च्यार हजार बगावत्या न बिड़ म लेगो हो। 39जणा पौलुस बोल्यो, “अ जी म बो कोनी। म तो कलिकिया की मानेडी नगरी तरसुस को रेहबाळो हूँ। म थारूँ हाथ जोड़र खेवूँ हूँ की थे मनै मिनखांऊँ बात करबा को मौको दयो।” 40अर जद बो बिनै बोलबा ताँई ओडायो जणा बो पेड़ी प खड़यो होर आपका हाथ ऊँ इशारो

कर्यो। अर जद लोग चुप होगा जणा बो इब्रानी भाषा म बोलबा लागम्यो।

22 “भाईड़ो अर बढको मेरो पक्ष बो म्हारूँ इब्रानी भाषा म बोलै ह जणा भीड़ एक-दम चुप-चाप होगी। जणा बो बोल्यो 3“म एक कलिकिया का तरसुस म जलमेड़ो एक एहूदी मिनख हूँ। अर मेरी लिखाई पढाई अठैई ई यरुसलेम नगरी म गमलीएल धर्म-गुरु जी क कनै ई होई ह। अर आपणा बाप-दादा का बिधि-विधान मनै सही ढंग स सिखाया गया ही। अर जय्यां थे परमेश्वर न जी-ज्यान ऊँ मानबाळा हो बंयांई म बी मानबाळो हूँ। 4इ ईशु का गेला प चालबाळा मिनखा न म मारगेर्यो अर बानै दिनघाल्यो हूँ अर इ गेला प चालबाळा मोटचार अर लुगाया न बाँध-बाँधर जेल म गेर दिया। 5अर मेरी इ बात का गुवाह महायाजक अर महा-सभा का सगळा बढका ह। म बाऊँ चिट्ठी मंडवार इ गेला प चालबाळा मिनखा न पकड़र यरुसलेम ल्यार बन्द करबानै दमिश्क जार्यो हो।

बिको मन बदक्बा क बारा म पोलुस कह्यो

6अर “जद चालतो-चालतो म दमिश्क क साकडै लागयो जणा दोपारी क टेम आसमान ऊँ मेरै चयारूँमेर एक जोर की बिजळी सी चमकी। 7अर जिकी बजैऊँ म धरती प पड़गो अर मेरै काना म अ शब्द पड़या, ‘ओ शाऊल, ओ शाऊल तू मनै क्यालै दिन घालै ह? 8जणा म

बोल्यो, ‘महाराज थे कूण हो?’ अर बे कहया, ‘म ईशु नासरी हूँ, जिनै तूँ दिन घालै ह।’ 9मेरै सागै हाला बिजली को बो च्यानणो सो देखया पण जखो मेरै सागै बात करै हो बिकी उवाज कोनी सुण्या। 10जणा म बोल्यो, ‘तो प्रबु म काँई करु?’ प्रबु मेरै ऊँ कहया, ‘खड़यो होर दमिशक म जा, अर जो क्युँ तनै करणो ह बो तनै बठैई बतायो ज्यासी। 11अर बी च्यानणा की बजैऊँ मनै सुझबो बन्द होयो, अर मनै मेरै सागै हाला हाथ पकड़र दमिशक लाया।

12“बि नगरी म हनन्याह नाम को एक मिनख हो जखो मूसा का बिधि-विधाना प चालबाळो अर बठै का एहूदी मिनखा म मान्यो-थान्यो हो। 13प्रबु की ईच्छा गेल बो मेरै कनै आर खड़यो होर मेर ऊँ बोल्यो भाई शाऊल, ओज्युँ देखबा लाग। अर बी घड़ीई मेरी आँख्या का पाट खुलगा अर म बिनै देखयो। 14जणा बो मेर ऊँ बोल्यो, “आपणा बाप दादा को परमेश्वर तनै इ ताँई टाव्यो ह क तू बिकी इच्छा जाणै। अर बी धर्मी न देखै अर बिका मुंडा ऊँ बातां सुणै। 15क्युँक त मिनखां क आगै बा बातां की गुवाई दैसी जानै तू सूणी अर देखी। 16ईब देर क्या की? खड़यो हो बतिस्मो ले अर बिका नामऊँ अरदास करर जिऊँ परमेश्वर तेरा पाप धो गेर।

17“यरुसलेम आबा क पाछै म जद एक दिन मंदर म अरदास कर्यो हो, जणा मनै चाणचुको एक दर्शाव होयो। 18अर मनै प्रबु जी दर्शाव देर कहया, ‘तावळ करर यरुसलेमऊँ चल्यो जा क्युँक अठै का मिनख मेरा बारा म

तेरी गुवाई न कोनी मानी। 19जणा म बोल्यो, “प्रबु जी थे तो जाणोई हो की म एहूदि मिनखा क अरदास करबाळी झाघ म जार थार प बिश्वास करबाळा क तड़ा मरवाया करतो हो अर जेळ म गेर दिया करतो हो। 20अर जद थारा गुवा सतफनुस न मार्यो जार्यो हो जणा बि टेम म बठैई खड़यो हो, अर बिकी मोत न सही बताँई अर बिनै मारबाळा का गाबा कि रुखाळी करी। 21जणा बो मेरऊँ बोल्यो, ‘जणा जा म तनै दूर-दूर ताँई गैर एहूदि मिनखा क कन्नै भेजस्युँ।’ 22आ बातां ताँई तो लोग बिकी सूणबो कर्या, अर इकै पाछै बे जोर-जोरूँ रोला घालबा लागया, “अंयां को मिनख जीबा जोगो कोनी इनै मार गेरो।” 23अर जद बे रोला घालता अर गाबा फिंकता अर आसमान म धुळीया उड़ाता रीह्या। 24जणा पळटन को सरदार, “बिनै सेना-हाला गढ़ म लेज्यार बिकै तड़ा मारबा अर जाँच करबा ताँई ओडायो क लोग इकै खीलापत म अंयां क्युँ रोला घाली ही।” 25पण जद बे बिनै तड़ा मारबा ताँई बाँधर्या हा जणा बो सुबेदार ऊँ बोल्यो, “कानून गेल थे एक रोमी मिनख क बिना अपराध सवित होया तड़ा लगवा सको हो के? 26आ सूणर सुबेदार पळटन का सरदार क कनै गयो। अर बिनै जार बोल्यो, “तू ओ काँई करै ह? ओ तो रोमी मिनख ह। 27जणा पळटन को सरदार बिकै कनै आर बिऊँ बोल्यो, “मनै बता, के तू रोमी ह?” जणा बो बोल्यो हाँ। 28आ सूणर पळटन को सरदार बोल्यो, “म रोमी नागरीकता मोटी रकम देर लियो

हूँ।” पौलुस बोल्यो, “म तो जन्म-जातई रोमी हूँ।” 29जणा बे सगळा मिनख जखा बिनै जाँचर्या हा बे सगळा नाकै होगा। अर पळटण को सरदार बी आ जाणर डरगो की म इनै बाँधयो हूँ।

एहूदि महापंचायत म पौलुस की पेशी

30सऊँ पेली पळटण को सरदार आ जाणबो चायो क यहुदी पौलुस क खीलापत म काँई दोष लगार्या ही। ई ताँई बो दुजै दिन बिका हाथ पग खुलया अर प्रधान याजक अर सगळी महासभा न भेळा होबा ताँई ओडायो। जणा पौलुस न ल्यार बाकै साम्हें खड़यो कर दिन्यो।

23 पौलुस महापंचायत क कानी एक टक देखर बोल्यो, “इजराएल का भाईड़ो, म हाल ताँई परमेश्वर क सामै ईमानदारी क सागै साफ मन ऊँ जियो हूँ।” 2पण प्रधान याजक हनन्याह पौलुस क सारै खड़या मिखन न बोल्यो “इकै होठा प मार।” 3आ बात सूणर पौलुस बिनै बोल्यो, “ओ कपटी तू तो चुनाऊँ लिपेड़ी भीत ह, परमेश्वर तनै मारसी। तू मूसा का विधी-बिधान गेल मेरो न्याय करबा अठै बेठयो ह, पण तू ई ईकै खिलाफ मनै मारबा ताँई ओडावे ह।” 4जणा कनै खड़या मिनख पौलुस ऊँ बोल्या, “तेरी अति हिम्मत की तू परमेश्वर का महायाजक न बुरो-भलो खैवै।” 5जणा पौलुस बोल्यो, “भाईड़ो मनै कोनी बेरो हो की ओ महायाजक ह; क्युँक शास्त्र म मंडेडो ह की तू मिनखां का प्रधान न बुरो मना खेजै।” 6जणा पौलुस आ जाणर की अठै एक दल

सदूकीया को अर दूसरो फरीसिया को ह जणा बो पंचायत म जोर ऊँ बोल्यो, “ओ भाईड़ो, म फरीसी हूँ अर फरीसया की ओलाद हूँ, अर मरबा क पाछै ओज्युँ जी उठबा की मेरी आस की बात न लेर मेर प मुकद्दमो चालर्यो ह।” 7पौलुस क अ बातां खेताँई फरीसी अर सदूक्या म खिचा-ताणी होबा लागणी अर पंचायत म फूट पड़गी। 8क्युँक सदूकी मानी ही की न तो मरबा क पाछै कोई जी उठै, न कोई स्वर्गदूत ह, अर नई आत्मा ह; पण फरीसी आ बाता म बिश्वास करीं ही। 9अंयां आच्छी ताणा-तणी होगी। अर फरीसिया का दल मऊँ क्युँक शास्त्रि खड़या होर जोर जोरूँ खेबा लाग्या की, “म्हें ई मिनख म सजा देबा लायक कोई दोष कोनी देखां, हो सकै क बिऊँ कोई आत्मा नहिस कोई स्वर्गदूत बोल्यो होसी, जणा ईमै काँई बात होगी।” 10अर जद बाकी लडाई घणी बढगी जणा इ डर ऊँ की बे कणा पौलुस का टुकड़ा-टुकड़ा न करदी, पळटण को सरदार आपकी पळटण का क्युँक सीपाईड़ा न ओडायो की जाओ अर जबरदस्ती बिनै बामैऊँ काढ ल्याओ अर सेना-हाला गढ़ म लेज्याओ।

11बि रात प्रबु बिनै दर्शाव देर बोल्यो, “ढाढस बाँध अर जंयां तू मेरै बारा म अठै गुवाई दी ह, ठिक बंयाँई तनै रोम म बी देणी पड़सी।

पौलुस न मारबा की जाळसाजी

12सुवारे क्युँक एहूदी पौलुस न मारबा को जाळ बिछायो अर सोगन खाई क बिनै मार्या पेली म्हें क्युँई कोनी खावां

पीवां 13 अर जखा ओ जाळ बिछायो हो
बे चालिसऊँ बी बेसी हा। 14 बे, बा मुख्य
याजका अर बढका क कनै जार बोल्या,
“म्हें सौगन खाई ह क पौलुस न मार्या
पेली जीभ प क्युंई कोनी धरा।” 15 जणा
इब थे अर महापचायत का सगळा जणा
पळटन का सरदार क कनै जार ओ भानो
लेल्यो की थे बिका बारा म ठिक-ठिक
जाँच करबो चाओ हो, बिनै थार कनै
ल्याबा की बोलो, अर म्हें बिको थार कनै
पूँचबा ऊँ पेलीई काम तमाम कर देस्याँ।

16 आ बात पौलुस को भाण्जो सूणली
की बे बिनै मारबा क चकरा म ह, जणा
बो गढ़ म जार आ बात पौलुस न बता
दी। 17 जणा पौलुस एक सुबेदार न बुलार
बिऊँ बोल्यो, “इ मोटचार न पळटन का
सरदार क कनै लेज्याबो, ओ बिऊँ क्युं
बोलबो चावै।” 18 जणा बो बिनै पळटन
का सरदार क कनै लेज्यार बोल्यो,
“कैदी पौलुस मनै बुलार मेर ऊँ अंयां
बोल्यो ह की ओ मोटचार पळटन का
सरदार ऊँ क्युं बोलबो चावै ह, तू इनै
बिकै कनै लेज्या।”

19 जणा पळटन को सरदार बिको हाथ
पकड़र बिनै कृणा म लेज्यार बिऊँ बुज्यो,
“तू मेरऊँ कॉई खेबो चावै ह?” 20 बो
बिऊँ बोल्यो, “एहूदी आ साजिस रची
ह, क थे पौलुस न ई भानै पंचायत म
लेर आवो अर अंयां मानो जंयां की
बे बिकी ओर चोखी तरया जाँच करबो
चावी ही। 21 पण थे बाकी मना मानज्यो,
क्युंक बामै ऊँ चालिस ऊँ बेसी मिनख
बिकी घात म बेठच्या हीं, जखा आ ध्यार
राखी ह की जद ताँई बे पौलुस न कोनी
मार गेरीं जणा ताँई क्युंई कोनी खावीं

बीवीं। अर बे इब त्यार ही अर तेरी
हाँ न उडिकी ही।” 22 जणा पळटन को
सरदार आ खेर मोटचार न बिदा कर्यो,
“आ किनैई मना खिजै की तू मनै अ
बातां बताँई ह।”

फेलिक्स क सामै पौलुस की पेशी

23 जणा पळटन को सरदार दो सुबेदार
न बुलार बोल्यो, “रात क पेला पहर
कैसरिया जाबा ताँई दो सौ सैनिक, सत्तर
घुड़सवार अर दो सौ भाला फिंकबाला न
त्यार राखो। 24 अर पौलुस ताँई बी घोड़ा
त्यार राखो, जिऊँ बिनै राजपाल फेलिक्स
क कनै राजी खुशी-पूँचा सको।” 25 बो
बाकै हाथ चिट्ठी भेजी जीमै अंयां मंडर्यो
हो की,

26 “महाराज राजपाल फेलिक्स न
क्लौदियुस लूसियास को नमस्कार। 27 इ
मिनख न एहूदी पकड़र मारबो चावै
हा, पण जद मनै इको बेरो पड़यो की
ओ रोमी ह। जणा सिपाईड़ा लेर इनै
छुड़ाल्यायो। 28 म आ जाणबो चाओ
की बे इपै काँई दोष लगावै ही, जि
बजैऊँ म इनै एहूदि महापंचायत लेगो।
29 जणा म समझगौ की बे आपका धर्म
का बिधी-विधाना क बारा म इपै दोष
लगार्या ही, पण इमै मार देबा या इनै
कैद करबा जोगो इमै कोई दोष कोनी ह।
30 अर जद मनै ओ बेरो पड़यो की बे इ
मिनख न मारबा क चकरा म ही, जणा म
तावळोसो इनै तेरै कनै भेज दिन्यो। अर
इपै मुकदमो चलाबाला न बी खे दिन्यो
की तेरै सामै जार इपै मुकदमो बाजी कैर।

31 जणा पाछै सीपाईड़ा ओडाया गेल
बिनै रात्युं-रात अन्तिपत्रिस कसबा

म ल्याया। 32 अर दुसरा दिन पैदल चालबाला सीपाईड़ा पौलुस न घुड़सवारा क सागै छोड़र पांछा सेना-हाला गढ़ म आया। 33 अर जद बे कैसरिया पूँच्याक जणा बे पौलुस न तो बी राजपाल क सामै खड़यो कर्यो अर पळटण क सरदार क हाथऊँ मंडेड़ी चिट्ठी बिनै दी। 34 बा चिट्ठी बाँचर बो पौलुस न बुज्यो, “तू कूणसा इलाका को ह?” अर जद बिनै ओ बेरो पड़गो की कलिकियां को ह 35 जणा बो बिऊँ बोल्यो, “जद तेर प मुकदमा बाजी करबाला आसी जणा तेरा मुकदमा की सूणवाई होसी।” अर बे बिनै हेरेदेस का गढ़ म निगरानी म राखबा ताँई ओडायो।

राजपाल फिलिक्स क सामै पौलुस को मुकदमो

24 पाँच दिन क पाछै महायाजक हनन्याह कर्ड बढका अर तिरतूलस नाम का एक बकिल न लेर आयो। अर फेलिक्स क सामै पौलुस प मुकदमा बाजी करबा ताँई बिपै दावो पेश कर्यो। 2 अर जद पौलुस न बठे बुलायो गयो जणा तिरतूलस बीपै दोष मंढर खेबा लाग्यो “महाराज! थारा राजपाट म म्हें बोला राजी खुशीऊँ रेहा हा अर म्हारा देश की भलाई ताँई थे बोला सुधार कर्या हो। 3 अर आ बातां न म्हें सगळी झांघां अर सगळी टेम राजी हिया ऊँ माना हा। 4 अर म थानै ओर तंग करबो कोनी चाऊँ पण दया करर थे दोच्यार बात और सुणो। 5 ओ मिनख उपरादी ह

अर म्हें इनै जगत का सगळा एहूदीया म बबाळ मचाता देख्या हा, अर ओ नासरी पंथ को खास नेता ह। 6 अर ओ मंदर न सुगलो करबा की कोसीस करै हो पण म्हें इनै पकड़ लिन्या। [म्हें इनै म्हारी परम्परा गेल सजा देबो चावै हा 7 पण पळटण को सरदार लूसियास इनै जोरामर्दी म्हारा हाथा ऊँ खाश लिन्यो, 8 अर तेरै सामै मुकदमा बाजी करबा को हुकम दिन्यो।] 8 अर आ सगळी बातां को जाको म्हें इपै दोष लगावा हा, बानै थे खुदई जाँचर जाण सको हो। 9 अर एहूदी बी बिकी हा म हा मीलार बोल्या, हाँ अ बातां अंच्याई ही।

पौलुस को जबाब

10 अर जद अधिकारी पौलुस न बोलबा ताँई ईशारो कर्यो, जणा बो बोल्यो: “म आ जाणर की थे बोला बरसा ऊँ इ देश को न्याय कर्या हो, जणा म राजी होर तेरै सामै मेरो पक्ष धरूँ हूँ। 11 आ बातां न जाणबो थार ताँई कोई मुश्किल की बात कोनी, आराधना करबा ताँई मनै यरुसलेम म आया हाँल बारा दिनाऊँ बेसी कोनी होया। 12 अर बे मनै ना तो मंदर म कोईऊँ जिरै करता देख्यो अर ना ई आराधनालय म अर न नगरी म भीड़ न उकसाता देख्या। 13 अर बे बा बातां न जर्खी बे मेरै माथा मंढी ह, बानै तेरै सामै सच साबित कोनी कर सकै ह। 14 पण म अ बात कोनी झुठलाऊँ की जिनै बे कुपंथ बोली ही म बी गेला ई मेरा बाप दादा का परमेश्वर की सेवा करूँ हूँ।

8 24:7 क्युंक मानी-थानी पुराणी पौथीयां म 34 की बाता कोनी मंडी।

अर म बा सगळी बातां प बिश्वास करूँ हूँ, जखी बातां मूसा का बिधि-विधान। अर परमेश्वर की खेबाळा की पोथ्या म मंडरी ह। 15 अर जंय्यां अ परमेश्वर म आस राखै ह बंयाई म बी राखूँ हूँ की सगळा धर्मी अर अधर्मी दोन्या को जी उठबो होसी। 16 जणाई तो म बी आई कोसीस करूँ हूँ की परमेश्वर अर मिनखा क सामै मेरी अन्तर-आत्मा साफ रेहै। 17 कई बरसा ताँई दिसावर म रेहबा क पाछे म मेरा मिनखा न दान का रूपिया देबा अर चढ़ावो चढ़ाबा आयो हो। 18 अर जद म अ सगळी बातां करै हो जणा ये मनै मंदर म देख्या, बी टेम म सगळा बिधि-विधान न पुरो कर'र शुद्ध होगो हो। अर न तो बठै कोई भीड़ ही अर न कोई रोलो-बेदो। 19 पण एशियाऊँ आयडा कई एहूदि बठै हा अर ज बाकनै मैरै खिलापत म क्युँ ह जणा बेर्ड आर तैरै सामै मेर प दोष लगावै। 20 अर नहिस अठै भेला आ मिनखाऊँ बुझो की जद म एहृदी धर्म-पंचायत म खड़यो हो, जनाडै बे मेर म कोई दोष देरव्यो हो के? 21 इनै छोड़र की म उझी उवाज म खीयो हो की, “म मरबा क पाछे ओज्युँ जि उठबा की बात प बिश्वास करूँ हूँ ई बजैऊँ आज थे मेरो न्याय करर्या हो।”

22 जणा फेलिक्स जखो प्रबु का गेला क बारा म चोखी ढाळ जाणतो हो, बो बानै आ खेर टाळ दिन्यो, की “जद पळटण को सरदार लुसिआस आसी जणाई म इ बात को फेसलो करस्युँ” 23 अर फिलिक्स सूबेदार न ओडायो की पौलुस न तेरी नीगराणी म राख अर बीकाळा भाईला न बिकी सेवा पाणी करबा दे।

पौलुस फेलिक्स अर बिकाळी घरहाळीऊँ बतळायो

24 क्युँक दिन बीतबा क पाछै फेलिक्स आपकी घरहाळी दुसिल्ला न लेर आयो। अर बिकाळी घरहाळी एहूदी ही। जणा बो पौलुस न बुलार बिकै कनै मसी ईशु प बिश्वास करबा क बारा म बिऊँ सुण्यो। 25 पण जद पौलुस धार्मिकता, खुद प काबु पाणो अर परमेश्वर को मिनखा प आबाळा न्याय का दिन क बारा म बोलबा लाग्यो जणा फेलिक्स डरपगो अर बोल्यो, “इब तो तू जा कदे ओज्युँ मोको पड़सीक जणा तनै बुलास्युँ।” 26 बिनै पौलुस ऊँ क्युँ पुण-पावलो मिलबा की आस ही, जि बजैऊँ बो बिनै बुला-बुलार बतळाया करतो हो। 27 अर जद दो बरस बितगा जणा पुरकियुस फेस्तूस फेलिक्स की झिघा आयो। अर फेलिक्स एहूदिया न राजी करबा क चकरा म बिनै कैद मई छोड़गो।

फैतूस क सामै पौलुस की दरखास्त

25 बी प्रान्त म पूँचबा क तीन दिना पाछै, फैतूस कैसरिया ऊँ यरुसलेम गयो। 2 जणा बठै प्रमुख याजका अर एहूदिया का नेता बिकै सामै पौलुस क खिलाफ बिका कान भरबा आया। 3 अर बे बिऊँ दरखास्त करी की बो पौलुस न कैसरिया ऊँ यरुलेम भेजै, क्युँक बे बिनै गेला मई मारबा की साजिस रच राखी ही। 4 जणा फेतूस बाऊँ बोल्यो, पौलुस कडा पेरा क माईनै कैसरिया म बन्द ह। अर म बी तावळो बठैई जार्यो हूँ। 5 अर थारा क्युँक नेता मेरै

सागै चाली अर ज बो क्युं गळत कर्यो ह। जणा बीपै इलजाम लगावै।

६फैत्स आठ दस दिन और बाकै सागै रिह्यो, जणा पाछे बो कैसरिया आयो। अर आगला दिन न्याय कचेरी म बैठ'र पौलुस न बुलवा भेज्यो। ७अर जद पौलुस बढै आयो जणा यरुसलेम ऊँ आयड़ा यहुदि बिकै च्यारूमेर फिरगा अर सागैड़ा-सागैड़ा इलजाम बिकै सीर मंडबो चालु कर्यो, पण बे बानै साबित कोनी कर सक्या। ८पण पौलुस आपका बचाव म बोल्यो, “म एहुदिया का कानून, मंदर अर रोमी राजा मऊ कोई क खीलाफ ई क्युई गळत कोनी कर्यो। ९पण फैत्स एहुदिया न राजी करबा क चक्करा म पौलुस ऊँ बुझ्यो, “के तू चावै ह की म तेरा मुकदमा को फेसलो यरुसलेम म करूँ। १०जणा पौलुस बोल्यो, “म रोम हाळा राजा का एक न्याय आसन क सामै खड़्यो हूँ, अर अठैई मेरो न्याय कर्यो जावै। एहुदिया क खीलाफ म क्युई गळत कोनी कर्यो ई बात न तू चोखी ढाळ जाणै ह। ११ज म कानून तोड़्यो हूँ अर म क्युं अंय्यां को कार कर्यो हूँ जि बेजैऊँ मनै मोत की सजा दि जावै जणा म मरबा स कोनी मुकरूँ। पण जखा गळत काम मेरै सीर मंडचा जार्या ही ज बामैऊँ क्युई सञ्च कोनी निकलै जणा मनै कोई आकै सपुर्द कोनी कर सकै, म रोम का राजा क सामै दरखास्त लगाऊँ हूँ। १२जणा फैत्स आपका दरबार्या क सागै सला-मश्वरो कर बोल्यो, “तू रोम का राजा की ताँई दरखास्त करी ह, जणा ईब तू रोम का राजा क सामै ई जावलो।”

राजा अग्रिप्पा अर बिरनिके क सामै पौलुस

१३क्युंक दिना क पाछै राजा अग्रिप्पा अर बिरनिके फैतूसऊँ मिलबा कैसरीया आया। १४बानै बढै रेहता क्युंक दिन होया, जणा फैतूस पौलुस का मुकदमा की बात राजा न खे सुणायो अर बोल्यो, “अठै एक अंय्यां को मिनख ह जिनै फैलिक्स बन्दि छोड़गो हो। १५अर जद म यरुसलेम गयो जणा यहुदि मिनखा का प्रधान याजका अर बढ़का बिकै खिलाफ शिकायत करी अर बिनै सजा देबा की माँग करी। १६जणा म बाऊँ बोल्यो, “रोम्या म ओ चलन कोनी की कोई न बी बिकी बात सुण्या पेली अर जद ताँई बिपै ईलजाम मंडबाळा न बिकै आमै-सामै कोनी कर्यो जा, सजा ताँई सपुर्द कर दे। १७अर जद बे अठै आया, जणा म बिना टेम खराब करै आगला दिनई दरबार बुलार न्याय सींघासण प बैठ'र ओडायो की पौलुस न अठै पेश कर्यो जावै। १८अर जद बिपै दोष मण्डबाळा खड़या होया जणा बे बिपै अंय्यां का कोई बुरा काम को ईलजाम कोनी मंद्यो जंय्यां की म सोचै हो। १९पण बामै तो बांका धर्म अर ईशु नाम का एक मिनख क बारा म जखो मरगो हो, अर इनै पौलुस जिन्दो बतावै ह इ बात की राड ही। २०म इ बात न तैय कोनी कर सक्यो की आ बातां की जाणकारी कंय्यां ल्युं, जणा म पौलुस न बुझ्यो तेरा मुकदमा का फेसला ताँई तू यरुसलेम जाबा ताँई त्यार ह के? २१पण पौलुस दरखास्त लगाई की बिनै हिरासत म राख्यो जावै अर

बिका मुकदमा को फैसलो रोम को राजा करै। जणा म ओडायो की जद ताँई म बिनै कैसर क कनै कोनी भेज दयुँ बिनै हिरासत मई राख्यो जावै।

22जणा अग्रिप्पा फैतूस ऊँ बोल्यो, “म खुद ई मिनख की सुणबो चाऊँ हूँ।” जणा फैतूस बोल्यो, “थे बिनै दिनग्या सुणज्यो।”

23आगला दिन अग्रिप्पा अर बिरनीके गाजा-बाजा क सागै सेनापति अर नगरी का मान्या-थान्या क सागै दरबार म आया। जणा फैतूस ओडायो पौलुस न ल्यायो जावै। 24फैतूस बोल्यो, “महाराज अग्रिप्पा अर अठै भेळा सगळा मिनखो! थे इ मिनख न देखर्या हो जिकै क बारा म सगळो यहुदि समाज, अठै अर यरुसलेम म चिल्हार मेर ऊँ माँग करी की ओ ओर जीबा जोगो कोनी। 25पण म इमै मार्या जाबा जोगी क्युर्हुं बुराई कोनी देखी। अर जय्यां की ओ खुदई रोम का राजा की सुणवाई ताँई दरखास्त करी, जणा म इनै बाकनै भेजबा को फैसलो कर्यो। 26पण इकै बारा म मेर कनै कोई पुख्ता बात कोनी जखी म रोम का राजा न मांडर भेजूँ। जणाई तो म ईनै थारे सामै अर खास कर महाराज अग्रिप्पा! थारै सामै ल्यायो हूँ जिऊँ इ पुछ ताछ क पाछै मेर कनै मांडबा ताँई क्युं होवै। 27क्युँक बिना ईलजाम बताया बन्दि न भेजणो मनै ठिक कोनी लागै।

अग्रिप्पा क सामै पौलुस की पेशी

26 अग्रिप्पा पौलुस ऊँ बोल्यो, “तनै तेरा खुद क बचाव म बोलबा की छुट ह।” जणा पौलुस

आपको हाथ उठायो अर आपका बचाव म बोलबो चालु कर्यो,

2“महाराज अग्रिप्पा! ओ मेरो सोभाग ह की यहुदि मेर प जो क्युं ईलजाम लगायो ह आकै बचाव म मनै खुद न थारे सामै बोलबा को मोको मील्यो ह। 3खास कर जद की थे यहुदि रिती रिवाजा अर बाका जिरै न चोखी ढाळ जाणो हो। इ ताँई म थार ऊँ माग करूँ हूँ की थे थ्यावस क सागै मेरी सुणज्यो।

4“सगळा यहुदि जाणी ही की टाबर-पुणाऊँ ई म कयासीक जितो आयो हूँ। अर अ जाणी ही की म मेरी पूरी जिन्दगी पेली तो मेरा खुद का मिनखा क माईनै अर जणा पाछै यरुसलेम म कयासीक बिताई। 5बे मनै सदाऊँ जाणता आया ही अर बे इ बात की गुवाई दे सकी ही की म म्हारा धर्म का कट्रर पंथ फरीसी क गेल जितो आयो हूँ। 6अर इब बि करार की आस की बजैऊँ जखी परमेश्वर आपणा बढ़का ऊँ कर्यो हो म अठै खड़यो हूँ। 7आ बाई आस ह जिनै पाबा ताँई आपणा मिनखा का बारां कुणबा दिन रात परमेश्वर की भक्ति करी। अर इ आस की बजैऊँ ई अ यहुदि मेर प ईलजाम लगावी ही, महाराज! 8परमेश्वर मरेड़ा न जिवावै ह आ बात थारै अठै बिश्वास जोगी क्युंकोनी समझी जावै?

9“म बी सोच्यो हो, जो क्युं मेर ऊँ हो सकै बो म नासरत का ईशु नाम म खिलाफ करूँ। 10अर म यरुसलेम म अंय्याई कर्यो हो। अर प्रधान याजकाऊँ अधिकार लेर पबितर मिनखा न जेळ म गेर्यो हो अर जद बानै मार गेर्यो जातो हो जणा म बी बाकै खिलाफ मेरी सहमती

देतो हो। 11 अर बोली बार म यहूदी सतसंग घर म बानै पीटचो अर बानै बाका बिश्वासऊँ मुकरबा ताँई जोर देतो हो। म बापै झाला भर' अत्तो बिकराल होगो हो की म दिसावर नगर्या म बी जार बानै दिन घाल्या करतो हो।

पौलुस क मुंडा बिको हियो बदलबा की बात

12 “अर इ लोर म जद म प्रधान याजकाऊँ अधिकार कागजियो मंडवार दमिश्क जार्यो हो। 13 तो महाराज गेला म मनै धोळा दोपारा एक घणो जोर को च्याण्णो जखो आसमान ऊँ आर्यो हो मैरे अर मैरे सागै जाबाळा क च्यारूँमेर चमकता दिख्यो। अर बो अत्तो जोर को हो की सुरज को च्याण्णो बिकै आगै क्युंई कोनी हो। 14 अर म्हें सगळा धरती प पड़गा, अर ईब्रानी भाषा म, म अंच्यां की एक उवाज सुणी ‘साऊल ओ साऊल! तू मनै क्युं दिन-घालै ह? आर्या क मुंडा प लात मार तू क्यालै खुद न दिन-घालै ह। 15 जणा म बुझ्यो “प्रबु थे कुण हो?” अर प्रबु बोल्या म ईशु ऊँ जिनै तू दिन घालै ह। 16 पण ईब तू उठ'र खुद का पगा प खड़यो हो। म तनै मेरो दास बणाबा ताँई दर्शाव दियो हूँ। अर जो क्युं तू आज देख्यो ह अर जखी म तनै आगै दिखास्युँ बिनै लागा न बतातो रेह। 17 म तनै इज्जायल्या अर गैर एहदियां का मिनखा ऊँ बचास्युँ जाकन म तर्ने भेजस्युँ। 18 जिऊँ तू बाँकी आँख्या खोलै अर बानै अँधेराऊँ च्याण्णा म अर शैतान की शक्तिऊँ परमेश्वर कानी ल्यावै, अर मेर प बिश्वास करबा ऊँ बानै पापाऊँ माफि

मिलसी अर जखी बाकोत मेरा टाळेड़ा मिनखा ताँई ह बिमै बाको बी हिस्सो होसी। 19 “जणा महाराज अग्रिप्पा, म बी दर्शाव न कोनी टाळ्यो जखो मेर कनै इश्वर नगरीऊँ आयो हो। 20 जणा म सऊँ पेली दमिश्क पाछै यरुसलेम अर पाछै यहुदिया का सगळा देशा का रेहबाळा अर गैर एहूदी मिनखा न समझातो रिह्यो की पापाऊँ मन फीराओ, परमेश्वर कानी आवो अर मन फीराबा जोगो काम करो। 21 आ बातां की बजैऊँ ई यहुदि जद म मंदर म हो जणा मनै पकड़र मारबा की कोसीस करी। 22 पण परमेश्वर की दया ऊँ म आज अठै खड़यो हूँ अर छोटाऊँ लेर बडा ताँई सगळा न मेरी गुवाई देर्यो हूँ। अर बा बातां न छोड़र ओर क्युंई कोनी रुयुं जानै मुसा अर परमेश्वर की खेबाळा कहया हा क अ बातां होबाळी ह। 23 की मसी बोळा दुख भोगसी, मरसी अर बोई सऊँ पेली मरेड़ा म जिन्दो होसी जीऊँ यहुदि अर गैर एहूदी मिनखा म च्याण्णा को हेल्लो पाड़े।

24 अंच्यां बोलर जद पौलुस खुद को बचाव करै हो, जणा फैतूस जार ऊँ बोल्यो, “पौलुस! तू बावळो ह, तेरी घणी बिद्या तनै बावळो करै ह।” 25 जणा पौलुस जबाब दियो, “महाराज फैतूस! म बावळो कोनी, पण म सची अर समझाळी बात खेरऊँ हूँ। 26 महाराज अग्रिप्पा अ बातां म थानै बेधड़क खे सकूँ हूँ, क्युंक थे आ सगळी बातां क बारा म जाणो हो। अर अ सगळी बातां थारऊँ छानी कोनी क्युंक अ बातां ओला अर कुणा म कोनी घटी। 27 महाराज अग्रिप्पा, “थे परमेश्वर की खेबाळा

म बिश्वास करो हो के? म जाणू हूँ थे करो हो।” 28 अग्रिप्पा पौलुसकुँ बोल्यो, “तू के जाणै ह मनै ई थोड़ा सा टेम म मसी को चेलो बणा लेसी?” 29 पौलुस बोल्यो, “के थोड़ो टेम, के बोल्हो, “पण म तो परमेश्वर ऊँ आई अरदास करूँ हूँ क थे अर जत्ता बी मनै आज अठै सुणी ही बे जी सांकच्छा ऊँ म बंधर्यो हूँ आनै छोड़र बाकी बातां म मेरै जंय्या का होज्यावै।”

30 जणा राजा खड़्यो होगो अर बिकै सागै राजपाल, बरनिके अर जत्ता बी बढ़ै बेठचा हा सगळा खड़्या होग्या। 31 अर बढ़ैऊँ जार आपसरी म बतलाबा लाग्या, “ओ मिनख अंय्यां को तो कोई काम कोनी कर्यो जिऊँ इनै मार्यो या बन्दी राख्यो जावै।” 32 अर अग्रिप्पा फैतूसकुँ बोल्यो, “ओ मिनख ज रोम का राजा कनै सुणवाई की दरखास्त न करतो तो ओ छोड़्यो जा सकै हो।”

पौलुस न रोम भेजबो

27 जद म्हारो पाणी क गेला ईटली जाबो तैय होगो हो, जणा बे पौलुस अर दुसरा कैदिया न रोम की सेना, “जिनै रोम का राजा की सेना खेता हा।” बिका सुबेदार मऊँ एक सुबेदार यूलियुस क हाथा म सपुर्द कर दिन्या। 28 म्हें अद्रमुतियुमऊँ आबाला एक पाणी हाला झाज प चढ़र चाल पड़्या, जिखो एशिया का समदरी भागा ऊँ होतो होयो जाबाला हो। अर एक थीस्सलुनिके

को रेहबालो एक मकिदुनी, जिको नाम अरिस्तार्कस हो बो म्हारै सागै हो। 3 आगला दिन म्हें सेदा पुंच्या। यूलियुस पौलुस प दया दिखाई अर बिनै बिकै भयला क कनै जार बाऊँ मिलबा की, अर जो क्युं बे बिनै दी बा लेबा की छुट दे दि। 4 भाल सामै कि ही ई बजैऊँ बठैऊँ बे साइप्रस का टापु की ओट म चाल पड़यां। 5 म्हें किलिकीया अर पंफुलीयां का गेला होता होया लूसिया प्रदेश का मुगा कसबा म पूँच्या। 6 बठै सुबेदार न सिकन्दरीया नगरी को एक झाज लाध्यो जिखो इटली जार्यो हो। जणा बो म्हानै बिषै चढ़ा दिन्या। 7 म्हें बोला दिना ताँई सफर कर’र बोली मुश्किलाऊँ आखिर क कनिदुस नगरी क सांकडै पूँच्या। अर इ दिशा म भाल म्हानै आगै कोनी चालबा देरी ही, जणा म्हें सलमोन क सामैऊँ होता-होया क्रेती का टापु की ओट म चाल्या। 8 अर म्हें किनारे-किनारे चाल’र बोली मुश्किलाऊँ एक झाँगै पूँच्या जीको नाम ‘सुरक्षित बंदरगाह’ हो, अर लसाय नगरी बिकै सारैई पड़ै ही।

9 बठै म्हें बोला दिन बिता दिन्या जी बजैऊँ आगै चालबो खतरनाक होगो हो, अर बरत करबालो त्युहार बी बितगा हा। जणा पौलुस बानै राय दिनी। 10 “भला मिनखो, मं देखुँ हूँ की अठै ऊँ आपणो सफर खतरनाक होसी। अर ईमै आपाणा झाज अर माल की ई नई पण पिराणा की बी हानी होबाली ह।” 11 पण सुबेदार पौलुस की बातां की परवा कर्या

बिना ज्ञाज का मालिक अर कपतान की बात मानी। 12ओ बंदरगा स्याळा ताँई चोखो कोनी हो ई ताँई घणकराक ओई बिच्चार कर्यो की होसकै तो कह्यां न कह्यां फिनिक्स पैंचार स्याळा-स्याळा बढ़े ही रह्यां। ओ क्रेती को अंयां को बंदरगा हो जिको मुंडो दिखणाद-पाछुणै अर उत्तराद-पाछुणै म खुलतो हो।

समदर म तौफान

13अर जद दिखणादि भाल होळया-होळया चालबा लागी। जणा बे सोच्या जंयां बे चावा हा बंयाईं होर्यो ह। जणा बे लंगर उठार क्रेती का किनारा-किनारा ज्ञाज न आगै बढाबा लाग्यां। 14पण क्युँक बारा मई एक जोरकी भाल आई जिने उत्तर पुर्वी भाल बोलै ह अर बा टापू कानीऊँ भेरी ही। 15अर जद भाल ज्ञाज क टकर मारी जणा बो भाल की बजैऊँ आगै कोनी सरकर्यो हो। जणा म्हें बीनै बंयाईं छोड़र भाल जठिनै भेरी ई बिनै बठिनई जाबा दिन्यो। 16अर क्लोदा का छोटा साक टापु का दिखणाद हाळा हिस्सा न पार करती टेम म्हानै क्युं ओटो मील्यो। जीऊँ म्हें बचाव न्यावडीⁱ न समाळर राख सकां। 17इकै पाछै बे बिनै ज्ञाज क माईनै लियाया, अर ई डरऊँ की कदै बो सुरतिस^j का गदळा पाणी की रेत म न फस ज्यावै जणा ज्ञाज चलाबाळा जंयां तंयां करर ज्ञाज न जेवडाऊँ लपेटर बाँध अर ज्ञाज क पाल न निचै कर दिन्या अर भेता ई चलेगा।

18अर दुसरा दिन तौफान का जोर का थपेड़ा की बजैऊँ बे ज्ञाज को माळ पाणी म फेंकबा लाग्या। 19अर तीसरा दिन बे आपका हाथा ऊँ ज्ञाज का औजारा न फेंक दिया। 20अर जद बोला दिना ताँई न तो सुरज दिस्यो अर न ई तारा अर उपर ऊँ तौफान भेंकर थपेड़ा मारै हो, जणा म्हें बचबा की सगळी उम्मीद छोड़ दी। 21बोला दिना ताँई जद बे भुखा प्यासा हा, जणा पौलुस बामै खड़यो होर बोल्यो, “ज थे क्रीत ऊँ न चालबा को मेरो कह्यो मान्यो होतो तो आज इ बिनास अर इ हाणी ऊँ बच ज्याता। 22पण हाल बी म थार ऊँ अरदास करूँ की, थे हिम्मत राखो क्युँक ज्ञाज न छोड़र कोइ नई क्युंई कोनी होवै। 23क्युँक बिती रात बी परमेश्वर को दुत जि परमेश्वर को म हूँ अर जिकी म भक्ति करूँ हूँ मेर कनै आयो अर बोल्यो, 24पौलुस डरै मना! तेरो रोम का राजा क सामै खड़यो होबो तैय ह। अर परमेश्वर जत्ता बी तेरै सागै सफर करी ही बा सगळा न बी बचसी क्यु क तेरै प बिकी भलाई ह। 25जणा ईब थे सगळा हिम्मत राखो क्युँक म परमेश्वर प बिश्वास करूँ हूँ, अर मेरऊँ जंयां बोल्यो गयो ह ठिक बंयाईं होसी। 26पण आ भाल आपानै कोई टापु प लेज्यासी। 27आ गेलड़ा चोदा दिना ऊँ म्हें तौफान की बजैऊँ भूमध्य सागर म भेताँई जार्या हा। जणा मङ्ग रात क करीब ज्ञाज चलाबाळा अनुमान लगाया की म्हें जमीन क साकड़े हा। 28जणा बे बजन

ⁱ 27:16 ज्ञाज प छोटी न्यावा राखी जाती ही, जखी ज ज्ञाज टुट ज्यावै जणा ज्ञाज प सवार मिनखा न बचार किनारा लगाबा ताँई राखी जाती ही। ^j 27:17 ओ सुरतिस आज को लिबिया को भाग ह।

बाँधर एक डोरी समदर म गेर'र देख्या की गेराई करीब एक सौ बिस फुट ह। अर क्युँक देर पाछै बे ओज्युँ अंय्याई कर'र बेरो पाड़यो की ईब नब्बै फुट ह। 29 बे डुरगा की कणा झाज ढाड क न भीड़ज्या, जणा बे झाज क गेलडै नाकै च्यार लंगर गेर्या, अर दिन उगबा की अरदास करबा लाग्या। 30 जणा झाज न चलाबाळा झाज प ऊँ भागबा ताँई लंगर गेरबा को भानो कर'र बचाव न्यावडी न पाणी म उतार दी। 31 जणा पौलुस सुबेदार अर सीपाईड़ा ऊँ बोल्यो ज अ झाज पऊँ चल्यागा क जणा थे बी कोनी बचस्यो। 32 जणा सैनिक बी न्यावडी का जेवड़ा काट'र बिनै पाणी म भेभा दी। 33 अर जद भागपाटचाई जणा पौलुस बानै आ खेर रोटी खाबा ताँई अरदास कर्यो की इ चिंत्या म आज थानै ठिक चोदा दिन होगा बिना रोटी खाया। 34 म थारऊँ अरदास करूँ हूँ क्युँ खाल्यो जिऊँ थे जिन्दा रेह्हो। क्युँक थार मऊँ कोईसा को बाल ई बाको कोनी होवै। 35 आ खेर पौलुस रोटी ली अर सगळा क सामै परमेश्वर को धन्यवाद देर बिका टुकड़ा कर'र खाबा लाग्यो। 36 जीऊँ बा सगळा की बी हिम्मत बढ़ि अर बे रोटी खाई। 37 झाज म म्हें कुलमिलार दो सो छिंतर मिनख हा। 38 अर जद सगळा खार धापगा जणा बे ग्यु न पाणी म बगार झाज न हळको कर्या।

झाज को टुटबो

39 अर जद दिन उगयो जणा बानै किनारो दिख्यो पण बे पिछाण कोनी सक्यां क आ कूण सी झघा ह, पण एक

खाड़ी देखी जीको रेतिलो कीनारो हो, अर बे बिच्यार कर्या की ज होज्या तो इपई झाज न टिकावा। 40 जणा बे लंगर की जेवड़ी काट'र समदर म गेर दिया, अर सागैई हडल की जेवड़ी खोलर आगलो पाल ताण'र कीनारा कानी चाल-पड़या। 41 झाज को आगलो नाको तो रेत म जार लाग्यो अर बीमै धसगो पण पीछलो नाको झाल का थपेड़ा ऊँ ट्रूटबा लाग्यो। 42 जणा सैनिक हाँ जखा सगळा कैदया न आ सोचर मारबा की मन म करी की कणा कोई तीरके भाग न छुटै। 43 पण सुबेदार पौलुस न बचाबा ताँई बानै रोक्यो अर बोल्यो जिनै बी तीरनो आवै बो पाणी म कुद'र कीनारै प चल्या ज्यावै। 44 अर बाकी का तस्ता अर झाज की दुसरी चीजा को सारो लेर चालै। अंय्यां सगळा-का सगळा कीनारा प पूँचग्या।

माल्टा टापू प पौलुस

28 अर किनारा प सही सलामत पुच्या पाछै म्हानै बेरो चाल्यो की बी टापु को नाम माल्टा ह। 2 बठै का रेह्बाळा म्हाहै सागै चोखो बरताव कर्या, क्युँक मेह बरसबा की बजैऊँ ठण्ड ही, जणा बे म्हाहै ताँई बास्तै सिलगाई अर म्हारी आवभगत करी। 3 पौलुस लकड़्या की पतूकळी कर आग म गेरबा लाग्यो जणा ताव खार एक साँप बारै निकळयो अर बिकाळा हाथ प आँन्टी घाल'र डस लिन्यो। 4 अर जद बठचा का रेह्बाळा बिका हाथ प बि साँप न लटक्या देख्या जणा आपसरी म बतळाबा लाग्या, “पक्कोई ओ हत्यारो

ह जणाई तो ओ समदर ऊँ तो बच निकल्यो पण न्याय इनै जिबा कोनी दर्यो। ५पण पौलुस बिनै आग म छड़का दियो अर पौलुस क क्युंई कोनी होयो। ६पण बे मिनख आ बाट देखता रीद्या की ओ सूज ज्यासी नहिस जमीन प पड़र मरज्यासी। पण जद बोली देर ताँई बिकै क्युंई कोनी होयो जणा बे बिकै बारा म आपकी राय बदली अर कहया ओ तो कोई देवता ह। ७बी झाघा क कनै बी टापु का मुखिया पुबलियुस की जमीन ही। बो म्हानै आपकै घरा लेगो अर तीन दिना ताँई बो म्हारी आवभगत करी। ८पुबलियुस को बाप बिछावणा म पड़यो हो। बिकै उन अर आमीदस्त लागर्या हा। जणा पौलुस बिऊँ मिलबा भीतर गयो अर अरदास करबा क पाछे बो बिपै हाथ धर्यो जिऊँ बो निरोगो होगो। ९आ बात होबा क पाछे बी टापु का सगळा रोगी बठै आया अर सगळा निरोग होया। १०बे म्हारी बोली ईज्जत करी अर जद म्हें चालबा लाग्या जणा जो क्युं म्हानै आगै का गेला ताँई चावै हो, बे सगळी चीजा म्हानै दी।

रोम जाबा ताँई रवानगी

११तीन मेहना पाछै म्हें सीकन्दरीया का एक झाज प चाल पड़या जखो स्याळा म बी टापु पई हो जिपै दो जुडवा देवता को चीत्र हो। १२म्हें सुरकूसा की नगरी पूँचर तीन दिना ताँई बठै रीद्या। १३अर बठैऊँ चालर म्हें रेगियुस नगरी पूँच्या। आगला दिन दिखणादी भाळ चाली जणा पाछै दुसरा दिन म्हें पुतियुली नगरी आया। १४बठै म्हानै क्युँक बिश्वासी भायिड़ा

मील्या अर बे म्हानै एक हसा आपकै सागै रेहबा ताँई कहया। अर अंय्या म्हे रोम आया। १५अर जद रोम का बिश्वासी म्हारै बारै म सुण्या जणा बे म्हारै ऊँ मीलबा ताँई अप्पियुस का बजार अर तीन सराया ताँई आया। बानै देखर पौलुस परमेश्वर को धन्यवाद दियो अर इऊँ बिनै बोली हिम्मत मिली।

रोम म पौलुस

१६अर जद म्हें रोम पूँच्या जणा पौलुस न एक सीपाईड़ा की नीगराणी म खुलो रेहबा की ईजाजत मीलगी। १७अर तीन दिना क पाछे पौलुस बठ्या का यहुदि बढ़का की एक सभा बुलाई। अर जद बे भेळा होया जणा बो बाऊँ बोल्यो, “भायिड़ो म आपणा मिनखा अर नई बाप दादा का रीती रीवाजा क खिलाफ क्युंई कोनी कर्यो इकै बावजुद बी यरुसलेम म बन्दि बणार रोमिया क हाथा म सपुर्द कर्यो गयो। १८अर रोमी मनै जाँचर छोडबो चावा हा क्युँक बानै मेर म मोत की सजा देबा जोगो क्युंई कोनी लाद्यो। १९पण जद यहुदि कोनी मान्या जणा मनै मजबुर होर राम का राजा की दरखास्त लगाणी पड़ी। इकै पाछै बी म मेरा मिनखा प दोष कोनी लगाबो चाऊँ। २०इ ताँई म थारऊँ मीलबो अर बातचित करबो चावै हो। क्युँ क मसी ताँई इम्मायल्या की आस की बजऊँ ई म साँकळाऊँ बन्धर्यो हूँ। २१बे बिऊँ बोल्या, “म्हानै न तो तेरै बारा म यहुदिया ऊँ कोई कागद आयो अर न ई बठैऊँ आयड़ा भाई तेरै बारा म कोई बुरो समचार दियो अर न ई तेरै

बारा म क्यूँ गळत बात कही। 22 पण
म्हें तेरा बिच्चार तेरा मुंडाऊँ ई सुणबो
चाव हां, क्युंकि जि पंथ ऊँ तू ह बिकै
खीलापत म सगळी झगा लोग बातां
करै ह। 23 जणा बे पौलुस की सुणबा
ताऊँ एक दिन राख्यो। अर बी दिन जठै
बो रेह्यो हो बठै बोलासारा मिनख आर
भेळा होया। जणा बो मुसा का बिधी-
विधान अर परमेश्वर की खेबाळा की
पोथ्या ऊँ ईशु क बारा म समझाबा की
कोसीस करतो बानै परमेश्वर का राज
क बारा म समझायो। बो दिनग्या ऊँ
लेर दिन ढळया ताऊँ इमई लाग्यो रिह्यो।
24 जणा क्युंक तो बिकी बातां न मानली
पण क्युंक बिश्वास कोनी कर्यो। 25 अर
बे आपस म एक मत कोनी होया, जद
बे बठै ऊँ जाबा लाग्याक जणा पौलुस
एक बात कही, “यशायाह परमेश्वर की
खेबाळा का मुंडाऊँ पवित्र आत्मा थारा
बढ़काऊँ कत्तो सही कही ही, ‘जार आ
मिनखा ऊँ खे दे, की 26 थे सुणता तो

रेहस्यों, पण समझोगा कोनी, अर देखता-
देखता तो रेहस्यों, पण सुझैगा कोनी।
27 क्युंक आ मिनखा को हियो मोटो
अर कान भार्या होगा, अर बे आपकी
आँख्या मीच राखी ह। अंय्यां नई होतो
तो बे आपकी आख्याँ ऊँ देखींता अर
कानाऊँ सुणता अर मन ऊँ समझता
अर मन बदल’र मेरै कनै आता, अर
म बानै निरोगो करतो।” 28“ थानै ओ
जाणबो चाये की परमेश्वर को उद्धार
गैर एहूदी मिनखा क कनै भेज्यो गयो
ह। बे इ उद्धार का समचार न सुणसी।”
29^k पौलुस क अय्याँ बोलबा क पाछै
एहूदी मिनखा म तणा-ताणी होगी अर बे
बठै ऊँ चलेगा। 30 बो पूरा दो बरसा ताऊँ
आपका किराया का मकान म रिह्यो, अर
जखा बी बिकै कनै आता हा, बो बा
सगळा की आवभगत करतो हो। 31 अर
बिना रोक-टोक बेधड़क होर परमेश्वर
का राज को परचार करतो अर प्रबु ईशु
मसी की बातां सीखातो हो।

^k 28:29 क्युंक मानी-थानी पुराणी पौथीयां म आयत 29 की बाता कोनी मंडी।

ईफिसि नगरी का बिश्वास्याँ के नाम पौलुस को कागज

भुमिका

पौलुस खास टाळेड़ा चेला को यो कागज ईफिसीया की मंड़ली न भेज्यो गयो। जखो सबसै पेल्या परमेश्वर की ईछचा न बतावै ह, “क जखो क्युं ईश्वर नगरी अर ई धरती प ह बिनै ईशु मसी म एक झघां भेलो करै” (1:10)। अर आ परमेश्वर का मिनखा स एक अर्ज भी ह क बे ईशु मसी म एको राख’र मिनखजाती का भाई च्यारा ताँई परमेश्वर की ई इछचा गेल जिवन बितावै। ई कागज का पेलड़ा भाग म मांडबालो एक्का क बारा म अर बी गेला क बारा म बतावै ह जिसै परमेश्वर आपका मिनखा न टाळयो, बिकाळा बेटा ईशु मसी की बजऊँ बानै बाका पापा स माफी अर छुटकारो मिल्यो अर पवित्र आत्मा क हात्थां परमेश्वर को करेड़ो वादो पुरो होबा को दिलासो दियो गयो ह। दुजा भाग म बो बाचबाला स अय्यां को जिवन जिबा की अर्ज करै ह क मसी म एक्को कर’र जिबो बाकै जिवन को साँच बणज्यावै।

परमेश्वर का मिनखा का एक्का न जखो मसी ऊँ जुडेड़ो ह बिनै दिखाबा ताँई बिकी बराबरी कई बाता बता’र करीगई ह: मंड़ली एक काया जय्यां की ह, जिको सिर मसी ह, नहिस या एक घर जय्यां की ह जिका कुणा का सिरा को भाग्यो मसी ह, अर या एक घरहाली जय्यां की ह जिको घरहालो मसी ह। हरेक बात न ईमै मसी का प्रेम, बलिदान, माफी, उपकार अर सिद्ध का उजाला म देख्यो गयो ह।

रूप-रेखा

भुमिका 1:1-2

मसी अर मंड़ली 1:3-3:21

मसी म नयो जिवन 4:1-6:20

कागज बंद करबो 6:21-24

1 म परमेश्वर की ईच्छा गेल मसी'ऊ भेजेडो (चेखो समचार फेलाबा ताँई) खास चेलो पोलुस, इफिसुस म रेहबाळा पवित्र मिनखा अर ईशु मसी प बिश्वास करबाळा न नमस्कार माण्डू हू। **2**आपणा पिता परमेश्वर अर प्रबु ईशु मसी कानीऊं थानै उपकार अर स्यांती मिलती रेह।

मसी म आत्मिक आशिर्वाद

3-4परमेश्वर अर आपणा प्रबु ईशु मसी का पिता की जय हो, जखो ई जगत न रचबा क पेल्याई आपा बिश्वास्या न मसी म टाळ लियो। बो आपा न टाळयो जिऊ आपा बिकी नर्जाया म पवित्र अर निरदोष होवां। जणाई बो ईशु मसी म आपा न ईश्वर नगरी म सगळा भाँत का आत्मिक आशिर्वाद^a दिन्या ही। अर परमेश्वर खुद का प्रेम की बैजैऊं **5**पेल्याऊँई आ तैय करलिनी ही क मसी म आपा बिका गोद लियड़ा टाँबर होवां, आई बिकी खुशी अर मकसद हो। **6**परमेश्वर की मेहमाभरी दया ताँई बिकी जै-जैकार होवै, जखी बिका लाडला बेटा म आपा न सित-मित म मिली है! **7**ईशु मसी की खुद की मर्जी'ऊ बिका लोयैऊँई ई आपणो छुटकारो होयो ह अर पांपाऊँ माफी मिली ह। आ परमेश्वर की बोळी बडी दया ह, **8**जिनै बो बुद्धी अर सगळी समझदारी क सागै बत्ती-बत्ती आपा न दिनी ह। **9**परमेश्वर बोई कर्यो जखो

बिको मकसद हो, अर बो बी भेद न आपा न बतायो जिनै मसीऊं पुरो करबा ताँई बो पेल्याऊँई ध्यार राख्यो हो। **10**क सई टेम आबा प परमेश्वर ई मकसद न पुरो करै, जिमै सगळी रचना जखी ईश्वर नगरी अर ई धरती प ह बानै एकसागै मसी म जखो सिर की जय्यां ह भेळी करै। **11**परमेश्वर सगळी चिजा बय्याई करी जय्यां बो ध्यार राखी ही; अर परमेश्वर आपका मकसद गेल आपाणा न बी मसी क सागै बिका मिनख होबा ताँई टाळयो जिनै बो बोळी पेल्याऊँई ध्यार राख्यो हो। **12**जणाई म्है मसी प आस लगाबाळा पेला हा, परमेश्वर की मेमा ताँई जै-जैकार करा हा।

13अर जद थे बिका साँच्चा वचननै सुण्याक जखो थारा छुटकारा को चोखो समचार ह थे बी परमेश्वर का मिनख बणग्या, थे मसी प बिश्वास कर्या अर परमेश्वर थानै पवित्र आत्मा जिकै ताँई बो करार कर्यो हो देर थरै प मालकाना छाप लगादी। **14**आ पवित्र आत्मा^b ई बात की जामनी ह क परमेश्वर आपका मिनखा ताँई जखो वादो कर्यो ह बो पूरो होज्यासी, अर आपणा न ओ बिश्वास दिलावै क जखा बी बिका ह बानै परमेश्वर पुरो-पुरो छुटकारो दिलासी जिसै बिकी मेमा की जै-जैकार होवै।

पौलुस की अरदास

15ई ताँई, प्रबु ईशु प थारा बिश्वास अर परमेश्वर का मिनखा ताँई थारा

^a 1.3-4 पाप भर्या जीवन'ऊँ छुटकारो, साँचा परमेश्वर न जाणबो, जुग-जुग को जीवन, परमेश्वर अर मिनखा न प्रेम करबो अच्याँ की ओर बी बोळी बाता आत्मिक आशिर्वाद म सामिल ह।

^b 1.14 परमेश्वर पीता, ईशु मसी अर पवित्र आत्मा परमेश्वर न दिखावै ह।

प्यार-प्रेम क बारा म जदऊँ म सुणयो
बि टेमऊँ, १६मेरो, परमेश्वर पिता न
थार ताँई धनैवाद देबो कोनी रुक्यो। म
जद बी परमेश्वर क सामै जाऊँ जना
म थानै याद करबो कोनी भूलू। १७अर
आपणा प्रबु ईशु मसी का परमेश्वर जखो
मेहमाभर्यो पिता ह, बिऊँ माँगु हुँ क बो
थानै बुद्धी देबाळी अर परगट करबाळी
आत्मा दे, जिऊँ थे बिनै चोखा ढंगऊ
जाण सको। १८अर म आ बी माँगु हुँ
क बिका च्याणना न देखबा ताँई थारा
हिया की आँख्याँ खुलज्यावै जिऊँ थे
जाणल्यो क बा कूणसी आसा ह जि
ताँई बो थानै बुलायो ह? अर बा आ ह
क पबितर मिनखा माय बिऊँ मिलबाळी
मेमा भरी पाँती कत्ती मोकळी ह। १९अर
थे आ जाण की बिकी शक्ति जर्खी आपा
बिश्वास करबाळा म काम करै ह बा
कत्ती महान है। आ शक्ति आपणा म
बच्याँई पुरी ताकत क सागै काम कर्फी
ह, २०जय्यां बो ई शक्ति न मसी न मौतऊँ
ओज्युँ जिवार बिनै ईश्वर नगरी म
आपकै दाणै नाकै बिठाबा ताँई काम म
लिनी ही। २१मसी सगळा राजकरबाळा
प, आधिकार्या प, शक्त्या प अर प्रबुआ
प राज करै ह, बिकी पदवी ई दुनिया
प अर आबाळी दुनिया प अधिकार
करबाळी सगळी पद्धयाऊँ ऊंची ह।
२२परमेश्वर सक्युँ बिका पघा तळै कर
दिन्यो; अर बिश्वास्या की मंडली ताँई
मण्डळी की सगळी चिजा प बिनै सिर
बणा दियो। २३बिश्वास्या की मंडली

मसी की काया ह, अर बिकी शक्ति की
भरपूरी च्यारमेर ह।

मौतऊँ जिवन कानी

२ पाप अर परमेश्वर का हुकमा न ना
मानबा की बजैऊँ थे आत्मिक रुपऊँ
मरेडा हा। २अर गेलडा दिना म थे ई जगत
का कु-गेला प चालता हा, अर सगळी
बुरी आत्मा प राज करबाळा० को कहयो
कर्या करता हा, आ आत्मा बा मिनखा
क हिया म काम करै ह जखा परमेश्वर
का हुकमा न कोनी मानै। ३साँचली तो
आ ह क आपा सगळा बी बाकी जंय्याँई
पेल्या बुरी ईछ्या गेल दिन काटर्या हा
जखी काया अर हिया की ईछ्या होती
बिनैई करर्या हा। अर आ सगळा की
जंय्याँई आपा बी परमेश्वर का परकोप
न भोगबा जोगा हा। ४पण परमेश्वर की
दया की कोई थाह कोनी, अर आपणा
ताँई बिको प्यार-प्रेम बोलो बडो ह। ५अर
परमेश्वर का हुकमा न ना मानबा की
बजैऊँ आपा तो आत्मा म मरेडा हा।
पण मसी क जिबा की बजेऊँ बो आपा
न पाप भर्या जीवन'ऊ बचा'र आपा न
आत्मा म जिवायो। ओ परमेश्वर को
उपकार'ई ह जिकी बजैऊँ आपा बचगा।
६अर ईशु मसी क मरेडा म जी उठबा की
बजैऊँ बो आपा न ईश्वर नगरी म मसी
क सागै राज करबा ताँई जिवायो। ७ओ
उपकार जखो बो ईशु मसी म आपणा
प दिखायो ह, बी दया क जरिये बो
आबाळा जुग-जुग का मिनखा न बिका

^c 2.2 अकाश प राज करबाळा की आत्मा शैतान न दिखावै ह, जखो परमेश्वर क खिलाफ काम करै ह।

उपकार की बोली मुकळाईनै दिखाबो चावै ह, जिकी कोई होड़ कोनी कर सकै। 8-9क्युँक आ परमेश्वर की दया'ई ह क थे बिपै बिश्वास कर्या जणा थानै बचालियो गयो। अर ओ थारा कर्मा कि बजैऊँ कोनी पण परमेश्वर का दान की बजैऊँ होयो ह। जिसै ईकै बारा म कोई फांप कोनी मार सकै। 10आपा परमेश्वर की बणाएङ्गी रचना हां अर मसी'ऊँ भला काम करबा ताँई आपानै रच्यो गयो ह, जानै परमेश्वर पेल्याऊँ ई आपणा ताँई त्यार कर्यो ह।

मसी म एक

11ई ताँई थे ई बात न याद करो क थे जलम जात गैर एहूदी हो, अर काया म मिनखा क हाथा सुनत करवायड़ा मिनख जानै ई बात प घमण्ड ह थानै बिना सुनत हाला बोलै ह, 12अर बा दिना म थे मसी अर ईजायल का मिनखा'ऊँ न्यारा हा। बा करारा म थारी पांती कोनी ही जामै परमेश्वर बा'ऊँ उद्धार करबाला क आबा को वादो कर्यो हो, अर्याँ थे ई जगत म बेआस अर परमेश्वर क बिनाई जीर्या हा। 13पण थे जखा पेल्या परमेश्वर'ऊँ दुर हा, ईब ईशु मसी का लोय'ऊँ कनै ल्याया गया हो। 14क्युँक यहुदि अर गैर एहूदीया क बिच म मसी स्यांती ले'र आयो अर बानै मिला'र एक कर दिन्यो, अर आपकी काया का बलिदान'ऊँ बानै न्यारो करबाली अर बैर बंधाबाली भीत न ढाह गेरी। 15अर

एहूदी धर्म का कानून-कयदानै^d भुजाण दियो अर यहुदि अर गैर एहूदीया न आपसरी म मिला'र परमेश्वर का मिनख बणा दिन्यो। 16अर सूली प ईशु मसी बैर-भाव न नास कर'र दोन्या न एक काया बणा'र परमेश्वर ऊँ मिला दियो। 17मसी आर थानै जखा परमेश्वर ऊँ दुर हा अर बानै जखा बिकै कनै हा दोन्या न स्यांती को चोखो समचार सुणायो। 18मसी की बजैऊँ ई आपा सगळा एक ई पबितर आत्मा ऊँ परमेश्वर पिता क सामै पुच्या हा। 19ई ताँई ईब थे परमेश्वर की नजर्या म बारला कोनी हो, पण परमेश्वर का टाळेडा मिनखा क सागै परमेश्वर का घरबार का बणग्या हो। 20जय्या एक हेली निम प चिणी जावै ह, बय्याँ ई थे परमेश्वर का भेजेडा खास चेला अर बिकी खेबाला मिनखा की सिख की निम प चिनेडो हो। जिकै कूणा का सिरा को भाट्ये खुद मसी ई ह। 21बो मसी सगळी हेली न थाम राख्यो ह। अर मसी म ई परमेश्वर सगळा बिस्वास्या न मिला'र पबितर आत्मा का बास ताँई एक पबितर मंदर बणार्यो ह। 22अर थेबी ईशु मसी म मंदर होबा ताँई बणाया जार्या हो जीमै परमेश्वर बिकी पबितर आत्मा क जरिये बास करै ह।

गैर एहूदीया म पौलुस की सेवा

3 ई बजैऊँ म पौलुस थार ताँई जखा 3 गैर एहूदी हो ईशु मसी की कैद म हूँ। 2परमेश्वर की दया'ऊँ थारै भला

^d 2.15 एहूदी धर्म क गेल क्युंक जानबरा को मास खाणो, आराम हाला दिन काम करबो भर्जत ह अर्याँ का बोला नियम कायदा ही।

ताँई जखा काम परमेश्वर मनै करबा ताँई दियो ह बाकै बारा म थे पक्काई सुण्या हो। ३परमेश्वर आपका भेद न मेर प परगट कर्यो ह। (पेल्या बी म आ बाता क बारा म थोड़ो-भोत थानै मांड़र भेड्यो हो। ४अर आनै बाचर थे जाण ज्यास्यो क म मसी का भेदा न कठै ताँई समझू हूँ।) ५गेलड़ा दिना म मिनख जात न ओ भेद कोनी बतायड़ो हो। पण ईब परमेश्वर आनै पबितर आत्मा क हाथां परमेश्वर का भेजेड़ा खास चेला अर परमेश्वर की खेबाळा प परगट कर्यो ह। ६यो भेद ओ ह क मसी का चोखा समचार न मानबा की बजैऊँ गैर एहूदी मिनख यहुदि मिनखा क सागै बापोती का हिस्सेदार हो'र, परमेश्वर का आशिर्वाद म सामील होग्या; अर एक ई काया का अंग अर ईशु मसी म करेड़ा बादा का हिस्सेदार होगा। ७परमेश्वर की दया का दानैऊँ म चोखा समचार को सेवक बण्यो अर बिकी काम करबाली शक्ति'ऊँ मनै ओ दान मिलेड़ो ह। ८म परमेश्वर का सगळा मिनखा म सऊँ छोटो हूँ इकै पाछै बी परमेश्वर की आ दया मेर प होई ह जि'ऊँ म मसी का अनमोल धन को चोखो समचार गेर एहूदी मिनखा न सुणाऊँ। ९अर परमेश्वर का ई भेद न सगळा न खोल'र बता'ऊ क ओ भेद कथ्यांसीक काम करै ह जखो आपणा सगळा न बणाबाला परमेश्वर क माईनै लुखेड़ो हो। १०जीऊँ परमेश्वर का भाँत-भाँत का ज्ञान न बिश्वास्या की मंडळी क हथा ऊँ ब्रह्मांड का प्रधाना अर अधिकारिया न बतावै। ११परमेश्वर ईनै आपकी कदई ना खतम होबाली मनस्याऊँ कर्यो ह जिनै बो आपणा प्रबु

ईशु मसी क जरिए पुरी कर्यो ह। १२ईशु मसी क सागै संगत अर बिपै आपणा बिश्वास की बजैऊँ ई आपा बेधड़क अर सगळा भरोसा क सागै परमेश्वर क सामै जा सका हां। १३जणा'ई म थारऊँ हाथ जोड़र रख्यु हूँ क, थे हिम्मत मना हारो क्युँक म थार ताँई जेल म दुख उठार्यो हूँ, अर अ सगळी बाता थारै भला की ई ह।

मसी को प्यार-प्रेम कत्तो बडो ह

१४-१५ भाईड़ो ई ताँई म परमेश्वर क आगै जखो ईश्वर नगरी अर धरती उपर का सगळा कुणबा को पिता है थार ताँई बिसै अरदास करू हूँ क, १६परमेश्वर आपकी मेमा का धन ऊँ बिकाळी आत्मा ऊँ थानै आ शक्ति देवै जिऊँ थे थारा खुद का मायला मिनख म शक्ति पा'र तगड़ा होता जाओ। १७अर थारा बिश्वास क जरिये मसी थारा हिया म बास करतो रेवै, थे थारै माय प्यार-प्रेम की जड़ पकड़र बिपै निम धरल्यो। १८जिऊँ थे परमेश्वर का सगळा मिनखा क सागै ई बात न समझबा की शक्ति पाओ क मसी को प्यार-प्रेम कत्तो लम्बो-चौड़ो, कत्तो डूँगो अर कत्तो ऊँचो ह। १९अर मसी का बी प्यार-प्रेम न जाण सको जखो सगळी समझ'ऊँ नाकै ह। अर थे परमेश्वर का सभाव म भर्यापुरा होज्याओ।

२०परमेश्वर शक्तिसाली ह अर आपणा म काम करबाली बिकी शक्ति'ऊँ जखो बि आपा अरदास कर'र बिऊँ माँगा अर जत्तो सोचा हा बिसै बी बत्ती बो कर सकै ह। २१बिश्वस्या की मंडळी म परमेश्वर की मेमा जुग-जुग होती रेहै

क्युँक आ मेम्मा परमेश्वर ईशु मसी म दर्शाई ह। अय्याँई होज्यावै!

मसी की काया को एङ्को

4 ई ताँई म, जखो प्रबु की सेवा ताँई कैदी हूँ थारूँ आ अरदास करूँ हूँ क जखा हेल्ला'ऊँ थानै बुलायो गयो हो बिकै जोगी ई चाल चालो, २सगळी बाता म अपणाप न छोटो बना'र नरमाई समेत, थ्यावस राख'र प्यार-प्रेम'ऊँ एक दुसरा की सेण करो; ३अर मेल-मिळाप का बंधन'ऊँ आत्मा को एङ्को राखबा ताँई जो क्युँ कर सको बो करो। ४क्युँक एक ई पवित्र आन्मा ह अर आपा बिश्वासी एक ही काया हा अर आपणी एक ही आसा ह जी ताँई परमेश्वर थानै बुलायो ह। ५आपणो प्रबु मसी एक ह, जिमे आपाणो एक सो बिश्वास ह अर आपा एक ही बतिस्मो लेवा हा अर अय्याँ आपा सगळा एक हा, ६सगळा को परमेश्वर अर पिता एक ई ह जखो सगळा क उपर, सगळा क म्हाइनै ह अर सगळा क जरिए काम करै। ७पण आपा सगळा न दया मिली ह अर जंय्यां मसी चायो बय्याँ ई बो ई बरदान न बाँट्यो ह। ८ई ताँई धर्म शास्त्र खेवै ह क,

“बो आपका बेरिया न कैदी बणा'र
बोलो उँचो चढ्यो अर आपका
मिनखा न बरदान दियो।”

९बिकै ऊँचा चढबा को मतबल काँई ह? ओई क, बो उँचो चढबा'ऊँ पेली पाताळ म जार आपका बेरिया न कैदी बणायो। १०अर जखो उतर्यो बो ओई ह क सगळा आसमान ऊँ बी उपर चढग्यो जिसै सक्यानै आपकी मौजुदगी

ऊँ भर्योपुरो करदे। ११बोई क्युँक न तो भेजबा ताँई खास चेला बणा'र, क्युँक न परमेश्वर की खेबाळा बणा'र, क्युँक न चोखा समचार को हेल्लो पाड़बा ताँई, क्युँक न बिश्वास्या की मंडळी की रूखाळी करबाळा अर परमेश्वर की सीखदेबाळा बना'र टाळ लिन्या। १२बो अय्यां मसी की मण्डळी न मजबुत करबा अर परमेश्वर का मिनखा न मसी की सेवा ताँई त्यार करबानै कर्यो। १३जद ताँई आपा सगळा बिश्वास अर परमेश्वर का बेटा की जाण पिचाणा म एक ना होज्यावां, अर पङ्का मिनख बण'र मसी का रूप म पुरा ना बढ ज्यावां। १४जिऊँ आपा टाबरपुणो ना करां। जिऊँ आपा मिनखा का ठगपुणा अर चतराईऊँ अर बाकी गुमराह करबाळी सीख म आर ईनै-बिनै भटकता ना फिरा। १५-१६पण इकी बजाय आपाणा न प्यार-प्रेमऊँ सचाई न बता'र सगळी बाता म मसी म बढणो चाए। आपा बिश्वास्या को सिर मसी ह, जिमै सगळी काया का न्यारा-न्यारा अंग एक सागै जुडया रेवी ही। आ सगळी काया जोडा की मद्ददऊँ एक सागै जुडरी ह। ई ताँई जद काया का अ न्यारा-न्यारा अंग प्यार-प्रेमऊँ आपको काम करै जणा सगळी काया मजबुती क सागै बडै ह।

मसी म नयो जीवन

१७ई ताँई प्रबु का नामऊँ म थानै चेतार्यो हूँ क ईब आगैऊँ परमेश्वर न ना ध्यारबाळा मिनखा की जय्यां मना जीवो क्युँक बाकी सोच बुरी ह, १८बाकी मत्ती मरेड़ी ह। बे आपकी अज्ञानता अर हिया

की कळडाई की बजैऊँ परमेश्वर का जीवनऊँ न्यारा ह। 19बाकी सगळी सरम-हया मरी पड़ी ह; बे खुद न गंदी आदता म गेर राख्या ही अर सगळा लुचापुणा का काम बिना रोक-टोक करबा लागर्या हीं। 20पण मसी क बारा म थानै अय्यांलकी सीख मिली ह के? 21-22थे थारा पुराणिया सभाव न छोड़द्यो जखो धोखो देबाळी ईच्छया गेल चाल-र थारो नास कर्यो हो। क्युँक थे तो पङ्काई ईशु क बारा म सुण्या हो अर जखो सांच बिमै ह बोई थानै सीखायो गयो, 23अर मन आत्मा म नया बणता जाओ, 24अर नयेडा सभाव न पेरल्यो जखो सांची धार्मिकता अर पबित्रता म परमेश्वर की जंय्यां ओज्यु नयो करेडो ह। 25ई ताँई झुठ बोलबौ छोड़र हरेक आपका संगी-साथी बिश्वासीऊँ सच बोलै, क्युँक मसी म आपा सगळा एक ई काया का अंग हाँ। 26थे झाल तो काडो, पण पाप मना करो; सुरज ढळबाऊँ पेली थारी झाल खतम होणी चाए। 27अर शैतान न मौको मना द्यो। 28जखा चोरी करी ही बानै चोरी करनी छोड़-र भला कामा म मेनत कर खुद ताँई कमाणो चाये अर गरीबा न दान देणो चाये। 29कोई बी बुरी बात थारै मुँडाऊँ न निकलै पण दुसरा को भलो करबाळी बाता बोलो जीऊँ सुणबाला की जरुरता पूरी होवै अर बाको भलो होवै। 30परमेश्वर की पबित्र आत्मा को निरादर मना करो क्युँक छुड़बाला दिन ताँई आ पबित्र आत्मा थार ताँई बिकी जामनी ह, की बो थानै छुड़ासी। 31ई ताँई थे सगळी कड़वाट, परकोप, झाल, कळह, दुसरा

की बुराई करबाऊँ अर दूसरा की हानी करबाऊँ दूर रेह्यो। 32एक दुसरा प दया कर्या करो अर जय्यां परमेश्वर ईशु मसी म थारा बुरा कामा ताँई थानै माफ कर्यो ह बय्यांई थे बी एक दुसरा न माफ करो।

उजाळा म जीबो

5 थे परमेश्वर का लाडला टाबर हो, ई ताँई परमेश्वर का सभाव प चालो। 2अर प्यार-प्रेम ऊँ जीवन बसर करो, जय्यां मसी आपणाूँ प्यार-प्रेम कर्यो अर परमेश्वर क सामै आपणै ताँई खुद की भेट चढा दी बिको आपणा ताँई ओ प्रेम चोखी सुंगंध हाळी धूप की जय्या ह जखी परमेश्वर न भावै ह। 3थे परमेश्वर का पबित्र मिनख हो ई ताँई थारै म कुकर्मा की, लुचा-पुणा की अर लोभ-लालच की चर्चा बी नई होणी चाए; 4अर थारा मुँडाूँऊँ कोई बेसर्मा की, बेतुकी, बेहुदा मजाक अर जखी बाता चोखी कोनी बे नई नकळनी चाए पण ईकी बजाय थारा मुँडाूँऊँ परमेश्वर ताँई धनैवाद निकळणो चाए। 5थानै ई बात न सूल जाणणोई ह क कुकर्मी, लुचा-पुणा करबाला, अर लोबी मिनखा को जखा मुर्तिपुजा करबाला की जय्यां ही, मसी अर परमेश्वर का राज म आकी कोई पांती कोनी। 6कोई बी थानै बेकार की बाता ऊँ धोखो ना देदेः क्युँक आ कामा की बजैऊँ परमेश्वर को परकोप बिका हुकमा न ना मानबाला प पड़ै ह। 7ई ताँई अय्यां का मिनखा को संगरो मना राखो। 8-9क्युँक थे ईब अंधकार म नई पण प्रबु का उजाळा म हो, उजाळो भलाई, धार्मिकता अर सांच जंय्यां का फळ ल्यावै ह। ई ताँई

उज्जाळा का टाबरा की जय्यां जीओ। 10परमेश्वर न काँई चोखो लागै ह ईकै बारा म खोज करो। 11अर अंधकार का बुरा कामा म सामिल मना होवो जय्यां मिनख करै ह ईकी बजाय बानै बाका बुरा कामा ताँई चेताओ। 12(क्युँक बाका ओलैछाना म करेड़ा कामा क बारा म बात करबो बी सरम की बात है।) 13पण जद सगळी चिजा उजाळा म आवै ह जणा बाकी असलियत सामनै आवै ह। 14क्युँक जखो सक्यानै परगट करै ह बो उजाळो ई ह। ई ताँई अच्यां खेयड़ो ह, “ओ सोबाळा, जागज्या अर मरेड़ा मऊँ जी उठ; अर मसी को उजाळो तेर प भळकसी” 15ई ताँई थे ध्यान दृयो क कंयां को जीवन जीवो हो। अनाड़ी की जय्यां मना जीओ पण बुद्धिमाना की जय्यां जीवो। 16हरेक मौका न सही ढंग ऊँ बरतो, क्युँ क दिन बुरा हीं। 17ई ताँई मुर्ख मना बणो, पण परमेश्वर थारूँ काँई चावै ह बिनै ध्यान ऊँ समझो। 18दारु पिर मतवाला मना बणो, क्युँक इऊँ मत मारीज्यावै, पण इकी बजाय आत्मा म भर्यापुरा होता जाओ। 19भजन-किर्तन अर आत्मिक गीत का शब्दा ऊँ एक दुसरा ऊँ बतलाता रिह्यो। अर थारा हिया ऊँ प्रबु का भजन-किर्तन करता रिह्या करो। 20अर आपणा प्रबु ईशु मसी का नामँऊँ परमेश्वर पिता को सगळी बाता ताँई सदाई धनैवाद देता रह्यो।

21मसी को डर राखर एक-दुसरा क बस म रह्यो। 22ओ लुगायो, थे थारा मोटचारां क बस म रह्या जय्यां प्रबु क रेह्यो हो। 23क्युँक मोटचार लूगाई को सीर ह जय्यां मसी मंडळी को सीर ह अर मसी ई मण्डळी को उद्धार ह। 24ई ताँई जय्यां मंडळी मसी क बस म ह बयाई लुगाया न बी चोखी बाता म आपका मोटचारां क बस म रेह्णो चाए। 25ओ मोटचारो, थे बी थारी लुगाया ऊँ प्यार-प्रेम राखर खुद की ज्यान मंडळी ताँई दे दिनी। 26जिऊँ मंडळी न मसी परमेश्वर का बचना अर पाणी का बतिस्मा ऊँ धोर पबितर अर उजळी बणावै^e, 27जिऊ बो बिनै अच्यां की भळका मारबाळी मंडळी बना’र आप ताँई त्यार करै, जिमै कोई बी दाग कोनी होवै, अर ना बीकी खाल लटकेड़ी होवै अर ना बिमै अच्यां की कोई दसरी कमी होवै पण पबितर अर बेदाग हौवै। 28मसी मण्डळी’ऊँ प्रेम राखै ह, ई ताँई आ जरुरी ह क मोटचार आपकी लुगायाऊँ अच्यां को प्रेम राखै जय्यां बो खुद की कायाऊँ राखै ह क्युँक मोटचार अर लूगाई एक काया जंय्यां ही। अर जखो मोटचार आपकी लूगाईऊँ प्यार-प्रेम राखै ह बो खुद ऊँ प्रेम राखै ह। 29-30क्युँक कोई बी आपकी कायाऊँ कदैई बैर कोनी राखै पण बिनै पालै-

^e 5.26 बतिस्मो भेजेड़ा खास चेला अर मण्डळी की रूखबाली करबाला क हाथा’ऊँ बा मिनखा न दियो जावै ह, जखा ईशु मसी म बिश्वास करी ही। बतिस्मो मसी म बिश्वास करबा अर पबितर आत्मा हिया न साफ करै ई बाँत न दर्शयावै ह। बतिस्मो लेबा’ऊँ कोई मिनख पबितर कोनी हो पण बतिस्मो लेबा की टेम जो परमेश्वर का गेला प चालबा को मन आपा बणावा ह बिकी बजे’ऊँ ईशु मसी परमेश्वर का बचना क जरिये मनखा न पबितर करै ह।

पोसै ह। आपा मसी की काया का अंग हा ई ताँई मसी बिश्वास्या की मंडळी न पालै-पोसै ह। 31मोटचार न आपकी लूगाई न पाळनो चाये ई ताँई परमेश्बर बोलै ह क,

“मिनख आपका माँ-बाप न छोड़र
आपकी लूगाई क सागै रेहसी
अर बे दोन्युँ एक ई काया
होसी।”

32ओ तो बोलो उँडो भेद ह, जिनै म अठै मसी अर बिश्वास्या की मंडळी क बारा म बताऊँ हँ। 33ई ताँई थार म हरेक मोटचार आपकी लूगाई न खुद की जय्यां प्रेम करै अर लुगाया बी आपका मोटचारा की ईज्जत करै।

माँ-बाप अर टाबरियां

6 ओ टाबरो, प्रबु म थे थारा माँ-बाप की बाता न मान्या करो क्युँक थार ताँई ओई सही ह। 2“वादा क सागै देयड़ा हूकमा म ओ सऊँ पेलो हूकम ह, की थै थारा माँ-बाप को मान करो। 3जखा आपका माँ बाप का कह्या म चाली ही बा ताँई बो वादो ओ ह की, ‘बाको भलो होसी अर बे धरती प बोला दिना ताँई जिसी।’” 4टाबर-टिकरा हालो, थारा टाबरा न झाल मना दिवाओ पण बाका चाल-चलन न सही करबा अर बिश्वास म बढबा ताँई प्रबु की सिख देर बानै पालो-पोसो।

मालिक अर दास

5ओ गुलामो, जखा मिनख ई धरती प थारा मालिक हीं बाकी सेवा सिधा मनऊँ डरर धुजता होया करो जय्या मानो की

थे मसी की सेवा कर्या होवो। 6अर बडाई पाबा ताँई देख-दिखावा की सेवा मना करो, पण सगळा मनऊँ परमेश्बर की ईच्छा गेल मसी का गुलाम की जय्या बाकी सेवा कर्याकरो। 7ई सेवा न मिनखा की नई पण परमेश्बर की सेवा जाणर राजी मन ऊँ कर्याकरो। 8याद राखो जखा चोखो काम करसी प्रबु मसी बा हरेक न ईनाम देसी चाएसै बो गुलाम हो अर चाएसै अजाद। 9ओ मालको, थारा गुलामा न धमकाणो छोड़र बाकै सागै बच्याँई बरताव करो जंय्यां बे थारै सागै करी हीं, क्युँ क थानै ई बात को बेरो ह क थारो अर बाको मालिक ईश्बर नगरी म ह अर बिकी नजर्या म सगळा ईकसार ही।

10आखरी बात आ ह क प्रबु अर बिकाळी शक्ति म तगड़ा बणज्याओ। 11अर परमेश्बर जखी लडाई की पौसाक अर हथियार थानै देवै ह बानै पेरल्यो जिसै शैतान की कळाबाजी क सामै खड़्या रेह सको। 12क्युँक आ लडाई मिनखाऊँ कोनी पण अकास प राज करबाळी बुरी शक्तियाँऊँ, अधिकार्याऊँ, अँधकार का हाकमाऊँ अर बुरी आत्मा की सेनाऊँ ह। 13ई ताँई परमेश्बर का सगळा हथियार बाँधल्यो जिऊँ जद बुरा दिन आसी जणा दुश्मन का वारा को सामो कर सको, अर आखिर ताँई लड़्या पाछै बी मैदान म डट्या रेह सको। 14-15ई ताँई साँचऊँ कडतु कसर, धरम की झिलम पेर, पगा म मेल-मिलाप का चोखा समचार की तेयारी का बुट घालर त्यार होज्यावो, 16अर आ सगळा क सागै बिश्वास की ढाल लेर डट्या रेहो

जिसै शैतान की बल्धती बाणा न बुता सको। 17 उद्धार को टोप अर आत्माँ देयड़ी तलवार जखी परमेश्वर को बचन ह लेल्यो। 18 हरेक मौका प अर सगळी बाता म आत्माँ अरदास करता रह्यो अर बय्यांई सगळा परमेश्वर का टाळेड़ा मिनखा ताँई जी ज्यानाँ अरदास करबा ताँई जागता रेह्यो। 19 अर सागै की सागै मेर ताँई बी अरदास कर्याकरो क बोलबा की घड़ी परमेश्वर मनै अय्यांको जोरदार समचार दे जिका भेद न म बेधड़क होर बता सकुँ। 20 ई चोखा समचार ताँई म राजदुत हूँ अर साँकळा म बंधेड़ो हूँ; अर अरदास करो की म ई चोखा समचार क बारा, म बेधड़क होर बोल सकु।

कागज की आखरी बात

21-22 म प्रबु की सेवा म बिश्वास जोगो दास अर आपणो प्यारो भाई तुखिकुस न थारै कनै भेजर्यो हूँ, जीकुँ बा थानै सगळी बाता बतासी की म कयासिक हूँ अर काँई कर्यो हूँ जिकुँ थानै हिम्मत मिल सकै अर थे म्हारा हालचाल जाण सको। 23 परमेश्वर पिता अर प्रबु ईशु मसी, मसी भायाँ न बिश्वास क सागै शान्ति अर प्यार-प्रेम देतो रेवै। 24 अर जखा आपणा प्रबु ईशु मसीकुँ ना मिटबाळो प्यार-प्रेम राखै ह, बा सगळा प परमेश्वर की दया होती रेवै।

फिलिप्पिया नगरी क नाम पौलुस को कागज

भुमिका:-

रोम परदेस क मकिदुनिया म, पौलुस की बसायड़ी युरोप की भौम म पेली मंडळी न ओ कागज मांडचो गयो हो। जद पौलुस जेळ म हो बि टेमका ओ कागज मांडचो गयो हो, अर बा दिना म मसी को काम करबाळा दुसरा बिस्वासी बिनै दिन घालर्या हा अर फिलिपी मंडळी म गळत सीख फैलगी ही। ई बजैस बो बोळो दुखी हो। ईकै पाछै बी ओ कागज राजी-खुशी अर भरोसा न दिखावै ह, जिनै सिरफ ईशु मसी म पौलुस का डुंगा(उंडा) बिश्वास ऊँ ई समझ्यो जा सकै ह। फिलिप्पिया का मसी बिश्वासी पौलुस न जरुरत की चिजा भेंट करी ही ई बजैस बाको धनैवाद करबा ताँई पौलुस ओ कागज मांडचो हो। बो ई मौका को फायदो बानै आसबासन देबा ताँई उठावै जिसै बे बिका अर सागै की सागै खुद का सगळा दुख-तकलीफा म हिम्मत अर भरोसो राखै। गरज अर गुमान की झाघा ईशु का नरम सभाव न लेबा की पौलुस बासै अरदास करै ह। बो बानै याद दिलावै की मसी म बाको जीवन परमेश्वर की दया को दान ह जखो एहूदी बिधी-बिधाना न मानबा स कोनी मिल्यो पण बिश्वास करबा स मिल्यो ह। बो बी राजी खुशी अर शांती क बागा म मांडै ह जिनै परमेश्वर बा मिनखा न देवै ह जखा मसी क सागै एळ्हो करर जीवै ह। फिलिप्पिया की मंडळी स पौलुस का उँडा प्यार प्रेम को बेरो ई कागज ऊँ चालै ह। मसी बिश्वास अर जीवन म राजी खुशी, भरोसो, एळ्हो अर मसी म बण्यो रेहबा प जोर देणो ई कागज की खासीयत ह।

रुपरेखा:-

राजी खुशी का समचार (1:1-11)

पौलुस का दिनमान (1:12-23)

मसी म जीवन (1:24-2:18)

तीमुथियुस अर इप्रुदीतुस ताँई काम जचाबो (2:19-30)

बैरी अर तूमता क खिलाफ चेताणो (3:1-4:9)

पौलुस अर बिकाळा फिलिप्पी भाइला (4:10-20)
कागज बन्द करबो (4:21-23)

राजी खुशी का समचार

1 1-2^{मैं}है ईशु मसी का गुलाम पौलुस अर तीपुथियुस आ चिठ्ठी फिलिप्पी नगरी म मसी क सागै मेळराखबाळा परमेश्वर का सगळा पबितर मिनखा, सागै की सागै मंडली की देख-भाल करबाळा अर काम म हाथ बटाबाळानै माण्डर्या हो। था सगळा प आपण परमेश्वर पिता अर प्रबु ईशु मसी कानीऊँ थानै उपकार अर स्यांती मिलती रेह।

पौलुस की अरदास अर धनैवाद

3जद बी म थानै याद करू जणा थार ताँई परमेश्वर पिता को धनैवाद करू हूँ; 4अर जद बी म था सगळा ताँई परमेश्वर^{ऊँ} अरदास करू जणा म राजी हियाऊँ थारै ताँई अरदास करू हूँ, 5क्युंक पेलडै दिनऊँ लेर ईब ताँई चोखा समचार न फिलाबा म थे मेरो सागो देर्या हो। 6अर मनै पक्को बिश्वास ह की जखो चोखो काम परमेश्वर थार म चालू कर्यो हो बो ई काम न जी दिन ईशु मसी आसी बी दिन ताँई पूरो कर देसी। 7थारै बारा म अय्यां सोचबो मेर ताँई सई ह, क्युंक थे मेरा काळज्या म बसर्या हो। बी सोभाग म था सगळा की पाँती ह जिखो परमेश्वर मनै दियो, चाएस म जद अब जेल म हूँ अर नहिस जद म आजादीऊँ चोखा समचार क सच को सबूत देर बिनै पूक्ता करबा म लागर्यो हो। 8म

ईशु मसी का हिया जंय्यां को लगाव राखर थारै सगळा ताँई तरसर्यो हूँ, अर ई बात को गुवा खुद परमेश्वर ह। 9थारे प्यारे प्रेम सांचा ज्ञान अर सई समझ क सागै बोलो-बोलो बढ़तो जावै ई ताँई म अरदास करू हूँ। 10जिऊँ थे चोखो काँई ह इनै टाळर, ईशु मसी क आबाळा दिन म सगळा बुरा कामा^{ऊँ} अर कलंकऊँ आजाद होज्यास्यो। 11धारमिकता का चोखा लखणाऊँ थारे जीवन भरज्यावै, जखो परमेश्वर की मेमा अर जै-जैकार ताँई ईशु मसी ऊँ मिले ह।

पौलुस का दुखा म चोखा समचार को फळबो

12अब भायडो, जखी बाता मेरै सागै बिती ह बाऊँ पक्काई चोखो समचार बोलो फळयो ह। म चावू हूँ क थे आ बाता न जाणो। 13ई बजौऊँ सगळा मेहला का सिपाया न अर दुसरा मिनखा न ई बात को बेरो पड़गो की म मसी को सेवक हूँ ई ताँई म केद म हूँ। 14अर म सांकळा म बंधर्यो हूँ ई बजौऊँई प्रबु म बिश्वास राखबाळा घणकराक भाईड़ा न घणीसारी हिम्मत मिली ह अर बे चोखा समचार न बेधड़क होर सुणार्या हीं। 15-17आ बात बी साची ह की क्युंक ह जखा जळता बळता अर लड़ाई करबा ताँई मसी को हैल्लो पाड़ी ही। बे सांचा मनऊँ मसी को हैल्लो कोनी पाड़े पण खुद की गरज काडबा ताँई मसी को

परचार करर मेरी केद की टेम म ई बे मनै दुख देबो चावी ही, पण दुसरा भली मनस्याऊँ मसी को परचार करी हीं, अ अय्यां प्यार ऊँ करै ह क्युंक अ जाणै ह की परमेशबर मनै चोखा समचार न सबूत देर साबित करबा को काम दिन्यो ह। 18मेरै ईऊँ क्युंई फरक कोनी पड़ै। चाए बुरी मनस्याऊँ अर चाए भली मनस्याऊँ आ सगळी तर्याऊँ मसी को ई परचार होयो ह अर आ बाताऊँ म राजी हू अर राजी ई रेस्यु।

मेर ताँई जीबो मसी ह

19क्युंक म ई बात न आछयां जाणू हूँ की थारी अरदास अर ईशु मसी की आत्मा कानीऊँ मिलेड़ा साराऊँ म कैदऊँ छुट ज्याऊँलो। 20मेरी दिली ईच्छा अर आसा ह की म कदई मेरा काम म शर्मिन्दा न होऊ, पण हर टेम अर खासकर ईब म हिम्मतऊँ भरज्याऊँ जिऊ चाएस म जिऊ अर मरू बस मेरी काया क जरिये मसी की मेमा होवै। 21मेर ताँई जीबो तो मसी ह, अर मरबो सऊ चोखो। 22पण ज म काया म जीतो रिह्यो तो म बोळा फायदा देबाळा काम कर सकू हूँ, आ मऊँ कुणसी बात न टाळबो चाए आ म कोनी जाणू। 23म आ दो मता म अळजर्यो हूँ। ई काया न छोड़र मसी क सागे रेहबो तो म बोळो चावू हूँ क्युंक ओ मेर ताँई घणोई चोखो ह; 24पण काया म मेरो जीबो थार ताँई जरुरी ह। 25म पक्कोई आ जाणू हूँ क म जिन्दो रेहस्यूँ। अर थार बिश्वास अर आनंद न बढाबा ताँई थारै सागई रेस्यूँ। 26अर थार कनै ओज्यू आबा क बाद

मेरी बजैऊँ थानै ईशु मसी प घमण्ड करबा की ओर बी बोळी बजै मिलसी।

27जणा मोटी बात आ ह की थारा जीवन की उठ बेठ सीरफ मसी का चोखा समचार जोगी होणी चाए; जिऊ म थारै बारा म आई सुणू क थे एकैई मकसद ताँई खड़्या हो अर एकैई मनस्यां राखर चोखा समचारऊँ मिलेड़ा बिश्वास ताँई कड़ी मेनत करतार्यो हो, चाए म थानै आर देखूँ चाए कोनी देखूँ, 28अर थे थारा बेरियाऊँ खंयाई कोनी डरो ओ बा ताँई ई बात को सबुत ह क बे हार ज्यासी अर थे जीत ज्यास्यो, क्युँक आ जै परमेशबर थानै देवै ह। 29क्युंक मसी प बिश्वास करबा को सौभाग ई नई पण बि ताँई दुख उठाबा को बी सौभाग थानै दियड़ो ह; 30क्युंक थे बी बय्याकिई लड़ाई लड़र्या हो जखी म लड़तो आयो हूँ इनै थे देख्या बी हो अर जय्यां थे सुणौ हो क ईब ताँई बी, म इनै लड़र्यो हूँ।

मसी जय्यां को सभाव गाखो

2 ईशु मसी म ज थानै हिम्मत मिली हो, बिका प्यार-प्रेम म थानै स्यांती मिली हो, परमेशबर की आत्मा क सागे थारो संगरो ह अर थार म नरमाई अर दया ह, 2जणा म थारऊँ आ चावूँ क थे एक जय्यां का बिच्यार, एक जय्यां को प्यार-प्रेम, एक जय्यां की आत्मा अर मनस्यां राखर मनै ठाडो राजी कर द्यो। 3खुद की गरज काढबा अर बुरी इंछच्या राखर फांप मारबा ताँई क्युंई मना करो, पण छोटा बाप का बणर एक-दुजा न खुदऊँ चोखो मानो। 4अर हरेक खुद

का फायदा की ई नई पण दुसरा की बी चिन्त्या राखो।

५जय्यां को सभाव ईशु मसी को हो, बच्यां को ई थारो सभाव होणो चाएः

६बो परमेश्बर का सभाव म होर बी परमेश्बर क बराबर होबा को हक कोनी जतायो।

७पण सक्युं तजर् गुलाम को सभाव धरर् मिनख रूप म जलम लियो। अय्याँ मिनख होर

८बो खुद न अतो झुका लियो अर मरबा तक ओडाया गेल चालतो रिह्यो अर अठै ताँई सुकी की मौत न बी गळे लगाली।

९ई बजैऊँ परमेश्बर बिनै सबऊँ ऊँची झाघा प बिठायो अर सगळा नामा म सबऊँ बडो नाम दिन्यो।

१०जीऊँ ईशु का नाम को आदरमान करबा ताँई ईश्बर नगरी का, धरती का अर धरती तळे का सगळा गोडा टेकिंगा,

११अर परमेश्बर पिता की मेमा करबा ताँई होरेर खुद की जबान ऊँ मानिंगा क ‘ईशु मसी ई “प्रबु” ह।’

तारा की जंय्यां चिलको

१२मेरा प्यारा भाईलो, ई ताँई जय्यां थे सदाऊँ मेरा हुकमा न मान्या हो जद म थारै सागै हो, ओ और बी जरूरी ह की ईब म थारै कनै कोनी हूँ जणा बी थे मेरा हुकमा न मानो। अर प्रबु का डर म धुजता होया थारा उझार न सूल पुरो करो; १३क्युंक बो परमेश्बर ई ह जखो थार म काम करै ह, अर बोई थानै बिका

मकसद न पुरो करबा की इंछचा अर शक्ति देवै ह।

१४सक्युं बिना बड़बडाट क अर बिना जिदा-जादी क कर्या करो, १५जीऊँ थे ई जगत म रेहबाळा कुटिचर अर पापी मिनखा म परमेश्बर का खरा अर बिना बलेम हाळा सायर टाबर बण सको। अर आसमान म तारा जय्यां चिलकै ह बच्यां थानै बी जगत का मिनखा म चिलकणो चाए, १६अर बानै जीवन को चोखो समचार सुणाणो चाए जणा आ सगळी बाता ताँई मनै मसी का आबाळा दिन म थारपै फकर होसी क मेरा सगळा काम अर भाग-दोड अळी कोनी गई।

१७थारो बिश्वास परमेश्बर क सामै बली अर याजक की सेवा जय्यां को ह अर ई बली प ज मेरो लोय बी चढाणो पड़े जणा म ई बात ताँई राजी हूँ अर आ खुशी म था सगळा क सागै बाँटर्यो हूँ। १८बच्यां ई थानै बी राजी होणो चाए अर थारी खुशी को बाँटो मेरै सागै करणो चाए।

तीमुथियुस न भेजबो

१९ज प्रबु ईशु चायो तो, तीमुथियुस न थारै कनै बेगोसो भेजबा की म आस राखूँ हूँ जीऊँ थारा समचार सुणर मेरी खुशी और बढ़ ज्यावै। २०बोई ह जखो मेरो सो मन राखै ह अर सचा मनऊँ थारै भला की सोचै ह। २१क्युंक बाकी सगळा ह जखा खुद को मतबल काढबा ताँई लाग्या रेह्बी ह, ईशु मसी का कामा की बानै जमाई चिनत्या कोनी। २२जय्यां बेटो बाप क सागै मिलर मेनत करै ह बच्यां ई तिमुथी मेरै सागै मिलर चोखा समचार न फेलाबा ताँई मेनत कर्ही ह अर

बिकी काबलियत न थे खुदई चोरखी तर्या जाणो हो। 23 अर जय्याई मनै ई बात को बेरो पड़सी क मेरै सागै काँई होबाळी ह बय्याई म बेगोसोक बिनै थारै कनै भेजबा की आस राखूं हूं। 24 अर प्रबु प मनै पक्को भरोसो ह क म बी बेगोई थारै कनै आज्यास्यूं।

इपफ्रदितुस न भेजबो

25 आपणो भाईङ्गो इपफ्रदितुस न जखो मेरै सागै काम करबाळो, मेरी जय्यां लड़बाळो, अर सेवा म थारै कानिँ मेरी मद्द करबा ताँई थारो भेजेङ्गो डाकीयो अर सेवक ह बिनै थारै कनै भेजबो म जरुरी समझूं हूं। 26 बो थानै देखबा की चिनत्या राखै ह। अर बो बोलो उदास ह, क्युंकि थे बिकी बिमारी क बारा म सुण्या हो। 27 बो साँच्याई बिमार हो अठै ताँई बो मरबाळो सो होगो हो पण परमेश्वर बिकै सागै-सागै मेर प बी दया करीं जीऊँ मनै दुख प दुख न होवै। 28 बिनै थारै कनै भेजबा की म बोली इछच्या राखूं हूं जीऊँ बिनै पाढा देखर थे राजी होज्यावो अर इसै मेरो बी दुख कट ज्यासी। 29 प्रबु म राजी होर भाई-भाई की जय्यां बिऊँ मिलीयो अर बिकै जय्याई मिनखा को मान करियो। 30 क्युंकि मसी का काम ताँई बो आपकी जान प खेलर मौत क साँकडै आयो हो, जीऊँ जखी सेवा थारै कानीऊँ मेरी कोनी हो सकी बिनै बो पुरी करी।

मसी न जाणबो अनमोल ह

3 आखिरकार मेरा भाईङ्गो प्रबु म राजी होता रह्यो। थानै अ बाता ओज्यु

मांडबा म मनै तो कोई आँट कोनी, अर ज म अय्यां मांडूं बी हूं जणा आऊँ थारी हिफाजत ई होसी। 2बा कमिणा, गंडकडाऊँ ध्यान ऊँ रेह्यो जखा बुरा काम करीं हीं। बे काया की सुन्नत करबा प जोर देवीं हीं। 3 क्युंकि सची सुन्नत हाळा तो आपाई हा बे कोनी, क्युंकि आपा परमेश्वर न बिकी पबित्र आत्मा ऊँ ध्यावां हा अर आपां ई जगत की बाता प नई पण मसी ईशु प गुमान करा हा। 4म अय्यां की बाता प घमण्ड कर सको हो, ज कोई सोचै ह की बो जगत की बाता प घमण्ड कर सकै ह जणा मेरै कनै आपै घमण्ड करबा ताँई बिऊँ बी बडी बजै ह।

5म जद आठ दिन को हो जणा मेरी सुन्नत होई ही। म जलम जात इस्त्राएली, बिन्यामिन का कुणबा को अर इब्रानी माँ-बाप ऊँ पैदा होयङ्गो सागी इब्रानी हूं। अर जठै ताँई बिधी-विधाना म लगाव राखबा की बात ह जणा म फरीसी हूं। 6ज मेरा जोश क बारां म सुणबो चाओौ जणा म बिश्वसी मंडळी न दिन घालबाळो; अर बिधी-विधाना का हुकमा न मानबाळो धर्मी अर निरदोष आदमी हो।

7पण जखी-जखी बाता प मनै गुमान हो, बा बाता न म मसी ताँई रुद्याई जोगी कोनी समझ्यो हूं। 8अर म आई बाता न नई पण सगळी बाता न मेरा प्रबु ईशु मसी का ज्ञान का मोल क सामै घाटा की समझूं हूं। अर मसी ताँई म आनै कुड़ो-करकट जाणर बगा दियो जीऊँ म मसी न पाऊँ 9अर म सगळो को सगळो बिको होज्या-ऊँ। म खुद की धार्मिकता की बजै-ऊँ धर्मी कोनी

हूं जखी बिधी-विधाना म मंडेडा धरम का काम करबा^{ऊँ} आवै ह, पण बि धार्मिकता की बजैऊँ धर्मी हूं जखी मसी म बिश्वास क जरिए परमेश्वर कानिऊँ आवै ह अर ओ बिश्वास करबा ऊँ ई होवै ह। 10-11म आ आस राखुँ हूं क म^{बी} मरर मौत ऊँ ओज्युँ जिन्दो हो ज्यास्थूं। अर ई आस ताँई म मसी न जाणबो चाऊँ हूं अर बिकी बि शक्ति न मेसुस करबो चाऊँ जीऊँ बो मर्या पाछै ओज्यूँ जिन्दो होगो हो। अर म बिकी सी पिडा उठार बिकासा मरबा म सामिल होणो चाऊँ हूं।

निशाना कानी भागो

12म ओ दावो कोनी करूँ क म सक्युँ पुरो कर करानियो अर सगळो सिद्ध होगो। पण म बि ईनाम न जीतबा ताँई कडी मेनत करयो हूं जीताँई ईशु मसी मनै पेल्या^{ऊँ} खुद ताँई जीत लिन्यो ह। 13मेरा भाईडो, मेरी अय्यां की भावना कोनी क म जीतगो; पण ओ एक काम करूँ हूं क गेलडी बाता न भुलर निशाना क कनै पुँचबा को जतन करूँ हूं, 14जीऊँ म निशाना कानी सीदो-सीदो भागर बो ईनाम जीतल्यूँ जीताँई परमेश्वर ईशु मसी क जरिए मनै ईश्वर नगरी जीवन ताँई बुलायो ह। 15आपां सगळा न जखा आत्मा म पळा हां अय्या कोई एकसो बिच्यार राखणो चाए पण ज थार म ऊँ क्युंक न्यारा बिच्यार राखै ह जणा बिनै परमेश्वर थारै प परगट कर देसी। 16जो^कयु बी हो आओ ल्यो आपा एकसा नियम न मानर आगैऊँ-आगै बढता जावां जिनै ईब ताँई मानर आया हां।

17मेरा भाईडो, मेरी जय्यां की चाल चालो, अर बानै बी ध्यान ऊँ देखो जखा अय्यां कि ई चाल चालै ह जय्यां की थे म्हार म देखो हो। 18म थानै पेल्या बी कई बार आ बात बता दिनी ही अर ईब बी म थानै आँसुआ क सागै ओज्यूँ बताऊँ हूं, क अय्यां का बोळा ही जखा सुळी प मसी की मौत का बैरी बणर जीवै ह। 19अर बे नरग म नास होबा जार्या हीं। क्युँ क बाको पेट ई बा ताँई परमेश्वर ह। जखी बाताऊँ शरम आणी चाए, बण बाता म बे शरम कोनी करीं पण उलटा का बण प घमंड करीं अर जखी संसार की चिजा ह बाकै बारा म ई सोची हीं। 20पण आपा तो ईश्वर नगरी का रेहबाळा हां, अर आपणा न बचाबाळा प्रबु ईशु मसी की जखो ईश्वर नगरी ऊँ आबाळो ह आस लगार बाट उडिकर्या हा। 21बो सगळी चिजा न आपकै बस म करबाळी खुद की शक्ती ऊँ आपणी माडी अर नश्वर काया न बदलर खुद की मेहमाभरी काया जय्यां की कर देसी।

हिदायता

4 मेरा भाईडो अर मेरा काळज्या का तुकडो म थानै बोळो याद करूँ हूं। थे मनै राजी करो हो अर मनै थार प गुमान ह। मेरा प्यारा भाईडो, थारो जीवन प्रबु म अय्याँई मजबुत बण्यो रेहणो चाए। 2म यओदीया अर सन्तुखे ऊँ अरदास करूँ हूं क दोन्युँ जणी प्रबु म आपसरी म मेळ-मिळाप करर आपसर्या म भाणा की जय्यां रेहै। 3अर मेरा बिश्वासी सीरी, म तेऱ्हा बी अरदास करर आ चाऊँ हूं

क जखी लुगांया मेरै सागै चोखा समचार न फेलाबा म क्लेमेंस अर मेरा ओर बी सीर्या क सागै मेहँत करी ही बाको सागो दिया कर क्युंक बाको नाम बी जीवन की पौथी म मंडेडो ह। 4प्रबु को संगरो राख'र सदाई राजी-खुशी ऊँ रेह्यों, म ओज्यूँ थानै रुखूँ हूँ, राजी-खुशी ऊँ रेह्यों। 5सगळा ताँई नरमाई को भिवार राखो। क्युं क प्रबु बेगोई आर्यो ह। 6कोई बी बात की चिनत्या मना करो, पण परमेश्वर को सगळी बात ताँई दिल ऊँ धनैवाद करता होया थानै जखो चाए ह बि ताँई बिऊँ अरदास अर बिनती कर'र मांगता रह्यों। 7जणा थानै परमेश्वर कानीऊँ बा स्यांती मिलसी जखी मिनखा की सोच ऊँ बोली परै ह अर आ स्यांती थारा दिल अर हिया न ईशु मसी म थारी रुखाळी करसी। 8मेरा भाईडो, जखी बाता साँची, आदरमान करबाळी, धार्मिक, खरी, प्यारी, सदगुण, चोखी, बडाई जोगी ह बा बाता ऊँ थे थारी बुझी न भरल्यो। 9जो क्युँ थे मेरी बाता अर कामा ऊँ सीख्यो अर पायो ह बानै लागू कर्याकरो जणा परमेश्वर जखो आपणा न स्यांती देवै ह थारै सागै रेह्सी।

दान ताँई धनैवाद देबो

10म प्रबु म बोलो राजी हूँ क अत्ता दिना पाछै थे ओज्यूँ मेरी चिनत्या करी; म आ कोनी रुखूँ क थे मेरी चिनत्या करबो छोड़ दिन्या क्युँ क म जाणूँ हूँ क थानै ईनै दिखाबा को मोको कोनी मिल्यो। 11अर मनै कोई चिज की जरूरत ह ई ताँई अ बाता कोनी बोलर्यो, क्युँ क मेरै कनै जीसो बि ह बिमैई सबर करबो म

सीख्यो हूँ। 12घाटा मोसी म कय्यां अर बोलो सारको होबा म कय्यां जीणो चाए म आ बात चोख्यां जाणू हूँ, कद बी अर कठै बी चाए म धापेडो हो अर चाए स म बास्यो हो, चाए मेरै कनै थोडो हो चाए स बोलो सारको हो म ओ भेद सीख लियो क बिमै सबर राखूँ। 13अर मसी कानीऊँ मिलेडी शक्ति ऊँ म हरेक हालाता को सामनो करबा की हिमत राखूँ हूँ। 14पण ओ बोलो चोखो हो क मेरा दुख म थे मेरो सागो दियो। 15फिलिप्पियो, थानै ई बात को आच्छयां बेरो ह क चोखा समचार को परचार करबा हाला शुरू का दिना म जद म मकिदुनिया ऊँ भीर होयो हो जणाऊँ थारी ई बिश्वासी मंडळी एक अय्यां की ही जखी मेरी मद्द करी; अर थे ई एक अय्यां का हा जखा मेरा फायदा अर घाटा-मोसी म मेरो सागो दियो हो। 16अर जद मनै थिस्सलुनिकी म बी पिस्सा-टक्का की जुरत पड़ी ही जणा बी थे ओज्यूँ मेर ताँई क्युँ ना क्युँ भेजता हा। 17ईको मतबल ओ कोनी क मनै दान चाए; पण म थारी बही म बढतो होयो फायदो देखबो चाऊँ हूँ। 18मेरै कनै थारो देयडो सक्युँ ह अर जरूरतऊँ बी बती ह: अर जखी चिजा थे ईप्रदितुस क हाथां मनै भेजी बे मनै मिलगी अर बे मिट्ठी अर खुशबोई देबाळी भेंट ह जखी लेबा जोगी अर परमेश्वर न राजी करबाला बलिदान जय्यां की ह। 19अर बिका सगळा भर्यापुरा धन क सागै मेरो परमेश्वर ईशु मसी क हाथां थारी सगळी जरूरता न पुरी करसी। 20आपणा परमेश्वर अर पिता की मेहमा जुग-जुग होती रेह्वै। अय्यांई होज्यावै।

कागद की आखरी बातां

21 सगळा परमेश्वर का मिनखा न जखा ईशु मसी को संगरो राखै ह बानै मेरो जय मसी की। अर जखा भाईड़ा मैरै सागै अठै ह बा कानीऊँ थानै जय

मसी की पुचै। 22 परमेश्वर का सगळा मिनख जखा खासकर कैसर का महल म काम करबाऊ हीं बाकै कानिऊँ बी थानै जय मसी की पुचै। 23 आपणा प्रबु ईशु मसी की दया थाई सगळा के उपर बणी रेहै।

कुलुस्सिया की मंडळी न पौलुस को कागज

भूमिका:-

छोटा एशिया म इफिसुस नगरी क अगुणी दिशा म बसेडी कुलुस्से नगरी की मंडळी न पौलुस ओ कागज मांडचो। ई मंडळी न पौलुस कोनी बणाई पण आ बि झाघा म ही जिकी चिनत्यां पौलुस कर्या करतो हो। जंय्यां की रोम राज-पाट का परदेस अखाया की राजधानी इफिसुस मठँ मसी सेवक न पौलुस भेज्यों। पौलुस न ई बात को बेरो पड़यो क कुलुस्से की मंडळी म क्युंक गळत सीख देबाळा ह, अ परमेश्वर न जाणबा अर उद्धार पाण ताँई मिनखा न क्युंक मान्या-थान्या आत्मिक बढ़का अर अधिकारीयां न पुजबा की सीख प जोर देता हा। अ कहता हा, क्युंक मानी-थानी धर्म विधी जय्यां खतनो, खाण-पाण अर अय्यां का ओर बी कड़ा नियमा को पालन करनो जरुरी ह।

आ बाता को बिरोध करबा ताँई पौलुस साढ़ो मसी चोखा समचार क सागै ओ कागज मांडयो। बिको जीगरी-जबाब ओ ह की, “ईशु मसी पुरो उद्धार करबा म समर्थ ह, अर अय्यां की धर्म विधी अर बिश्वास मिनखा न बिसै दुर करै ह। मसीऊँ ही परमेश्वर ई सृष्टी न रच्यों अर बिकाळा खुन स ई इनै आपकै कनै ल्यार्यो ह। सिरफ मसी म ई जगत का उद्धार की आस ह।” जणा पौलुस बिश्वासीयां का जीवन ताँई ई महान सीख को मतबल बतावै ह। आ ध्यान देबाळी बात ह क तुखिकुस, जखो पौलुस को ओ कागज कुलुस्से लेग्यो हो बिकै सागै उनेसिमुस बी हो(ओ बोई चरुआरो ह जीकै हिमाईती म पौलुस फिलेमोन क नाम कागज म मांडचो हो)।

रूप-रेखा:-

भुमिका (1:1-8)

मसी को सभाव अर का (1:9-2:19)

मसी म नयो जीवन (2:20-4:6)

कागज बन्द करबो (4:7-18)

राजी खुशी का समचार

1 १-२म परमेश्वर की ईच्छा गेल मसी'ऊ भेजेडो खास चेलो पौलुस अर तीमुथियुस आ चिट्ठी कुलुस्से नगरी म रेहबाळा मसी प बिश्वास करबाळा पवितर अर बिश्वास-जोगा मिनखा न माणङ्गर्या हा। था सगळा प आपणा परमेश्वर पिता की दया अर स्यांती होती रेह।

धनैवाद की अरदास

३म्हें जद बी अरदास करां हा, जणा सदाई आपणा प्रबु ईशु मसी का पिता परमेश्वर न थार ताँई धनैवाद द्या हां, ४क्युं'क थे मसी ईशु प बिश्वास अर सगळा पवितर बिश्वास्या'ऊँ प्यार-प्रेम राखो हो, आ बाता क बारा म म्हें सुण्या हां। ५अच्यां बि आस करेडी चिजा की बजैऊँ होयो ह जखी थार ताँई ईश्वर नगरी म धेरेडी ह। अर जिकै बारा म थे पेल्याऊँ ई चोखा समचार जिखो साँचो ह बिमै सुण लिया हो। ६चोखो समचार सगळा जगत म फळर्यो-फुलर्यो अर फेलर्यो बि ह, बय्याँई जद थे परमेश्वर की दया क बारा म सुण्या अर साच्याँई बिनै समझ्या हा जद'ऊ लेर थार म बी चोखो समचार फळर्यो-फुलर्यो अर फेलर्यो बि ह। ७आपणो प्रेमी भाँई इपफ्रास, जखो आपणै ताँई मसी को संगी बिश्वास-जोगो दास ह बिऊँ थानै परमेश्वर की दया की सीख मिली ही। ८पवितर आत्मा थानै प्रेम करबाळो हियो दियो ह बिकै बारा म बो म्हानै बतायो ह। ९ई बजेऊँ जनाडैऊँ म्हें थारै बारा म सुण्यो हो थारै ताँई अरदास करबो कोनी छोडयो। म्हें

अरदास करां हा क परमेश्वर थानै बिकी ईच्छा का गेरा ज्ञान, सगळी बुद्धी अर समझ ऊँ भैरै जिखो पवितर आत्मा देवै ह। १०जीऊँ थे प्रबु जय्यां चावै ह बय्यां जी सको अर हर बाता म सदाई प्रबु मसी न राजी राख सको। थारै जीवन म सत्-कर्मा का फळ लागै अर थे परमेश्वर का ज्ञान म दिन-दिन बढ़ता रह्यो। ११बो थानै आपकी महमा भरी शक्ति ऊँ मजबुत बणावै ह जिऊँ थे थ्यावस राख'र सक्युँ सेह सको। अर राजी खुशी ऊँ १२परमेश्वर पिता न धनैवाद देता रह्यो, बो थानै ई जोगो बणायो ह की उजाळा का राज म जो क्युँ परमेश्वर आपका मिनखा ताँई धर राख्यो ह बिमै थारी पाँती होवै। १३परमेश्वर आपणा न अन्धकार की शक्ति ऊँ छुड़ा'र आपका लाडला बेटा क राज म बाड़्यो ह। १४बिका बेटा क जरिए आपणा न छुटकारो मिल्यो ह मतबल आपणा पांपा की माफी।

मसी को सभाव अर काम

१५दिखबालो ईशु मसी ना दिखबाळा परमेश्वर की जय्या ह। बो सगळी चिजा म पेलो ह अर सगळी सृष्टी'ऊँ बोळो महान। १६बिऊँ ई परमेश्वर सगळी चिजा बणायो चाए बे ईश्वर नगरी की हो अर चाए धरती की, दिखबाळी हो अर न दिखबाळी (आत्मिक शक्तियां न मिलार), चाए राजा हो चाए महाराजा, चाए राजकरबाळो हो चाए कोई अधिकारी सक्युँ बिऊँ ई रचायो गयो ह अर बी ताँई ही रचायो गयो ह। १७सगळा ऊँ पेल्या परमेश्वर क सागै मसी हो अर मसी की शक्ति'ऊँ ई सगळी चिजा

बणी रेवै ह। 18 ई काया रुपी मंडळी को सिर अर जीवन की शुरूआत बोई ह। अर मरेड़ा म ऊँ जी उठबाळा म पेली पोत को बोई ह, ई बजैऊँ सगळी बाता म पेली झङ्घा बिनैई मेलै। 19 क्युँक परमेश्वर की खुशी आ ही क बिका सगळा का सगळा गुण बिमै बास करै। 20 अर बिऊँ ई परमेश्वर सगळा ब्रह्माण्ड ऊँ मेळ-मिळाप करबो चायो, बा सगळा ऊँ बी जखा धरती अर ईश्वर नगरी का ह। बिकाळा लोय ऊँ ई परमेश्वर मेळ-मिळाप करवायो जिनै मसी सुळी उपर बहायो हो। 21 बो बी एक टेम हो जद थे थारा बुरा बिच्यारा अर बुरा कामा की बजेऊँ परमेश्वर ऊँ आंतरै हा अर बिका बेरी हा। 22 पण ईब, हाड माँस की काया म बिकी मौत ऊँ परमेश्वर थारै ऊँ बी मेळ-मिळाप कर लियो। जिऊँ थानै पबितर, बिना कलंक अर निरदोष बणार आपके सामै लेर आवै। 23 ओ जणा ई हो सकै ह जद थे बिश्वास म एक झङ्घा अर अटळ बण्या रह्यो अर जी चोखा समचार न थे सुण्या हो बिऊँ मिलेडी बि आस न ना तजो। ओ बोई चोखो समचार ह जिको म पौलुस गुलाम बण्यो हूँ अर ईकी ई जगत का सगळा मिनखा न सीख देर्इ गई ह।

मंडळी ताँई पौलुस का काम

24 मसी की सेवा करतो होयो म थार ताँई दुख उठाबानै राजी हूँ, अर म मसी की काया मतबल बिश्वास्या की मण्डळी ताँई मसी का सेवका की पीडा न भोगर्यो हूँ। 25 थारै भला ताँई परमेश्वर मनै जखो हुकम दिन्यो हो, बि बजेऊँ ई म

बिश्वास्या की मण्डळी को दास बणायो गयो हूँ। जीऊँ म परमेश्वर का चोखा समचार को भरपूरी ऊँ हैल्लो पाडँ। 26 ओ चोखो समचार भेद भर्यो सत है जखो जुगाद ऊँ ई सगळी पीढ़याँ की आख्याँ ऊँ ओला म हो। पण ईब परमेश्वर का टाळेड़ा मिनखा प इनै परमेश्वर कानीऊँ परगट कर दिन्यो गयो ह। 27 परमेश्वर आपका टाळेड़ा मिनखा प बी भेद भर्यो सत न परगट कर्यो जया बो मनस्या बणा राखी ही ओ सत बोलो मेमा-भर्यो ह, अर ओ सगळा ताँई ह। ओ भेद भर्यो सत ओ ह की मसी गेर एहूदि मिनखा म बी रेहवै ह जखो महमा की आस ह। 28 म्हें मसी को परचार करर हरेक मिनखा न चितावां अर सगळा ज्ञान ऊँ बानै सीखावा, जिऊँ हरेक मिनख न मसी म सिद्ध करर परमेश्वर क सामनै हाजीर कर सकां। 29 ई ताँई तो म, मेर म दम क सागै काम करबाळी बिकी शक्ति ऊँ कलड़ी मेनत करर्यो हूँ।

2 म चावूँ क थे ई बात न जाणो की म थार ताँई, लोदिकीया म रेहबाळा अर बा सगळा ताँई जाऊँ मेरो आमनो-सामनो कोनी होयो, मनै बाकी बोली चित्या ह। 2 ओ म ई ताँई करूँ हूँ की, बाका काळज्या न हिम्मत बंधै अर बे आपसरी का प्यार-प्रेम म बँध जावै, अर भरी-परी पङ्की समझ जखी परमेश्वर पिता का भेद न सूल जाणबा ऊ आवै ह। ओ भेद मसी ह जिनै परमेश्वर खोल्यो ह। 3 जिमै सगळा ज्ञान अर बुद्धि को खजानो लुखेड़ो ह। 4 अख्याँ म ई ताँई बोलूँ हूँ क कोई थानै आपकी मिट्ठी-मिट्ठी बाता ऊँ धोको न दे सकै। 5 अख्याँ तो म काया ऊँ

थाँ दूर हूँ पण मन'ऊँ थारै कनै हूँ, म
राजी हूँ अर सूर्णयो हूँ क थे सही ढंग ऊँ
हो अर मसी म थारो बिश्वास मजबुत ह।

मसी म भर्योपुरो जीवन

६ई ताँई जय्यां थे मसी ईशु न प्रबु मान्यो
ह, बय्यां ई बिमै बण्या रह्यो। ७अर जय्यां
थानै सीखायो गयो ह बय्यां ई थारी जड़ा
न बिमै फैलार बढ़ता जाओ। बिपै थारा
जिवना की निम गेरो। अर बिश्वास म
पाञ्चा होर बिको धनैवाद करता रेह्यो।

८९साँच्चाई मसी ईशु जखो मिनख
बणर आयो बिमै ईश्वर को सगळो सभाव
भर्पूरी क सागै बास करै ह। ई ताँई
थे बेमतलब की जिरे-बाजी'ऊ समबळर
रेवो कणा कोई थानै आको गुलाम ना
बणा ले क्युक अ मसी कानीऊँ नई
पण मिनखा का रीती-रिवाजा अर
जगत प राज करबाळी आत्मा कानीऊँ
आवै ह। १०अर बिमैई थे भर्यो-पूर्यो
हो, जिखो सगळी राज करबाळी अर
अधिकार राखबाळी शक्तिया'ऊ बोलो
बडो ह। ११थारा खुद का पापी सभाव
का छुटकारा ताँई थारी सुन्नत^a मिनखा
क हाथा ऊँ नई पण मसी'ऊ करेडी ह।
१२अर जद थे बतिस्मो^b लिया जण मसी
क सागै गाड़या गया हा अर परमेश्वर
की काम करबाळी शक्ति प थारा बिश्वास
ऊँ ओज्युँ मसी क सागै जीवाया गया हा।
जी मसी न परमेश्वर मरेडा म ऊँ ओज्युँ
जीवायो हो।

१३मसी प बिश्वास करबा'ऊ पेल्या थे
थारा पापा की बजैऊँ आत्मा म मरेडा
अर बिना सुन्नत हाळा हा। पण ईब
परमेश्वर थानै मसी क सागै जीवायो
अर सगळा पापां ऊँ आपणा न माफ कर
दिन्यो; १४अर बिधी-विधान का बी लेख
न जखो आपणै नाम अर खिलापत म हो
बिनै भुजाण दियो अर ईशु न सुन्धी प
किला ऊँ जड़र आपणै सामैऊँ बी लेख
न हटा दिन्यो, १५अर राज करबाळी अर
अधिकार राखबाळी शक्तिया का हतियार
खोसर सुन्धी ऊँ बाको चोड़े-धाडै तमाशो
बणायो अर बानै आपकै गेल करर जीत
को जुलस काडयो।

१६-१७ई ताँई खाबो-पिबो, तिहवार,
पुन्युं अर आराम हाळो दिन क बारा
म बताबाळा नियम सदाई कोनी बण्या
रेवी अर अ रीती रिवाज छाया जंय्यां का
ही पण सचाई तो मसी म ही ह ई ताँई
ज कोई थार प आ बाता की बजै'ऊँ
बलेम लगावै जणा बिऊँ दुखी मना होवो।
१८जखो मिनख देख-दिखावा की नरमाई
बरतै अर ईश्वर नगरी दूता न पुजबा को
काम करै ह बिनै थारा ईनाम पाबा
म रोडो मना बणबा द्यो। अन्यांलको
मिनख सदाई बा दिव्य दर्शावा की फांप
मारतो रेह जखा बो देख्या हा अर बो
आपका अर मिनखा का विच्यारा म
झुष्टो ई गुमान म फुल्यो रेवै ह, १९अर
अन्यांलको मिनख मसी म कोनी बण्यो
रेह। मसी मण्डळी को सीर ह। मसी का

^a 2.11 इको मतबल पापा न छोड़र परमेश्वर का कह्या न मानर परमेश्वर का परिवार म सामिल होवो। ^b 2.12 बतिस्मो एक धार्मिक रित ह जिमै एक मिनख पापी म डुबकी लगार पालो पापी क उपर आवै ह। जो आ दिखावै ह बो आपका पाप भर्या जीवन न पापी म दफनार एक नया जिवन न ध्यार लियो ह।

बसऊँ ई सगळी काया रुपी मण्डळी
पळै अर जोड़ अर नसा ऊँ मिलर जय्यां
परमेश्वर चावै ह बय्यां ई बढ़ती जावै।

मसी क सागै मरबो अर जीबो

20थे तो मसी क सागै मरेड़ा हो अर
थानै जगत प राज करबाळी आत्मा क
कनै'ऊँ छुडायडो ह जणा पाछै थे आ
जगत का मिनखा की जय्यां क्याले जीओ
हो? थे जगत का अय्यांलका नियमा न
क्याले मानो हो? 21जय्यां, “ईनै हाथ ऊँ
नई पकड़णो, इकै कोनी अड़बो, इनै
कोनी खाणो” 22अ सगळी चिजा खत्म
होबाळी चिजा ही, अर अ मिनखा का
बणायड़ा नियम अर सीख ह। 23ईश्वर
नगरी दूता न पुजबो, आपकी काया न
दुख देबो, देख-दिखावा की नरमाई अ
मिनखा का बणायड़ा झुट्ठा नियम, ज्ञान
की बातां तो लागै पण काया की बासना
न रोकबा ताँई अ क्युंई फायदो कोनी
करै।

3 मसी मरेड़ा मऊँ ओज्युँ जीवायो गयो
ई बजै'ऊ थे आत्मा म जिवाया गया
हो। ई ताँई थे ईश्वर नगरी हाळी चिजा
न टोल्यो। जठे मसी परमेश्वर का दाहणै
हाथ कानी बिका सिंघासन प बिराजर्यो
ह। 2-4थे तो आत्मा म मरेड़ा हा पण
ईब थारो जीवन मसी क सागै परमेश्वर
म लुखेडो ह। अर जद बो परगट होसी
जणा थानै बी बिकै सागै बिकी महमा
म परगट कर्यो ज्यासी। थारा जीवना की
निम मसी ह। ई ताँई थे धरती हाळी
चिजा प नई पण ईश्वर नगरी हाळी चिजा
प हियो लागाओ।

नयो अर पुराणो जीवन

5ई ताँई थारै माईनै जो क्युं दुनियादारी
की ईच्छ्या गेल काम करै ह बानै मार
द्यो, जंय्यां मूण्डा काळा होबाळा
नजायज कुकर्म-बासना भर्या काम, बुरी
ईछ्यां अर लोभ-लालच जिखो परमेश्वर
की नजर्या म बूरो ह उर ताँई की मूर्ती
पूजा की जंय्यां ह। 6जखा आ कामा न
करी ही बापै परमेश्वर को परकोप पड़ै
ह। 7अर बो बी एक टेम हो जद थे बी
आ बाता क गेल चालता हा अर अय्यां
ई बुरी-बुरी बाता म जीर्या हा। 8पण ईब
थे आ सगळी चिजा क सागै, लाल-तातो
होबो, दाँत पिसबो, बैर बाँधबो, दुसरा
की बुराज करबो अर मुंडाऊँ गाळ्यां
बकबा न छोड़ द्यो। 9आपसी म झुंठ
मना बोलो क्युं'क थे थारा पुराणत्या
सभाव न जीमै बुरी बाण ही बिनै छोड़
दिन्यो। 10अर नएडा सभाव न ध्यार
लिन्यो ह। अर थे परमेश्वर का गुण
अर बिका सगळा ज्ञान म दिन-दिन
बढता जाबो। 11अर ईब कोई युनानी
अर यहुदी, सुन्नत हाळो अर बिनासुन्नत
हाळो, बिना लोतर का, जंगली, गुलाम
अर आजद म कोई अंतर कोनी ह पण
मसी सक्युं अर सगळा म ह।

12थे परमेश्वर का लाड़ला, पबितर
अर टाळेडा मिनख हो। ई ताँई तरस,
दया, नरमाई अर थ्यावस का गाबा पेर
ल्यो अर मन म बढा मना होबो। 13याद
राखो प्रबु थारा पांपा न माफ कर्यो ह,
ई ताँई एक दुसरा की सिकायत करबा
की बजाय बिनै सेल्यो अर एक दुसरा न
माफ करो। 14अर आ सगळा लखणा म

प्यार न बी सामिल करल्यो जखो सगळी
चिजा न आपसरी म कोनी टुटबाळा पट्टा
म बाँधै ह।

15परमेश्वर थानै एक सागै एक ही
काया म शांती'ऊ रेबा ताँई बुलायो ह,
जणा ईब थे मसी जखी शांति थानै दि
ह बिनै थारा हिया म राज करबा द्यो।
अर परमेश्वर को धनैवाद करता रह्यो।
16सगळी बुद्धी क सागै एक दुसरा न
सीखाओ अर चेताओ। अर थारा हिया'ऊ
परमेश्वर ताँई सगळा भजन अर गुण-
गाण गाता रह्यो अर धनैवाद देतार्यो।
अयाँ कर मसी का बचना न थारा हिया
म पुरो-पुरो बसबा द्यो। 17मेरो खेबा को
मतबल ओ ह की, थे जोक्युं'करो अर
बोलो बो प्रबु ईशु मसी क नाम ऊ होणो
चाए अर बिका नाम ऊ ई परमेश्वर पिता
न धनैवाद द्यो।

घर ताँई नया जीवन का नियम

18ओ प्रबु न मानबाळी लुगायो, थार
ताँई ओ चोखो ह की थे थारा मोटचारा
क बस म रह्यो। 19अर मोटचारो, थे
थारी लुगाया ऊ प्यार-प्रेम राखो, बाऊं
कल्डो बिवार मना करो। 20टाबरियो, थे
थारा माँ बापा का कह्या म चालो क्युं'क
प्रबु ईऊं ई राजी होवै ह। 21टाबर-टिकरा
हाळो, थे थारा टाबरा न दुखी मना करो
कदे अय्यां न होज्या क बाको मन मर
ज्यावै।

दास अर मलिक ताँई नियम

22गुलामो, थे मिनखा न राजी करबाळा
की जय्यां थारा मालिका क सामै काम
मना करो। पण सच्चा मन ऊं प्रबु को

मान करबा ताँई सगळी बाता म बाका
हुकमा न मानो। 23थे जो'क्युं'करो बिनै
मन लगार करो अर अय्यां जाणो क,
“ओ काम म्हे मिनखा ताँई कोनी करर्या
पण प्रबु ताँई करर्या हा”। 24याद राखो,
थारो असली मालिक मसी ह जीकी
थे सेवा करो हो अर प्रबु थार ताँई
जखो ईनाम धरर-राख्यो ह बो थानै
देसी। 25मेरो खेबा को मतबल ओ ह
की, परमेश्वर हरेक को बराबर न्याय
करसी बो कीकिई हिमायती कोनी ले।
अर हरेक पापी न बिका बुरा कामा गेल
ई फळ मिलसी।

4 मालिको, याद राखो थारै उपर बी
ईश्वर नगरी म एक मालिक ह, ई
ताँई थारा गुलामा'ऊं थारो बिवार सळीयो
अर बाजीब होणो चाए।

बिश्वासीया न पौलुस की राय

2ध्यान ऊं अरदास करबा म लाग्या
रह्यो अर परमेश्वर न धनैवाद देता
रेह्यो। 3अर सागै की सागै म्हाहै ताँई
बी अरदास करो क परमेश्वर म्हानै मसी
का भेदा को परचार करबा को मौको
देवै। क्युं'क ई ताँई तो म जेळ म हूं,
4अर अरदास करो क म आनै साफ-
साफ बोल सकूं जय्यां मनै बोलणो चाए।
5जखा मसी प बिश्वास कोनी करै बण
मिनखा क सागै थारो बिवार सलीका
को राखो अर हरेक मौका को चोखो
फायदो उठाओ। 6थारो बोल मिठो अर
मन न चोखो लागबाळो होणो चाए जीऊं
थे जाण ल्यो की कूण सा आदमी न
कय्यां को जबाब देणो चाए।

कागज की आखरी बातां

7-8म्हारो प्यारो भाईड़ो तुखिकुस जखो
एक बिश्वासी काम करबालो अर प्रबु म
म्हारो साथी-संगी दास ह, बो थानै मेरा
सगळा समचार दे देसी बिनै म थारै कनै
भेजु हूं जीऊँ म्हारा हालचाल थानै बेरो
पड़ज्या अर बो थारी हिम्मत बँधासी। 9प्यारो अर बिश्वास जोगो भाईड़ो जखो
थारमालो ई ह बि उनेसिमुस न बी बिकै
सागै भेजर्यो हूं, बे थानै उरै जखी बाता
वितरी ह बाकै बारा म बतासी। 10मेरै
सागै कैद खाना म बंद अरिस्तरखुस
कानीऊँ थानै ‘जय मसी की’ पुचै अर
बरनाबास को भाई मरकुस बी थानै ‘जय
मसी की कह्यो ह’^c (मरकुस क बारा
म थानै पेल्या ऊँ ई समचार लागया
हीं क जद मरकुस थारै कनै आवै
जणा बिकी चोखी आवभगत करज्यो)
11यसु जिनै यूसतुस बी बोलै ह, बिकी
बी थानै ‘जय मसी की’ पुचै। परमेश्वर
का राज ताँई अ तीन यहुदी बिश्वासी
ह जखो मेरै सागै काम करै ह अर अ
मेरो बोल्हो साथ दिया हीं। 12थारमालो
ई एक ओर ह जिको नाम इपफ्रास ह

अर ईशु मसी को दास ह बिकी बी थानै
‘जय मसी की’ पुचै। ओ सदाई थार ताँई
जी-ज्यान ऊँ अरदास करै ह जीऊँ थे
परमेश्वर की सगळी इछ्या म समझदारी
अर पुरा भरोसा क सागै खड़्या रेह
सको। 13थार ताँई अर लुदिकिया अर
हिरापुलिस का मिनखा ताँई बो बोल्ही
कड़ी मेनत करै ह ई बात की म खुद
गुवाई दे सकूँ हूं। 14आपणा प्यारा बैद
लुका अर देमास कानीऊँ थानै ‘जय मसी
की’ पुचै। 15लुदिकिया म रेहबाला भाई
बंदूआ न, नुमफास अर बिकै घरा भेळी
होबाळी मंडळी न म्हारी ‘जय मसी की’
पुचै। 16ओ कागज थारै बाच्या पाछै
लुदिकिया की मंडळी म बी बाच्यो
जावै अर जखो कागज लुदिकिया म
रेबाला मसी का बिस्वासी लेर आसी
बीनै थे बी बाच ज्यो। 17अर प्रबु की
सेवा ताँई जखा काम दियड़ा ही बानै
ढंग ऊँ करबा ताँई अर्खिपुस्स न खिज्यो।
18अर म पौलुस खुद का हाथा ऊँ थानै
‘जय मसी की’ मांडर्यो हूं। म साँकळा
म बँधर्यो हूं ई बात न थे याद राखीयो।
परमेश्वर कौ दया थारै सागै बणी रेह।
‘अय्यांई होज्यावै!

^c 4.10 जद पौलुस ई कागज न लिखर्यो हो जणा अरिस्तरखुस बठै बिकै सागै जेळ म हो, अर हो सकै
ह की बाकी जता की बी बो जय मसि खे खिंदायी बे जेळ म बिकै सागै कोनी हा।

तीतुस

तीतुसनै पौलुस की चिट्ठी

भूमिका:-

तीतुस की पोथी पौलुस क हाथा'ऊँ मांडेड़ी चार चिट्ठा म ऊँ एक चिट्ठी ह जरिखि पौलुस मंडली क नाम न मांडर एक आदमीनै मांडी ह। बाकी की तीन पोथ्या पेली तीमुथियुस, दूसरी तीमुथियुस अर फिलेमोन ह। बच्या तो पौलुस इ चिट्ठीनै तीतुस ताँई मांडी ह पण बो इनै इ हिसाब'ऊँ मांडी क आ सकै सामै उची उवाज म बाची जा सकै। आपां आ बात अंयां जाण सका हा क्युँक बो भेजेड़ा चेला क रूप आपका गुण अर बा बाता क बारा म बतावै ह, जानै सायद तीतुस पेली'ऊँ जाणतो हो। अनुमान ह क पौलुस आ चिट्ठी ईशु मसी क जलम क पाछै 63-65 साल क बिच म मांडी।

इ चिट्ठी म पौलुस क्रेते टापू की मंडळया की अगुवाई ताँई तीतुसनै हिदायता देवै ह। पौलुस आ चिट्ठीनै मांडबा के पिछै पौलुस को इरादो ओ हो क तीतुसनै मंडली ताँई बडकानै टाळ'र बानै ट्रेनिंग देर त्यार करबा की हिदायत दे। अयाकी हिदायता बो तिमुथुस न मांडेड़ी चिट्ठी म बी दे ह। इ चिट्ठी की खास बात “सची सीख” ह। (1:9, 2:1, 2:7, 8) तीतुस की चिट्ठी म मण्डळी क बारा म दियडा आदेश तीमुथियुस की चिट्ठी'ऊँ कम ही। बामै इ बात प जोर दियो गयो ह की मण्डळीनै समाळबाळा को जीवन आत्मिकरूप'ऊँ अर समाज क कानी'ऊँ चोखो होणो चाये।

रूप रेखा:-

1. पबितर अगुवा टाळबा अर बानै जिमेबारी सोपबा ताँई पौलुस की तीतुसनै हिदायत। (1:1-16)
2. मिनखानै पबितर जीवन जिबा की सीख देबा ताँई पौलुस की तीतुसनै हिदायत। (2:1-3:11)
3. आखरी भाग, आखरी म पौलुस को आपकी क्युँक मनस्या अर नमस्कार मांड'र चिट्ठी बंद करबो। (3:12-15)

नमस्कार

१ म ईशु मसी'ऊँ भेजेडो परमेश्वर को दास पौलुस आ चिट्ठी तितुस तनै मांडू हूँ।

म परमेश्वर का टाळेडा मिनखानै बिश्वास म बढाबा भेज्यो गयो हूँ। जि'ऊँ बे सचनै जाण'र पवित्र जिवन जिवै। २ओ सच बी जीवन की आस बँधावै ह जो कदैई खतम होबा को कोनी। जिको करार बिश्वास जोगो परमेश्वर जुगाद'ऊँ पेली इ कर दिन्यो हो। ३परमेश्वर का बचन सही टेम प परचार कर'र परगट कर्यो गयो। बोइ समचार मनै सोप्यो गयो हो, अर आपानै बचाबाला परमेश्वर का हुक्म'ऊँ म इको हेल्पो पाड हूँ।

४तितुस आपणै एकजिसी बिश्वास की बजै'ऊँ, तू सांच्याई मेरो बेटो ह।

पीता परमेश्वर अर आपानै बचाबाला मसी ईशु तेर प दया अर स्यांति राखै।

क्रेते म तीतुस को काम

५क्रेते टापू म, म तनै इ ताँई छोड़'र आयो हो क तू बठै की सगळी बचेड़ी बातानै सुधारै अर मेरी हिदायत गेल हर नगरी म बडकानै टाळ'र जिमेदारी सोपै। ६एक बडका म अ बातै होणि चाये क, बिमै कोई एब न हो, बिकै एक ही लूगाई हो, बिका टाबर बिश्वासी, सभ्य अर आज्ञा मानबाला हो। ७परमेश्वर का कामनै आपका हाथा म लेबाला एक मण्डळी का मुखिया ताँई ओ जरुरी ह क बिमै कोई एब न हो। बो घमण्ड करबालो न होवै, न तावलोई ताव खाबालो होवै, न दारुडो, न मारपीट

करबालो अर नई पीसा को लालची। ८पण बो आव-भगत करबालो, भलाई चाबालो, खुदनै बस म राखबालो, पवित्र, धर्मी अर कायदा म रेबालो हो। ९बो बिश्वास जोगा परमेश्वर का समचार म जजबुति क सागै ठिक बंयाई बिश्वास करै जय्याँ क बिनै सिखायो गयो ह। जिऊँ क बो ओरानै बि सची सीख'ऊँ हिम्मत बँधा सकै। अर जखा सामै होवै बा मिनखा को मुंडो बंद कर'र बानै मनवा सकै क बे गळत ही।

१०क्युँ'क अठै सिर उठाबाला, बकबास करबाला अर धोको देबाला बोला मिनख ही, खासकर बे जखा छुटकारा ताँई सूनत प जोर देवी ही। ११ओ जरुरी होगो ह क बाको मुंडो बंद कर्यो जाय। क्युँ'क बे पिसा कमाण क चकरामै आपकी सीख'ऊँ घर-घरनै सही सीख प बिश्वास कोनी करबा द्ये। १२क्रेते टापू को रेबालो बाकोई एक बडको खयो ह, “क्रेते का रेबाला सदाई झूठ बोलै ही, अ जंगली ज्यानवर, आळसी अर पेटू ही।” १३आकै बारा म इ आदमी की गुवाई साची ह, इ ताँई तू बानै दकाल'र समझा जिऊँ बे बिश्वास म मजबुत होवी। १४अर यहूदी मिनखा की मनघडी कहाण्या प अर बा मिनखा का ओडाया प ध्यान मना द्यो जखा सचाईनै कोनी मानै। १५शुद्ध मिनखा ताँई सक्युं शुद्ध ह, पण अशुद्ध अर अबिश्वास्यां ताँई क्युई शुद्ध कोनी, क्युँ'क बाका मन अर बाकी आत्मा दोन्युई अशुद्ध करी गई ह। १६बे खेवै ह, क म्हें परमेश्वर न जाणा हा, पण बाका कर्म इ जोगा कोनी। बे सुगला

अर बात न मानबाला अर चोखा काम करबा क जोगा कोनी।

सची सीख का सही नियम

2 तितुस तू बोई सिखा जो सही ह। २बुढा-बड़कानै हिदायत दे क बे सिदा-सादा, थ्यावस राखबाला, खुदनै बस म राखबाला लोगा म बुझहाला, प्यार-प्रेम अर बिश्वास म मजबुत अर बर्दाश करबाला हो ३अंय्याई बूढ़ी ठेरी लुगायानै बी सीखा क बे पवित्र मिनखा की जंय्यां बर्ताव करबाली हो। बे चुगली-चाला करबाली न हो अर नई बामै पिबा की लत हो। पण बे चोखी सीख देबाली हो। ४-५जिऊँ की बे जुवानड़्या न बाका मोटचार अर टाबरा-टिकरा'ऊँ प्यार करबा, खुदनै बस म राखबा, मोटचार क ख्या म चालबाली अर घर बाँधबाली चोखी लूगाई बणबा की सीख दे। जिऊँ कोई बी परमेश्वर'ऊँ आबाला संदेश क बारा म बुरा न बोलै।

६अंय्याई तू जुवान छोरानै समझधारि'ऊँ जिबा ताँई समझा। ७तू खुद बोई कर जो चोखो ह जिऊँ दूसरानै बेरो पड़े कि बानै कय्याँ को बताव करणो चाए। तू तेरी सीख म इमानदार अर खरो बण्यो रे। ८बोई बोल जिपै कोई आगली न उठा सकै, जिऊँ तेरा बेरी शर्मिन्दा होवी अर बाकै कनै आपानै बुरो बताबा की कोई बजै न होवै। ९दासानै सिखा क बे आपका मालिका की हर बातनै मान'र बानै राजी राखै। बे बानै ओटो जुबाब न देवै, १०बे मालिक क घर म चोरी-चकारी ना करी, पण पूरी तर्या चोखा अर बिश्वास जोगा बण्य रेवी जिऊँ आपानै बचाबाला

परमेश्वर क बारा म जो सिखायो गयो ह हर कोई बिको मान करै।

परमेश्वर की दया

११क्युँक परमेश्वर सगला मिनखा का छुटकारा ताँई दया दिखाई ह। १२आ दया सीखावै ह क आपां बि जीवन न जिमै परमेश्वर कोनी अर दुनिया दारी की बुरी इच्छानै छोड़र इ जुग म खुद क बस म रेबालो, खराई'ऊँ भर्यो जीवन जिवा जिमै परमेश्वर ह, १३अर अपा जखी धन्य आस करा हा बिकै पूरो होबानै उडिका हा, जद अपणो महान परमेश्वर अर बचाबालो ईशु मसी मेमा म परगट होसी। १४बो आपणा ताँई खुद की ज्यान दे दिन्यी। जिऊँ बो आपानै सगला पापा'ऊँ बचावै अर आपानै शुद्ध कर'र खुद ताँई अंय्यां का मिनख बणावै जिखा भला काम करबा ताँई उतावला रेवी।

१५तू अ सगली बाता अधिकार क सागै तेरा सुणबाला नै सिखा, जुर्त पड़े तो बाकै दकाल लगा अर जुर्त पड़े तो हिम्मत बँधा। कोईक सामैई तनै निचो न देखणो पड़े।

मसी चाल-चलण

3 तू मिनखानै याद दिवा क राज करबाला अर अधिकार्यो को खयो मानी। अर हर तर्या का भला काम करबा ताँई त्यार रेवी। २बा'ऊँ बोल क बे कोई क बारा म बुरो न बोलै, पण सगला क सागै चोखो बर्ताव कर'र मिलजुल'र स्यान्ति'ऊँ रेवै। ३क्युँक कोई टेम आपां बी बेबुद्धि का, खयो न मानबाला,

भटकेड़ा अर हर तर्या की मो-माया का
गुलाम हा। आपणो जीवन बुराई अर
बळोकड़ा पुणा'ऊँ भरेड़ो हो। अर आपां
एक दूसरा'ऊँ नफरत करता हा। ४पण
आपांने बचाबाळा परमेश्वर की दया
अर प्यार मिनख ताँई परगट कर्या गयो,
५अंयां इ ताँई कोनी होयो क आपां
धर्म का कर्म कर्या हा, पण आ बिकी
दया इ ह की बो आपांने पबितर आत्मा
क जरिये बचायो ह जखि आपांनै धोर
नयो जलम अर नयी जिन्दगी देवै ह।
६परमेश्वर आपानै छुड़ाबाळा ईशु मसी
क जरिये आपणा प भरपुर'ऊँ पबितर
आत्मानै उडेळयो ह। ७दया'ऊँ इ आपां
परमेश्वर क सामै सही ठेरा हा अर कदैई
न मिटबाळा जीवन का वारिस होवा
जिकी आपां आस राखा हा। ८आ साँची
बात ह। म चाऊँ हूँ क आ मामला म तू
खास जोर देर बोलै जिऊँ परमेश्वर प
बिश्वास करबाळा, भला काम करी, जो
सकै काम का अर चोखा ही। ९बेतूक
की जिरै, बडका की पिढचा की गिणति,
लड़ाई-झगड़ा'ऊँ अर विधि-विधान क
बारा म लड़बा'ऊँ बचो। क्युँक अ
बाता बेतुक अर बेमतबल की ह। १०फुट

गेरबाळा मिनखनै चिता अर ज बो एक
बर म न मानै जणा बिनै दूसरकै चिता
जद बो दूसरकै बि न मानै जणा बिऊँ
किनारो करले। ११तू ओ जाणले के अंयां
को मिनख श्रष्ट होगो ह, अर बिका पाप
बिनै गळत साबित करी ही।

आखरी हिदायता

१२जद म अरतिमास नहिस तुखिकुसनै
तैरै कनै भेजु। अर बाकै पुचताँई तू
तावळ करार मेरै कनै निकुपुलिस नगरी
म आज्याजे। क्युँक श्याळै-श्याळै म
बढैई रेबा की मनस्यां करी। १३तू बकील
जेनास अर अपुल्लोस क सागै बाका सफर
ताँई जुर्त की चिजा बाँध दिज्ये। बानै कोई
बात की कमी-घटी न होवै। १४आपणा
मिनखनै औरा की जुर्त पुरी करबा ताँई
चोखा कर्मा म टेम बिताणो चाये, बानै
फालतु को जीवन नई जिणो चाए।

१५मेरै सागाळा की ओर'ऊँ तनै
नमस्कार मांडू हूँ। बिश्वास म आपणा
सगळा भाईड़ानै म्हारी ओर'ऊँ नमस्कार
स्विज्ये।

परमेश्वर की दया था सगळा प बणि
रेवै।